




atb
P. XVII. 239



2864 Ex B II

Bibliotheca Capituli

Ritus graeco - catholici

Premisliensis.



En. No. 1484
Hic Atb

mat. 13 - W - 299.

PARADISVS PRECVM,
EX

R. P. F. LVDOVICI
GRANATENSIS SPIRI-
TVALIBVS OPVSCVLIS,
aliorumque sanctorum Patrum, & Illustri-
um cum veterum, tum recentium
Scriptorum concinnatus

PER MICHAELEM ab ISSELT
Amorfortium.

Inscript.
Inscript. Catalo
JESU



Regi. Societatis
Rigensis

Renij
Collegij
gesti
Dni 16

in Carolo
Regi
15 Dec
september

A. D.

COLONIAE,

Apud Geruinum Calenium, & haeredes
Ioannis Quentelij.

Anno M. D. LXXXIX.

Cum gratia & priuilegio Caesaris Maiestatis.

Conuentus Vini Renij Saluatoris CD

De S. Catharina Patrona Studiosor
Salus S. Catharina V. benedicta Regis aeterni
sponsa obsecro te ut quocumq; necessitatibus et
tribulationibus grauatis fuis, leuamen et auxilium
et semper in studiis meis per tua intercessionem apud
Deum accipiam. Item te precor o V. Sancta Catharina
ut pro me infirmo peccatore humiliter te maxime
orare digneris ut in ceteris meis tui clementis tui me-
ritis necessitatibus miseretur mihi Amen

Ad proprium Patronum cuius nomen est
O gloriosissime S. L. inter ceteros mihi dile-
ctissime te ab invicem statim mihi Patronum delegi
et quod in sacro baptismatis fonte a Deo mihi
datur et et dilecti parentes solliciti patres
quorum curam me Ecclesia Catholica commisit
te sibi asumpserunt, tu ut tuo auxilio in ceteris
facti melius mihi rationem habuerint, quam ut ego
amor distractionis attingens. pidi. Videri tui
testigis infirmum, ideoque me non tuo vocari
In te igitur oem spem et confidentiam apud
Deum patrocinandi colloco deprecor, ut vias
meas dirigas in viam virtutis, pacis, fide-
ritatis et salutis aeternae. Ut nunquam a vir-
tutum tramite ad vicia tua exemplar disce-
das: mihi quoque in periculis tam animae quam
corporis cura et custodia suscipi, in ceteris
suis ora, in terris me docere, regere et gubernare
in extremo mortis articulo succurrere et cum
Iesu Deo meo Maria mihi eius nomine Angelorum
et ceteris. Videri tui aeternae comiter
occurrere. Ego enim igitur et hanc partem paternam
gloriam habere melius in ceteris. Per eundem
Deum Deum nostrum

NOBILI, GENEROSO, LITTERIS
NON MINVS, QVAM
VIRTVTIBVS ORNATO
Iuueni, Hermāno à Valckenaer,
Domino in Haeck, & Duijcken-
burch : Domino & Patrono
suo Michael ab Isselt
S. D. P.



INTER omnia, quæ ab
initio sapientissimus il-
le, & potentissimus hu-
ius vniuersi Architectus
condidit, Nobilis & Ge-
nerose Domine, nihil post Angelos aut
dignius homine, aut excellentius crea-
tum esse, omnium & Christianorum, &
Ethnicorum est sententia. De huius
creaturæ dignitate dicturus B. Chry-
sostomus, inter cetera sic inquit: Homo
est chara possessio Dei ; homo cuius
causa firmatum est cælum, extensum
mare, fundata est terra super aquas :
propter quem Sol oritur & incumbit,

Ex varijs
in Matth.
locis ho-
mil. 27.

EPISTOLA

Luna crescit, astra micantia surgunt.
 Propter quem diuersa animalia qua-
 drupedia, volatilia, & natantia : pro-
 pter quem terra producit herbam, &
 dat cibaria in tempore suo omni anima.
 Propter quem montes & colles, valles
 & campi : propter quem fontes & flu-
 mina, stagna & paludes : propter quem
 tēpora & menses & anni ; propter quem
 Angeli & Archangeli, Principatus &
 Potestates, Throni & Dominationes,
 Cherubin & Seraphin. Et quid multa
 loquar ? propter quem vnigenitus filius
 Dei sanguinem suum fudit, & genus
 redemit humanum. Insignis profectò
 laus, & quæ post Angelos nulli potest
 attribui creatura. Minuit enim Domi-
 nus hominem paulò minùs ab Angelis,
 gloria & honore coronauit eum, &
 constituit eum super opera manuum
 suarum.

Psal. 8.

Ceterum cum homo tanto esset in
 honore, non intellexit propriam dignita-
 tem & excellentiam ; sed diuinitatem
 ambiens, cum Deus esse vellet, nec Dei

Genes. 3.

man-

mandato obtemperaret, comparatus est iumentis insipientibus, & similis factus est illis. O incredibilis hominis metamorphosis: sicine repente ex optimo pessimus factus es? ab vno extremo ad alterũ sine medijs motus esse non solet: at hĩc nulla inueniuntur media. Per peccatum enim vnus hominis aded totius humani generis massa corrupta est, vt nũc inter omnes creaturas, post Dæmonem, miserior homine nulla reperitur. Factus est enim homo natura fragilis, ingenio hebes, consilio improuidus, viribus imbecillis, affectibus præceps, curis anxius, cupiditatibus furēs. omnibus denique molestijs, casibus, iniurijs & morbis obnoxius. Quæ omnia Philosophi considerantes, vitã humanam vt grauissimũ tormentum exhorruerunt. Insignis ille Philosophus Anaxagoras, longioris vitæ tadio fatigatus, mortẽ sibi diuturna inedia consciscere voluit: & certẽ fecisset, nisi Pericles Atheniensis, vt si sibi viuere nollet, saltẽ viueret Pericli, rogasset. Sed & Silenus senex à

EPISTOLA

Mida Rege captus, rogatus ab eo, quid
 esset homini optimū, diu silentium te-
 nuit: Tandem ad actus dicere, ait; Opti-
 mum esse nunquam nasci, proximum
 quā ocyssimè aboleri. Quare Seneca
 mihi verissimè dixisse videtur; Nemo
 vitā acciperet, ait, si daretur scientibus.
 Siue enim animā inspiciamus hominis,
 siue corpus, vbique tantā imperfectio-
 num, tantamq; malorum copiam inue-
 nimus, vt Aristoteles hominem definire
 non dubitauerit, imbecillitatis exem-
 plum, temporis spoliū, fortuna lusum,
 inconstantia imaginē, inuidia & cala-
 mitatis trutinam: reliquum verò pitui-
 tam & bilem. Veram, imò verissimam
 esse hanc Aristotelis descriptionē, multis
 argumentis ex ipsis humana vitæ cir-
 cūstantijs probare possem: ceterū cum
 alij, vt Innocentius Pontifex tertius,
 Granatensis noster, & alij plures inter
 Christianos; Seneca verò inter Ethni-
 cos de miserijs hominū integros aut li-
 bros, aut tractatus scripserint, quos &
 te, Generose Domine, aliquando legis-

se, &

DEDICATORIA.

se, & adhuc sæpenumero legere non dubito, his recensendis supersedebo, ne dedicatoriae limites excedam.

Quòd si quis interrogauerit, cur amator hominum Deus tot arumnis eorum vitam voluerit exagitari; multas sanè consilij huius causas deprehendet: inter quas non postrema illa est, quòd hac ratione hominum insolentiam atque superbiam reprimere, & ad humilitatis studium voluit incitare. Sicut enim qui aues domi nutriūt, cū aliquando eas auolare contigerit, ubi eas iterum ceperint, pennis nudant, vel alas præscindunt, ne earum adminiculo fretæ iterum aufugiant: ita Dominus cū hominem conditum celestibus donis (quæ initio conditionis suæ multa & præclara acceperat) elatum vidisset, meritò illum donis suis spoliauit, & velut implumem reliquit: ne diuinorum beneficiorum pennis sese iterum in sublime attolleret.

Ne tamen miseriarū pondus prorsus hominem opprimeret, aut ad animi vel

EPISTOLA

delirium, vel desperationem adigeret, idē benignissimus Deus, qui minutissimis animalculis media contulit, quibus noxia sibi fugerent, & vtilia consequerentur, etiam hominibus remediū, quod tantas arumnas euadere queant, reliquit. Sed hīc magna inter Ethnicos & Christianos oritur controuersia. Philosophi namque rati naturam per se sufficientem esse ad bene, beateq; viuēdum, solam rationem constituerunt, qua sibi homo omnibus in rebus consuleret: mala omnia propulsare, bona omnia sibi posset comparare. Sed miserē hīc seculi huius sapientes desipuerunt. Ratio enim, praterquam quod per se infirma atque imbecillis est, frequenter etiam multum ex acumine & splendore amittit, quoties varijs affectibus & cupiditatibus, velut atris quibusdam nebulis, ita obscuratur, vt magis illis, quā veritati pareat. Vbi enim cupiditas in homine dominatur, ibi exultat ratio, & caligo mentis oculis offunditur. Hinc Philosophi ipsi saepe nisi sunt
ratio-

DEDICATORIA.

rationes excogitare, quibus id quod amica caro concupiscebat, licere sibi alijs persuadebant, puram & liquidam veritatem impugnantes.

Quàm infirmū in ratione præsidium ad cetera mala corporis depellenda positum sit, illud satis argumento est, quod nec potentissimi, nec opulentissimi, nec sapientissimi, nec eloquentissimi huius mundi, in quos opes suas natura effudisse videtur, miseras huius vitæ effugere potuerunt. Testes sunt Iulius Cæsar, Pompeius, Cræsus, Annibal, Alexander Magnus, Salomon, Achitophel, M. Tullius & alij infiniti, qui præter varias ruinas, casus & pericula in vitâ perpeffa, omnes ferè aut violenta, aut infelici morte perierunt.

Quis igitur aut fortuna, aut natura præsidijs ita munitus erit, vt suis viribus tutò fidere audeat, cū nec præstantissimis viris natura indolem, nec felicissimis fortunas suas, nec sapientissimis prudentiam suam tantum videat tribuisse, vt ab omni periculo &

EPISTOLA

casu immunes essent ?

2 Par. 20.

Psal. 49.

Aliud igitur in miserijs & calamitatibus huius seculi, præter rationē, remedium nobis quarendum est. Et quod aliud, præter illud, quod ab optimo Rege Iosaphat nobis demonstratur : qui in extremis angustijs constitutus, totū spiritum suum contulit ad rogandum Deum, & dixit; Cū ignoremus, Domine, quid facere debeamus, hoc solum habemus residui, ut oculos nostros dirigamus ad te? Quibus verbis malorum nostrorum remedium sanctus Rex monstravit; orationis scilicet vocem, qua Dei misericordiam imploramus. Oratio enim velut legatio quædam est, quæ à terris ad calum transmissa, cuncta mala nostra celesti medico denunciat, ut periclitantibus opem ferat : quandoquidem ipse eam piè petentibus pollicitus est, cū ait; Inuoca me in die tribulationis, eruam te, & honorificabis me. Precatio enim ad ea omnia, quibus humana eget natura, commune remedium est. Latissimè namque inter ce-

teras

DEDICATORIA.

teras virtutes eius utilitas patet. Cetera namque virtutes aut merendi, aut satisfaciendi vim potissimum habent; quorum illud ad gratiam & gloriam, hoc ad poenarum remissionem pertinet. Precatio autem non solum merendi & satisfaciendi, sed etiam impetrandi vim habet; quod illius proprium est. Impetrare autem non solum gratiam respicit; sed etiam quicquid diuina miseratio dare potest. Vt enim Deus in corporali hoc celo quasdam constituit causas particulares, Solem verò tanquam vniuersalem, vt qui illuminat, qui calefacit, qui anni tempora mutat, qui hominem & plantam generat: sic in spiritali celo, quod Ecclesia est, præter diuersa malorum remedia particularia, vnum instituit vniuersale, Orationem scilicet, commune atq; præcipuum nostrorum malorum medicamentum: ad quam, quasi ad sacram anchoram, quoties in calamitatibus constituti sumus, confugere debemus. Hinc sancti viri per orationem non modò

EPISTOLA

3 Reg. 3.

4 Reg. 20.

Exod. 17.

1 Reg. 1.

Tobiz 11.

4 Reg. 4.

gratiam & poenarum remissionem consecuti sunt, sed alius sapientiam, alius sospitatem, alius diuturniorem vitam, alius aduersus immanes hostes victoriam, alius orbitatis remedium, alius lumen oculorum amissum, alius mortuorum remissionem, alius miraculorum operationem, alius denique liberationem ab instantibus malis. Ecce virtute orationis, inquit, Augustinus, Hieremitas cōfortatur in carcere, Daniel inter leones exultat, tres pueri in fornace tripudiant: Iob in sterquilinio nudus triumphat; paradysum de cruce latro inuenit; Susanna inter senes defenditur; Stephanus de torrente lapidum in caelum suscipitur, & inter lapidantes pro Saulo exauditur.

Cum itaque, Nobilis & Generose Domine, tot calamitatibus hac vita nostra, siue corpus, siue animam, siue externa, quae circa nos sunt, intueamur, exposita sit, aduersus autē haec omnia vnicū habeamus remediū, orationē; videt N. V. quātō opere ea sit necessaria. Si animam

con-

DEDICATORIA.

conspiciamus, caro semper concupiscit
aduersus spiritū, & hinc perpetua vir-
tutum & vitiorum lucta: hanc augment
affectus inordinati, & perturbatissimū
appetituum regnum. Si corpus, tot affe-
ctiones, tot letales morbi sunt, vt his
omnium Medicorum libri pleni sint, &
crescentibus quotidie morbis ars ipsa
crescat. Si externa consideremus, quot
naufragia, quot bella, quot terramotus,
quot eluiones, quot edificiorum rui-
nae, quot venenorum genera, aliaq³ si-
milis mala, quae vita nostrae insidiatur,
(vt de minoribus taceam) in mundo re-
periuntur? quibus omnibus diuites non
minus quàm pauperes, nobiles non mi-
nus quàm ignobiles, principes nō minus
quàm subditi (cū omnes ex eadē Adā
massa procreentur) obnoxij sunt. Ad
hanc igitur cōmunem orationis ancho-
ram omnes confugiāt homines necesse
est, siue Rex, siue aliquis ex infima plebe
sit: imò quo quis in dignitate sublimior,
eo in oratione sit frequentior oportet:
pluribus enim occupatur negotijs, quo-

Psal. 118.

rum singula orationis auxilium requirunt, & pluribus periculis eius vita exponitur, quibus depellendis orationis praesidium est tutissimum. Non ignorauit hoc potentissimus Rex Dauid, qui inter tot regni negotia, tot aulae curas, tantum domesticorum strepitum, nunquam orationis studium intermisit, sed septies in die laudem dicebat Domino, & media nocte surgebat ad confitendum ei: imò semper (vt ipse fatetur) erat laus Dei in ore ipsius. Sed quid Dauidem refero? Clarissimum illum Ducem, Scipionem Africanum, legimus nunquam aliquod opus arduum moliri voluisse, quin prius à suo illo Ioue auxilium postularet, vt illi bene verteret: quae de causa multi illum Iouis filium crediderunt. Quod igitur tanti principes, quorum alter etiam ethnicus fuit, tot circumstrepentibus negotiis secularibus fecerunt, pudor est nos Christianos, minus occupatos facere aut nolle, aut detrectare: praesertim cum praeceptum Christi habeamus quod semper (id est, vt

Luc. 12.

DEDICATORIA.

Patres interpretantur, singulis diebus certis horis) orare debeamus: & quod corporibus sunt nerui, quod piscibus aqua, quod arborum radicibus humor, quod ciuitati murus, quod denique huic visibili mundo Sol est, idipsum anima sit oratio, vt Chrysostomus disertissimis verbis in suis de Oratione libellis ostendit.

Sunt qui offenduntur, vel ideo ab orandi studio abhorrent, quòd interdum orationes nostras non exaudit Deus. Ceterum si huius rei causas diligenter inspicerent, non hoc eos offenderet. Interdum enim differt sua dona Deus, vt crescant orantium affectus, & desideria, vt instantius, & maiori cum feruore orantes maiora & ampliora accipiant. Aliquando precatio nostra comites suos non habet, sine quibus infrugifera & inanis est. Bonae autem orationis comites sunt, mentis attentio, humilitas, fiducia, integritas vitae, & perseuerantia: ista si adsint, fieri non potest, quin oratio vel tandem exaudi-

atur,

EPISTOLA

Iacob. 4.

August. in
Psal. 58.

atur, modò audiri expediat. Sunt enim nonnulli, qui ea petunt, quæ non oportet, de quibus ait B. Iacobus: Petit is, & non accipitis, eò quòd malè petatis: vt in concupiscentijs insumatis. quod sit, cum ea petimus, quæ non ad salutem animæ, sed ad cupiditatum nostrarum fomenta magis pertinēt: vt sunt honores, diuitiæ, voluptates, & horum species, quæ celestis Pater clementer negat, ne nobis delinquendi materiā prabeat. Sic enim carnis parentes filijs nocitura petentibus piè negāt, quæ crudeliter concessissent. De his Augustinus sic ait; Deus bonus tibi est, si det quod vis. Quid si malè vis? nōne erit tibi magis non dando misericors? Aeger petit multa à medico: non dat medicus. Non exaudit ad voluntatem, vt exaudiat ad salutem. Ergo medicum tuum pone Deum; pete ab eo salutem, & salus tua ipse erit. Si itaque oratio nostra fuerit suis numeris omnibus absoluta; si comites suos habeat adiūctos, si de rebus fuerit nobis vtilibus, omnino exaudiatur necesse

DEDICATORIA.

cesse est. De Tito Imperatore, quem delicias populi Romani solent appellare, legimus, quod in omnibus desiderijs suis obstinatissime tenuit, ne quem sine spe dimitteret: de Galieno verò, quamvis peruersissimo, quod nihil vnquam petenti denegaret: quanto minus Deus, qui bonitate superat omnem creaturam, nobis aliquid petentibus denegabit, cum ipse dicat; Si vos cum malis sitis, nostis bona data dare filijs vestris: quanto magis Pater vester dabit spiritum bonum petentibus se? Adeamus igitur Luc. ii. cum fiducia ad thronum gratiae Dei, ut misericordiam consequamur. Heb. 4.

CETERVM cum multi in arte bene precandi minus exercitati sint, Christus caelestis Doctor primam nobis orandi formulam tradidit, breuem quidem, sed absolutissimam: ut quae à nullo Christiano, quantumvis rudi, deberet ignorari. Hanc alijs atque alijs interpretantibus, variae preces prodierunt, dum quisque pietatem suam nouis affectibus, nouoque loquendi genere pro-

nun-

EPISTOLA

nunciauit, peculiaribus precibus singulis rebus & personis accommodatis. Contulit non parum ad hoc studium amplificandum nostra etate Ludouicus Granatensis, Hispanus, ordinis Dominicani Monachus; qui diuinis suis, quos de rebus spiritualibus edidit, libellis sparsim multas inseruit orationes, prolixiores quidem, sed pijs affectionibus plenas. Quæ cum multis probarentur, varij à me typographi contenderunt, vt eas ex omnibus auctoris opusculis, pridem à me translatis, corraderem, atque libello quodam separato excudi curarem. Quod onus antequam suscipere volui, ante omnia de ordine in his precibus seruando seridè deliberaui, vt singula preces suis locis, quasi certis sedibus continerentur: quod à paucis Neotericis obseruatū vidi: cum tamen preces sine vllō ordine congestæ, lectorē facilè conturbent. Placuit ante omnes R. D. Simon Verrepæus, qui hac in re ceteris antecellere videtur, quod pulcherrimū ordinē secutus est. Hunc dum nobis imi-

tan-

DEDICATORIA.

tandū proponimus, nōnulla detrabere, addere quādā, & quādam capita primaria transponere coacti sumus. Inuenimus enim apud Granatēsem quasdam orationes, quæ peculiare caput exigebant : quoddā caput apud Verrepæum, cui nulla orationum Granatensis potuit accommodari. Sed & hanc difficultatem inuenimus, quod plurimis rebus necessarijs accommodatas preces Granatensis nobis non suppeditaret ; quare eas aut ex alijs probatissimis auctoribus eligere, aut ipsi nouas facere, suisq³ locis accommodare debuimus. id ubique diligenter cauentes, ne à D. Verrepæo positas repeteremus, aut vulgares precatationes, sed selectissimas quasque lectori traderemus.

PROPERABAT iam libellus hic ad finem, & patronum sibi aliquem postulabat, sub cuius auspicijs in lucem prodiret. Obtulit sese Nobilitas tua, Generose Domine, cum alias ob causas, tum maximè ob eximiam pietatem, quæ in vtraque familia tua, pa-

terna

EPISTOLA

terna ac materna, iam à multis seculis mirum in modum eluxit : quod plurima in templis ac locis sacris relictà patrum monumenta testantur. Id de VALCKENARIIS testabuntur Vlraiectensium ij, quorum adhuc recens est memoria earum rerum, quæ ante Iconoclastarum exitiosam cladem passim in templis extiterunt. Nam ut BOETBERGII apud Neomagenses summo semper in honore fuerunt ; sic apud Vlraiectenses illi ; & apud utramque gentem utriusque familia gratissima patrum adhuc extat memoria. Horum pietatem, eximiasq; virtutes tantum abest, ut tu obscures, quòd etiam ob singulares animi dotes, ingenijq; dexteritatem, indies magis magisque illustres ; & maximam maximarum rerum spem (si hæc atas ad senilem gravitatem, atque prudentiam peruenerit) Christiana Reipub. de te præbeas : ea enim in te iacta sunt fundamenta, quæ nobilem & absolutam nobis structuram

pro-

DEDICATORIA.

promittunt : eas diuitias opum largi-
tor Deus tibi contulit, illud dedit inge-
nium, eamq³ generis inter Gelros au-
ctoritatem, vt possis : illam etiam pie-
tatem ac bonitatem, vt velis quàm plu-
rimis, atque aded toti patriæ prodesse.
Tantum id caue, ne in tam sublimi po-
situs felicitatis fastigio, quæ ad virtu-
tes sectandas data sunt adiumenta, vi-
tiorum (quod in multis vidimus) fiant
instrumenta : ætas enim illa multis pe-
riculis est exposita, quæ occasionibus
sepe fiunt maiora ; & naus vento se-
cundo, si vehementius flauerit, faci-
lè subuertitur. Sed his malis medebi-
tur optima disciplina, quam generosa
Nobilitas tua vnà cum litteris ab opti-
mis præceptoribus traditam imbibit :
quæ si pietate condiatur, omnia pericu-
la fient leuiora : ea enim, Apostolo te-
ste, Vtilis est ad omnia. Per illam re-
ges regnant, & legum conditores iu-
sta decernunt. Per illam principes im-
perant, & potentes decernunt iustiti-
am. Cum ea sunt diuitiæ & gloria,
opes

1 Tim. 4.
Prouer. 3.

EPIST. DEDICAT.

opes superba & iustitia. Sine ea non
modò florentissimæ familiæ, sed inte-
gra regna non ratò pereunt, & euer-
tuntur. Magnum ad pietatem adfert
adiumentum oratio, quia pietas impe-
tratur, impetrata augetur, & aucta
quasi in naturam transit. Oratio igitur
ab ore tuo non recedat, sed illam
fac tibi familiarem, & in ea iuueni-
lem, sed generosam, mētem tuam quo-
tidie exercere ne pigeat. Cuius rei per-
ficiendæ ut N. T. maiorem habeat
commoditatem, has nostras Preces,
omnibus rebus accommodatas, sub tuo
nomine prodire volui : nec tu dedica-
tionem hanc aliter accipies, quàm a-
moris inter nos mutui pignus. Deus
Opt. Ter Maximus Nobilitatem Tu-
am nobis quam diutissimè seruet inco-
lumem. Nouiomagi Gelrorum, ipsis
Nonis Septembris, Anno post
Christum natum

1589.

AD LECTOREM,

De Collectoris consilio, & usu harum precationum.

Prodit iam tandem, candide Lector, Paradisus precum Ludouici Granatensis, à multis diu desideratus. Eum ad maiorem tuam vtilitatem in 18 capita primaria distinximus; vt semper sine vlla difficultate inuenias, quod orare velis. Hoc enim vnicè curauimus, vt orare volenti nulla, quæ in preces nostras venit, desit materia. Et quia Granatensis de omnibus his peculiare preces non habebat, multas ex alijs probatissimis auctoribus seligere debuimus. Auctorum nomina ad marginem adiecimus, ex quibus singulæ desumptæ sunt. Sed & si apud auctores illos etiam orationes materiæ congruentes non inueniramus, eas ipsi nouas fecimus, & sub nomine Collectoris posuimus. Hoc autem sæpe obseruabis, Lector, non semper integras, aut verbotenus orationes vel Granatensis, vel aliorum auctorum à nobis poni, sed subinde ijs aliquid vel detrahi, vel addi, aut in ijs aliquid mutari, prout tempori aut rei propositæ expedire videbatur. Quibusdam etiam capitibus præfationes, rectum istarum precum usum explicantes, præmisimus: &

subinde

AD LECTOREM.

subinde pias admonitiones inter ipsas preces inseruimus.

Porro omnium capitum vsus cuique facile manifestus erit: cum vnumquodque suis rebus, personis, aut temporibus sit accommodatum: exceptis meditationibus Orationis Dominicæ, capitibus etiam 4. 7. 9. 10. quorum singula in septem meditationes, orationes, aut gratiarum actiones distribuimus. Ne autem tædium eadem semper orandi tibi subrepat, ex omnibus his capitibus singulis diebus vnā orationem aut meditationem desumere potes. Hoc modo singulis septimanis semel orationem Dominicam, & totam Christi vitam percurres: semel Deo pro omnibus eius beneficijs gratias ages, & quotidie (vt oportet) pro nouitate vitæ, & amore Dei (in quo nostra consistit perfectio) Deum precaberis. Obseruandum etiam in capite secundo, nostram fuisse intentionem, vt istud sufficeret solenni Missæ, quæ canitur. Quod si prolixius sit pro priuata Missa, quædam orationes possunt omitti. Illustrauimus nunc Ludouicum Granatensem quantum potuimus: tu Lector eo nunc vttere, & pro laboribus meis id quaeso à te præmij fectam, vt pro me infelici peccatore Deum ores, meque precibus tuis illi commendes.

VALE.

PRAEFATIO IN ORATIONEM DOMINICAM.



VM quid petendum, aut Rom. 8.
quomodo orandum sit, ex
nobis ipsis nesciamus, Ser-
uator noster, pro sua bonita-
te, nobis formulam orandi
tradidit; quam si seruemus,

non est periculum, ne ab ipso audiamus; Ne Matt. 20.
scitis quid petatis. Brevis autem haec est
formula; sed absoluta, & mysterijs referta.
Cum enim omnibus velut regula exhibeatur,
oportebat esse breuem, vt capi & retineri
posset à pueris, à senibus, ab egrotis, à mulier-
culis, ob occupatis, à rudibus, ab obliuiosis, ab
ignauis. Nihilominus absoluta est; cum nihil
peti possit aut debeat à Deo, quod paucis istis
verbis non contineatur.

Petimus hic bona omnia tam spiritualia,
quàm corporalia: deprecamur etiam mala
omnia: illa quatuor petitionibus prioribus,
haec tribus posterioribus. Porro cum qui rogat
bona cum spe & fiducia, quod exoraturus sit,
rogare debeat, nec quod illam in nobis generat
omissum est. Nascitur enim fiducia ex consi-
deratione duarum rerum; quod is à quo ali-
quid expectamus & potest facere, & volet.
Voluntas in paternitate declaratur; poten-

tra in sede caelesti. Magnam igitur fiduciam concipiamus necesse est, cum dicimus; Pater noster, qui es in caelis. Singula itaque particulae, singula sunt expendenda verba, atque adeo literulae ipsae & apices. Referta sunt mysteriorum omnia, sicuti & ipse, & vita eius, omnesq; eius actiones qui dictavit.

Plurima sunt de explicatione orationis huius à sanctis viris, à magnis ingenijs per scripta, nec tamen varietatem & multitudinem sensuum poterunt exhaustire. Pulcherri-
mam, & p̃ys affectibus plenam explicatio-
nem in hanc orationē ante paucos annos scri-
psit Ludovicus Granatensis; quam ex suo
Memoriali vita Christiana, mutatis paucis,
additis & detractis quoque nonnullis, prout
nostro instituto convenire videbatur, desum-
ptam huic libello praefiximus; rati omnino
nullas in lucem preces prodire debere, quae non
ab hac salutari, & planè divina, utpote ab
ipsa Dei sapientia praescripta oratione felix
faustumq; sumerent auspiciū.



DEVOTISSIMA,
PIISQUE AFFECTI-
BUS PLENA ORATIONIS

Dominicæ expositio, in septem
Meditationes, seu oratio-
nes distributa.

MEDITATIO I.

Pater noster qui es in calis.

Ex libro
septimo
Memori-
alis Gra-
natenfis.
Pfal. 88.

Domine quis in nubibus equa-
bitur tibi, similis erit Deo in
filijs Dei? Confitentur nam-
que cæli mirabilia tua, & ter-
ra videns opera manuū tua-
rum obstupescit. Quia facis magna, &
incōprehensibilia, & mirabilia, quorum
non est numerus. Ea namq; facis opera,
quibus omnis humana laus est inferior,
quæ nullius hominis eloquētia potest e-
nūciare, nullius intellectus cōprehende-
re. Nec mirum: Etenim par erat, ut ope-
ra tua cum tua natura quandam habe-
rent proportionem. Cū igitur natura
tua sis omnipotens, immensus, incir-
cumscriptus, incomprehensibilis, infini-
tus; quid mirum, si illa facias opera, quæ
si quis curiosius scrutari velit, stet atto-
nitus, & à mentis suæ statu dimoveatur?

Iob 9.

Mirantur alij, ô Domine, quòd pugil-
lo aquas metiris; quòd cælos palma
ponderas; quòd tribus digitis molem
terræ appendis, librasque in pondere

Esa. 40.

Psal. 144.

montes, & colles in statera: Mirētur, in-
quā, alij opera creationis, quorū non est
apud homines aut numerus, aut ratio,
aut intellectus: ego misericordię tuę o-
pera contēplabor, & admirabor: miseri-
cordia nāque tua super omnia opera tua.

Galat. 4.

Horum operum primum & princi-
pale, est myſterium incarnationis vni-
geniti filij tui, quem ante constitutio-
nem mundi prædeſtinatum, cū tem-
poris plenitudo veniſſet, è ſummo cæ-
lo, atque adeò, è ſinu tuo in hoc mun-
di exilium demiſiſti, vt ex carne noſtra,
& oſſibus noſtris corpus ſibi formaret;
noſtram naturam aſſumeret, frater no-
ſter ſecundum humanitatem fieret, at-
que nos ſuos fratres, non quidem natu-
ra, ſed adoptione faceret. Myſterium igi-
tur incarnationis ſemper ego venera-
bor, ſemper prædicabo, ſemper adorabo:
per illud enim mihi beneficium colla-
tum eſt, quo magnificentius nec in cæ-
lo, nec in terra poſſet à te poſtulari: vt
ego ſcilicet filius tuus, & tu meus pater
eſſes. Huius rei fidē mihi fecit filius tu-
us Chriſtus Ieſus, Dominus noſter, qui
in vniuerſo euangelij ſui contextu te
patrem noſtrū appellauit. Quam ob cau-
ſam nec filius tuus confunditur fratres
nos appellare, dicens; Nunciabo nomen
tuum fratribus meiſ.

Matth. 6.

Ioan. 20.

Heb. 2.

Mirabatur Dauid bonitatem tuam,
qua in eum vtebaris, & dignitatem,
ad quam illum euexeras, ſtuporeque ple-

nus exclamabat; Quis ego sum Domine Deus, & quæ domus mea, quia adduxisti me huc vsque? exiguum tamen erat, quod ille mirabatur, si cum eo, quod mihi in hac adoptione donasti, conferatur. Regem illum vnus prouinciæ in mundo feceras, & filios eius heredes regni fore promiseras: me autem filium Regis Regum, & Domini Dominantium, cui cælum & terra parèt, effecisti, nec filium tantum, sed etiam heredem omnium regnorum tuorum instituisti.

Ceterum cum in hoc mundo multi sint tituli honorum potiùs, quàm rei, quorum nomini effectus non respondet, tuque Dominus tam excelsus sis & potens, ego tam vilis & infirmus, dubitare meritò possem, anne Patris illud & filij nomen, quibus te & nos dignatus es, honoris potiùs tituli sint, quàm rei, nisi filius tuus addidisset; Patrem nolite vobis vocare super terram: vnus est enim pater vester, qui in cælis est. significans tantam esse prouidentiam & curam tuam erga nos, tantum esse amorem, quo nos complecteris, tot & tanta beneficia, quibus nos oneras, vt si cum ijs conferatur, quidquid filiis à parentibus terrenis fieri potest, ipsi ne parentum quidem nomine digni sint. Quis enim pater filiis suis tot tantaque bona præparauit? quis filios suos ad tantos honores vnquam euexit? quis vnquam tantos thesauros, tot laboribus & dolo-

2 Reg. 7.

Matt. 23.

Psal. 26.

Esa. 63.

Esa. 49.

ribus filijs suis cumulauit, quantos tu nobis vnigeniti filij tui pretioso sanguine mercatus es? tu nos captiuos redemisti, & ad supremam cæli gloriam prædestinasti, ad quam morte vnigeniti tui nobis aditum patefecisti. Dicam igitur Domine cum Dauide; Pater meus & mater mea dereliquerunt me: Dominus autem assumpsit me. Non vocabo mihi patrem super terram, sed dicam cum Esaia; Tu Domine pater noster es, & Abraham nesciuit nos, & Israel non cognouit nos. Certus enim sum, quòd non derelinques me: tu enim dixisti; Nunquid obliuisci potest mulier infantem suum, vt non misereatur filio vteri sui? sed & si illa oblita fuerit, ego tamen non obliuiscar tui. Ecce in manibus meis descripsi te, & muri tui coram oculis meis semper.

Cum igitur tanta, tamque ineffabilis sit hæc tua misericordia Domine, non dubitauit filius tuus fiduciam in nobis duplicare, & licentiam dare, imò præcipere nobis, vt in posterum orantes dicamus ad te, *Pater noster, qui es in calis*. O Regale verbum, ô verbum dulce, verbum plenum deuotionis & consolationis inæstimabilis. Quis vnquam, ô Domine mi, ausus fuisset te Patrem compellare, nisi vnigenitus filius tuus, qui est in sinu tuo, hanc nobis licentiam, & hoc priuilegium dedisset? Quis enim es tu Deus meus, & quis sum ego, vt te patrem au-

Ioan. 1.

deam

deam nuncupare? Tu es qui es, & ego sum qui non sum: imò vniuersa hæc mundi machina in tuo conspectu quasi stilla situlæ, & quasi momentum statere est reputata.

Esa. 40.

Quid igitur magis admirandum, & quæ copiosior esse potest misericordia, quàm quòd tu Deus infinitæ Maiestatis, Rex Regum, Dominus Dominantium, Sanctus Sanctorum, Deus Deorum: tu Deus Angelorum gloria, & Sanctorum gaudium meus Pater esse voluisti, & me in filium tuum adoptare, qui nihil sum aliud, quàm immundum quoddam sterquilinium, vilis & contemptus vermiculus, creatura fœtore & horrore plena: O admirabilem pietatem, ô longitudinem, latitudinem, altitudinem & profunditatem diuinæ charitatis & bonitatis.

Pater noster. Ecquod mel vnquam inuentum est tam dulce, tam suauis nectar, tam odoriferum balsamum, quàm verbum hoc? Quid? ergone te Creator mi Patrem meum appellabo? Tantane in me erit fiducia, vt audeam te hoc nomine interpellare? O inæstimabile gaudium, ô dulcedo ineffabilis. Quid amplius facere potuisti tu Domine, & ego quid amplius optare? quid pretiosius desiderare potuissem, quàm te Deum meum habere Patrem? Euge quàm bene intellexit huius gratiæ magnitudinem Euangelista cum diceret; Videtis qualem chari-

1. Ioan. 3.

tatem nobis dedit Pater, vt filij Dei nominemur & simus. quasi diceret; non fuit tibi satis dedisse nobis nomen & titulum filij, nisi etiam dares nos esse vtros filios, & filiorum nobis dignitatem atque prerogatiuam donares, vt essemus certi, te Patrem nostrum esse: cum non inueniatur Pater sine filio, nec filius sine patre: ita vt nos deinceps tu Deus Pater habeas pro tuis filijs, & filius tuus pro suis fratribus, & Spiritus S. pro suis templis atque viujs sacriarijs. Quæ gloria magnificentior? quæ dignitas esse potest augustior?

Vetus est prouerbium, Dulcis odor lucri de re qualibet; & sanè, nō est quicquam in mundo gratius aut suauius utilitate: solet enim omne opus fieri tolerabile, cum præmium eius cogitatur, & spes præmij solatium est laboris. Sed omne lucrum, omnem utilitatem, omne præmium longè superat, Deum habere patrem, non tantum nomine, sed effectu etiam & re. Quid igitur in mundo dulcius? quid suauius? quid delectabilius hoc nomine Patris potest excogitari? Vox illa vulnerat cor, commouet interiora viscera, confortat spiritum, exhilarat animam, aperit clausos lachrymarum fontes.

Pater noster: O verbum compendiosum, ô verbum abbreviatum quod fecit Dominus super terram. Clamat Apostolus, se nihil scire, præter Christum, &

hunc

hunc crucifixum : nec male ; in eo namque mysterio comprehenduntur omnes scientiæ ad salutem necessariæ. Et ego Domine aliud nil scire cupio, quàm te Patrem meum ; discere nil aliud volo, quàm quæ sit vis gratissimæ illius vculæ, *Pater noster*. In hac sententia studere, in ea philosophari, in ea die ac nocte volo meditari. huius enim vnius vocis scientia ad omnia mihi sufficit. Vt enim homo propterea microcosmus, hoc est, mundus minor appellatur, quia in illo solo inuenitur, quidquid in vniuersa mundi machina spectatur à te creatum : sic & scientia horum verborum ferax ; & compendiosa dici potest, cum in ea breuiter comprehendatur, quidquid per vniuersum scripturæ corpus diffusum est. Tota namque scriptura commodè in duas partes diuidi potest, sub quarum vna petitiones, altera promissiones continentur : in hoc enim tota occupatur, vt petat ab homine reddi, quod Deo debetur, & facienti hoc, omne bonum vicissim pollicetur. Vna igitur parte scriptura docet quid tibi, Domine, debemus ; & altera, quid à te expectamus. Sed quæ promissio dari potest, quæ non comprehenditur sub nomine Patris ? & quæ obedientia, quæ sub voce filij non continetur ? Quæ igitur bona, quam sollicitudinem, curam, prouidentiam & gratiam non sperabo ab illo, qui verè pater meus est ?

Si enim Pater meus sis, omnino & naturæ & rationi conueniens est, vt me ames, mihi necessaria tribuas, me dirigas, me iuues, me defendas, me honores, mihi consulas, me doceas, me hæredem instituas, me (cùm opus erit) vt pater castiges. Quis enim filius quem pater non castigat? Viuere igitur sub talis patris tutela & prouidentia, conditio est suavis, seruitus libera, custodia secura, timor lætus, castigatio mollis, paupertas opulenta, possessio diues. Patris enim est omnes sollicitudines, curas & labores in se suscipere, & fructum eorum cum filio diuidere.

Porro si tu Pater Deus sis omnipotens, omniumque rerum creatarum Dominus, quid mihi deesse poterit, si talem patrem habeam? scio enim quòd filij partem habent in patris possessione. Quæ tribulatio, quæ angustia, quæ fames, quæ nuditas, quod periculum animum meum turbare poterit, si te Deum meum Patrem habeam? Si inimici me persequantur, tu me defendes; si bonis me temporalibus exuant, tu mihi vitæ reddes necessaria; si aliquo in dubio verfer, tu me docebis; si ambulauero in tenebris & in vmbra mortis, tu mihi dux eris; si contra me testimonium falsum dicatur, tu pro me respondebis; si insurgant aduersum me castra, non timebo, quia tu pater mecum es. Quæ itaque gloria maior? quis honos sublimior? quæ

miserericordia esse poterit vberior? Prima dignitas quæ in rerum natura inuenitur, est, esse filium Dei per naturam; secunda verò, eiusdem filium esse per gratiam. & quia impossibile erat alios præter vnum esse filium Dei naturalem, ad secundam nos dignitatem euexisti, faciens nos filios tuos per gratiam; cui beneficentiæ quid amplius addi posset ignoro.

Videmus igitur, ô benignissime Domine, promissiones tuas omnes simul iunctas in hac vna voce Patris reperiri: imò plura eadem significari, quàm vniuerso scripturæ contextu comprehenditur. Multò enim maius est, quòd tu Deus Pater noster esse dignatus es, quàm reliqua omnia, quæ absque hoc vno promittere nobis potuisti. Cum enim tu sis Pater noster, & nos tui filij, omnium bonorum tuorum fumus participes, omniumque diuitiarum tuarum simul cum vnigenito & naturali filio tuo sumus cohæredes.

Præterea vox illa Patris non tantum docet, quid mihi sperandum, sed etiam quid mihi faciendum est. Si tu enim Pater meus verè sis, ego vicissim ero verè tuus filius. & quid hinc sequitur, nisi me obstrictum esse ad opera filij faciendâ: nam si à te officium boni patris expectem, æquum est, vt ego vicissim boni filij officium faciam. Quid igitur mihi incumbit ô pie Pater? vt te tanquam pa-

trem diligam, tanquam patrem colam, tanquam patrem timeam, tanquam patri obediam : vt ad te tanquam ad benignissimum patrem in omni mea tribulatione recurram ; in te, vt in patre fidelissimo spem omnem meam collocem. Muneris adhæc mei est honorem tuum zelare, vbicunque & quodocunque poterò : eundem promouere, puro amore, puraque intentione tibi velut patri seruire, me totum in manus tuas, tanquam in manus optimi patris, commendare : omnes castigationes & correctiones tuas, quasi à charissimo patre missas patienter, & cum gaudio sustinere.

Denique omnes meas sollicitudines & curas in te, vt in charissimum patrem conijcere. Omnia hæc nomen filij à me requirit, & quoties te patrem appello, toties horum omnium me debitorem agnosco. Quidquid igitur præcipis, quidquid in vniuersa scriptura promittis, in vna voce Patris concluditur. Valeat igitur Plato, valeat Aristoteles, valeat omnis humana Philosophia, valeat denique infinita librorum multitudo, in hoc vno vocabulo Patris verbum habeo abbreviatum, & doctrinam compendiosam, in qua vna toto vitæ tempore studere & meditari est animus.

Noster.

Erunt autem hæc manifestiora, si secundum verbum primo iungamus, di-

centes,

centes, *Pater noster*. Non enim voluit v-nigenitus filius tuus, vt diceremus; *Pa-ter mi*; neque in tota hac oratione me-um aut tuum inuenitur, sed *noster*, no-strum, nobis, & nos. Voluit enim omni-bus hominibus dignitatis huius glori-am esse communem, vt omnes essemus per gratiam, quod ille est per naturam. Cum itaque dicimus *Pater noster*, disertis verbis fatemur omnes nos esse fratres, tanquam vnius, eiusdemque Patris fili-os: debemus igitur singulos vt fratres, & te, vt vniuersalem omnium patrem, diligere. In his itaq; duobus verbis mo-nemur amoris Dei & proximi, in quo duplici amore lex & Prophete consistūt. Quæ igitur doctrina posset esse sublimi-or, vtilior, vberior, & tamen compendi-osior, cum duobus vocabulis apertissi-mè doceat, quidquid scire ad salutem est necessarium?

Denique non tantum me docent hæc verba, quid scire, quid facere, quid spera-re debeo: sed viam mihi quoque ad pœ-nitentiam sternunt, portamque spei, peccatis meis mihi occlusam, aperiunt. Non enim desperabo, non despondebo animum, fiduciam & spem non abijci-am, etiam si grauissimè peccauero, si te Deum habeam Patrem, quem Aposto-lus tuus Patrem misericordiarum, & De-um totius consolationis appellauit: sed potius exemplum filij prodigi imita-bor, reuertar ad te Patrem meum eadem

2 Cor. i.

Lucæ 15.

eum verecundia, eodemque cum animi affectu, quo ille reuersus est, & dicam; Pater mi, peccaui in te, & in cælū ipsum. non sum iam dignus vocari filius tuus: fac me sicut vnum de mercenarijs tuis. Licet enim ego dignitatem filij amiserim, tu tamen, ô Domine, pietatem & beneuolentiam Patris non amisisti. Hęc ex intimo corde si dixerō, antequam orationem meam absolucro, spero quòd aderis, occurrēs mihi, cadensque super collum meum, me osculo pacis osculareris. Hęc de visceribus Patris mei mihi spes est, id omni studio aget, ne pereat filius suus: & si perierit, reuocabit illum; imò si opus fuerit, ad se trahet. Si auis pullum suum nido excidisse & periclitare viderit, non quiescit priusquam in nidum reduxerit: sed & si bestiam accedere conspiciat, circumuolat, rostro tuetur, alis defendit, donec pullum suum liberauerit: sic & tu Pater cælestis de salute mea sollicitus es; mederis meis infirmitatibus, sanas mea vulnera, & feras bestias, hoc est, cacodæmones persequeris, filiosque tuos ad nidum, & ad gremium tuum reducis: etsi offensus sis, iniuriarum tamen obliuisceris, nec quiescis, priusquam filij tui ad pœnitentiam reuertantur. Huc accedit, quòd non cessas eos iugiter admonere, ijs tanquam pius pater consulere, & si errauerint, in viam salutis reducere. Si quis lucem dici videre cupiat, non accendit lucernam,

vt quærat eam : ipsa enim lux quærenti se offert, & in oculos eius influit : sic quicumque vult oculos suos in cælum leuare, & te Patrem intueri, non est quòd externum lumen adferat : sed in lumine tuo te lumen videbit, nec deerit cuiquam petēti serena lux tua, quæ se communicat omnibus.

Psal. 35.

Qui es in cælis.

O cæli terræque Conditor, diffusa est gratia in labijs tuis ; ideo dulciora sunt eloquia tua super mel & fauum : nectare & ambrosia dulciora sunt verba, quæ præcedunt, nec minùs dulcia sunt, quæ immediatè sequuntur : copiosa sunt illa, & tamen succincta ; sed nec minùs copiosa sunt hæc, nec minùs succincta. Si enim tu Domine, qui Deus meus, pater meus, hæreditas mea es, in cælis habites, quid mihi cum terra ? si thesaurus meus sit in cælis, quid quæro super terram ? Si tu pater meus sis in cælis, ego filius tuus quid hîc in mundo sum, nisi hospes & peregrinus ? manentem ciuitatem in terris non habeo, sed quasi extorris solum vertens veram patriam meam quæro, ad patriam meam gemens aspiro.

Psal. 13.

Sicut peregrinus qui ad patriam festinat, nullis grauatur sarcinis, sed solum corpus secum fert : omnes eius curæ & sollicitudines de patria sunt, vbi domicilium & habitatio eius est : sic ego Domine qui peregrinus sum, cur non ex-

cuslis

cussis omnibus huius vitæ curis & solitudinibus, cor & omnes cogitationes meas ad te dirigo, quamdiu à te disiungor? cur non festinus ad te propero?

Qui es in cælis. Verbum hoc spem meam corroborat, & securiorem meam reddit absentiam. Etenim si tu Pater meus in cælis sis, ius in eisdem cælos habeo: pedem iam alterum in isto diuersorio iamdudum collocaui, cum tu in illo habites, & verus illius sis paterfamilias. Vbi habitabunt filij, nisi vbi Pater eorum habitat? vbi erunt membra, nisi vbi caput est? vbi congregabuntur aquilæ, nisi vbi corpus reperitur? An tu Pater vnquam denegabis ei domum, cui titulum filij & hæredis non denegasti?

Qui es in cælis. Verbum hoc magnificat animam meam, & super omnia quæ creata sunt extollit. Quæ namque maior animi satietas, quæ dignitas sublimior, quæ gloria possit optari magnificentior, quam habitare in terris, & Patrem habere in cælis, qui Rex est cæli & terræ, cuius beneficio nos etiam cælorum Reges constituimur? O vos omnes qui gloriam & honores ambitis, quid quæritis hæc in fumo qui subitò euanescit, & in puluere quem proijcit ventus à facie terræ? Cur contemnitis honorem qui vltro vobis offertur, vt sitis filij Regis cælestis, & gloriam huius seculi, quæ fugit insequentes, tam multo sudore quæritis? Aut igitur Christianos esse vos

ostendite, & diuinos honores vltro oblatos suscipite : aut si hos negligatis, & vanos huius seculi honores tantis cum difficultatibus quærere pergatis, profectò Christiani non estis. Lætamini in Domino & exultate iusti, & gloriamini omnes recti corde, quia preciosissimum pignus vobis in cælo repositum est, & cæli Deum Patrem habetis. Assumam, ô Domine mi, pennas vt aquila, derelinquam ima hæc, terrenarum opum sordes deseram, & in cælum ad te subuolabo : quî namque possem magni facere quæ sunt in terris, cum institutus sim hæres omnium eorum, quæ sunt in cælis ? quomodo potero me conuertere ad brutas & immundas huius mundi voluptates, terrenasque & momentaneas mundi diuitias, qui beneficio patris mei omnium cælestium opum atque regnorum possessor effectus sum ? Id profectò gloriæ meæ non leuem aspergeret maculam ; sed & turpius atque ignominiosum magis mihi esset, quàm si Regis alicuius filius equilia purgaret, aut strigilando victum mendicaret.

Sed miser adhuc sum, & in calamitatibus multis adhuc viuo. differtur hæc spes, & nondum apparet quid ero. an igitur inanis sit hæc mea gloriatio ? nequaquam. Si primogenitus Regis, licet possessionem regni nōdum adeptus est, propter ius tamen quod in regnum paternum habet, haud aliter quàm Rex

Psal. 32.

ipse

Apoc. 5. 7.
& 22.

ipse habeatur: ego qui simile ius ex adoptione & promissione Dei viui, non ad perituum & mundanum, sed ad æternum & cæleste regnum habeo, cur me diuitem & felicem non dicam? cur de Regis nomine non gloriabor? Etsi enim hæc spes differatur, tu tamen Deus verus es in promissionibus tuis; & fœdus tuum quod pepigisti nobiscum non facies irritum: sed absterges omnem lachrymam ab oculis nostris, & sedere nos tecum facies in throno tuo, regnabimusque tecum in secula seculorum. Amen.

MEDITATIO II.

Sanctificetur nomen tuum.

Psal. 15.

Igitur, ô benignissime Pater noster, cum omnia quæ sub cælo sunt, in vsum nostrum creaueris, nos autem in vsum (etsi bonorum nostrorum non egeas) tuum, vt scilicet tibi seruiamus, te laudemus, sic viuamus, vt nomen tuum vbique glorificetur; pulcherrimo quodam ordine quod summum est, id primò petendum esse, nos tuus docuit Filius: vt scilicet orantes dicamus; *Sanctificetur nomen tuum.* Etenim si iam in filium tuum adoptatus sim, quid mihi magis faciendum incumbit, quàm vt sancti nominis tui gloriam vbique & semper promoueam? victoriam regni tui optem? & obseruantiam tuæ voluntatis omnibus rebus anteponam? Acce-

pta namque filij noua dignitate, quid restat, nisi vt ad possessionem illius procedam, quæque filio conueniunt, ea cum amore & timore, quantum datur, exequar?

Quemadmodum enim homo nuper Rex, Antistes, aut alterius dignitatis Prælatu electione creatus, mox dignitatis illius possessionem capit, & ea quæ ad officium suum pertinere videntur incipit cogitare: sic ego, Domine, gratia nouæ huius dignitatis accepta, ad ipsius possessionem aspiro: quæ officij illius sunt meditor, paratus omnia facere, omniaque velle, quæ tanti Patris filium decent: hoc est, vt nomen tuum sanctificetur, & gloria regni tui in omnibus tribu, & lingua, & populo fiat manifesta; vt Maiestas tua ab vniuerso mundo adoretur & glorificetur. Dum enim, vt hæc fiant, quantum in me est, laboro atque desidero, quid aliud ago, quam quod propriæ studeo laudi atque vtilitati? Gloria namque patris est & gloria filij, vt quidam tuorum amicorum ait.

Prou.17.

Porro cum natura sic comparatum sit, vt bonus filius amet Patrem; amoris verò proprium sit, amante in rem amatam transformare, adeo vt qui amat, iam quasi sui oblitus non minus quærat, appetat, & concupiscat ea, quæ illius sunt, quem amat; quam quæ propria sunt: quid ego Domine totus in te per amorem transfusus aliud velle, aut desidera-

re pos-

re possem, aut debeam, quàm quod tu ipse vis & desideras? Et quid tu maiori cum desiderio quæris, quàm nominis tui gloriam? non enim est quidquam aut in cælo, aut in terra maiori dignum appetitu: æquum igitur, vt & ego ex totis viribus meis eandem gloriam tuam apud omnes prædicem, vbique magnificem, & totum per orbem vt celebris habeatur exoptem.

Scio mi Pater, scio te bonorum meorum non egere, nec meis tibi laudibus opus esse: nam si mortalium lingua taceat, omnes creaturæ vociferabuntur, gloriam tuam prædicabunt, & se mutuò ad laudem tui nominis exhortabuntur. Si namque Spiritus Angelicos intueamur, quid aliud agunt in cælis, quàm quòd sine requie, sine vlla intermissione te laudant, nomen tuum sanctificant, diuinoque te Treishagio concelebrant? Si vertamus nos ad admirabilem illam cælorum compositionem, motuum concordiam, & miracula quæ in ijs conspiciuntur, vtique Domine; Cæli enarrant gloriam tuam, & opera manuum tuarum annuntiat firmamentum. Si confideremus pugnantem inter sese elemètorum concordiam, fluxum & refluxum maris, fontium scaturigines, perpetuos fluminum decursus, tantam arborum diuersitatem, herbarum varietatem, tot animalium species, & tot naturæ miracula, quæ modum & numerum non ha-

bent,

bent, singula secundum propriam virtutem naturalem, prout tibi dare placuit, quid aliud prædicant, quid aliud toti mundo annunciant, quam nominis tui magnificentiam? omnia hæc quasi viua voce clamant te solum Deum verum, Deum viuum, Deum omnipotentem: te solum Deum sapientem, bonum & misericordem; te solum Deum iustum, terribilem & admirabilem; te denique solum dignum, qui sine intermissione lauderis, atque sanctificeris.

Inter omnes creaturas alias homo maximè obstrictus est ad sanctificandum nomen tuum, teque magnificandum. Cum enim ipse solus inter omnes creaturas visibiles à te acceperit aptitudines, facultatesque & perfectiones omnium rerum creatarum (vnde & microcosmus, hoc est, parvus mundus appellatur) illarum autem singulæ suo modo nomen tuum sanctificare teneantur; quid non debebit ille, qui omnia simul accepit, & in cuius gratiam atque usum omnia creata sunt, quæ in hoc visibili mundo conspiciuntur?

Ex toto igitur corde meo, ex totis viribus meis, o Pater oro, opto, atque desidero, vt nomen tuum per vniuersum mundum sanctificetur: vt non sit lingua, tribus, populus, sexus, ætas & conditio hominum, quæ non conuocet cœtum & conuentus faciat ad laudandum & glorificandum sanctum nomen tu-

um.

um. O Domine mi, non peto vt des mihi diuitias terræ, honores mundi, aut illecebras huius carnis; sed tantum oro, *Sanctificetur nomen tuum* in vniuerso terrarum orbe. Sit hæc prima, sit & ardentissima petitio mea; hæc principalis sit mea cogitatio, hic æstus, denique sit & impetus meorum desideriorum. Amor enim in te omnium amorum oportet vt sit fortissimus. Cumque hanc gloriam & honorem tuum optem in hoc seculo, da ne in meum commodum, sed in tuam optem gloriam; vtque beatos iudicem omnes regni tui ciues & incolas: ipsi enim te laudant, te glorificant, tibi benedicunt per omnia secula seculorum. Amen.

MEDITATIO III.

Adueniat regnum tuum.

Vides, ô Pater, vides multos Tyrannos & Dominos inter nos regnare, nobisque dominari: Hic Diabolus premit cum sua superbia, illic mundus cum sua pompa infestat: caro cum suis blanditijs & delitijs nos sollicitat, propria voluntas cum suis appetitibus nos oppugnat. Omnes isti crudelissimi Tyranni suam in nobis tyrannidem exercent, tuo regno vim inferre, & iurisdictionem tuam ybique minuere conantur; id vnice laborantes, vt sua voluntas in nobis fiat, non tua: vt secundum leges & præscripta regni sui, non tui viuamus.

Exur-

Exurge igitur ô cælestis Rex, & hanc ataxian corrige : inuersum hunc ordinem conuerte, & ne patiaris, vt crudelis hæc tyrannis in tuo regno præualeat, aut nobis dominetur. Eijciantur isti Tyranni, dissipentur inimici tui, & à tua præsentia fugiant omnes, qui te oderunt. Impera tu nobis Domine, tu rege nos, sceptrum tuum & regnum tuum inter nos tantum agnoscatur. Voluntas tua sit nostra lux, & verbum tuum lumen pedum nostrorum ; præceptum tuum nostra sit exultatio, iustificationes tuæ nostræ sint diuitiæ, atque asperrima quæque pro nomine tuo pati nostra sit gloria.

Rege nos Domine tua prouidentia, defende nos tua dextera, duc nos tuo Spiritu, doce nos tuo verbo : tuis nos legibus moderare, tuis nos beneficijs dita, misericordi nos manu tua castiga. Fac Domine mi, ne posthac caro, mundus, diabolus, aut propria voluntas vllum in nobis locum inueniat. Longè fac Principem mundi huius à nobis : tu solus in nobis dominare, tu solus nobis impera, tu solus habita in anima nostra, & regnum tuum totum cor nostrum occupet. Tu solus esto lumen intellectus nostri, tu refectio voluntatis nostræ : te solum quærat, te solum petat, te solum desideret anima nostra. Et quid plura commemora ? cur singula percurro ? *Adueniat regnum tuum, & sufficit nobis.*

Da mihi, ô Pater, tuam gratiam, ne in posterum aliquid cogitem, quæram, desiderem, præter regnum tuum. id solum mihi sufficiat, id nocte dieque sollicitè quæram, in eo sit omnis mea conuersatio. Tu Pater solus bonus es, tu solus pulcher, tu solus amabilis, tu solus animarum nostrarum sponsus es: ideoque tu solus regna, tu solus impera, tu solus dominare, tu solus voluntatem meam dirige, tu solus Rex meus esto, & ego fidelis tuus subditus. Pectus meum in te solo recreetur, cor meum in te solo quiescat, anima mea te solo repleatur: Concede Pater, vt ad te solum curram, qui es vltimus finis meus, centrum & regnum meum, in quo animæ puræ & sanctæ sine fine suauiter requiescunt.

Adueniat regnum tuum, quod finis est & complementum nostræ spei, communisque omnium nostrorum desideriorum portus: in quo videbimus te Regem & Patrem nostrum in tua pulchritudine, in quo conspectu tuo sine termino fruemur. Ecquod enim magis proprium, magisque naturale potest esse filiorum desiderium, quàm velle videre patrem suum in regno & Maiestate sua? Mi Deus, quando veniet ille dies? & hora illa, quando tandem aderit? quando lucem tuam videbo? quando veniam & apparebo ante conspectum tuum? Aureum illud palatium quando videbo? quando, inquam, videbo hortos tuos

æternis floribus confitos? fontes salientes in vitam æternam? portas & muros ex gemmis lapidibusque pretiosis extructos? choros illos Angelorum & Virginum quæ sequuntur Agnum immaculatum quocunque ierit? Cantores, phœnascos & psalterias quæ perpetuis carminibus & hymnis celebrant, laudantque summum Regem atque communem omnium Patrem, quando præsens audiam?

O Hierusalem mater nostra, quando ab hoc exilio reuersus in te totus recipiar? quando erit illa dies, in qua ad tua limina vocabor? quando videbo muros tuos & iaspide & hyacintho elaboratos? quando audiam voces & concentus canentium & laudantium te in te?

Quàm dilecta tabernacula tua Domine virtutum, concupiscit & deficit anima mea in atria Domini. Quemadmodum desiderat ceruus ad fontes aquarum, ita desiderat anima mea ad te Deus. Hoc naturale filiorum est desiderium, & proprietas aquarum salientium in vitam æternam, eleuantium corda hominum è terris in cælum: Hæc est aqua illa, de qua singularis amator tuus, ô Pater, B. Ignatius, cum ad martyrium duceretur, ait; Amor meus crucifixus est, nec in me ignis est, qui quippiam amet: sed aqua viua, quæ exilit in me, mihi que intrinsecus ait; Veni ad Patrem.

Hic est ille communis Pater omni-

Psal. 33.

Psal. 41.

Ignat. Epist. 12. ad Roman.

um, quem desideramus, & ad quem aspi-
ramus in hoc exilio, clamantes, & di-
centes, *Adueniat regnum tuum.* quem co-
gnoscere est vita æterna, quem videre est
ipsa beatitudo, quam vt nobis pro tua
ineffabili misericordia largiri digneris,
ô Pater, supplices precamur omnes, per
filium tuum super omnia benedictum,
Iesum Christum, Dominum nostrum.
Amen.

MEDITATIO IIII.
*Fiat voluntas tua, sicut in calo
& in terra.*

Rom. 8.
Psal. 113.

Voluntati tuæ quis resistet, ô Pater?
Omnia enim fecisti quæ voluisti,
& tamen in nobis voluntatem depre-
hendimus tam peruersam, vt tuæ vo-
luntati sæpe reluctetur. Sol, Luna, &
stellæ; mare & omnia elementa, quic-
quid creatum est, tuæ paret voluntati:
soli nos homines rationis participes nō
obtemperamus. *Fiat igitur ô Domine,*
voluntas tua in terra in nobis, inquam,
qui nihil nisi cinis & terra sumus, *sicut*
ea fit in calo, & Spiritibus illis cælesti-
bus, qui ad nutum tuum dicto sunt au-
dientes. Et quæ voluntas tua est ô Pa-
ter?

Cypria. in
Orat. Do-
minic.
Quæ sit
voluntas
Dei.

Hæc est voluntas Patris, inquit glo-
riosus ille tuus martyr, quam Christus
Unigenitus filius tuus & docuit & fe-
cit: Humilitas in conuersatione, stabili-

tas in fide, verecundia in verbis, in factis iustitia, in operibus misericordia, in moribus disciplina; iniuriā facere non nosse, & factam tolerare posse; cum fratribus pacem tenere, Deum toto corde diligere, amare in illo quod Pater est, timere in illo quod Deus est; Christo nihil præponere, quia nec nobis ille quicquam præposuit; charitati eius inseparabiliter adhærere, cruci eius fortiter & viriliter assistere: quando de eius nomine & honore certamen est, exhibere in sermone constantiam, qua confitemur; in quæstione fiduciam, qua congregamur; in morte patientiam, qua coronamur.

Vnam in te agnoscimus voluntatem tantum, sed duos habet illa respectus: aut enim refertur ad illa, quæ tu ab æterno infallibiliter fieri disposuisti; aut ad illa, quæ monuisti, præcepisti, consuluisti & prohibuisti. illam beneplaciti, hanc signi appellamus: illi resistere potest nemo, in hac libertatem arbitrij reliquisti. Hinc est quod voluntas tua sæpe in nobis non fit, & tu de nobis conquerris, dicens; Quoties volui, & nolulistis?

Hoc igitur, ô Domine, peto, hoc desidero, hoc solum quæro; vt in me, & per me, vtraque tua voluntas fiat: illa, vt nihil mihi displiceat eorum quæ ab æterno mecum facere decreuisti, siue læta sint, siue tristia: hæc, vt ego nil faciam tuis præceptis & monitis contrarium

Duplex
voluntas
Dei.

Matth. 23.

sed quæ tibi placent, in ea vbique incumbam, licet voluntati meæ sæpe contraria. Non enim cupio, vt posthac aliquid fiat secundum optionem vel appetitum meum, neque ea quæ mihi iucunda sunt & grata volo quærere. Nolo, inquam, agere quod suadet affectus erga cognatos & amicos, nolo aures præbere mundo, non quid caro & sanguis hortetur audiam. Da vt non discutiā posthac quid honorabile, quid ignominiosum, quid facile, quid difficile, quid dulce est, quid amarū: sed in eo solo omnis mea sit voluntas, tuam voluntatem vt faciam. Illud opus me tantum lætificet, illud solum suaue sit mihi, in eo solo sit omnis animæ meę consolatio. In omni cogitatione, verbo & opere non alius mihi præfixus sit scopus nisi tua voluntas. Da me solum id velle & posse facere, quod tuæ conueniens est Maiestati.

Verè Domine, si etiam in minutissimas partes totus essem discerpendus, id quæ pro gloria & amore, qui tibi debetur, id mihi iucundius esse deberet, quàm si cunctis mundi fruerer voluptatibus: nisi fortè voluptates illæ in maiorem tui nominis gloriam redundarent. Non enim voluptates propter voluptates, sed propter obsequium & cultum tuum, si ita volueris, appetam. quoniam non vt mea, sed vt tua voluntas fiat petere me præcepisti. Nihil mihi sit dulcius, nihil amabilius, nihil iucundius, quàm

vt totus amore tui liquefiam. Hæc mihi sit summa delectatio, aliquid durum & asperum pro honore tuo tolerare. Illud enim est gaudium Angelorum, desiderium Sanctorum, exultatio iustorum; tibi scilicet perfectè seruire, tuæ voluntati in omnibus cōformes fieri, & quid agunt ad tuum semper honorem dirigere.

Scio Domine mi, scio Angelos & Sanctorum animas in cælis magis ob gloriam & magnificentiam nominis tui, quàm ob propriam exultare; magis ob excellentiam honoris tui, quàm ob suam tripudiare: & sic voluntatem eorum tuæ voluntati commixtam esse, vt in omnibus, & per omnia tuæ voluntati satisfiat. Vt igitur in cælo, Pater, sic & in terra voluntas tua fiat: eam cum maximo cordis seruire & iubilo sequamur per gloriam, & ignobilitatem, per infamiam & bonam famam, per aduersa & prospera, aliorum omnium voluntates, blanditias, minas, & promissiones contemnentes. Etsi enim voluntas nostra mala sit & peruersa, tamen vt virgultum minus frugiferum & arbor fertilis cum conferuntur, vna arbor fructuosa fieri consuevit: sic & nos, si voluntatem nostram sterilem & longè à tua diuersam tuæ frugiferæ inseramus, vna fiet voluntas, eaque bona, & bonorum operum ferax. Ad insitionem autem hanc, ô Pater, tui Spiritus gratia requiritur: contraria

Hier.3.

namque contrarijs misceri, non nisi vi quadam supernaturali accedēte possunt. Da mihi ergo Pater Spiritum sanctum tuum, qui doceat me facere voluntatem tuam, qui det legem tuam in visceribus meis, & scribat eam in corde meo; qui cæcam voluntatem meam dirigat, intellectum eius ducem illuminet, cor durum emolliat, appetituum ardores cælesti rore aspergat, & naturam infirmam fanet atque corroboret, ne post hac difficile mihi sit aut arduum abnegare me ipsum, tollere crucem meam, & sequi te. Tu enim solus es noster Deus, tu solus noster Pater, tu solus Rex Regum, & Dominus Dominantium: tibi debetur omnis obedientia, reuerentia, honos & gloria in secula seculorum. Amen.

MEDITATIO V.

*Panem nostrum quotidianum da
nobis hodie.*

QVis vel mediocriter à te doctus, Pater, quis styli tui non ignarus te non facillimè videt huius tam concinnæ atque perfectæ orationis magistrum & doctorem esse? Vt enim cetera præteream, solus petitionum pulcherrimus ordo id manifestissimum facit. Quid enim feruentiori cum desiderio filij possent optare, quàm ante omnia honorem & nomen bonum patris? deinde prosperitatem eius regni vel possessionis? ter-

tio loco paternæ voluntatis obseruantiam? Porro quid magis propriū & quid vſitatius est filiis adhuc paruulis, quam à patre panem petere? Verbum hoc toties ab illis repetitur, quoties esuriunt: tum enim obsecrant eum voce lachrymabili, tunc ploratu & fletu paterna viscera mouent, vt panem ipsis distribuat.

Igitur, ô Pater cœlestis, ego filius tuus ætate quidem prouectior, sed meritis adhuc paruulus, famelicus, & multis necessitatibus circumuentus, ea cum libertate atque fiducia, qua pueri solent à suis parentibus, à te panem, hoc est, ad vitæ huius sustentationem quæ necessaria sunt, flagito.

Ceterum quia in me duas substantias deprehendo, corporalem vnā, alteram spiritualem, panem peto pro vtraque: pro corporali terrenum, pro spirituali cœlestem: panem, inquam, Angelorum, qui tanquam creaturæ spirituales, non alio viuunt nutrimento, quàm teipso; qui cibus es spiritualiū substantiarum. Quare & ego, ô Pater cœlestis, qui hætenus sedi in AEgypto, inter putridas carniū ollas, in medijs mundi voluptatibus, omne iam despiciens pabulum bestiarum, ad te suspiro; à te panem Angelorum, qui de cælo venit, supplex peto. Hunc quæro, hunc volo, ad illum totus famelicus anhelō. O amor inæstimabilis, ô misericordia inaudita: Deus Deorum, Dominus Dominātium,

præmium Sanctorum, gaudium Angelorum, Verbum Patris, Sapientia æterna, lux mundi, Sol cæli, & conditor vniuersorum factus est cibus viatorum; factus est cibus hominum. Quid amplius optare, quid magnificentius possemus desiderare?

Cant. 5.

Genes. 4.

Genes. 48.

Zach. 9.

Valete igitur porcorum siliquæ, valete mundi voluptates, cibus non hominum, sed bestiarum; aliud mihi reflatum est promptuarium: introduxit me Rex in cellaria sua: Verus Melchisedech protulit mihi panem & vinum, panem Asar præbens delicias Regibus, & vinum germinans virgines: cibum pretiosum, delectabilem, & salutiferum: quem etsi non semper audeam sumere sacramentaliter, spiritualiter tamen sumere semper debeo. Cum itaque, ô bone Iesu, tu mihi datus sis in edulium, nauscat anima mea cum delicias mundi cogitat: te namque solum manducare cupio, nullius rei præter te me appetitus incessat. Si namque solus odor tuus mundum vniuersum refocillet, quid nō faciet gustus? quid non refectio qua te comedentes exhilaras? Sed, ô Domine, quâ fit vt manducantiū te corda non liquefiant à tua præsentia? quâ fit, vt quoties ad te accedo anima mea nimio amore tui in te tota non transferatur? à te absorbeatur adeo, vt omnium rerum, imo mei ipsius obliuiscat? Si res terrenæ, quid res ipsas dico? si earum imagines & figuræ tan-

tum

tum adeo nonnunquam cor meum ad se rapiant, vt planè me tui faciant immemorem : cur non eandem in me vim habet realis tua præsentia, vt quoties ad eam accedo, sic alteretur cor meum, & amore tui incalescat, vt mundi, & quæ in eo sunt obliuiscar?

Da igitur nobis hodie, ô cælestis Pater, panem istum, vt comedamus eum nunc sub speciebus velatum, & in futuro seculo nudum omni detracta specie & ænigmate. Memêto Pater, Filium tuum Vnigenitum panem hunc vocare quotidianum, & præcepisse, vt hodie peteremus. Dic mihi, ô bone Iesu, ô cohæres & frater noster, cur tam anxie & sollicitè voluisti nobis adesse, vt præceperis nos hodie te petere, & non vsque in crastinum expectare. Quid boni in nobis reperisti, quæ causa amoris tam flagrantis, vt vnum diem non velis expectare? Si amor ille quo nos complecteris sic urgeat, vt hanc morulam non feras, & aduentum nostrum ne tantillo temporis differri velis, sed confestim, & iugiter nobiscum esse cupias, cùm tibi nullum in eo positum sit commodum; quantò magis sollicitos oportet esse nos, qui miserrimi sumus vermiculi, qui sine te nec esse, nec spirare possumus, vt tibi iungamur semper, tibi adhæreamus iugiter, ad te veniamus quolibet momento, vt qui summum bonum es, speculum sine macula, & gaudium Angelorum?

Sed optimè inter nos, ô bone Iesu, conuenit: Tu conuentum hunc differri non vis, & nos prorogare non cupimus: tu vis, vt panem hunc petamus hodie, & non eras: ecce venimus, ecce hodie petimus, hodie nos gratiam illam accepturos confidimus. Nam si hodie petamus, & non obtinuerimus, inutilis esset tua doctrina, nec sibi cōstaret. Cùm igitur nos hodie te possidere cupiamus, & tu ad nos hodie venire petas, veni, ô Domine, & in animas nostras illabere.

Da ô cælestis Pater, vt sicut tu totus inflammatus es amore nostrî, sic nos vicissim amore tui ardeamus, & idē pondus quod te deprimit ad nos, vicissim nos eleuet ad te. Concede vt sublati omnibus impedimentis te anima mea tam tenerè diligat, vt in amplexibus tuis deficiat, & nimia dulcedine tua inescata, quasi deliquium patiatur: Et quia vis vt te petamus quotidie, da nos semper tecum esse, nec patere, vt à te, qui cibus es delicatissimus, & animarum nostrarum Sponsus amantissimus, vnquam diuellamur. Amen.

MEDITATIO VI.

Et dimitte nobis debita nostra, sicut & nos dimittimus debitoribus nostris.

O Bone Iesu, tu licet benignè me admodum & liberaliter cumque magna instantia ad mensam tuam inuites,
panem

panemque illum quotidianum offeras, vereor tamen ad te accedere. Timeo venire ad conuiuium Hester, ne mihi accidat, quod Aman euenit, qui inuitatus ab illa, paulò post suspendio necatus est, delicto id eius exigente. Scio, Domine, hanc non esse tuam intentionem, conscientia tamen me reprehendit, facitque ut malam in me dispositionem metuam: idque propter multitudinem peccatorum meorum, quæ super numerum arenæ maris multiplicata sunt. Quis enim vnquam subducere poterit calculum vanarum mearum cogitationum? mala opera mea & otiosa verba mea quis numerabit? Vix enim iusti suam, ut decet, linguam norunt refrenare: sed nec criminum transgressionis & omissionis ullus est numerus. Quid igitur faciam, Domine, positus in hoc certamine? Tu quidem ad mensam tuam me inuitas, & fames suadet, imò vrget ut accedam, sed sentio tantam meorum peccatorum multitudinem, ut me retrahant, animumque despondere faciant. Quia verò mihi licentiam tribuisti, te patrem ut appellem, venio ad te corde contrito, & dolore pleno: venio cum pudore & affectu filij, petēs peccatorum remissionem, quæ merito debitorum nomine veniunt appellanda. Debemus enim celsitudini tuæ venerationem, debemus paternitati obedientiam & obsequium, bonitati benevolentiam, ut

Hest. 7.

amantem redamemus; debemus pro beneficijs atque amplissimis muneribus gratitudinem; debemus veraci fidem, optimo atque potentissimo fiduciam. Hæc quoties non præstamus quum res poscit (& poscit quàm creberrimè) debitum non dissoluimus, sed alienum detinemus.

Præterea qui vsurpat aut detinet sibi, quod alterius est, inuito domino, is debitor illius est: cum autem nos tui simus, omniaque nostra in cultum & obsequium tuum expendere debeamus, id non tantum non fecimus; sed etiam in omnibus, & cum omnibus te offendimus: & facultates nobis datas à te, ut earum opera tibi seruiamus, in arma quibus te oppugnamus sæpe conuertimus; ideoque honoris tui, quem tibi denegauimus, nos debitores agnoscimus.

Sed, ô Domine, *dimitte nobis debita nostra*: tu namque præcipis nobis, ut eorum remissionem petamus. O admirandam Domini clementiam: nos peccamus, tu peccantes vocas; nos te despiciamus, & tu oculis benignis aspicias; nos tuam Maiestatem ad iram prouocauimus, eam vilibus huius seculi rebus postponentes; tu tantum non castigas, sed vltro ut indulgentiam petamus iubes, & cum tu læsus sis, pacem tamen offers & reconciliationem. Hanc misericordiam, ô Pater, peccantibus Angelicis Spiritibus non exhibuisti: illi enim in suis

iniquitatibus remanent, & remanebunt
semper, quamdiu tu Deus eris Deus.

Sed, ô Pater, sicine dimittes nobis
debita nostra gratis, & sine vlla com-
mutatione? Gratis vtique & non gratis:
Nô gratis, quia etsi misericordia prom-
pta sit ad remittendum, iustitia tamen
sibi vult satisfieri: gratis verò, quia id-
ipsum quo iustitiæ satisfacimus, tu no-
bis gratis propinasti: thesaurum scilicet
immensum & incomparabilem, quem
Unigenitus tuus filius triginta tribus
annis nobis thesaurizauit, & ad quem
sanguine suo nobis aditum patefecit.
Hunc thesaurum offerimus tibi Pater,
inde tibi sume quantum placet. hauri-
tur, non exhauritur; erogatur, non mi-
nuitur: eius merita nostra sunt, eius sa-
tisfactio nostra est, & eius sanguis no-
strum est pretium. Oramus igitur Do-
mine, vt sanguine & meritis filij tui pla-
catus ad delicta nostra cōniueas; quæ si
ad examen volueris reuocare, nullus vel
iustitiæ tuæ mansuetudinem, nedum
seueritatem sustinebit. Subueniat nobis
tua misericordia, quos multorum esse
iam à iustitia scelerum damnatos agno-
scimus. Purga nos igne fauoris tui, repo-
ne nos in gratiam, reconciliare nobis,
dimitte nobis debita nostra.

Sicut & nos dimittimus debitoribus nostris:
O felix offensa, ô beatum debitū, quod,
postquam à nobis dimissum est, in iudi-
cium pro nobis adducere possumus, &

quasi causam allegare, cur iudex nos debeat absolvere. Cum lædimur ab alijs cogitatione, verbo, consilio, opere, exemplo; in fortunis, in corpore, in animo, in amicis, in existimatione, nō contristemur; sed gaudeamus potius, & lætemur: dum enim nos istas iniurias dimittimus, Deus vicissim dimittit nobis iniurias nostras, quibus illum laceessimus. Et quæ hæc est commutatio? Quantulum est quod à me poscitur, & quantum ego posco? quantulum quod ego do, & quantum quod recipio? Accipio thesauros immensos, do nummulum. Ego peccaui in te summum Deū; frater meus peccauit in me, lutū, & puluerem platearum. Ego à te Deo meo veniam peto, tu vt fratri veniam dem iubes. Accipe igitur, ó Pater, lutum pro auro, stipulam pro margarita. *Dimitte nobis debita nostra, sicut & nos dimittimus debitoribus nostris.* O summe Iudex & Aduocate noster Iesu Christe, da mihi mitem animum, vt debitores meos non ad reposcendum debitum agnoscam, sed ad remittendum, vt cum veneris ad iudicandum, mitius mecum, quàm cum illo, qui conseruo suo debitum dimittere nolebat, sed in carcerem detrusit, agatur. Amen.

Matth. 18.

MEDITATIO VII.

Et ne nos inducas in tentationem.

Sed

Sed quid proderit mihi Domine, si dimittantur mihi debita antiqua; & denuo noua contraxero? quid proderit me lauaria mortuus, si mortuum denuo tetigero? Igitur, ô Domine, si permiseris nos tentari, vt humiliemur, vt exerceamur, ne fides in nobis languescat, & emoriatur, vt patientia nostra manifestetur, vt corona nostra augeatur, denique vt in medijs tentationibus constituti, varijsque tribulationibus & casibus attriti ad te Patrem nostrum recurramus, saltem ne finas nos à tentationibus vinci, vt vel faciamus malū, vel, quod proximum est, non faciamus bonum. Tanta est nostra fragilitas, vt non possimus non cadere sine tua gratia; non possimus perseuerare, sine singulari tuo auxilio: datur enim multis gratia, sed non omnibus perseuerantia.

Magnum, atrox & horrendum prælium instructum est contra nos: Caro inimica domestica, assidua & familiaris pellicit nos suauitate, terret asperitate, nunc titillationes & voluptates, nunc cruciatus & dolores parturit. Mundus illusor & impostor, mendax & proditor scenam suam sensibus nostris subinde ostentat, commodis & incōmodis permixtam. Dæmon crudelis, fortis, astutus, & in impugnando exercitatissimus ruditati ac fragilitati nostræ innumeris dolis atque artibus tendit insidias. Pandit latissimè quoquo versum sua retia,

&

& indagine nos circuncludit, in hoc totus, vt abs te abscedamus, à bono ad malum, à salute ad perniciem, à vita ad mortem.

In medio igitur tot hostium constitutus, inter tot carnis appetitus, tot spiritus infestationes, solus & inermis relictus quid faciam Domine, si tu me deseras? Quid faciet innocens ouicula inter tot lupos derelicta? quid creatura infirma inter tot potentissimorum hostium agmina? quid faciam, Domine? non inuenio effugium, non remedium aliud, quàm vt te inuocem, ad te, sicut pullus hirundinis clamem, gemā sicut columba? Quid faciam, nisi vt oculos meos leuem in montes, vnde veniet auxilium mihi?

Psal. 120.

Ad te igitur oculos meos tollo, qui habitas in cælis; ad te leuo animam meam Deus meus, in te spero, ne confundar in æternum. intende in adiutoriū meum, veni & noli tardare. Vsq̃uequo Domine obliuisceris me in finem? vsquequo auertes faciem tuam à me? Vsq̃uequo exaltabitur inimicus meus super me? Quot sunt dies serui tui, quando facies de persequentibus me iudicium? Ne finas nos deuenire in tentationem; aut si omnino vt manum conseramus stet sententia, ne discedas latum à nobis pilum: accende ip̃ nostris mētibus lumen tuum, vt inimici quò pertineant insidie cernamus. Suggere vires, ne nos robore

Psal. 12.

Psal. 113.

suo

suo profternat; Auge in rebus lætis constantiam, in tristibus fortitudinem.

Infelix ego homo, quis me liberabit à tot insidijs, laqueis, dolis, & artibus inimicorum? quando liber ero, Domine, ab omni tentatione? quando perueniam ad te, vbi nullus premit hostis, nulla sollicitat tentatio? Quando erit, vt nemo amplius me poterit à te separare? Quando rebus omnibus huius seculi, imò mihi ipsi mortuus ero, vt expeditius curram ad te? Quando erit, vt omnium rerum oblitus, te, & quæ tua sunt tantum recogitem? Quando tandem omnia, quæ tu non es, mihi sordebunt? Quando tuus ero ex animo & voluntate, qui tuus sum ex iure & iustitia?

O Pater misericordiarum & Deus totius consolationis, da mihi gratiam, vt mortuis omnibus meis passionibus, moriar etiam mihi, & inimicis meis; tibi autem soli viuam. O Pater, ô Rex, ô Domine, ô summum bonum meum, & centrum animæ meæ, da vt habitem in te, quiescam in te, latitem in foraminibus petrae, & in cauernis maceræ, ne milius me comprehendat, aut accipiter Diabolus me deuoret.

2 COR. I.

Cant. 2.

Sed libera nos à malo.

Mala, ô Pater, in hoc æui decursu multa sunt; sed ea hoc præcipuè nomine consignanda sunt, quæ adeò vrgent corpus, ac premunt, vt à recordatione

tui

tui nos abripiant. Huiusce generis sunt necessitates quotidianæ, fames, sitis, nuditas, æstus, albor : tum morbi & cruciatus corporis, vel in nobis, vel in rebus voluntatis nexu nobiscum coniunctis, Adhæc animi motus concitati & perturbati, & diuersæ passionēs, quæ regnāt in membris nostris : tenebræ quoque & cæcitates mentis. Sed & is, qui tibi perpetuò aduersatur Dæmon malus est, qui & robustissimus est, & callidissimus. Sed si nec aperta vi, nec dolis aliquid proficiat, vniuersam suam officinam terroris explicat : infert fortunis, amicis, corporibus nostris damna, agit, rapit, trahit, diuexat. Libera nos Pater à prauī huius sæui dominatu, & tyrānide, quam propter peccatum nostrum incurrimus : auerte immanem illius truculentiam à capitibus nostris, & oppugnationem, cui tantoperè sumus impares. Libera nos Pater ab omnibus malis animi & corporis, quæ violentia sui vel contrahunt animum, vel auertunt, vel opprimunt ; vt tua benignitate liberi hæreditatem cælestis regni, sanguine filij tui nobis etiam filiis tuis partam perpetuò possideamus, & inter Angelicos choros, beatosque Spiritus cælestibus delicijs semper fruamur ; patrocinate nobis benignitate atque gratia Iesu Christi, Seruatoris nostri, cui & tibi Patri nostro, cum Spiritu sancto imperium, gloria, & honor nunc & in omnia secula. Amen.

CON-

CONCLUSIO, VEL

*Precatio Dominica orationi**subijcienda.*

EN Pater amantissime, functa est infans nostra ratio suo munere, quoad eius facere potuit, exprimendo verba, quæ Vnigenitus filius tuus nos docuit: nunc vniuersum ad te desiderium semel & simul sine verbis effundimus, vt tuo nutu approbes, quæ abs te nobis euenire petimus. Omnia ista beneficia, gratias istas omnes, ô Pater, hætenus commemoratas vt nobis benignus largiaris supplices oramus, non indignitatē nostram, sed dignitatem Iesu Christi filij tui vnigeniti intuitus: ille enim noster est Aduocatus, Sacerdos, Sacrificium & Patronus coram te. Non enim iniustificationibus nostris prosternimus preces ante faciem tuam, vt ait Propheta, sed in miserationibus tuis multis, & in meritis filij tui Domini nostri. Quicquid enim ille fecit & passus est, id totum nobis donauit, id totum nobis fecit & passus est. Per illum itaque oramus te, vt his precibus nostris annuas. Per eum creasti omnia, & per eum restituiisti, quæ iam erant perdata. Per eum creasti hominem ad imaginem & similitudinem tuam, & ad eandem imaginem hominem per illum reformasti. Ille fundamentum est nostræ essentiae, ille fundamentum nostræ iustitiæ, nostrorumque meritorum causa. Ille apud te no-

Dan. 9.

ster

ster est Intercessor, ille Aduocatus, & robur nostræ spei.

Quicquid ergo hætenus à nobis pet-
titum est, ô cælestis Pater, id omne per
Filium tuum petimus; quod enim non
debetur nostræ iustitiæ, id debetur illius
meritis. Si in nobis nihil boni inuene-
ris, ecce in illo nihil inuenies mali. Si
in nobis nulla sint merita, ecce in illo
meritorum nec pretium est, nec nume-
rus. Per eum igitur te oramus, per eum
tibi supplicamus; honora illum in no-
bis: quod enim nobis tribuis, hoc ipsum
tribuis illi: quidquid enim datur mem-
bris, id omne redundat in caput cuius
membra sunt.

Exod. 23.

Fatemur quidem, ô Pater, fatemur,
inquam, paupertatem nostram, vt qui
nihil habemus ex nobis, quod tibi offe-
ramus: ne tamen vacui in conspectum
tuum veniamus (id enim in lege tua
prohibes) ecce immolamus tibi Vnige-
nitum filium tuum, cum omnibus eius
laboribus & doloribus, plagis & liuori-
bus: quidquid fecit, & quidquid pertu-
lit ex illo momento, quo primum in
lucem effusus est, vsque ad extremum
spiritum, quem in cruce moriens emi-
sit, id omne tibi offerimus: Nos enim
horum omnium sumus participes, no-
stra hæc omnia sunt, nobis hæc ille fe-
cit, nobis pertulit.

Hac oblatione, hoc sacrificio & his
meritis freti ad te venimus, & miseri-

cordiam à te per modum iustitiæ petimus : nam si filium tuum respexeris, iustitia est : si nos intuearis, misericordia.

Sed & aliud est quod fiduciam nobis auget, spem erigit, animum addit ; quia scilicet non ex humana præsumptione, aut perfriktæ frontis audacia venimus ad te, & petimus hæc tam magna : sed venimus missi à proprio filio tuo : ille enim iubet nos ad thronum tuum accedere, & in nomine suo petere, quicquid ad vtramque vitam nobis est necessari-
um : nec tantum hoc iubet, sed ipse misit in os nostrum verba ad hoc conuenientia ; ipse tradidit nobis phrasas tibi cognitæ, & familiares, quas vsque huc recitauimus. Agnosce illas Domine ; est enim stylus filij tui, sunt verba, quæ ille nobis reliquit ad nostram salutem promerendam. Recordare Pater mulieris illius Thecuitæ, quæ à Dauide veniam delicti filio illius Absaloni impetrauit mox, vt intellexit Rex, quod veniret ab exercitûs Principe Ioab emissæ : quam gratiam Ioab interpretatus est sibi, non mulieri factam esse. Sic ego Domine mittor ab Vnigenito filio tuo ; ille est qui posuit mihi hæc verba in ore meo, ille est qui te orat per me, & pro me : quod mihi tribuis, hoc illi tribuis, ille tibi gratiarum referet actionem.

Memento Domine quod nō dampnasti, sed commendasti iniquum bonorum

tuo-

Matth. 6.

2 Reg. 14.

Luc..16.

tuorum dispensatorem, qui de tuis bonis sibi fecerat amicos : & inuidere mihi noli, quòd ego omnium hominum pauperrimus, qui opes tuas malè expendi, easque dilapidaui, accedo ad filium tuum, illi me reconcilio, eius patrocínio me submitto, vt in hoc necessitatis tempore me in sua tabernacula recipiat, eius me merita protegant. Scio enim periculosum esse in conspectum tuum venire, sine spirituali fratre nostro Beniamin ; hoc est, Vnigenito Filio tuo ; Ecce igitur illum, ecce adducimus eum nobiscum, & offerimus eum tibi, vt eius intercessione benignè à te audiamur.

Genes.44

Et tu Vnigenite Fili Dei, qui etiam filius hominis es, extende super nos brachium tuum : tu enim es noster protector, & tuo pallio nostram tege nuditatem, tuis opibus nostram subleua paupertatem, & ne repellas à tua gratia, quos naturæ tuæ secisti fratres & socios : Qui viuis & regnas cum Patre & sancto Spiritu in secula seculorum.
Amen.



CAPVT

CAPVT PRIMVM,
CONTINENS PRECA-
TIONES QVOTIDIANAS,
certis horis diei & noctis fe-
rè adaptatas.

ADMONITIO MA-
tutina.

NON est eò fabricata nox, inquit
Chrysostomus, vt eam totã dor-
miendo transigere debeamus, &
vt eam otiosam degamus: præ-
sertim cum multi propter humana commoda
laudabiliter laborent. In Ecclesia quoque
consueuerunt eius ministri media nocte con-
surgere ad Deum laudandum. Ita & tu te ge-
rere debes, & contemplari stellarum choros,
laudantes factorem suum. Cum ceteri somno
vacant, tu interdum vigilabis, flebis & ora-
bis, tibiq; propones illud; Laborauit in ge-
mitu meo, lauabo per singulas noctes le-
ctum meum. Quemadmodum enim vtilissim-
us est nocturnus ros ad temperandum
diei æstum; ita lachrymæ nocturnæ vtilissimæ
sunt ad emendandas diurnas concupiscentias;
& vt nox ea componat, quæ interdum pertur-
bata sunt, & malè acta. Christus in die præ-
dicabat, & docebat, per noctem verò in so-
lennis in oratione erat, in monte, inter feras,
& in solitudine.

Hom. 26.
in Acta
Apost.

Psal. 6.
Simile.

Lucæ 6.

Qui

Vide Gra-
nat. lib. 2.
de orat. &
meditat.
cap. 14.
Sap. 16.
Exod. 16.

Eccli 30.

*Qui media nocte surgere non possunt, o-
peram dent, vt paululum ante ortum Solis
surgant, vti monet Sapiens; Quoniam, in-
quit, oportet præuenire Solem ad bene-
dictionem tuam, & ad orientem lucis te
adorare. Manè collegerunt filij Israel delica-
tum illud manna, habens in se omnis saporis
suauitatem. Et de iusto dicitur; quòd cor
suum tradit ad vigilandum diluculo
ad Dominum, qui fecit eum; & in con-
spectu Altissimi deprecabitur,*

*Ad surgendum maturius multum proderit
breuis cœna, durus lectus, & subinde in vestis-
bus dormire: hæc enim somnum faciunt bre-
uiorem, & tempus orationis longius. E contra-
riò cum cœna est longa, lectusq; mollis, difficile
somnus relinquit nos: cum enim multum est
digerendum, multum est edormiendum, & le-
ctus mollior difficilius relinquitur.*

Consule
Granat.
lib. 4. de
Orat. &
medit. in
proœmio

*Statim verò vbi expergisceris, occlude por-
tam omnibus cogitationibus prophanis; &
ante omnia Dominus noster admittatur: of-
fer ei primitias diei, & cum eo colloquens,
hæc tria obseruabis:*

Huic ex-
ercitio ac
commo-
data est
Oratio
capitis
primi.

*Primò gratias ages illi pro quiete nocte
illa tibi concessa, & quòd liberauit te ab omni-
bus illusionibus, laqueisq; inimici: pro alijs
etiam omnibus beneficijs creationis, conserva-
tionis, vocationis & redemptionis: quòd bo-
nas inspirationes tibi instillauit, quòd libera-*

nit

uit te ab omni malo; quòd tanto tēpore tanta cum patientia & misericordia te ad penitentiam expectauit.

Deinde offer illi temetipsum & omnia tua; quidquid eo die facies, quidquid patieris; vt ipse omnia pro bona voluntate sua disponat.

Tertiò pete gratiam, ne quid illo die committas diuinę voluntati contrarium: ora vt det tibi auxilium, quò peccatis magis tibi familiaribus, & ad quę natura propendes, quęas resistere, firmoq; & immobili proposito te corroboret.

CVM EXPERGISCIMVR.

I

Pater Deus, qui dixisti in principio, *Collector.*
Fiat lux: & facta est; illumina oculos meos, ne vnquam obdormiā in morte: ne quando dicat inimicus meus, Præualui aduersus eum. *Psal. 11.*

Fili Deus, lumen de lumine, lux maxima & verissima, vnde lux ista nascitur solis & diei; lux lucens in tenebris, illuminansque omnem hominem venientem in hunc mundum, pelle à me omnes tenebras ignorantię, & da mihi intellectum, vt in te, & per te videam atque cognoscam Patrem, quem nosse viuere, & cui seruire regnare est. *Ioan. 1.*

Spiritus sancte Deus, ignis illuminās pariter & calefaciens; accende in me lumen tuum, vt fallaces huius mundi delicias & vera cælorum gaudia cognoscam: Illustra mentem meā, vt cernam

quantum bonum inimicus noster sollicitet nos leuissima vmbra commutare. Da vt quæ tua sunt tantum videam, cæcus ad reliqua. Infunde quoque in mentem meam charitatis tuæ donum, vt spretis his transitorijs, iugi desiderio ad ea, quæ sempiterna sunt, anhelem.

Sancta Trinitas, vnus Deus, ✝ defende me hodie ab omni impetu Diaboli: ✝ Custodi me hodie ab omni peccato: ✝ à subitanea & improuisa morte hodie me protege. Esto mihi in tribulatione solatium, in tentatione præsidium, in morte iucundum animæ meæ receptaculum.

Excitasti ô Deus corpus somno con-

Apocal.7. sopitum, oro te, vt animum quoque meum à somno peccatorum & tenebris mundi huius liberes; quodque ex somno ad vigiliam reuocasti, post mortem reddas vitæ: est enim somnus tibi, quæ nobis mors est. Tibi benedictio, & claritas, & sapientia, & gratiarum actio, honor, virtus, & fortitudo in secula seculorum. Amen.

CVM SVRGIMVS

& induimur.

2
Ephes.5.
Esa.52.

Surge, ô anima mea, quæ dormis, exsurge à mortuis, & illucescet tibi Christus. Surge ô filia Sion, ô anima mea Christi sanguine redempta, excutere de puluere peccatorum, & sede in pace Christi meritis tibi conciliata.

Ex precibus diur-

Christe generis humani patrone in-

dul-

dulgentissime, vt graue hoc onus corporis mei tuo beneficio erigis, ita & animos nostros ad cognitionem amoremque euehe tuæ sublimitatis. fit & corpus socium atque administrum pietatis animæ in hac vita, quo fit & in altera illa vita particeps beatitudinis sempiternæ.

Exue me, ô Domine, vetere hoc & corrupto Adam, qui peccato maceratus in animæ formatur perturbatiões, morbosque à te alienos, cum tota illa sua tētratrice Eua, quæ ab obsequio Patris tui auertit. Indue me temetipso, homine secundo & nouo, qui per iustitiam factus es Deo patri tuo adiuratissimus, ad exuendas concupiscentias omnes, & crucifigendum regnum carnis. Tu nobis, ô Christe, aduersus frigus mundi huius esto indumentum, quo foueamur: qui si absis, omnia fiunt protinus torpida, infirma, mortua: si adsis, viuida, tuta, fortia, vigentia. Et vt corpus amiculo hoc circundo, ita tu me totum, sed animum potissimum, teipso vestias, ne in die iudicii cum Martyres sua vulnera, Confessores suam fidem, mille bonorum operum floribus ornatam, & Virgines suam castitatem, aliasque virtutes suas ostendent, ego nudus ante tribunal tuum compaream: sed tuis potissimum, deinde & bonorum operum meorum meritis amictus, audiam à te dulce verbum illud; Veni benedicte in regnum

nis Lodo-
uici Viuis

Matth. 25.

Patris mei : Vbi tu viuis & regnas cum Patre & Spiritu sancto in secula seculorum. Amen.

MEDITATIO.

POST orationem hanc, donec vestiariis, meditare primò, quanta erit in illa resurrectione corporum nostrorum in nouissimo die bonorum lætitia, & quantus tremor & horror malorum, ceterasq; illius resurrectionis circumstantias.

II. Quanto potior lux animi, & præstabilior mentis oculus, quàm corporis : quàm conuenit magis curare vt acutiùs cernat mens, quàm corpus. oculum corporis bestiolæ habent, mentis autem soli homines, & quidem sapientes.

III. Quanta erit claritas ciuitatis illius, in qua nox vltra non erit ; quæ non egebit lumine lucernæ neque lumine solis ; sed quem ipsa Dei claritas illuminat ; & cuius lucerna agnus est : in qua singuli Spiritus claritatem stellæ, aut lune, aut solis habebunt.

IIII. Quod stipendium sit peccati, nuditas scilicet, impudici rebellis & infrumitæ carnis motus, animiq; perturbationes : frigora quoque & alia corporis incommoda.

V. Quid sit induere Christum.

Postquam surrexeris, & vestitus fueris, age Domino gratias, quòd nocte illa te defen-

dit

Apoc. 21.
& 22.

*dit, & supplex ora, vt dies itidem instans, illo
te protegente, felix faustusq; tibi sit.*

ORATIO.

3

Collector.

OMnipotens æterne Domine, Pater Domini nostri Iesu Christi, te laudo, tibi benedico, & ex toto pectore gratias, non quas debeo, sed quas possum ago, quòd pro immensa tua bonitate me hac nocte paterna tua prouidentia custodiuiſti; quòd mihi adesse voluisti, vt te præsente Diabolus propius accedere non auderet, sopitoque corpore anima in te vigilaret, quòd ab omni malo tam animæ, quàm corporis me protexisti, quòd me profundo sopitum somno sanctorum Angelorum præsidio, quasi muro inexpugnabili, aduersus omnes insidias & machinationes antiqui illius Sathanæ, qui nullis nocendi nobis oportunitatibus indormit, circūuallasti: quòd denique me à somno, vera mortis imagine, ne in peccatorum meorū tenebris præfocarer, suauiter excitasti, vt spatium & tempus vel tandem seriò pœnitendi mihi suppeteret.

Sed & nunc tibi, ô Pater misericordiarum, & Deus totius consolationis, supplico, quin & ex toto corde precor, vt me etiam hoc die in paternam tuam tutelam assumes, oculis tuæ misericordiæ me obserues, in viam mandatorum tuorum me dirigas, atque ijs me sancti Spiritus charismatibus dones, quorū præsi

2 Cor. i.

dio hunc itidem diem ad laudem & gloriam diuini tui nominis, ad proximorum vtilitatem, & animæ meæ salutem auspicari, traducere & finire possim; vbi-que & in omnibus satagens, ne vsquam desim officio meo, sed vocationi meæ, in qua vocatus sum, per omnia satisfaciam.

Custodi me Domine ab omni peccato, carnem meam & sanguinem meum ad omnem iniquitatem propensum, veteris illius Adami amicū & ministrum refrena: ardorem cupiditatis, quæ in membris meis dominatur, rore tui Spiritūs refrigera, ne hodie vsquam impingam in vllum peccatum, tuamque in me iram & indignationem prouocem. Da, pie Pater, da benigne Deus, vt quod reliquū est vitæ meæ in timore & amore tui transigam.

Colof.3.

1 Pet.5.

Dirige hodie cor & corpus meū, sensus, sermones & actus meos in lege tua, & in operibus mandatorum tuorum. Auerte cor meū ab omnibus rebus trāsfitorijs, & ad æternas conuerte, vt spretis huius seculi diuitijs atque delicijs ad regnum tuum aspirem, quæ sursum sunt quærā, vbi filius tuus est in dextera tua; quæ sursum sunt sapiam, & non quæ super terram. Constringe & cohibe potentiam Diaboli, veteris & iurati hostis nostri, vt licet quasi Leo rugiens circūeat, quærens quem deuoret, me tamen lēdere, aut mihi obesse non possit: ab omni-

bus

bus etiam periculis cum animæ, tum corporis, & à subitanea morte me protege: vt sub vmbra alarum tuarum sedens, tuo patrocinio tutus, ab omni immundorum spirituum impugnatione securus & lætus hunc diem inoffenso pede percurram.

Fateor, ô Pater, & Domine mi, fateor, nō sum ego hac tua paterna cura & prouidentia dignus; non sum dignus, vt inter filios tuos me numeres: nulla enim merita mea sunt, quibus ego fretus tale quid à te petere præsumam; sed ecce mecum adduco Vnigenitum filium tuum Christum Iesum Dominum nostrum, in quo tibi bene complacuit: hunc mediatorem constituo inter me & te; hic est Pontifex summus, hic propitiatio pro peccatis meis: is pro me in cruce obdormiuit, vt animam meam ab æterno somno, atque à tenebris tam interioribus, quàm exterioribus liberaret. In huius igitur faciem respice, ô Pater, & propter iustitiam filij parce peccatis famuli: quod mea non merentur opera, id eius merentur abundè vulnera: Ille mea est redemptio, ille mea satisfactio, ille mea iustitia, ille mea sanctificatio. Eum tibi offero Pater sacrificium matutinum, vt pinguedine & odore suauitatis illius delinitus, mihi concedas ex misericordia, quod non debetur ex iustitia. Qui viuus & regnas Deus per omnia secula seculorum. Amen.

4

ORATIO DEVOTISSIMA
manè dicenda; in qua cōmemorat homo prae-
cipua Dei beneficia, vt cognoscat ex ijs, quid
Deo debeat: deinde gratias Deo pro illis
agit, illi se offert, nouaq; benefi-
cia ab eo petit.

PRAEFATIO IN ORATIO-
NEM SEQUENTEM.

Thren.2.

Matutinum vel nocturnum tempus pre-
candi officio maximè accommodatum
est. Quare Propheta; Consurge, inquit,
in nocte in principio vigiliarum, & ef-
funde sicut aquam cor tuum ante Domi-
num. tunc enim omnes animæ nostræ poten-
tiae sunt alacriores, & ad officium hoc magis
preparate. Visus est magis collectus, stomas-
chus leuis, caput somno refocillatum; cor ab om-
nibus imaginationibus liberum, tempus qui-
etum, locus solus, & à salutationibus amico-
rum magis imperturbatus. Manè in descensu
roris caelestis decedit etiam gratia, Spiritus san-
ctus in corda eorum, qui de Deo meditantur:
Manè igitur diutius, quàm alijs diei tempori-
bus cum Deo colloquendum est: manè potissi-
mum salutis nostræ tractanda sunt negotia.

Subiecimus igitur orationem sequentē pro-
lixam per se, sed quam extendere vel contra-
here pro voto licebit. Eius partes sunt quatuor,
Commemoratio scilicet beneficiorū Dei; Gra-

tiarum

tiarum actio, Oblatio, & Petitio. In gratiarum actione si longior esse velis, poteris totum Canticum trium puerorum, & eo absoluto omnes choros Angelorum, Sanctorumq; ordines percurrere, in singulis versibus repetens; Laudate & superexaltate eum in secula. Miram enim habent ista verba energiam, in cordibus eorum, qui Deum diligunt. In petitione omnia postulare potes, quæ ad vtramque vitam corporalem & spiritualem sunt necessaria. Primam & tertiam partem cuiusque arbitrio relinquimus.

Dan. 3.

DEus, Deus meus ad te de luce vigilo, dicit sanctus ille tuus Prophetas: & paulò post addit; Sic memor fui tui super stratum meum, in matutinis meditabor in te, quia fuisti adiutor meus. Et ego, Domine mi, cum eodem hoc Rege sancto vigilare cupio. Hoc initium sit mearum occupationum: hanc meam cogitationem exordium diei excipiat: Huc enim adigunt me debita quibus tibi obligatus sum, hic finis est meæ creationis. vt enim te laudem, glorificem, magnificem & nomen tuum sanctificem conditus sum. Tu enim principium es & finis omnium rerum. principium dico sine principio, & sine fine finis. Quemadmodum enim nemo vnquam potuit aliquid creare sine te, ita creari non potuit aliquid per aliū, quàm per te: vt omnia tibi seruirent, te lauda-

Granatē-
sis lib. 5.
Memori-
alis.
Psal. 62.

rent, & gloriam tuam prædicarent.

Tu es vniuersalis omnium bonorum largitor, cum nullum bonum inueniatur naturæ vel gratiæ, corporis vel animæ, quod à te, qui fons es omnium bonorum, non trahit originem: tu es pelagus omnium perfectionum, omnis magnitudinis abyssus; infinitæ misericordiæ atque bonitatis Oceanus, incomparabilis pulchritudinis imago. Tu es Deus Deorum, Sanctus sanctorum, Rex Regum, Dominus Dominantium, causa causarum, ens entium, vita viuentium, ordo Vniuersi, pulchritudo mundi, gloria cæli.

I
Comme-
moratio
benefici-
orū Dei.

Tu es Creator meus, qui me de nihilo creasti ad imaginē & similitudinem tuam. Tu es meus Conseruator, qui me tua prouidētia conseruas, ne in nihilum recidam. Tu es meus Sanctificator, qui me per gratiam tuam ad ea, quæ diuina sunt, extollis. Tu es meus Glorificator, qui me vt tua gloria sine fine fruar condidisti. Tu meus es defensor, adiutor, pastor, benefactor. Tu meus es Rex, meus Dominus, meus Pater, meus Sponsus; Tu es centrum animæ meæ, vltimus finis meus, in quo vno cōsistit omnis mea felicitas, beatitudo, vitæque meæ vltima perfectio. Quid multis? tu mihi omnia in omnibus es, quatenus Deus es.

1 Cor. 3.

Quatenus verò homo es, tu meus Redemptor es, Saluator & liberator. Tu es, Apostolo teste, mea sapientia, mea iusti-

tia,

tia, mea sanctificatio, mea redemptio, meum sacrificium, meus agnus, meus sacerdos, meus aduocatus, meus intercessor, meus doctor, meum exemplum, mea fortitudo, mea consolatio. Tu es vniuersalis omnium vulnerum & infirmitatum mearum medicus: tu sanasti meam superbiam, tua humilitate; meam auaritiam tua paupertate; meas voluptates tuis doloribus; meam iram tua mansuetudine; meam inuidiā tua charitate; meam gulam tuo felle & aceto, quod amore mei bibisti; pigritiam meam tua diligentia, & immensis pro me exantlati laboribus.

Tu pro me ieiunasti, huc illuc discurreisti, sudasti, vigilasti, orasti, lachrymatus es, in exilium eiectus, persecutiones passus, derisus, subsannatus, consputus, flagellatus, spinis coronatus, crucifixus, plus ceteris hominibus huius mundi afflictus, & tandem mortuus es.

Omnia hæc Domine beneficia tua sunt, pro quibus omnibus tibi gratias agere debeo: imò causæ sunt iustissimæ, ob quas me ipsum tibi debeo, & vincula quibus me comprehensum & ligatum tenes. Quid retribuam tibi Domine pro omnibus quæ retribuisti mihi? quo munere, aut quibus obsequiis tantas gratias mihi exhibitas cōpensabo? Credo equidem quòd etsi omnia corda hominum solus haberem, & ex ijs omnibus te solum amarem, non possem ne minimum

II
Gratiarū
actio.

Psal. 115.

tibi debitum reddere: quomodo igitur pro tot, & tantis tibi satisfaciam? quomodo negare tibi potero illud cor vnum, quod habeo pro omnibus, cum tantundem tibi debeam pro singulis tuis in me beneficijs? Quid dicam Domine mi? Quid faciam? Non enim ego solus sufficiens sum, pro tanta beneficiorum multitudine dignas tibi gratias agere. Sed scio quid faciam: Inuocabo omnes creaturas, quæ sunt in cælo, & in terra; petamque ut mihi assistant, tuasque mecum laudes decantare non grauentur, communemque me glorificare Dominum adiuuent. Cantemus igitur canticum quod cecinerunt tres pueri in ardenti fornace Babylonis, dicentes; Benedicite omnia opera Domini Domino, laudate & superexaltate eum in secula. Benedicite angeli Domini Domino, laudate & superexaltate eum in secula. Benedicite cæli Domino, laudate & superexaltate eum in secula. Benedicite aquæ omnes, quæ super cælos sunt Domino, laudate & superexaltate eum in secula. &c.

Dan. 3.

III
Oblatio

Has omnes laudes atque benedictiones tibi debeo, Pater, sed & maiora multo tibi debentur. Nam si rem propius inspexero, non tantum mea, sed & me ipsum tibi debebo. Si enim in India homo hominem rubro emat pileo, emptusque tam vili pretio eum in modum totus transeat in ius & potestatem emptoris, ut nec temporis momenti, nec teruntij

maneat

maneat dominus, sed & sæpe à domino suo in vincula conijciatur, flagelletur, fustibus cædatur, & pro libidine emptoris tractetur: quid de me fiet Domine? Ego tuus sum, & quidem totus, nec vno titulo vel nomine, sed infinitis. Tu me creasti, tu me non rubro pileo, sed pretioso tuo sanguine mercatus es; tu me in omnibus & singulis vitæ meæ momentis conseruasti; sine te namque vel manum, vel pedem mouere nō possum; spirare nec respirare absque te mihi datum est, nec quidquam aliud agere. qua igitur fronte tuum in me dominium recusabo? quomodo potero tibi negare quod tuum est? quo iure potero libertatem mihi arrogare, aut qua impudentia velle secundum proprium beneplacitum, iugo Domini mei abiecto, vivere, cum ex tot causis tuus sim atque me totum tibi debeam?

Humiliter igitur agnoscens tuum in me dominium, ecce me totum tibi offero, me totum tibi in perpetuū seruum & mancipium trado: nec tantum me tibi offero, sed & omnia mea; quidquid hodie aut in reliqua vita mea cogitabo, dicam, aut faciā; cum omnibus ijs, quæ mihi propter te quocunque tempore venient perferenda: adeo vt in posterum nec comedam, nec bibam, nec dormiam, nec quicquam simile faciam, cuius finis non erit honor & sanctissimi tui nominis gloria.

Iterum dico, Domine, immolo tibi memetipsum, ne posthac sim meus, sed tuus: non viuum amplius secundū meam voluntatē, non laborabo mihi, non quæram me; sed in omnibus, & per omnia quæram te, tuæ parebo voluntati, atq; in tuo assiduus ero obsequio. Quod si quandoque contrarium fecerō, furem medicam, & alieni raptorem: obsequium namque & obedientiam, quæ tibi tot titulis, & tam multiplici iure debetur, tibi denegatam & suffuratam mihi vsurpabo.

IIII
Petitio.

Sed quia tale debitum reddere non possum sine tua gratia, oro te Domine, vt in hoc me iuues, & cres in me cor nouum, quod ne momentum temporis suū esse iudicet; sed perijsse putet, quidquid tuo non impenditur obsequio atque cultui. Da mihi voluntatem, cui nihil æquē in desiderio sit, atque obseruare diuina mandata tua, tuæque voluntati obtemperare: largire intellectum, qui in lege tua meditetur die ac nocte, cum memoria, quæ tui nunquam obliuiscatur.

Præterea, Domine, tribue frēnum linguæ meæ, & custodiā oculis meis: Concede mihi puritatem cordis, asperitatem carnis, mortificationem omnium appetuum, animique perturbationum. Da mihi denique profundam humilitatem cordis, & cum ea patientiam, obedientiam, mansuetudinem, castitatem, veram

discrē-

discretionem : adde paupertatem spiritus, feruentem honoris tui zelum, amorem proximi, & sinceram in tribulationibus illius compassionem : Qui viuus & regnas in secula seculorum. Amen.

Deinde ora Deum, vt illo die te Angelorum praesidio muniat, hac oratione :

ORATIO.

OMnipotens, mitis & misericors Deus, pietatē tuam planē patriā agnosco, & praedico. Dilexisti me vnice amor meus, antequam diligerem te, & ad imaginem tuam creasti me, & sanguine filij tui dilectissimi redemisti me per acerbam mortē innocentis agni Iesu Christi; lauisti, liberaisti, ornasti & sanctificasti me, denique tanquam magno pretio emptum thesaurum Angelis tuis & sanctis Spiritibus custodiendum & defendendum commisisti, vt in omnibus vijs meis me tueantur. Hi enim sunt ciues beatæ ciuitatis supernæ Hierusalem, in ministerium missi propter eos, qui hæreditatem capient salutis. Hi sunt fidelissimi custodes super muros nouæ vrbis Hierusalem, diu noctūque excubantes, & peruigilantes super gregem tuum, quē sanguine tuo redemisti. Te humillime oro ô clemens & misericors Deus, ô dulcis Iesu Christe, vt me praesidio Angelorum tuorū ita munias, vt omni tempore & loco, in omnibus actionibus

custo-

5

August. in
Soliloq.
cap. 27.

Heb. 1.

1 Pet. 5.

custodiar & conseruer, vt arceatur & compefcatur rabidus ille sanguinis fitiens tartareus Leo, qui nihil aliud machinatur, quàm vt me destruat ac dilaniet: qui veluti Leo rugiens ſemper circumit, quærens quem deuoret ac perdat.

O eterna Sapientia, tu noſti inueteratum & acerbiffimum odiũ antiqui ſerpentis, ſanguinei Draconis, calumniatoris & accuſatoris fratrum, lupi infernalis huius mortiferas cogitationes & pernicioſas inſidias habes perſpectas. Aduerſarius meus & hoſtis agilis eſt, expeditus, fortis & mille dolis inſtructus artifex; ego verò timidus, debilis & imbecillis, vt huic monſtro reſiſtere non valeam. Te igitur oro, miſericors Saluator, ô fortiſſime Heros, ô inuiſte Deus Iſraël, qui es vnicum auxilium meum, fortitudo mea, confugium meũ, & ſpes mea. Reſpice Deus, & cogita quid pro me in cruce expenderis, commenda ſanctis tuis Angelis, vt ipſi mihi adſint hodie, omnibus horis mihi ſuccurrant, pro me pugnent, corpus meum & animam meam defendant, gemitus meos atque ſuſpiria referant ad te in conſpectũ gloriæ atque Maieſtatis tuæ; vt benignitatis tuæ propitiationem mihi impetrent, & deſideratam tuæ gratiæ benedictionem mihi reportent: vt me alliciant, moneant & commoueant ad veram & ſanctam pœnitentiam, vt & ipſi de vita

mea

mea gaudere possint : & vt in pio proposito, & in vita inculpabili perseuerem: quò tandē cū anima mea ex hoc corpore est excessura, ab ipsis in sinum Abrahæ ferar in requiem perpetuā, in consortium & societatem conciuuium cælestium & in vitam æternam perducar. Amen.

AD ANGELVM

Custodem.

Quantum, ô fidelissime custos corporis & animæ meæ, debeo communi nostro Domino & parenti, qui te mihi dedit, vt duceres videns cæcum, sapiens stultum, fortis imbecillem, gnarus viæ ignarum, & quidem inter tot pericula & præcipitia? O quoties me discriminibus exemisti, quoties in perniciem ruentem seruasti? tu præcedis me, tu custodis me in via, tu introduces me in locum quem præparauit mihi Dominus: tu in manibus tuis portas me, sicut frater nātū maior infantulū fratrem in vlnis gestat, vt ab omni me peccatorum offendiculo eripias. Pro his omnibus hactenus mihi præstitis beneficijs maximas ago tibi gratias, & vehementer peto atque obtestor, vt seruare me pergas, ac perseueres: abducas à malo, retrahas ad bonum. Coge nolentem, adiuua volentem, impelle euntem. Denique sic ducito, vt tandem ad beatitudinem perducas, qua tu semper iam frueris; vt quemadmodum hīc vel pupillus fui tu-

us, vel

6

Ex Lodo-
uico Viue.

Exod. 23.

us, vel cliens, sim illis conciuus & socius, gaudeasque creditum, commissumque tuæ curæ tam felici portui appulisse.

7

COMMENDATIO MATV-
rina, qua post nos omnes Christi fideles
Deo commendamus.

Granatē.
 sis lib. 5.
 Memori-
 alis.

A Doro, benedico, & glorifico te, ô sancta Trinitas, omnipotens Deus Pater, Fili & Spiritus sancte. Ecce me tuæ diuinæ Maiestatî offero, & me tuæ sanctissimæ atque irreuocabili voluntati trado. Oro te, Domine, tolle à me, & ab omnibus fidelibus Christianis, quicquid tibi displicet: redde quod gratum est in oculis tuis, & fac vt tales efficiamur, quales nos esse præcipis.

Commēdo tibi patrem, matrem, fratres, sorores, filios, cognatos, benefactores, amicos, familiares & vicinos, omnesque illos qui se meis orationibus cōmendârunt, aut pro quibus orare debeo. Commēdo tibi Sanctā tuam Ecclesiam Catholicā, fac, Domine, vt omnes & singuli te cognoscant, omnes te colāt, oēs te diligant, & vicissim à te diligātur. Reduc errantes in viam, hæreses destrue; omnes ad veram & sinceram fidem conuertantur, qui non habent sancti tui nominis cognitionem. Dona nobis pacem, & nos in illa conserua. In omnibus tamen tua, non nostra voluntas fiat. Consolare & iuua omnes qui sunt in tribu-

latione,

latione, quique in miserijs, tentationibus, perturbationibus, & afflictionibus tam spiritualibus, quàm carnalibus vitam ducunt. Denique omnes creaturas tuę protectioni commendo, vt viuis tribuas gratiam, & defunctis requiem sempiternam. Amen.

AD OMNES SANCTOS.

8

Salue candidū & pulcherrimum formosi veris lilium sanctissima Virgo Maria, Salue rosa diuinę suauitatis odorifera. Salue noua viola plena cælesti gratia, plena venustate, de qua nasci voluit & lactari paruulus Iesus Christus Dei filius, Rex cælorum inclytus, splendor paternæ gloriæ, & figura eius substantiæ. Impetra, ô Domina mea, mihi ab vnigenito Filio tuo omne quod noveris animæ meæ necessarium. Adiuvā pia Mater fragilitatem meam; adesto mihi hodie in omnibus calamitatibus, tentationibus & periculis meis: præcipuè verò in hora mortis mihi assiste, opem fer, nec à me discede; vt per auxilium & patrocinium tuum securus esse merear in ultimo illo & periculoso certamine.

Granatē.
sis ibidē.
Ad B. Vir-
ginem.

O BEATI Spiritus Angelici, qui suauissima melodia communem glorificatis Dominum, & de eius præsentia semper gaudetis, miseremini mei. Et tu præsertim sanctissime Angele, Custos animæ meæ, & corporis mei, cui specia-

Ad omēs
Angelos.

Ad Ange-
lū custo-
dem.

li mandato Dei commendatus sum, oro te, fideliter & diligenter officium tuum fac, meque hodie ab omni malo visibili & inuisibili custodi, tuere, protege.

Ad omnes
Sanctos.

O omnes Sancti & Sanctæ Dei, qui iam transistis turbulentum huius mortalitatis pelagus, & peruenistis ad portum perpetuæ tranquillitatis, securitatis & pacis; quique iam meruistis cælestium gaudiorum consortes fieri: securi estis de vobis, solliciti estote de nobis; procuratores & aduocati mei esse ne dedignemini. Orate Dominum pro me, ut vestris orationibus & meritis nunc gratiam impetrem, & in hora mortis salua naue, & integris mercibus securo perpetuæ gloriæ portui detur appellare: ubi vos cum Deo sine fine regnatis. Amen.

ANTEQVAM DOMO EGREDIARIS, ADMONITIO.

IN publicū processurus memento te in mundum esse venturum. Et quid est mundus, nisi silua periculis mille obnoxia, & saltus spiritualium venatorum indagine cinctus, tot habens tendicula, quot vias tot retia, quot homines; tot casses, quot sensuum obiecta; tot plagas, quot studia; tot sagenas, quot negotia, Quidquid enim in mundo est, aut est concupiscentia oculorum, aut concupiscentia carnis, aut superbia vitæ: & in omnibus laquei, casses & retia. facile namque oculus videt, au

1. Ioan. 2.

vis audit, & ceteri sensus percipiunt, quo infelix anima illaqueatur. Hinc pauci in mundo saluantur, & pereunt quàm plurimi. In mari quantumuis procelloso vix decima nauis perit, in mundo vix anima decima saluatur. Mare mundus est, in eo piscatur Christus, piscatur diabolus: sed Christus arundine hamatili, & extrahit paucas: Diabolus expansis retibus & sagenis, & capit multitudinē maximam. Vidit olim D. Antonius totum mundum tensis laqueis plenum, & exclamauit; Domine quis laqueos omnes istos euadet? Hæc cum ita sint, quis inter tot serpentes audebit ire nudis pedibus? quis inter tot laqueos clausis oculis? inter tot hostes inermis? inter tot peccatorum occasiones securus & inconsideratus? Vis esse tutus ab istis laqueis? vis, si non melior & sanctior, saltem non deterior domum reuerti, quàm exieras, pijs orationibus pectus tuum muniatur. Oratio sit tibi galea, oratio sit tibi clypeus, in oratione tuum inuenies præsidium. Vtere itaque hac aut simili precatione.

ORATIO.

9

Ioannes
Faber.

O Deus propitius esto mihi peccatori, & custodi me: sis mecum omnibus diebus & noctibus vitæ meæ. O Iesu Christe, Dominus meus & Deus meus, miserere mei, & mitte mihi in adiutorium sanctum Michaëlem Archangelum,

gelum, qui me defendat & protegat ab omnibus inimicis meis. Sancte Michael Archāgele defende me in prælio, vt non peream in tremendo iudicio. Precor vos omnes SS. Angeli & Archangeli, vt vestra intercessione detur mihi auxilium & potentia, vt nullus inimicus mihi nocere possit in via, nec in aqua, nec in igne; nec offendar à subitanea morte, nec dormientem vel vigilantem opprimat, aut lædat. Ecce Cru⁺ cem Domini, fugite partes aduersæ, vicit Leo de tribu Iuda, radix Daud. Saluator mundi salua nos, qui per Crucem & sanguinem tuum pretiosum redemisti nos, auxiliare nobis te deprecamur Deus noster; Sancte Deus, Sācte fortis, Sancte & immortalis Saluator miserere mei. Crux⁺ Christi salua nos; Crux⁺ Christi protege nos; Crux⁺ Christi defende nos. In nomine Patris & Filij & Spiritus sancti. Amen.

10

ALIA.

Collector.

OMnipotens æterne Deus, qui es via, vita & veritas, ecce inter tot laqueos à Dæmone & mundo eius ministro extensos mihi gradiendum est; sed & stimulos lubricæ carnis meæ circumfero, fieri non potest vt illæsus vel anima vel corpore inter tot voragines & præcipitia, quæ malus ille hostis fabricatus est nobis per peccatum exoculatis, ambulem, nisi tu manum porrigas. Duc igi-

tur

tur me certissime & fidelissime dux, aperi oculos meos, & deduc me per regiam viam, vt neque ad sinistram, neque ad dextram declinem. Vias tuas demonstra mihi, & semitas tuas edoce me. Rectos fac cursus meos, & itinera mea dirige in pace: Domine in tua iustitia deduc me: propter inimicos meos dirige in conspectu tuo viam meam. Qui sanctis hominibus mittis Angelos custodes, à quibus tanquam imbecilliores filij à filijs natu grandioribus & magis validis ducantur: qui Tobiae probi patris filio modestissimo iter ingressuro Raphaëlem ministrum tuum misisti viæ comitem; mihi virtute quidem Tobiae longè inferiori; sed bonitate tua confiso mitte sanctum Angelum tuum, qui me nunc per vias tibi gratas deducat, & tandem ad æternæ vitæ portum perducatur. In nomine Patris & Filij & Spiritus sancti. Amen.

Psal. 24.

Prou. 4.

Psal. 5.

INGREDIENS ALI-

quod iter.

II

DEus qui Abraham puerum tuum de Vr Chaldæorum eductum per omnes suæ peregrinationis vias illæsum custodisti, quæsumus vt nos famulos tuos custodire digneris. Esto nobis Domine in procinctu suffragium, in via solatium, in æstu vmbraculum, in pluuia & frigore indumentum, in lassitudine vehiculum, in aduersitate præsidium, in lubrico baculus, in naufragio portus; vt

Ex Breuiario Romano.

te du-

te duce, quò tendimus, prosperè perueniamus, & demum incolumes ad propria redeamus: Per Christũ Dominum nostrum. Amen.

ADMONITIO.

Matth. 6.

Egressus domo sepositis nonnihil curis secularibus & negotijs externis, ante omnia satisfacito Saluatoris nostri præcepto, dicētis; Quæ rite primùm regnum Dei & iustitiā eius, & hæc omnia adiiciētur vobis. Deus enim victum, amictum, defensionem & cetera vitæ commoda largitur his, qui ante omnia illum colunt & venerantur, eiusq; iustitiam diligunt. Sic in veteri testamento præceperat Deus quotidie offerri sacrificium matutinum, vt populus ante omnia negotia externa, quæ salutis erant cum Deo tractaret. Sic in nouo testamento primi Christiani antelucanos cœtus celebrabant, in quibus omnes hymnis & canticis Deum collaudabant. Laudandus est & antiquus Christianorum ritus, apud quos religio erat, si quis ad seculares occupationes manum misisset, priusquam Missæ sacrificio interfuisset: aut manum ad panem materiale extendisset, priusquam animum suum pane illo supersubstantiali, hoc est, Eucharistico, spiritualiter saltem (quod sacramentaliter faciebant quotidie fideles Ecclesiæ primitiue) verboq; diuino (si festus erat dies) refecisset. Orationes, igitur sub augustissimo hoc Missæ

sacris

sacrificio legenda, ponuntur infra capite secundo.

ORATIO ANTE

12

Concionem.

LAETARE & exulta anima mea, quia Dominus benefecit tibi, & misericordiam suam inclinavit super te, relinquens tibi semen diuini verbi sui; quod nisi reliquisset, omnes quasi Sodoma fuissetus, & quasi Gomorrha similes essemus. Non enim est instrumentum potentius ad operandam salutem, quam verbi diuini ministerium. Vt enim tu, ô Pastor & Doctor populi tui, omnipotens es; ita & sermo tuus potestate plenus est. Tuum enim verbum, non minùs quam tu ipse suscitatur mortuos, regeneratur viuos, sanat egrotos, cõseruat sanos, oblectat pios, reuocat impios, illuminatur cæcos, accendit tepidos, consolatur mœrentes, desperantesque confirmat.

Pleraque
ex concione 2 Gra
naten. de
Sexages.
Esa. 1.

Infelix & miser ego peccator, quotidie verbum tuum audio, & nihil horum effectuum in me sentio. Si verbũ tuum, ô Deus, lumẽ sit, cur animi mei tenebras non discutit? Si panis sit, quomodo ieiunus adhuc & famelicus perduro? Si vinum, cur amore tuo non inebrior? Si medicamentum, cur tot vitiorum morbis oppressus iaceo? Si malleus, cur duritia cordis mei tot eius ictibus percussa non frangitur? Si ignis, cur tui charitate adhuc algeo? Si denique semen sit, cur

D

toti-

toties iactum in terra cordis mei vix vltimum pietatis fructum refert?

Collector

Fateor Domine, non est hæc verbi tui impotentia, sed cordis mei duritia. Verbum tuum vini & energiam suam non amisit, sed animus meus sensum & vitam perdidit. Diuturna namque consuetudo audiendi verbum tuum quasi callos in anima mea obduxit, vt nihil sentiat, promissionibus non moueatur, minis non terreatur. Vereor igitur ne in me locum habeat illa tui Apostoli maledictio; Terra venientem super se bibens imbrem, proferens autem tribulos & spinas, ijs à quibus colitur reproba est, & maledicto proxima, cuius consummatio in combustionem.

Heb. 6.

Hier. 7.

Tu mittis seruos tuos prophetas per diem ad me surgens diluculo; tu manes, tu nona, tu vndecima hora conducis & mittis operarios in vineam tuam. Non defunt operarij, & quidē idonei, in messe tua. Sed quid prodest mihi, si idoneus sit Doctor, & ego non studeam, vt idoneus sim auditor? Idoneus autem esse non possum, nisi tu Domine dederis. Nisi enim Spiritus tuus auditorum corda repleat, ad aures corporis vox Doctorum frustra sonat. & in cassum homo exterius monetur, si intus cor eius tua gratia non repleatur.

Duo itaque ô salutis opifex oro, vt scilicet mittas Doctores ad nos à te edoctos, & spiritu sapientiæ ac bonitatis tue

instru-

instructos, vt non se ac res suas, sed te vnum & prædicare velint, quia boni; & sciant, quia sapientes. Huic autem, ex quo verbum tuū audituri conuenimus, de sapientiæ tuæ thesauris largire, quod in nos ad salutem nostram transfundat. Deinde & in me quæso cordis mei fenestras aperi, vt lumen tuū sanctissimum admittam: operetur in me verbum tuum effectus salutare: tanquam panis in via virtutis me alat ac sustentet; tanquam vinum diuinorum beneficiorum ac promissionum cōmemoratione me lætificet; sit mihi medicamentum animæ meæ morbos sanans; sit gladius qui vitia, libidines & cupiditates meas refect; sit malleus pectus meum emolliens; & ignis illud amore tui inflammās. Da, inquam, Domine, ne quod in me hac hora incidet semen præfocetur sentibus curarum huius seculi; ne exarescat siti & defectu roris sancti Spiritūs in tempore tribulationis; ne diripiatur ab aui- bus cæli: sed sancti Spiritūs calore & operatione confotum germinet in terra bona, & æternæ vitæ fructum proferat, vt te cognoscam, diligam, & laudē laude perpetua, qui es laudabilis & gloriosus in secula. Amen.

Origenes in Exodum.

Videte fratres nè fortè effluant quæ dicuntur, & pereant. Volo vos admonere religionis veritæ exemplis. Nostis qui diuinis

Audiant
hec qui in
concioni-
bus fabu-
latur, dor-
miunt, a-
nimo tra-
ctant quæ
foris sunt

mysterijs interesse consueuistis, quomodo cum
suscipitis corpus Domini, cum omni cautela &
veneratione seruatis, ne ex eo parum aliquid
decidat, ne consecrati muneris aliquid dilaba-
tur. Reos enim vos creditis (& rectè creditis)
si quid inde per negligentiam decidat. Quòd si
circa corpus eius conseruandum tanta vtimini
cautela, (& meritò vtimini) quomodo puta-
tis minoris esse piaculi verbum Dei neglexisse
quàm corpus eius?

13

ORATIO POST

Concionem.

Ioannes
Faber.

Domine Iesu Christe, æterne Salua-
tor, gratias tibi ago, quòd cibo ver-
bi tui me pauisti, & abundè refecisti: oro
te, vt apud me sit efficax & salutaris tui
verbi perceptio, ne sine fructu depereat
sementis illa cælestis. Custodi cor me-
um, & circunda sepimento gratiæ tuæ,
& per sanctos Angelos tuos prohibe, ne
auis infernalis ex corde meo auellat: sed
pectus meum tibi præpara, vt verbum
tuum conseruet, & veluti recens me-
moriæ inhæreat meæ. Tu es qui dixisti
per Prophetam tuum; Verbum quod
egredietur de ore meo, non reuertetur ad
me vacuum: sed prosperabitur in his, ad
quæ misi illud. Eia Domine prosperetur
verbum ex ore ministri tui iam audi-
tum in me; da vires, vt vita mea doctri-
næ iam perceptæ respondeat: da incre-
mentum verbo tuo, o cælestis Agricola,

Esa. 55.

vt

vt in me augeatur & crescat, vt sancto tuo elogio nō tantum ad cognitionem tuæ voluntatis perducatur; sed etiam impleam & exequar quod iubes & vis; & sic perseuerē vsque in finem, donec perueniam ad regnū tuum cæleste & sempiternum. Amen.

CVM QVOD OPVS

aggredimur.

14

Collector.

NOs in obscurissimam caliginem Protoplastorum nostrorum præuaricatione deturbati, ô fons æternæ Sapientiae, ignoramus quid tibi placeat, quid non; & quid nobis expediat, quid obsit. Ego nihilominus, ô benigne & misericors Deus, hoc opus arduum, si vires meas; leue & facile, si ad opem tuam asperoxero, nunc aggredior, nescius an hoc à me fieri velis, an itē mihi profuturum, an verò obfuturum sit. O Splendor diuinæ maiestatis, ô candor paternæ gloriæ, ô dator munerum, descendant queso cælitus in me tuæ gratiæ stillicidia, vt hinc voluntatem tuam cognoscam.

Non te latet in hoc opere mea intentio, quæ non est alia, quàm illud ad tui nominis gloriam, proximorum vtilitatem, & meam salutem perficere. Si me fallat mea existimatio, dissipa consilium meum, inuerte propositum; fiat voluntas tua, nō mea: & vt olim Dauidem cogitantem tibi ædificare domum à suo instituto deterruisti; sic me quàm lon-

2 Reg. 7.

gissimè ab hac mente meā abducas sequentem oro, vel etiam repugnantem abstrahas & auellas: hominis enim est proponere, tuum autem disponere.

Rom. 7.

Psal. 126.

1. Cor. 3.

Sed etsi opus hoc boni spiritûs instinctu conceptum sit, vt deinceps aggrediar, mea me terret infirmitas: velle bonum mihi adiacet, perficere autem non inuenio. Nisi enim tu ædificauis domum, frustra laborat, qui ædificat eam: omnis namque sufficientia nostra ex te est.

Sap. 8.

Iud. 13.

Ad te igitur, ô in altissimis habitans, Deus, & Pater omnipotens, corde humili, affectu pio, oratione deuota cōfugio; tuum in hoc opere inchoando suffragium flagito. Intelligis enim tu profunditatem ignorantiaē meæ, virtutum inopiam, bene agendi inertiam, morumque meorum deformitatem maximam, quæ vniuersa ad huiusmodi peragendū opus efficiunt me indignum. Da mihi ergo sapientiam sedium tuarum assistricem: mitte illam de cælis sanctis tuis, vt mecum sit, & mecum laboret. Cōfirma me Domine Deus Israel, & respice in hac hora ad opera manuum mearum; tribue mihi robur, fer opem, da auxilium ne in hoc opere perficiendo malignus me Spiritus impediat; peruersorum hominum oblocutiones ab eo me reuocent; ipse alibi peccem, aut ante operis finem deficiam: sed te tanto moderatore & rectore omnia ritè instituiam & peragam,

Iesu

Iesu Christo mediatore, qui est Deus in secula benedictus. Amen.

REGVLÆ QVÆDAM PRV-
dentia in rerum agendarum deliberatio-
nibus obseruande.

I. *Negotia nostra Domino Deo commēdemus.*
Deprecare Deum, inquit Sapiens, vt di-
rigat in veritate viam tuam : Ante o-
mnia opera tua præcedat verbum verax,
& ante omnem actum tuum consilium
stabile.

Granatē-
sis lib. 2
Ducis pec-
cat. par-
te 2.
Eccli 37.

II. *Perpendamus summa cum diligentia non
tantum substantiam operis; sed singulas etiam
eius circumstantias; vna enim circumstantia,
si incōueniens sit, bonitatem totius operis non
nunquam euertit.*

III. *Consulamus alios, & cum alijs confe-
ramus, quæ sunt agenda. Sint autem huiusmo-
di Consiliarij numero quidem pauci, fide verò
probatissimi. Et si plures consulantur, deter-
minatio tamen penes paucos sit.*

IIII. *Deliberationi instum temporis spatium
detur, vt temporis diuturnitate, & conuersa-
tionis longitudine hi, quorum consilijs vtimur,
an boni sint, an mali, cognoscātur : sed & eo-
rum sententiæ propiùs examinentur & pro-
beantur.*

V. *Quatuor noueræ veræ prudentiæ diligen-
ter euitentur; quæ sunt præcipitatio, affectus,
pertinacia, vana ineptia. Præcipitatio nam,*

que non deliberat, affectus excæcat, pertinacia bonis consilijs portam occludit, & vana ineptia, quamcunque deliberationem ingreditur, eam sine fructu dissoluit.

VI. Extrema fugiamus: Virtus enim & veritas mediū tenent. Nunquam igitur omnia simul sunt reprehendenda, nunquam omnia simul probanda: nunquam omnia negare, nunquam omnia credere, nunquam omnia non credere debemus: nunquam ob delictum paucorum damnandi multi, nunquam ob sanctitatem aliquorum omnes iustificandi sunt.

Valet hæc
regula in
Ethicis nō
in dogma-
ticis.

VII. In æstimandis rebus non semper ad antiquitatem est respiciendum: multa namque longo iam tempore pessimè vsurpata sunt, & multa quæ optima, non ita pridem inuenta sunt.

VIII. Figuris & rerum apparentijs ne decipiamur cavendum est: non enim omne quod fulget aurum est; nec bonum omne, quod bonitatis habet speciem.

15

GRATIARVM ACTIO

opere iam perfecto.

Collector.

Apoc. i.
Ioan. i.

HUMANI generis Redemptor, ô dulcissime Domine Iesu Christe, qui es α & ω, principium & finis, per quem facta sunt omnia, & sine quo factum est nihil, qui pensas vota, coronas merita, & confers præmia; tibi gratias ago, quòd opus te præueniente inceptum, tandem

te co-

te cooperante absolui. Tuum nunc est, o bone Iesu, valorem eius ponderare : si quid in eo peccatum, id omne meum est: si quid oculis tuæ Maiestatis gratum, id omne tibi acceptum fero. In peccatis namque concepti, in peccatis nati, & in peccatis enutriti, quid aliud nisi peccare possumus? & bonum quomodo operabimur, nisi tu dederis Domine? Non inuenit in sacco Benjamin frater Ioseph aurum, nisi quod ipse posuerat: nec tu, bone Iesu, in pectore nostro bonum inuenies, nisi quod ipse præstiteris. Vtinā, Domine, utinam in pectoris nostri sacco gratiæ tuæ scyphum clementer abscondas, & piè inferas, hac lege, ut in quo beatum furtum inuentum fuerit, tibi seruiat in æternum: nam tibi seruire regnare est. Reliquum nunc est, Domine, ut qua misericordia opus hoc mecum operatus es, eadem nunc ad optatum scopum & finem dirigas, ne fructus illius mihi vel proximo pereat.

Quod si pro singulis tuis erga nos beneficijs gratias tibi essemus acturi, beneficentissime Iesu, tota esset in eo vna vita nostra consumenda, ut nulla alia de re conueniret nos cogitare: nunc autem aliò subinde nos vocat nostrum officium, aliud exigit nostra vocatio: noua tamē tua beneficia noua semper gratiarum actione sunt excipienda. Quare & ego pro eo quod tam fideliter in me, & per me, licet vile & indignum instru-

mentum tuum, hoc opus operatus es, tibi benedico, te laudo, te glorifico.

Sed & da mihi, Domine, nō tam gratias tibi agere, quā habere : hoc est, benignitatis & munificentiae tuæ erga me continenter recordari, vt cū me experiare non ingratum, pergas dona tua in me augere, quousque per hæc tua perueniam ad te fontem bonorum omnium perennem & totius beatitudinis. Amen.

16

CVM OPVS ALIQVOD NO-
strum bonum Deo volumus offerre.

August. in
psal. 137.

Domine Deus, Pater cælestis, obnixè Maiestatem tuam deprecor, & impetrare desidero, ne opera manuum tuarum despicias. Opus tuum in me vide, non meum : nam meum si videris damnas, tuum si videris coronas : quia & quæcunque sunt opera bona mea, abs te mihi sunt, & ideo tua magis, quā mea sunt. Audio quippe ab Apostolo tuo ; Gratia salui facti estis per fidem, & hoc non ex vobis ; sed Dei donum est. non ex operibus ; ne fortè quis extollatur. Ipsius enim sumus figmentum creati in Christo Iesu, in operibus bonis. Ergo siue in eo quod homines sumus, siue in eo quod ex nostra impietate mutati & iustificati sumus Domine, opera manuum tuarum ne despicias. Amen.

17

CVM NOS AD STVDI-
um paramus.

Nos

NOs quotquot sumus, naturæ quodā occulto instinctu scire desideramus: sed adeò densis in tenebris versamur, vt nedum quæ oportet, sed & quomodo scire oportet, ignoremus. Primi namque peccati pœna est, quòd lux ista naturalis, qua in statu innocentie noster intellectus illuminabatur, nunc extincta sit, & nos quasi cæci palpemus parietem & quasi absque oculis attrahemus.

Ad te igitur ô in altissimis habitans & in paterno gremio residens Sapientia recurro, illumina quæso mētem meam, & cor docile tribue, vt veritatem, quæ tu ipse es, cognoscā, sequar & teneam. Scire quidem appeto, quia legi te repellere eos qui scientiam repellunt: legi, quòd qui docti sunt fulgebunt quasi splendor firmamenti, & qui ad iustitiam erudiunt multos quasi stellæ in perpetuas æternitates: sed quia nescio quomodo scire oportet, tu quæso modum & ordinē monstra, da vt id prius discam quòd maturius est ad salutem, id ardentius quòd vehementius est ad amorem. Da ne scire cupiam ad inanem gloriam, non ad curiositatem, non turpis quæstus gratia, sed tantum ad ædificationem cum propriam, tum etiam proximi.

Tu ô Creator omnium, ô meridiana lux, ô electorum merces, tu scis profunditatem ignorantie meæ; sermonis mei imperitia, virtutum inopia, bonaque & salutaria discendi inertia à te non est

abscondita. Veruntamen ô increata Sapientia, quæ ad libitum tuum de impio iustum, & de ignaro repentè & sine mora doctum facis, emitte de sede Maiestatis tuæ lucem & veritatem tuam, vt illuminet tenebras meas, tribuatque mihi licet indigno castorum tuorum eloquiorum intelligentiam. Fac me sapientio rem & meliorem, vt in alios quoque de isto tuo lumine transfundam quod mihi impartiris. Nihil industriæ, nihil solertiæ, nihil ingenio meo tribuo, (scio enim omnes qui rectè sapiunt, te docente sapere) sed abs te expecto, vt aperias mihi thesauros sapientiæ tuæ.

Adesto, adesto igitur ô splendor diuinæ Maiestatis, ô candor paternæ gloriæ, ô dator munerum, adesto precor mihi, & de altitudine sedium tuarum illabere micanti lumine gratiæ tuæ in cor serui tui, reucla mihi incerta & occulta sapientiæ tuæ, vt te solo intus docente intelligam non quæ carnis suadet prudentia, sed quæ cælestis probat sapientia: intelligam autem ad sobrietatem, & ne dum alios bonos reddam, memetipsum arrogantem & malum faciam: sed primùm ad meam vtilitatem, quidquid mihi à te datum fuerit, conuertam; deinde à me in proximum dimanet: vt beneficio huius imperfectæ scientiæ, tandè perueniā ad contemplationē perfectissimæ Sapientiæ, quæ tu ipse es, qui viuis & regnas Deus per omnia secula seculorū. Amen.

CVM HORAE SI-

gnum auditur.

18

Benedicta sit hora, in qua Dominus meus Iesus Christus natus & mortuus est pro nobis. O Domine in hora mortis memento mei. Amen.

Granat.
in præfat.
lib. 4 de
Orat. &
Meditat.

Deinde cogita, quomodo vita tua iam hora breuior est, quàm antè fuit: & sic telam tuam paulatim abrumpi.

ALIA PRECATIVNCULA,

cùm elapsæ horæ signum auditur.

19

Domine Iesu Christe, qui transacti temporis rationem à singulis exiges, precamur ne vnquam malè, sed ad tuam gloriam horas collochemus, & te suggerente imminentem hanc horam poenitentia fracti vltimam nobis esse cogitemus. Amen.

Timäus
Borkensis
in suo En-
chiridio.

ORATIO ANTEQVAM

cibum sumamus.

20

Admirandum mysterium operis tui est, ô fabricator & rector mundi, vt cibis istis hominum & animantium vitas sustentēs. Profectò non est in pane atque obsonijs ea potētia; sed in voluntate & verbo tuo, quo vno viuūt & consistunt omnia. Tum & illud quantum est, te in annos singulos sufficere, vnde tot animantibus alendis sit satis? Quod sanctus Propheta tuus in enarratione laudum tuarum dixit; Spectare ad te

Lodo. Vi-
ues in pre-
cib. diur-
nis.

Psal. 144.

Pfal .144.

omnia, vt tu des illis escam in tempore opportuno. Aperis tu manum tuam, & imple omne animal benedictione. Hec sunt mirabilia omnipotentiae tuae opera. Rogamus te Princeps & Pater magnificentissime, vt qui vitam nostris corporibus subministras cibis per verbum tuum; animos quoque nostros gratia per idem verbum tuum viuifices.

Fac nobis adsit auxilium tuum, ne praeue abutamur ijs, quae tu ad nostros rectos vsus condidisti: non te amemus, quia tu illa das; sed illa diligamus, quia veniunt abs te, & ad tempus nobis sunt necessaria reuertentibus ad te. Sobrie, pure, moderate, sancte versetur inter tua dona, qui es talis, ne quae tu largiris nobis tanquam medicinam vitae corporae, nos in venenum conuertamus mortis animae. Quin potius recte ea sumendo, & animo grato, fiant nobis corpori atque animae salutaria; vt digni simus, quos merito tanquam Pater charissimos filios saluberrimis alimentis enutrias, donec ad perfectionem illam ventum sit filij tui Iesu Christi, in qua mortale hoc induet immortalitatem, nec amplius alimoniae indigebimus, facti vnum cum te ipso, qui es benedictus in secula. Amen.

PRAECEPTA INTER
edendum seruanda.

Ecclesiastici 31 Capite.

Vtere

Vtere quasi homo frugi quæ apponuntur, vt non cum manducas odio habearis. Cessa prior causa disciplina, & noli nimius esse, ne forte offendas. Et si in medio multorum sedisti, prior illis ne extendas manum tuam, nec prior poscas bibere.

Ex Grana
ten. Ducis
peccat. li-
bro 2. par-
te 2.

Bernardus in Epistolis.

Observandus est cibi modus & tempus, quantitas & qualitas; fugienda quoque sunt superflua & adulterina condimenta. Obseruandus est modus, vt non effundat, qui comedit, animam suam super omnem cibum. Tempus, ne ante horam: Qualitas, quibus vitur communitas fraternitatis; excepta causa manifesta infirmitatis.

Gregorius libro 5 Moralium.

Abstinentia est quæ edendi horam non præuenit, vt fecit Ionathas in fauo mellis: non lautiora querit edere, vt Israelitæ in deserto: non accuratiùs parare, vt filij Heli in Silo: non ad superfluitatem, vt Sodomitæ; non vile quodlibet, vt Esau edulium in fame concupiuit.

Epictetes Philosophus.

In conuiujs memento duos tibi hospites nutriendos, corpus & animam: & quidquid in corpus contuleris, id statim effundi; quod autem in animam, perpetuò seruari.

Anacharsis Philosophus.

Primum poculum quod infunditur sanitatis

est;

est; alterum voluptatis; tertium iniuriæ;
quartum insaniæ.

Hieronymus in Epist. ad Furiam.

Parcus cibus & venter semper esuriens
triduanis ieiunijs præfertur; & melius est
quotidie parum, quàm semel satis superfluè.
Pluvia illa optima est, quæ sensim descendit in
terram. Subitus & nimius imber in præceps,
arua subuertit. Plura vide apud Granatensem
loco citato & lib. 3. de Oratione & Medita-
tione parte 2.

21

ORATIO POST SVM- ptum cibum.

Collector.

DVplicem edacitatem, ô beneficen-
tissime & liberalissime Pater, in
membris nostris sentimus: hinc calor
naturalis quotidie consumit aliquid de
corporis nostri substantia; illinc non
naturalis, sed noxia concupiscentia ali-
quid absument eius, quæ in animabus no-
stris te largiente nobis est, iustitiæ. Si cor-
pus, Domine, corporeis cibis non repa-
res, & quotidie fulcias, moritur, & quæ
in eo est, vita naturalis extinguitur: Ani-
mam autem nisi quotidie noua gratia
reficias, infirmatur primò, & moritur
tandem, non morte huius temporis, sed
æterni. Vt enim duplex est nostra sub-
stantia, ita duplex nobis alimentum est
necessarium. Oramus itaque Domine,
vt panem des corpori quotidianum; ora-

mus

ambulant. Palpant sicut cæci parietem,
 & quasi absque oculis attrectant: impin-
 gunt meridie quasi in tenebris, in caligi-
 nosis quasi mortui. At ijs qui tecum ver-
 santur, nunquam non dies est lucidissi-
 ma. habet hic sol æthereus vicos suas;
 oritur, occidit, accedit ad nos, & recedit:
 sed tu, Domine, si te verè diligamus, vi-
 ces nullas habes. oriris semper, occidis
 nunquam: accedis ad nos, & manes no-
 biscum vsque ad consummationem se-
 culi. O oriens ex alto, illuminare mihi
 qui in tenebris sedeo, & in vmbra mor-
 tis. O splendor Patris, ô Sol æterne, illu-
 mina tenebras meas interiores, ne post
 hâc vitâ rapiar ad exteriores. O pijs-
 sime, ô dulcissime Iesu mane mecû, quoniam
 aduersperascit, & inclinata est iam dies.
 Quamdiu enim præsentia tua fruimur,
 in luce & claritate versamur: si verò à
 nobis recesseris, quid lætum, quid non
 triste nobis atque funestum esse queat?
 Cùm te præsentem habemus, tua dulce-
 dine pascimur, tua familiaritate frui-
 mur, inter humeros tuos requiescimus,
 internis tecum colloquijs oblectamur, à
 terrenis curis & cupiditatibus liberi, te
 summum bonum nostrum ducimus; te-
 cum habitamus, tecum viuimus. Omnia
 hæc bona pereunt nobis, si tu, ô æterna
 lux, nobis occidas. Mane igitur nobiscû
 Domine, obicemque peccatorû à nobis
 remoue, quo sit semper in nostris pecto-
 ribus dies, Mane nobiscum Domine.

Matth. 28.

Luc. 1.

Luc. 24.

AD PRECES VESPERTINAS
A D M O N I T I O.

Granat.
lib. 2 de
Orat. &
meditat.
cap. 9.

Memento sepiſſime commendari in lege duo ſacrificia quotidiana, matutinum & veſpertinum; quæ etiam omnis Chriſtianus debet ſpiritualiter offerre, ijs temporibus abſtrahens ſeſe ab externis occupationibus, vt vacet internis & diuinis. Quemadmodum enim bis vacamus in die corporis reſectioni, in prædico ſcilicet, atque in cœna: ſic etiam bis vt minimum animæ reſectioni vacandum eſt. cùm hæc non minoris, imò multo maioris ſit dignitatis, quàm corpus: nec minùs ei ſuus cibus eſt neceſſarius, quàm corpori ſuus.

Orationi matutina multum proderit, ſi hoc mo antequam ſeſe ad ſomnum componat aliquamdiu orauerit; manè namque inueniet in corde ſuo fructum eius ſementis, quam veſperi fecerat: quemadmodum is qui veſperi carbonem igne tegit, vt tanto facilius poſtridie focum ſtruat, & rogam accendat.

Antequam igitur lectum intras, hæc præmittantur: Examen conſcientiæ, Gratiarum actio, Petitio, ſeu commendatio.

I. Homo priuſquam ſomno ſe tradat, conſcientiam ſuam diligenti ſcrutinio diſcutiat, videatq; quid opere, quid verbo, quid cogitatione vel alio quocũque modo illo die peccauit. Pri-
mò an lingua lapſus ſit, an mentitus, an crea-

turas Dei Daemonio vouerit, an blasphemias, diras, calumnias, & detractiones locutus fuerit; an inhonesta, an otiosa verba protulerit. Secundo, qua cum diligentia malis cogitationibus restiterit; an in ijs aliquamdiu haeserit, an ijs sese oblectauerit, an eas serio & instar ignis infernalis scintillas à se reiecerit. Tertiò, perpendat quomodo illo die sensus exteriores custodierit, præcipuè visum & auditum. Quarto, recogitet quibuscum eo die conuersatus sit, quid cum ijs tractauerit, quid apud illos locutus sit, & num eos destruxerit seu offenderit potius quàm edificauit. Vltimò, examine opera sua tam commissa, quàm omissa. consideret quomodo tēpus & horas illius diei collocauerit, an vocationi suæ satisfecerit; an quæ domus & familie sunt rectè curauerit &c. Probatum hoc consilium à multis Sanctis; Vide Eusebium Emisenum homilia nona ad Monachos. Et à Philosophis Ethnicis, vide Senecā lib. 3 de ira ad Nouatum, cap. 36.

Pythagoræ dictum.

Neque somnum in mollibus oculis suscipe, antequam diurnorum operum ter vnumquodque percurras. Quo transgressus sum? quid feci? quod mihi decens perfectum non est? incipiens à primo, percurrere, & qui mala operatus es, dole: qui bona, letare. Hac labora, hac meditare.

*Quomodo examinanda est conscientia, vi
de apud Bernardum libro Meditat. cap. 5.*

*Postquam conscientiam hoc modo exami-
nasti, statue ante oculos tuos omnia peccata,
quæ die illo commisisti, eaq; Domino cum ama-
ritudine cordis confitere, veniamq; postula, hac
vel simili oratione.*

25

CONFESSIO VE- spertina.

Ex diuer-
sis.

Confiteor tibi peccata mea æterne
Pontifex, sanctorum minister, &
veri tabernaculi sacerdos, qui semel in
anno huius seculi in mystica sancta in-
trasti, & sanctum atque immaculatum
agnum proprii corporis tui ad hostiam
dedisti, pro peccatis nostris: Tibi confi-
teor, quia debitor tibi sum; Non solum
decem millia talenta delictorum meo-
rum, sed totius vitæ meæ rationem red-
dere debeo: quia in omni vita mea nul-
lum mandatum tuum perfectè à me cu-
stoditum scio, in quo ego sermone, visu,
auditu, gustu, opère, cogitatione, suasio-
ne, aut consensu non deliqui. Sed nunc,
Domine, præuenio faciem tuam in con-
fessione, & in conspectu Angelorum &
Sanctorum tuorum omnium confiteor
tibi omnia peccata, quibus hoc die Ma-
iestatem tuam offendi, præsertim hæc;
Hic recitentur, si quæ sint, grauiora. Nec
tantum hæc, sed & omnia alia confite-
or, quæcunque ab infantia mea vsque in

hanc

hanc horam commisi, scienter vel ignoranter, in factis, in verbis, in cogitationibus & omissionibus. Qui & summam tibi malam arborem cordis mei expono, cum omnibus suis radicum fibris, folijs, fructibus; & cum omnibus suis deformitatibus, tuberibus & carie, cuiusmodi omnia tibi nota sunt. Nam perspicis non minus interiores cupiditates, dubitationes, prouidentiae negationes, quam crassa haec externa, quae in sermone & factis perperam admittimus.

Proinde, o clementissime Pater, pro modulo imbecillitatis meae te oro (quam admodum inidoneus sim ad orandum) da veniam erratis, ignosce delinquenti, & obliuiscere omnium peccatorum meorum, cum quae hoc die commisi, tum etiam quorumcunque me ab infantia mea reum nosti. Cor quoque meum planè lapideum benignè circuncide, pro vetere hoc aliud nouum crea, nouoque spiritu affice. succo caelestis gratiae ac fontibus spiritualium aquarum irriga, quo internum venenum, & succus carnis noxius exiccetur, veteris hominis consuetudo vertatur, & cor meum non semper tribulos & spinas ad materiam ignis, sed fructus spirituales in iustitia ac sanctitate ad vitam aeternam post hac proferat. Amen.

ADMONITIO.

Hic examini Conscientiae addatur specialis

Granat.
lib. 2 de

Orat. &
Meditat.

cialis aliqua pœnitentia, secundũ peccati qualitatem, vt in posterum tanto diligentius te à peccato simili abstineas.

Firmum quoque propositum fiat, singulis septimanis velle te vt minimum vnum peccatum superare, & ab illo disuescere.

Si subinde per diem cadas, caue desperes: sed simillies vno die cecideris, millies eodem resurge, sperans in ineffabili misericordia Dei.

Si quæ passiones acedũ duræ sint, & familiares, vt insuperabiles videantur, noli animum abijcere: saepe enim post aliquot annos citò vincitur, quod longo tempore vinci non potuit, vt constet homini, vnde sit victoria.

Deinde age Deo gratias, quòd illo die te custodiuit ab omni malo, tam corporis, quàm animæ; & dic:

26

GRATIARVM ACTIO

Vespertina.

Collector.

ECce, Domine, tot & tanta sunt delicta mea, quibus tuam hodie Maiestatem offendi; & tempus quod mihi ad agenda pœnitentiam dederas, tam inutiliter consumpsi; immemor diem hunc vitæ meæ postremum esse potuisse; noua veteribus peccata cumulans, & in conspectu tuo, qui vides omnia, absque vlllo timore, haud aliter, quàm in cōspectu idoli alicuius ambulans: Qua-

propter

propter dignus eram quem terra dehisceret, & quem infernus absorberet. Sed quòd funestum hoc supplicium me non inuoluit, infinitæ misericordiæ tuæ labijs & corde, & omni qua possum virtute gratias ago.

Tu namque, ô Domine, me hodie ab omni infortunio corporis & animæ clementer conseruasti; nullum enim in orbe malum est, corporale vel spirituale, quod hodie mihi accidere non potuisset. Nam quod in alium hominem cadere potest, in me cur cadere non posset? Si enim ille filius Adæ sit, & ego sum: si ille in originali peccato conceptus, & ego sum: si ille peccatis actualibus obnoxius, & ego: si eius corpus ex humoribus atque elementis pugnantibus formatum sit, & meum est. Si ergo ille hodie cæcus factus sit, cur non & ego excæcari potuissem? si contractus, si syncteticus, si phthisicus, lymphaticus, dysentericus, lienosus, paralyticus factus hodie sit alter, cur & ego factus nō sum? si hic aqua perierit, ille igne, iste morte inopinata & subitanea extinctus sit, cur non sum & ego, qui in eadem eram cum illo damnatione? cur Domine? cur, inquam, nisi quia tua, ô clementissime Domine, gratia me cōseruauit, tua me protexit misericordia: Quòd igitur incolūmis, quòd sano & robusto sum corpore, tibi acceptū fero, & immensas tibi gratias ago.

August. in
Soliloq.
cap. 15.

Pares, imò etiam maiores tibi gratias ago, mi Pater, quòd non minùs animam meam à vitijis, quàm corpus à morbis & infortunijs hodie conseruasti: quòd cæcam illuminasti, & per viam mandatorum tuorum deduxisti; cadentem erexisti; stantē, ne caderet, sustinuisti. Quòd misericordia tua præuenit me, liberans me ab omnibus malis, saluans à præteritis, suscitans à præsentibus, & muniens à futuris: præcìdens etiam ante me laqueos peccatorum, tollens occasiones & causas; quia nisi tu hoc & illud mihi fecisses, ego omnia peccata mundi fecissem: quoniam scio Domine, quòd nulum peccatum est, quod vnquam fecerit homo, quod non facere possit alter homo, si Creator desit, à quo factus est homo. Sed quòd non facerem, tu fecisti: quòd abstinerem, tu iussisti, & quòd tibi crederem, gratiam tu infudisti. Tu namque, Domine, regebas me tibi, seruabas me tibi, & mihi, vt adulterium & omne aliud peccatum non committerem, gratiam & lumen per Iesum Christum filium tuum donasti; tibi laus, tibi gratia, tibi gloria in secula seculorum. Amen.

Tandem Deo te commenda.

27

NOCTVRNA PRECATIO
qua iturus cubitū Deo te commendabis.

Ioannes
Faber.

Domine Iesu Christe Deus & Redemptor meus: Quandoquidē miseris

seris mortalibus placidum noctis tempus ad quietem & refectiorem infirmi corporis condidisti, atque ordinasti; Te oro, vt in hac nocte animam meam peccatis grauata, in te, ô Deus, qui es vera & æterna requies, munitam vera pace custodias, & serues ab omnibus inimici Diaboli insidijs, & ab omnibus noxijs eius incurfionibus; defendas sensus & cogitationes meas, & omnia quæ facio, & in quibus cesso, secundum tuam voluntatem ordines ac dirigas, ne in tenebris deprauati huius mundi, à Principe eiusdem Diabolo superatus in anxietate, tentationem & perniciosos laqueos inducar: sed perface in me veram tranquillitatem, & constantem puritatem in mea conscientia. Da etiam, mitissime Iesu, corpori meo, multis delictis contaminato, per noctem hanc, & alio quouis tempore talē quietem, vt nunquam à te, æterna tranquillitate, discedam, neque te deferam; aut ex tepore & desidia inertis meæ carnis tui obliuiscar, & sic in perpetuam irrequietæ molestiæ agitationem & damnationem detrudar.

Quapropter, ô æterne ac clementissime Domine, spiritum meum in manus tuas commendo. Tu enim, pijsime noster liberator, in ligno crucis nos redemisti: Ne finas, ô Deus, spiritum meum in peccatis obdormire, & languescere, ne in mortem sempiternam sepeliar. Sed euigila super me, pro custodia mea ex-

Psal. 16.

cuba Pastor fidelissime, ne permittas vt auxilio tuo destitutus in peccatorũ voraginem dilabar. Sub vmbra alarũ tuarũ me protege, ne patiaris me vltra iustũ & necessarium tempus somno opprimi; sed tempestiuè me suscita: vt sic expergefactus ad tuam laudem & seruitia tua alacris accedam, vt de te cogitem, & tuo præsentì excitatus numine, opera iustitiæ perficiam, regnum tuum cæleste toto ex corde quæram, vt tandem per te, & tecum, & in te ad æternam lucem & requiem cælestẽ possim peruenire. Amen.

28

ALIA ORATIO ANTE

somnum D. Ephræm.

Seuerus
Patriar-
cha Ale-
xand. in
precib. Sy-
rorum.

TRibue mihi Domine, vt ego vigilans vigilanter in conspectu tuo consistam; & quoties dormire mihi contingat, sit sine peccato somnus meus: si verò in excitatione mei quicquam iniqui admisero, per gratiam tuam Domine mi veniam tribue; & in dormitione mea si peccauero, sit clementia tua cõdonatrix, & per depressionis tuæ Crucifixum quietis somnum mihi dato, meque à malis somnijs, fœdisque imaginationibus liberato, & in somnum tranquillitate plenum tota nocte me inducito, ne dominantur in me mala, & cogitationes peruersitate plenæ. Angelum lucis da mihi, qui omnia membra mea custodiat, & ab execranda concupiscentia libera me, per corpus illud viuum

* quod

* quod pro me traditū est. Cubitū eam, & in quiete dormiam, sanguisque tuus sit custos meus, animæque meæ, quæ tua imago est. Confer libertatem figmento tuo, & corpus quod effinxerunt manus tuæ protegat dextera tua, & circunda me muro misericordiarum, tanquam acceptabili præsidio, & clausione; vt cum quieuerit ac dormierit corpus à virtute tua custodiatur, & veluti suffitus aromatum sit somnus coram Maiestate tua: nec accedat Malus ad cubile meum, intercessione illius, quæ te peperit. Audiam & exequar voluntatem tuam Domine mi, qui noctē quoque cumulas tranquillitate iustitiæ Iesu Christi redemptoris nostri; quia tu es lux vera, & in luce habitat gloria tua, & filij lucis te adorant in luce commorantem. Iesus Verbum Deus ad vitam, defunctos per Crucem tuam conserua, parce propter misericordiam tuā: atque tibi Patrique tuo, qui te misit, & Spiritui sancto laus detur in omni tempore. Amen.

* quod comedi, habet textus.

ADMONITIO.

Ingrediens lectū signa te signaculo S. Crucis, & compone te ad modum, quo iacebis in sepulchro, lectum tumulo comparans: & meditare paululum quis erit situs & figura, quam corpus tuum in tumulo computrescens habebit. recita quoddam responsorium, aut orationem Dominicam, cum salutatione Angelica, quem

Granat.
in præfat.
lib. 4 de
Orat. &
Meditat.

Idem lib.
2 de Orat.
& Medit.
cap. 14.

admodum ad sepulchra mortuorum fieri consuevit.

Optimè facturus est homo, si quotidie cubitum ierit cum sancta cogitatione: quemadmodum enim is qui vesperi carbones cineribus tegit, ut ignis manè in promptu sit: sic manè facile inuenit affectum orandi, qui vesperi cum oratione, aut pia cogitatione indormit.

Quotiescunque nocte expergisceris cor ad Deum eleua, dicendo; Gloria Patri & Filio, &c. aut alium pium versiculum. Multum enim hoc prodest ad fugandas illusiones Demonis, malasq; cogitationes: solet enim Demon nocte hominem magis quàm alio tempore infestare. In sanctum Dauidis lectulum, ait Hieronymus, quem ille per singulas noctes lachrymis suis rigabat, Diabolus cum omni voluptatum suarum pompa accessum habuit.

ORATIONES IACVLATORIAE SEMPER IN PROMPTU HABENDA.

Semper orandum esse monet Christus, monet Apostolus, monent & sancti Patres. Sed cum id ore simul & corde ab homine tot, tantisq; necessitatibus circumuento difficulter fieri queat, eum semper orare dicunt nonnulli, qui cor semper ad Dominum habet eleuatum. Vtilissimum igitur est interdum noctuq; cor saepe succinctis oratiunculis, quas iaculatorias

vocant, ad diuinæ Maieſtatis memoriam excitare. Hoc olim Patres feciſſe, ait D. Auguſtinus; Fratres, inquit, in Ægypto crebras quidem orationes habent, ſed eas breuiſſimas, & raptim quodammodo iaculatas, ne illa vigilantia erecta (quæ oranti plurimum neceſſaria eſt) per productiores moras euaneſcat. De uſu atque utilitate harum orationum conſule Lod. Granat. lib. 2. de Orat. & Meditat. cap. 8. Nos in gratiam piorum aliquot huiusmodi orationunculas ex diuerſis collectas, hoc loco poſuimus.

Epist. ad
Probam.

Quando ſurgendum eſt, præparandus eſt animus ad deuotionem, ita vt ſeruenter exili-
as de lecto, & corpore diſcuſſo, gratias diuinæ
miſericordiæ agas, pro quiete indulta, pro cu-
ſtodia & protectione Angelica. deinde veniens
ad eccleſiam, pone manum tuam ſuper oſtium,
& dic; Expectate hîc cogitationes ma-
læ, intentiones & affectus cordis, & ap-
petitus carnis: Tu autem anima mea in-
tra in gaudium Domini Dei tui, vt vi-
deas voluntatem Domini, & viſites tem-
plum eius. Sicq; veniens ante Crucem, dic:
Adoramus te Chriſte & benedicimus
tibi.

Bernar-
dus in ſua
doctrina
circa finē
operum.

Pſal. 26.

Cùm aliquod opus aggredieris.

Deus in adiutorium meum intende.
Domine ad adiuuandum me feſtina.
Hic verſus in collationibus Patrū frequēs eſt.

Pſal. 69.

EX THOMAE A CAMPIS

*Hospitali pauperum Cap. 18.**Cum repentinus timor irruit.*

Psal. 60.

Esto nobis Domine turris fortitudinis a facie inimici.

Si caro putrida stimulet.

Psal. 118.

Confige timore tuo carnes meas; à iudicijs enim tuis timui.

Si prava suspicio influat.

Psal. 50.

Cor mundum crea in me Deus, & spiritum rectum innoua in visceribus meis.

Si mala tristitia te premat.

Psal. 50.

Redde mihi lætitiā salutaris tui, & spiritu principali confirma me.

Si vana gloria inflat.

Psal. 113.

Non nobis Domine n. & nobis, sed nomini tuo da gloriam.

Si desperatio molestat.

Psal. 70.

Spes mea Dominus à iuuentute mea, de ventre matris meæ tu es protector meus.

Si tedium mentem occupet.

Psal. 118.

Adiuua me & saluus ero, & meditabor in iustificationibus tuis semper.

Si acedia impugnet.

Psal. 79.

Excita Domine potentiam tuam & veni; confirma me in verbis tuis, ne deficiam in via.

Si labor aggrauet.

Psal. 24.

Vide humilitatem meā, & laborem meum, & dimitte vniuersa delicta mea.

Si iracundia perturbet.

Da patientiam Domine, & pacem ser-
uo tuo, ne perdam coronam animæ meę
in cælo: Tu enim dixisti; In patientia
vestra possidebitis animas vestras.

Lucæ 21.

*Si appetitus honoris & altior status
te alliciat.*

Inclina cor meum Deus in testimo-
nia tua, & non in auaritiā. Auerte oculo
meos ne videant vanitatem, in via
tua viuifica me.

Psal. 118.

Si gula te sollicitet.

Regnum Dei non est esca & potus,
sed pax & gaudium in Spiritu sancto:
Spiritus est qui viuificat, caro non pro-
dest quicquam.

Rom. 14.

Ioan. 6.

Si maligna cogitatio obrepat.

Cuius est imago hæc & superscriptio?
Et audiens, quia Cæsaris est, hoc est,
principis huius mundi Diabolī, dic; Pe-
cunia tua tecum sit in perditionem: Iam
ostium clausum est, & Dominus hīc
Pascha manducat, non vacat mihi ape-
rire tibi.

Bernar-
dus loco
citato.
Matt. 22.
Act. 8.

Si aliquod beneficium Dei occurrat.

Quid retribuam Domino pro omni-
bus quæ retribuit mihi? quantum debes
anima mea? & conuersus ad Angelos
dic; Venite audite & narrabo omnes
qui timetis Deum, quanta fecit animæ
meæ. Et ad ipsum Deum deflectens
oculis; Verè, inquires, Domine miseri-
cordia tua magna est super me.

Psal. 115.

Psal. 85.

In graui aliqua persecutione.

Pfal. 34.

Iudica Domine nocentes me, expugna impugnantes me. Apprehende arma & scutum, & exurge in adiutorium mihi.

Cum videris à Deo derelictus.

Pfal. 9.

Vt quid Domine recessisti longè? despicias in opportunitatibus, in tribulatione? Mane nobiscum Domine, quoniam aduersperascit.

Luc. 24.

Contra detractores.

Pfal. 11.

Saluum me fac Domine, quoniam defecit sanctus; quoniā diminutæ sunt veritates à filiis hominum: Disperdat Dominus vniuersa labia dolosa, & linguam magniloquam.

Pro inimicis.

Act. 7.

Domine ne statuas illis hoc peccatum, quia nesciunt quid faciunt.

Cum ad studium nos paramus.

Pfal. 118.

Benedictus es Domine, doce me facere voluntatem tuam; Reuela oculos meos, & considerabo mirabilia de lege tua.

Ex Granatenfi.

Lib. 2 de
Orat. &
Meditat.
cap. 8.
Pfal. 50.

Poterit homo nonnunquam cor eleuare per affectum pœnitentiæ, his verbis; Auerte faciem tuam à peccatis meis, Domine, & omnes iniquitates meas dele. Cor mundum in me crea Deus, & spiritum rectum innoua in visceribus meis.

Aliquando cum affectu gratitudinis.

Benedic

Benedic anima mea Domino, & noli obliuisci omnes retributiones eius. Psal. 102.

Nonnunquam cum affectu amoris.

Diligam te Domine fortitudo mea, Dominus firmamentum meum, & refugium meum, & liberator meus. Deus meus, adiutor meus, & sperabo in eum. Psal. 17.

Quemadmodū desiderat ceruus ad fontes aquarum, ita desiderat anima mea ad te Deus. Sitiuit anima mea ad Deū fontem viuum, quando veniam & apparebo ante faciem Dei mei? Fuerunt mihi lachrymæ meæ panes die ac nocte, dum dicitur mihi quotidie; Vbi est Deus tuus? Psal. 41.

Subinde amore beatitudinis eterne inflammatus dicat;

Quām dilecta tabernacula tua Domine Deus virtutum? concupiscit & deficit anima mea in atria Domini. Psal. 83.

Patribus in AEgypto familiare erat quod sequitur; Hieron. in Epist.

Quis mihi dabit pennas sicut columbæ, & volabo & requiescam? Psal. 5.

Plures huiusmodi oratiunculas, & ad pietatem stimulos passim obseruabit orationis studiosus per semetipsum, in Psalmis, cæterisque sacrarum Scripturarum libris. Suffi-

cit ex plurimis pauca posuisse.

CAPVT SECVNDVM,
CONTINENS ORATIO-
NES LITVRGICAS, QVÆ
sub sacrificio Missæ le-
gendæ sunt.

QVANTA CVM REVEREN-
tia in templo versari debeamus. ex con-
cione Alphonfi Villegæ de dedica-
tione templi S. Saluato-
ris Romæ.

Si templum Salomonis tanto in ho-
nore & reuerentia habebatur, in
quo erat Arca Domini; quanto
in honore habendum est templum,
vbi est ipse Dominus, videlicet in sanctissimo
Sacramento Eucharistia, verè & realiter &
substantialiter? vbi iam non immolatur san-
guis hircorum & taurorum, sed pretiosissimus
Christi sanguis, qui effusus est in ara Crucis?
vbi Christus sese obtulit hostiam viuam eter-
no Patri pro redemptione humani generis?
Quod etiam repræsentat Sacerdos quoties Mis-
sam celebrat. Hic etiam sunt in ecclesia no-
stra sanctissima Sacramenta, à Christo insti-
tuta, quibus curantur animæ nostræ infirmit-
tates. Siquidem vt aliquis robustus sit Christi-
miles, & intrepidè atque impavidè eius sancti-
ssimum nomen vbique profiteatur, datur
illi sanctissimum Confirmationis sacramen-

tum.

tum. Insuper ad locupletandam animam, & insigniendam pretiosissimis ornamentis & donis spiritualibus, ministratur sacratissimum Eucharistiæ sacramentum. Alijs etiam, vt copulentur sanctè inter se, ministratur sacramentum Matrimonij: illis autem qui vulnerati veniunt ex militia spirituali, & varijs sauciati vulneribus, ministratur sanctissimum Pœnitentiæ sacramentum. Vnde constat esse ecclesiam sanctissimã apothecam quandam, & pharmacopolium medicine spiritualis, & salubrium remediorum ad languores varios sanandos.

Est insuper ecclesia in qua continentur pretiosissimi Christi thesauri: in ea enim condonantur delicta: in ea dantur Spiritus sancti dona; in ea sunt magis meritorie orationes fidelium, atque facilius impetrant, quod petunt: in ea siquidem est scala illa Iacob, per quam ascendunt Angeli & descendunt, offerentes preces nostras Domino, & perferentes ad nos celestes consolationes: in hac etiam ecclesia sanctissima prædicatur Christi Euangelium, docetur observatio mandatorum Dei, laudantur virtutes, reprehenduntur vitia. Vnde fit vt alij compungantur, alij timeant, alij ad virtutem & Dei amorem vehementius incitentur.

In ecclesia fidelis anima cum Deo conuersatur, Deum laudat, Deum orat, à Deo beneficia

Matth. 28.

multa accipit. In ecclesia assistunt S. Angeli; ibi reperitur celestis curia, ibi Deus adest, ibi pollicitus est se adfuturum vsque ad consummationem seculi.

Quare sacra templa summo prosequamur honore, salutareq; illud Prophetæ consilium diligenter obseruemus, qui Psal. 92 inquit & monet admirabili, maximoq; honore afficiendum esse templum Domini in vniuersa terra. Dedecet igitur in eo omnis strepitus, omnis murmuratio, omnis impura actio, & denique quælibet etiam inanis & vana cogitatio: sed quæcunque in eo tractabimus sint ad honorem Dei: vnde fiet, vt amplissima à Domino beneficia consequamur, & eius misericordiam impetremus.

I

MEDITATIO QVA MENTEM ad deuotionem & reuerentiam erga tremendum Missæ sacrificium præparamus.

Ex diuersis.

Quid agis anima mea? quò vadis? solue calceamentum de pedibus tuis: locus enim in quo stas sanctus est. expecta modicum & videbis hîc visionem magnam: expecta modicum & faciet hîc Deus magna & inscrutabilia & mirabilia absque numero: expecta modicum & aperientur cæli, mirabuntur Angeli, sancti laudabunt, iusti exultabunt, captiui visitabuntur, compediti soluen-

tur,

tur, infernus vlulabit, sanctaque in spiritu mater ecclesia lætabitur.

Immolabitur enim hîc sacrificium, quo nullum maius, nullum vtilius, nullum amabilius, nullum oculis diuinæ Maiestatis gratius: oblatio quæ honorem Deo, Angelis contubernium, exulibus cælum, religioni cultum, iustitię debitum, normam sanctitati, obedientiam legi, gentibus fidem, lætitiā mundo, credentibus gaudium, vnitatem populis, sacramentis legalibus finem, initium gratiæ, virtuti robur, hominibus pacem, lucem mentibus, spem laborantibus, peruenientibus tribuit speciem. Nempe dolores mediatoris nostri, irrogata conuicia, excepta flagella, aceti & fellis pocula, clauorum & lanceæ vulnera ex rediuiua sacrificij huius celebratione, memorantur.

Offertur æterno Patri nati assumpta humanitas, quatenus agnoscat ipse quē genuit, quemque pro hominum salute misit in terras, vt interuentione ipsius delinquentibus veniam, lapsis manum, & iustificatis præroget vitam. Clamat idem Redemptor ad Patrem, corporales suas cicatrices ostendens, quatenus ab æternis supplicijs sua homines interpellatione custodiat.

Hæc omnia, ô anima mea, hoc loco, & quidem hac hora fient, quorū omnium spectatrix esse poteris, si fide vera & sincera hîc astiteris. Qua igitur veneratione,

tione, qua reuerentia, qua humilitate tantis interesse debebis mysterijs? Quid enim mirabilius, quàm videre Dominum tantę Maieſtatis, cuius ſedes cælum eſt, & cuius ſcabellum terra; cui aſtant omnes Seraphin, cui miniſtrant Angeli & omnes creaturæ famulātur, hunc iterum de cælo deſcendere in hanc vallem lachrymarum? habitare nobiſcum? in templis præſentem eſſe, vt ſua præſentia noſtram adiuuet deuotionem, noſtris adſtet lachrymis, noſtras audiat orationes?

3 Reg. 8.

Non erat aliud quod datum erat Iudæis in arca fœderis, quàm vmbra huius beneficij: & tamen adeò miratus eſt illud Salomon, vt dixerit; Ergone putandum eſt quòd verè Deus habitet cum hominibus ſuper terram? ſi enim cælum, & cæli cælorum te capere non poſſunt; quantò magis domus hæc quam edificauit? O magnæ venerationis myſteriū, o beneficiū inæſtimabili gratitudine recolendum. O Domine mi, ſi homo noſſet pretium & dignitatem tuorum beneficiorum ponderare, quantas tibi gratias redderet? quàm prompto tibi animo ſeruiret? Sed neſcio quĩ fiat Domine, vt adeò cæcutiamus te ſtātem in medio noſtrum quòd non cognoſcimus.

Si namque nos domum tuam, & quis eſt, qui inter nos ſtat, cognoſceremus, o quanta cum reuerentia in conſpectum tuum veniremus? quanta cum fiducia

preces

preces tibi nostras offerremus? quanta cum alacritate loca sacra visitaremus? quanta denique cum deuotione templa tua Domine frequentaremus? Si templum eminus conspiceremus, inclinare capita nostra, ei que reuerentiam exhibere deberemus: non enim minoris dignitatis est templum materiale, quam cælum empyreū; cum vtrumque eundem habeat in se præsentem Dominum.

Quis mihi dabit lachrymas, vt defleam eorum impietatem, religionisque contemptū, qui sub augusto hoc, & stupendo Missæ sacrificio aut in templis deambulant, aut fabulantur, aut negotia tractant externa, aut dormitant, aut foris mente vagantur? Qui fit Domine, vt cum bos cognoscat possessorem suum, & asinus præsepe domini sui, homo te nō cognoscat, nec vnquam rectè cognouit? Venisti in mundum, & mundus te non cognouit; nunc iterum in mundo es, & necdum mundus te agnoscit. Nos miseri Iudeos cōdemnamus, quòd te in medio illorum stantem non cognouerunt, cō quòd formā hominis habebas, & nobis ignoscimus, quòd idē facimus, cō quòd sub panis forma latitas.

Esa. i.

Ioan. i.

At tu, o anima mea, non quod alij faciunt, sed quod tui muneris est facito. Eleuare, eleuare, consurge anima mea: solue vincula colli tui captiua filia Sion; sanctificare & esto parata, modò enim veniet Dominator Dominus, &

Ema-

Emanuel nomen illi. stillabunt montes
 confestim dulcedinem, & colles fluent
 lac & mel. Videbis mox cælos aperiri, &
 Sponsum procedere de thalamo suo: vi-
 debis Verbum fieri carnem, & habitare
 in te. Occurre illi cum reuerētia magna,
 humilitate profunda, & puritate perfe-
 cta: præstolare aduentum eius in spe &
 silentio, in precibus & desiderijs, donec
 hæc omnia perficiātur in te, & in omni-
 bus Christi fidelibus.

2

*Generalis ante Missam peccatorum
 Confessio.*

Ioannes
 Faber.

INter miseros peccatores ego longe
 miserrimus confiteor Deo Patri meo
 cælesti, & Iesu Christo Domino Redem-
 ptori & Saluatori meo; Mariæ Deiparæ
 Virgini, & omnibus Sanctis, quod sæpe
 & multum peccaui, & heu mihi graui-
 ter deliqui contra Dominum Deum me-
 um incredulitate & diffidentia; nec di-
 uinam Maiestatem, vt debui, supra omnia
 amaui. Deinde & proximum meum non
 ex animo vt meipsum; sed multa aduer-
 sus eum iniqua machinatus sum, & per-
 petraui. Denique ex diuinis præceptis ne
 vnum quidem vt par fuit obseruaui, sed
 voluntati & mandatis illius reluctatus
 sum. Agnosco me reum, & culpam me-
 am ipse profero, quod plurimum deli-
 qui prauis cogitationibus, verbis inqui-
 natis, & impijs operibus: siue ea crimi-
 na sint mortalia, quotidiana, occulta, si-

ue ma-

ue manifesta ; scienter aut ignoranter commissa, contra Dei cultū atque amorem, & contra proximi dilectionem : quemadmodum tu, ô Deus omnipotens, in misero me peccatore agnoscis : ego autem vitijs excæcatus nec videre, nec agnoscere possum.

Hæc omnia summatim colligò, & singulis excussis omnium me dico reum, nec aliud possum, quàm deprecari. Te igitur oro æterne & misericors Deus, sis propitius mihi deplorato peccatori propter diuinam tuam gratiam & perennem misericordiam, per filium tuum dilectum Iesum Christum, Dominum & Saluatorem nostrum. Amen.

Ad Missæ introitum.

3

NON discedimus à te Domine, viuificabis nos & nomen tuum inuocabimus. Memento nostri Domine, in beneplacito populi tui, visita nos in salutarī tuo. Ex desiderio magno clamamus & vociferamur cum patribus nostris ; Rorate cæli desuper, & nubes pluant iustum : aperiatur terra, & germinet Saluatorem. Emitte agnum Domine Dominatorem terre ; ostende nobis Domine misericordiam tuam, & salutare tuum da nobis. Sediti super throno & Agno benedictio, & honor, & gloria, & potestas in secula seculorū. Amen. Non discedimus à te Domine, viuificabis nos, & nomen tuum inuocabimus.

Psal. 79.

Psal. 105.

Esa. 45.

Esa. 16.

Psal. 84.

Apoc. 5.

Ad

4

*Ad Kyrie eleison. & Gloria in
excelsis.*

Ex Gra-
natē lib.
5 Memo-
rialis.

Benigne Pater, pie Pater, & misericors Pater, miserere mei. In remissionem omnium meorū, totiusque mundi peccatorum, offero tibi vitam, passionem & mortem vnigeniti Filij tui. Offero tibi quidquid in hoc mundo fecit & passus est, pro nostra salute. Offero tibi omnia merita dulcissimæ Mariæ illius, omniumque Sanctorum, vt illorū amore mihi ignoscas, miserearis mei, & eternam vitam mihi largiaris.

Pie Iesu, Redēptor mi, miserere mei. Gratias tibi ago pro infinita miserationum tuarum multitudine, proque gratijs tuis, quæ numerum nō habent, quas contulisti, & confers quotidie in me miserum peccatorem. Oro te clementissime Domine, fac me omnium meritum tuorum participem, vt tibi incorporatus, & virtute huius sacrificij vnum quid tecum effectus, tibi per amorem & imitationem sanctissimæ vitæ tuæ vbi que conformis viuam, teque, vt palmes in vite, frui merear, qui es vera vitis, & omnium fidelium vita.

Spiritus Sancte, Consolator optime adiuua me. Domine mi, commendo tibi animam meam, corpus meum, & omnia quæ mea sunt. In manus tuas commendo progressum & finem vitæ meæ. Da mihi vt illam in tuo cultu & obsequio

transi

transigam, veram agens meorum peccatorum pœnitentiam, priusquam anima mea ex hoc corporis migret ergastulo. Cæcus & infirmus ego facile in laqueos affectionum mearum incido; erro facile, facile decipior: ideo metibi cōmendō, & tuæ protectioni me submitto. Ah Domine pauperem hunc & nudum famulum tuum defende, custodi illum ab omni malo. Illumina intellectum meum, rege corpus, moderare animum, conforta spiritum, vt vincat omnes affectus cordis inordinatos. Da fidem certam, spem firmam, & puram perfectamque charitatem. Fac vt cum dulcedine te diligam, & in omni loco atque tempore tuæ voluntati satisfaciam. Amen.

Ad Collectam.

5

Domine Deus omnipotens, Pater misericordiarū, & Deus totius consolationis: gratias tibi ago infinitas, quia nobis animum addidisti, vt iam aucti simus à te misericordiam flagitare. Dixisti enim per vnigenitum tuum; Petite & accipietis, quærite & inuenietis; pulsate & aperietur vobis.

Ex lib. 5
Memorialis
Gratienensis.

Matth. 7.

Age igitur Domine, si tu is sis, qui me vocas, qui me inuitas, qui expandis brachia tua vt ad te curramus, cur non speremus te nos recepturos? Longè alio loco res apud te sunt, quàm apud homines, qui cum dant, depauperantur, & ideo ferè semper inuiti rogantur. Non sic apud

te Do-

Psal. 49.

te Domine, non sic, quia quēadmodum tibi nihil decedit, cū omnia largiris; sic etiam iniquo non fers animo, cū rogaris: ideoque petere à te misericordiam, non est importunitas, sed obedientia. Tu enim, vt te petamus, præcipis. orare namque te, honorare est, & te glorificare. Cū aliquid à te petimus, profitemur te Deum, te vniuersalem Dominum, te donatorem omnium, à quo peti debent omnia, cū nemo præter te det omnia. Imò tu ipse hoc sacrificij genus tibi offerri præcepisti, dicens; Immola Deo sacrificium laudis; & redde Altissimo vota tua. & Inuoca me in die tribulationis, eruam te, & honorificabis me.

Hac fiducia fretus ad thronum tuæ misericordiæ venio, orans vt mihi tribuas peccatorum meorū remissionem, veram contritionem & pœnitentiam. Deinde vt tua gratia mihi denuo iustificato des gratiam, ne te in posterum rursus offendam, siue ijs peccatis quæ mihi hætenus familiaria fuerunt, siue alijs quibuscunque. Ante omnia verò gratiam & auxilium tuum peto, quo possim carnem meam in seruitutem redigere, linguam refrenare, appetitus mortificare, dispersas imaginationis cogitationes colligere: vt sic totus reformatus & renouatus, merear esse viuū tibi templum, & gratum in quo moreris habitaculum.

Largire quoque virtutes illas, quibus habitaculum istud non solum purgetur;

sed

sed etiam ornetur; vt sunt nominis tui sanctissimi timor, inuicta spes, profunda humilitas, insuperabilis patientia, prudens discretio, paupertas spiritûs, perfecta obedientia, immota fortitudo & diligentia in omnibus, quæ ad tuum obsequium & cultum pertinent: ante omnia verò ardentissima charitas, tam erga te, quàm erga proximum. Da denique, ô Domine, vt in his omnibus in finem vsque perseuerem, vt te auctore, promotore & consummatore salutis meæ, tandem perueniam, vbi tu viuis cum Filio & Spiritu sancto per omnia secula seculorum. Amen.

Ad Epistolam.

6

Domine Deus Pater cælestis, qui non videris nisi à mundis cordibus, inuestigauì legendo, meditando quæsiui quomodo haberi possit cordis munditia, vt ea mediante vel media ex parte possem te cognoscere. Quærebam vultum tuû Domine, & diu meditatus sum in corde meo, & in meditatione mea exardescit ignis, & desiderium ampliùs cognoscendi te crescit, dum panem sacræ scripturæ frangis mihi, & in fractione panis, in qua cognitus es, quantò plus te cognosco, tantò plus te cognoscere desidero: non iam in cortice literæ, sed in sensu experientiæ. Nec hoc peto propter merita mea, sed pro tua misericordia. Fateor enim quòd indignus & pec-

August. in
libro de
scala Pa-
radisi.

cator

cator sum, sed & catelli edunt de micis, quæ cadunt de mensa dominorum suorum. Da mihi Domine arrham hæreditatis tuæ futuræ, saltem guttam cælestis pluuiæ, qua refrigerẽ sitim meam, quia amore ardeo. Amen.

7

Ad Graduale, & Tractum, si legatur.

B. Martyr
Cyprianus.

DEus Pater Domini nostri Iesu Christi filij tui, Deus Patriarcharum, Deus Prophetarum, Deus Apostolorum, Deus Martyrum, Deus Virginum, Deus omnium credentium: Te deprecor Pater Maiestatis, qui in fine temporis misertus es nostri, mittens nobis Iesum Christum filium tuum, Dominum Deum Saluatorem nostrum, natum ex Maria virgine de Spiritu sancto, annuntiante Gabriele Angelo, per quem nos liberaisti de periculo mortis imminantis.

Te rogo, Domine, subueni mihi, noli me secundum actus meos iudicare: non enim parui præceptis tuis, sed ex omni lege facientis ante conspectum tuum pro vniuersis peccatis meis, qui es amator pœnitentiæ, miserere mei. Et vt Dauid orat, Domine, propter nomen tuum dele peccata mea: Ita & ego deprecor Maiestatem tuam; dele vniuersa peccata mea.

Fac vt fide illibata, mente incorrupta, deuotione robusta, dilectione & operatione continua in ecclesia tua sancta persistam, & libera me ab igne &

pœna

pœna perenni, & ab omni tormento, quod paraſti iniquis, per bonum & benedictum Ieſum Saluatorem noſtrum, per quem tibi laus, honor, virtus & gloria in ſecula ſeculorum. Amen.

Ad Alleluia, ſi legatur.

8

Gratias agimus tibi Domine Deus noſter omnipotens, qui es, & qui eras, & qui venturus es: quia accepisti virtutem tuam magnam, & regnaſti. Apoc. II.

Dignus es Domine Deus noſter accipere gloriam, & honorem, & virtutem: quia tu creaſti omnia, & propter voluntatem tuam erant & creata ſunt. Apoc. 4.

Ad Proſam vel Sequentiam, ſi legatur.

9

Omnipotens æterne Deus, tibi ſancti & humiles corde, tibi ſpiritus & anime iuſtorum, tibi omnes ſuperni ciues & cuncti beatorum Spirituum ordines, gloriam & honorem ſuppliciter adorantes concinunt ſine fine. Laudant te Domine illi ſuperni ciues magnificè & honorabiliter. Laudat te homo magna portio creaturæ tuæ. Sed & ego peccator homuncio deſiderio magno cupio te laudare, amare te opto amore præcipuo. Deus meus, vita mea, fortitudo mea & laudatio mea, dignare me laudare te. Da mihi lumen in corde, verbum in ore, vt cor meum meditetur gloriam tuam, & lingua mea tota die cantet laudes tuas. Sed quia non eſt pulchra laus in ore pec-

Ex Aug.
Meditat.
cap. 33.

catoris, & quia vir pollutis labijs ego sum, munda obsecro cor meum ab omni inquinamento : sanctifica me sanctificator omnipotens interiùs & exteriùs, & fac me dignum laudibus tuis. Suscipe benignè & laudabiliter de manu cordis, & de mentis amore, suscipe sacrificium labiorum meorum, fiatque acceptabile in conspectu tuo, & ascēdat ad te in odorem suauitatis. Memoria tua sancta, & dulcedo tua beatissima possideat totam animam meam, atque in inuisibilem amorem rapiat eam. Per Christum Dominum nostrum. Amen.

IO

Ioannes
Faber in
precat.
Christ.

Ad Euangelium.

Mitissime Domine Iesu Christe, tu ex mera atque singulari gratia & misericordia voluntatem Patris tui nobis ostendisti & reuelasti : Apostolis etiam commendasti, vt Euangelium vulgo prædicarent ad consolationem & salutem hominum : est enim virtus Dei, quæ animas nostras conseruare potest in æterna patria ; est viuus panis & confortatio nostri spiritûs, est gladius quo truculentum & infernalem hostem reprimere & superare possumus ; est directio pedum nostrorum in via recta ; est validissimus malleus qui scopulos & rupes conterit ; est ignis ardens, qui spiritum in amore Dei accendit.

Docet nos per fidem cognoscere, per charitatem tua præcepta custodire, per

spem

spem promissiones tuas gratiosas patienter expectare, per timorem sincerū ad comminationes tuas contremiscere. Est lex perfectorum, vera libertas spiritūs & vitæ. Absque hac sumus veluti Sodomæ & Gomorrhæ incolæ: hoc si destituamur, necesse est vt anima nostra fame emoriatur.

Quapropter oro te ô mitis Saluator, illumina cor meum, patefac & aperi aures meas internas gratia Spiritūs sancti, vt verbum tuum humili corde audiam, in obedientia spiritūs percipiam; & vt tandem fructus largos proferat in patientia: vt intellectus meus in veritate instruatur ad facienda bona, & vitanda atque fugienda mala: vt per me honor tuus & gloria propagetur; anima mea salutem consequatur; hostis diabolus deuictus prosternatur; vt inculpatus ad tribunal iudicij tui veniam, æternaque felicitate per te potiar. Amen.

Ad Symbolum.

II

Collector.

OMnipotens æterne Deus, miser & infelix ego peccator ad te venio, vt hodie coram diuina tua Maiestate renouem pactum baptismale, repetamque fidem tibi in baptismo datam & promissam. Credo igitur corde & ore confiteor omnia, quæ Christus Iesus dilectissimus filius tuus, & sponsa illius Ecclesia, instinctu Spiritus sancti edocta, mihi credenda proposuerunt. siue illa expref-

se iam sciam & intelligam, siue adhuc ignota mihi sint.

Ore profiteor me credere omnes articulos Symboli Apostolici, & sanctum Christi Euangelium, quod in vniuerso terrarum orbe annuntiatur est: in quam fidem ex gratia vocatus, natus & baptizatus sum. Huic me hodie fidei obstringo, & fateor me ab ea ne vnguam latum discedere posse, etiam si totus mundus, cum omnibus suis tyrannis in me insurgant, priusquam tu Imperator meus, cui milito, me hoc sacramento soluas, à statione discedere iubeas, & in patriam, vbi nulla amplius fides, sed clara erit visio, me reuoces. Offero itaque mi Domine intellectum meum tibi in obsequium huius fidei.

Quod si ex tentatione diabolica, aut ex ignorantia mea aliquid in huius fidei præiudicium dixerò, vel cogitauerò; id nunc reuoco, & quasi non dictum, aut non cogitatum haberi volo; nunquam enim tali dicto aut cogitationi sciens & volens assensum præbebo, adiuuante me tua gratia, Qui viuus & regnas Deus in secula seculorum. Amen.

12

*Ad Offertorium oblatio sui ipsius, & ad
Collectam secretam.*

Ex quodā
Germani
co. ibello
anonymo

DEus Deus meus ac Pater celestis, supplico tibi miser ego peccator in nomine Domini nostri Iesu Christi, gratia & auxilium tuum præueniant me, vt

memet-

memetipsum tibi offeram hostiā viuētem, sanctā & beneplacentem: sine tua namque gratia oblatio sum immunda & peccatorum meorum sordibus contaminata. Sed in meritis sanctissimi sacrificij vnigeniti filij tui Domini nostri Iesu Christi, quod ille summus Sacerdos & sacrificium ipsum in altari sacratissimæ Crucis pro nobis immolauit, hostia mea mundabitur, & sanctificabitur.

In illo igitur, & per illud sacrificium ego hodie tibi cælestis Pater offero animam meam, cum omnibus suis potentijs; offero tibi memoriā, intellectum, & voluntatem meam; fidem quoque, spem, charitatem, quæ in me est: cor meū cum omnibus suis affectibus, corpus & vitam meam cum omnibus viribus internis & externis, cum sensibus & omni mea facultate naturali. Offero tibi sanitatem & robur corporis, fortunam, famam & diuitias meas: offero tibi parentes, filios, cognatos, amicos, & quicquid meū est: id omne tibi offero cum humili confessione, omnia hæc tua esse, & eorum vsum à te mihi concessum: omnia namque hæc ex tua bonitate, sine vllō meo merito, à te accipi.

O Domine Deus, fac tibi ex his sanctam & beneplacentem hostiam; da mihi, vt omnibus his à te perceptis bonis ac donis rectè, & secundum diuini verbi tui præscriptum vtī assuescam, ne me illorum Dominum, sed œconomum &

dispensatorem esse mihi persuadeam, cuius administrationis ratio suo tempore à me postulabitur.

Concede mihi omnia hæc cum debita gratitudine, animique libertate possidere; vt memetipsum iuge tibi holocaustum offeram in meipsum abnegatione, voluntatis mortificatione, crucisque meæ voluntaria tolerantia, & Christi vera imitatione. O Domine fac mecum quidquid vis; tu enim scis quid honori tuo & meæ saluti expediat. Quòd si aliqua tentatio me inuadat, tædiumque atque molestia mihi oboriatur, ex ijs quæ vel mihi, vel meis à te immittuntur, oro te, mi Domine, misericordiam tuam à nobis ne auertas: cùm ego hodie ex toto corde, totaque anima mea meipsum tue voluntati deuoueam: & dolet mihi, si ex infirmitate aliqua huic deuotioni in posterum egero quicquam contrarium.

Dispone igitur de me, Domine, quidquid tibi placet: fiat in me, & de me tanquam de proprio tua voluntas. Secundum spiritum promptus sum & paratus durissima quæque pro peccatis meis tolerare, saltem tua me gratia atque misericordia non destituat, vt ea patienter feram ad tui nominis gloriam, & criminum meorum expiationem. Immolo tibi quoque spiritum hilarem & promptum, vt tibi seruiat, te colat; tui namque obsequij debitor ego sum, & in eo usque ad mortem cupio perseuerare.

Defende

Defende me hodie & omni tempore
ab omni infortunio animæ vel corpo-
ris: da mihi benedictionem tuam, tu-
ere & rege me nunc, & in perpetuum.
Amen.

ADMONITIO ANTE PRAEFATIONEM.

QVando stamus ad orationem, fratres Cypria-
nus.
dilectissimi, vigilare & incumbere ad
preces toto corde debemus. Cogitatio omnis
carnalis & secularis abscedat, nec quicquam
tunc animus, quàm id solum cogitet, quod
precatur.

Ideo & Sacerdos ante orationem prae-
fatione praemissa parat fratrum animos dicen-
do; Sursum corda: ut dum respondet plebs,
Habemus ad Dominum; admoneatur nihil
aliud se, quàm Dominum cogitare debere.

Ad Praefationem.

Verè dignum & iustum est, te bene-
dicere, tibi gratias agere, te adorare
in omni loco dominationis tuæ: tu
enim es Deus ineffabilis, inuisibilis, in-
comprehensibilis, semper es similiter
existens tu, & vnigenitus filius tuus,
& Spiritus sanctus. Tu de non ente ad
esse produxisti nos, & lapsos erexisti rur-
sus, & non destitisti omnia faciens usque-
quo in cælum reduxisti nos, & regnum
futurum donasti. Pro his omnibus

13

Chrysoft.
in Litu-
gia sua.

gratias agimus tibi & vnigenito Filio tuo, & Spiritui sancto.

Gratias quoque agimus tibi, & pro Sacramento isto, quod ex manibus Sacerdotis huius suscipere dignaris, quamuis tibi assistant Archangelorum & Angelorum millia millium; Cherubin quoque & Seraphin agmina sex alas habentium, & oculos multos, eleuatorum & pennatorum, cantantium, clamantium, & sine fine hymnum pro victoria dicentium.

14

Ad Hymnum Angelicum.

S. German. Archiep. constant. in sua Theoria.

Sanctus es Rex seculorum, & omnis sanctimonie dator: tu enim es omnium potens, qui sancta obsignas dona: Sanctus vero & vnigenitus tuus Filius, Dominus noster, Iesus Christus, ante secula ex te ineffabiliter genitus. Sanctus autem & Spiritus tuus, totus sanctus, scrutans omnia, etiam profunda tua, qui Deus es; per quem vniuersa, quæ in cælo & super terram sunt, sanctificantur.

15

Ad sacrum Canonem.

Ex diuersis.

Domine viuificator & bonorum sup-
peditator, qui hominibus Domini-
num nostrum Iesum Christum, beatam
spem vitæ æternæ dedisti, dignos nos fa-
cito, qui in sanctitate, hoc quoque tibi
diuinum sacrum perficiamus, vt futura
beatitudine perfruamur. Vt sub tua po-
tentia semper protecti, & in lucem veri-

tatis

tatis deducti, tibi gloriam & gratiarum acti onem referamus.

Oro te pijsſime Pater, per eum qui & Sacerdos eſt, & ſacrificium ſanctiſſimæ huius actionis, ſit mihi hæc oblatio cōtra omnium peccatorum meorum vulnera efficaciffimum medicamentum; ſit virtutis & gratiæ victorioſiſſimū complementum; ſit mihi tam in vita, quàm in morte contra omnia pericula validiſſimum tutamentū; ſit denique ad æternam fortitudinem ſolidiſſimum fulcimentum.

Nec mihi ſolū, ſed omnibus ſit in remiſſionem peccatorum, & in vitam æternā; in ſanctificationem animarum & corporum, ad fructus bonorum operum ferendos: Non enim hæc nobis ſolū, ſed charitatis memores omnibus fratribus noſtris petimus.

Memento igitur Domine ſanctę Catholicę & Apoſtolicę Eccleſiæ, quæ eſt à finibus uſque ad fines orbis terrarum, & pacifica eam, quam tu feciſti honorifico ſanguine Chriſti tui.

In primis memento Domine (Papæ noſtri N. nec non &) Archiepiſcopi noſtri (vel Epifcopi) N. eos da ſanctis tuis eccleſijs ad pacem integros, honorificos, ſanos, longeuos, rectè tractantes verbum veritatis tuæ.

Piſſimi quoque & fideliffimi Regis noſtri N. quem decreuiſti regnare ſuper nos; Totius etiam palatii & exercitus il-

B. Iacobus in Liturgia.

Baſilius in Liturgia.

lius : armis veritatis & bonæ voluntatis corona eum. Da ei pacificum imperium, vt nos in tranquillitate eius quietam & tranquillam vitam ducamus.

S. Marti-
nus Papa.

Memento Domine omnium fidelium, & populo Christiano miserere. Clerum defende, religiosos in seruitio tuo sancto conseruare dignare, omnesque laborantes conforta : tristes consolare, infirmis sanitatem corporis & animæ restitue; pauperibus ac egentibus omnia ad vtrumque hominem necessaria tribue; peregrinis ac exulantibus cum salute ad propria fac remeare; in periculis aquarum positis ad portum suæ voluntatis fac pertingere; prægnantibus partû gaudiû misericorditer largire. In vinculis & carceribus detentos absolue; omnibus cum quibus peccauimus, vel quos ad peccandum induximus, & nobis misericors Pater indulge; omnibus quos conturbauimus, læsimus, scandalizauimus, vel defraudauimus, tu gratiose Pater retribue.

Errantes corrige, incredulos ad fidem conuerte, schismaticos ad vnitatem sanctæ Ecclesiæ fac redire, & ipsis lumen tuę veritatis ostende : peccatoribus veram pœnitentiā largire, iustos in bono proposito fac perseuerare.

Omnibus meis parentibus, amicis & inimicis, confratribus & consanguineis, familiaribus & benefactoribus, omnibusque pro nobis Deum exorantibus,

vel

orationibus nostris se commendantibus, omnia bona tribue, & eos ab omni malo defende; in tuoque eos seruitio fac perseverare, usque in finem. & post huius cursum miserie ad te, qui es vera patria, merces, præmium æternum, & gloria, fac peruenire.

Ad memoriam Sanctorum.

16

Ex Liturgia D. Basilij.

Cumque omnes Sancti & Sanctæ cælestis patrie ciues & incolæ, ô Deus, tuam misericordiam laudabilissimam, & amorem tuum erga genus humanum imitantes, assiduas preces atque obsecrationes pro nobis tibi offerant: nos etiam memoriam eorum celebremus; ut quando nobis ipsi parum fidimus, memoria & legatione eorum protecti, per eos audcamus ad te accedere. Per intercessionem igitur sanctissimæ, immaculatæ, gloriosissimæ, benedictæ Domine nostræ Matris Dei, & semper virginis Mariæ, & omnium qui inde à seculo placuerunt tibi Patrum, & Patriarcharum, Prophetarum, Apostolorum, ac omnium denique Sanctorum, esto expiator prævaricationum nostrarum. Quia sanctus ipse es, & in Sanctis acquiescis. Amen.

Sub Consecratione.

17

Ex Liturgia B. Iacobi.

Sileat omnis humana ac mortalis caro, stetque cum metu & tremore, ac nihil terrestre apud seipsam cogitet. Rex

enim regnantium, & Dominus Dominantium, Christus Deus noster progreditur, vt immoletur, & detur in cibum fidelibus. Ipsum autem antecedunt Angelorum chori, cum omni imperio & potentia; Cherubin multorum oculorum, ac Seraphin sex alarum, faciesque velantia, & cum clamore canentia hymnum, Alleluia, Alleluia, Alleluia.

18

AD ELEVATIONEM

Hostiæ sacræ.

D. Thomas Aquinas.

A Doro te deuotè latens Deitas, quæ sub hac figura verè latitas. Tibi fecor meum totum subijcit; quia te contemplans totum deficit; Visus, gustus, tactus, in te fallitur; sed auditu solo tute creditur. Credo quicquid dixit Dei filius; Nihil veritatis hoc verbo verius. In cruce latebat sola Deitas; sed hîc latet simul & humanitas. Ambo tamen credens atque confitens, peto quod petiuit Latio pœnitens: Plagas sicut Thomas non intueor, Deum tamen meum te confiteor. Fac me tibi semper magis credere; In te spem habere, te diligere. O memoriale mortis Domini; Panis verus vitam præstans homini; præsta meæ menti de te viuere, & te illi semper dulce sapere.

19

Ad elevationem Calicis.

Collector.

Salue ô sanguis Christi prænobilis, sub figura vini latens humilis; per te redemptus mundus, fracta tartara; aper-

tum

tum cælum, per tot clausum secula; cum de Saluatoris nostri pectore, salutari scaturires flumine. O ros cælestis, ô liquor purpuree: ô calix præclare salus mentis meæ; tu me refrigera in peccati fomite; ab omni me peccantem munda crimine, & amore tui me inebria, vt pocula tua gustem quàm dulcia, & quàm iucunda sunt tua solatia.

O pie Pelicane Iesu Domine, me immundum munda tuo sanguine, cuius vna stilla saluum facere, totum mūdum posset omni scelere. Iesu quem velatum nunc aspicio, quādo fiet illud quod tam sitio; vt te reuelata cernens specie, visu sim beatus tuæ gloriæ?

D. Thomas.

*Post elevationem, filij pro peccatis nostris
ad Patrem oblatio.*

20

O Clementissime & supreme cæli, terræque Creator ac Domine, ecce ego licet omnium peccatorum primus, ac maximè detestabilis, vnā cum Ecclesia offero tibi pretiosissimū, & quo non aliud tibi gratius est, sacrificium; Vnigenitum scilicet filium tuum, Dominum nostrum Iesum Christum, pro expiatione & satisfactione omnium meorum peccatorum, quæ ab infantia mea, vsque in hanc horam nequiter commisi; & pro omnibus hætenus à tua liberalitate perceptis beneficijs.

Aspice igitur, ô pie Pater, pijsimum hunc Dominum nostrum Iesum Chri-

Granatēf.
lib. 5. Memorial. ex
cap. 5. 6. 7.
& 8. Meditat. B.
August.

stum, filium tuū, pro me tam impia passum. Respice clementissime Rex quis patitur, & reminiscere benignus pro quo patitur. Nōne hic est, mi Domine, innocens ille, quem vt seruum redimeres, filium tradidisti? Nunquid auctor vitæ hic est; qui vt ouis ad occisionē ductus, tibi que vsque ad mortem obediens factus, atrocissimæ nō timuit necis genus subire? Recole totius salutis dispensator, quia hic est ipse, quē etsi ex tua virtute genuisti, meæ tamen infirmitatis participem fieri voluisti. Verè hæc est tua Deitas, quæ meam induit naturam, crucis ascendit patibulū, quæ in assumpta carne triste tulit supplicium.

Reduc Domine Deus meus oculos tuæ Maiestatis super opus ineffabilis pietatis. Intuere dulcem natum toto corpore extensum: cerne manus innoxias pio manantes sanguine, & remitte placatus scelera, quæ patrarūt manus meæ. Considera inerme latus crudeli perfossū cuspide, & renoua me sacro fonte, quem inde credo fluxisse. Vide immaculata vestigia, quæ non steterunt in via peccatorum, sed semper ambulauerunt in lege tua, diris confixa clauis, & perfice gressus meos in semitis tuis, & fac me odio habere benignus omnes iniquitates meas: viam iniquitatis amoue à me, & fac me propitius viam veritatis eligere.

Oro te Rex Sanctorum per hunc Sanctum Sanctorum, per hunc Redempto-

rem

rem meum, fac me currere viam mandatorum tuorum, vt ei valeam spiritu vniri, qui mea non horruit carne vestiri. Nunquid non attendis pie Pater adolescentis filij charissimi caput niuea ceruice deflexa, pretiosissimam resolutum in mortem? Aspice mitissime Conditor dilectæ sobolis humanitatem, & miserere super infirmi plasmatis debilitatem. Candet nudatum pectus, rubet cruentum latus, tensa arent viscera, decora languent lumina, regia pallent ora, procera rigent brachia, crura pendent marmorea, rigat terebratos pedes beati sanguinis vnda.

Specula gloriose genitor gratissimæ prolis lacerata membra, & memorare benignus quæ mea est substantia; conspicare Dei hominis pœnam, & relaxa conditi hominis miseriam. Vide Redemptoris supplicium, & redempti dimitte delictum.

Ecce omnipotens Deus, Pater Domini mei, dispone benignus, quo miserearis mei: quoniam quidquid pretiosius inueni, deuotè obtuli; quidquid charius reperi, suppliciter præsentavi. Direxi tibi Aduocatam meum, dilectum filium tuum. Amplectere serenus pastorem, & respice misericors allatam proprijs humeris ouem. Oro te pie Pater, da mihi, vt illum merear habere Aduocatam, quem nullo meo merito, sed ex pura tua gratia mihi dedisti Redemptorem. Amen.

21

Seuerus
Patriar-
cha Ale-
xand. in
prec. abe-
cedarijs
Syrorum.

Ad memoriam defunctorum.

Recordare Domine animarum no-
strarum, & animarū patrum & fra-
trum nostrorum, & præceptorum no-
strorum, & defunctorum nostrorum,
omniumque defunctorum fidelium, fi-
liorum ecclesiæ sanctæ & gloriosæ.

Tribue requiem Domine Deus ani-
mabus eorum, & eorum spiritibus, eo-
rumque corporibus, & asperge rorem
miserationum super ossa eorum: mise-
rator & misericors esto nobis & ipsis
Christe Rex noster, colloca eos, Domine
mi, in mansionibus benedictis domūs
patris tui, cum Abraham, Isaac, & Iacob,
amicis tuis, & cum omnibus Sanctis, qui
executi sunt voluntatem tuam in fide
vera, & Patris tui, & Spiritus tui sancti
in secula seculorum. Amen.

22

Collector.

Ad memoriam Sanctorum.

Nobis Domine quos vocasti, & quos
sanctificasti portionem da in voca-
tione tua, & fortifica nos in amore tuo,
& custodi in sanctificatione tua. largire
nobis vitam inculpata, vt inueniamus
misericordiam & gratiam cum omni-
bus Sanctis tuis Patriarchis, Prophe-
tis, Apostolis, Martyribus, Confessori-
bus, atque Virginibus; omnibusque ijs
qui ab æterno tibi placuerūt: intra quo-
rum nos consortiū, non æstimator me-
riti, sed veniæ quæsumus largitor ad-

mitte:

mitte: vt te rectore, te duce inter Scyllam & Charybdim iter tenere, per mediū, & integra naue, saluisque mercibus ad te portum tutissimū peruenire valeamus. Da vt anima nostra terreno resoluta carcere libera cælum petat, beatis admixta spiritibus; Maieitati tuæ assistat, te incircūscriptum lumen cernat; qui viuus Deus per omnia secula seculorū. Amen.

Ad Orationem Dominicam.

23

OMnipotens, æterne ac cælestis Pater, qui per filium tuū vnigenitum Dominum nostrum Iesum Christū precandi rationem discipulis præscripsisti tibi offerendam, & eandem post illos in nos deriuasti, simulq; docuisti, te requirere oratores, qui in spiritu & veritate tibi supplicent. Nos miseri peccatores, absorpti mendacio, vacuique spiritu te oramus Patrem cælestem, per eundem filium tuum, qui est veritas, vt propter illum in nos abundè effundas Spiritum sanctum, qui nos in numerum filiorum adoptet, quorum tu Pater es; vt nostræ infirmitati subsidio sit, nos doceat, quid, & quomodo iuxta sanctam voluntatem tuam orandum. Adeoque inter nos exclamet, Abba pater, animo meo dilectissime genitor; & sic desiderium & votum nostrum in conspectum tuum producat, in quo clementer exaudiamur. Per eundē Iesum Christum Dominum nostrum. Amen.

Timānus
Borkensis
in Enchi-
ridio.

Deinde Orationem Dominicam, si volueris, subiunge.

24

Ex Missali
Gottico
MS.

Ad Agnus Dei.

Agnus Dei, qui tollis peccata mundi, respice in nos, & miserere nobis; factus nobis ipse hostia, qui Sacerdos; ipse præmium qui Redemptor: à malis omnibus, quos redemisti, custodi.

25

Ex eodem
Missali.

Ad osculum Pacis.

Comple Domine vota supplicum, exaudi gemitus peccatorum: osculetur nos osculo oris sui pacis Magister, & conditor; vt in nobis hoc [spiritualiter] recipientibus holocaustum, pacem, quam speramus, habeamus. Amen.

26

Ex Missa
Æthiopū.

Oratio pro pace.

Ecclēsiā quæ fuit à principio, & erit vsque in finem seculi; omnes populos, & omnes greges benedic Domine. Pacem de cælo mitte super omnes animas nostras: pacem vitæ nostræ da nobis, per ipsam Ecclesiam. Da Domine pacē Regi nostro N. & Principibus eius, ac Iudicibus eius, & subditis eius, & circa nos congregatis, tam extra, quàm intra Ecclesiam. Orna eos omni genere pacis, Rex pacis: pacem da nobis, quia omnia dedisti nobis. Conserua nos Domine, quia præter te neminem cognoscimus: nomen sanctum tuum nominamus, & inuocamus, vt viuat anima nostra in Spiritu sancto, nec inuale scat

mors

mors peccati super nos seruos tuos, & super omnem populum tuum. per Christum Dominum nostrum. Amen.

OBSERVATIO

Ante Communionem.

A Postolorum tempore, & in primitiua Ecclesia mandatū erat, ne quis tremendo Missæ sacrificio interesset, qui non etiam sacramentaliter communicaret. Vnde Anacletus; Peracta, inquit, consecratione omnes communicent; qui noluerint ecclesiasticis carere liminibus. Sic enim statuerunt Apostoli, & sancta Romana tenet ecclesia. Sed si qui initio Missæ, quæ Catechumenorum dicebatur, interesset, is post Euangelicā lectionem, si præparatus ad communicandum non erat, eijciebatur: vt patet ex verbis Dionysij Areopagite, de Hierarch. Eccles. cap. 3. Illud autem conueniebat paruo isti Christianorum numero, ad plantanda nouellæ illius Ecclesiæ germina.

Crescente postea Christianorum plebe, & deuotione decrecente, quod antea mandati erat consilij esse cæpit, & quod singulis diebus antea fiebat, id Dominicis tantum in usu habitum est. Inde sub Fabiano Pontifice statutum, vt saltem ter in annis communicarent; cui præcepto cum postea nõdum satisfaceret, eò quòd charitas in Deum magis, magisq; refrigesce-

De cõse-
crat. dist.
2. c. Per-
acta.

Vide Io-
annem de
TurreCre-
mata &
Extrà de
Paroch.
cap. 2.

ret,

ret, sub Innocentio III, in Concilio Lateranensi decretum est, vt omnes vtriusque sexus homines, mox vbi sapere iam inceperint, reuerenter ad minus semel singulis annis, in Paschate Eucharistiam suscipiant, nisi quis viuens ab ingressu Ecclesie arceri, & moriens Christiana carere sepultura voluerit.

Nihilominus quouis tempore Christiani ad sacramentaliter communicandum non preparati, in Ecclesia admittebantur, vt orarent, pacem haberent, benedictionem cum ceteris acciperent, & spiritualiter communicarent.

illi autem spiritualiter communicant, qui audientes Missam, orantes & adorantes Christum in sanctissimo hoc Sacramento, cogitant sine intermissione de illo, animo flamma deuotionis accenso, intentoq; desiderio illum percipiendi; & sancta quadam emulatione Sacerdoti, alijsq; sacramentaliter Christum summentibus, inuident.

ORATIO

Ante Communionem spiritualem.

27
Collector.

Domine Iesu Christe, qui in his sacrosanctis & augustissimis mysterijs ad nos venire, & in incruenti huius sacrificij mensa omnibus te manducare volentibus apponi dignatus es; nosque omnes ad tremendum hoc epulum inuitas; ecce ego infelix peccator, hircus inter agnos tuos, etiam hic assisto, si forte

mihi

mihi misero catello, vel micula quædam decidat, quo esurientem & desiderio tui latrantem ventriculum satiem.

Cupio, ô melliflue Iesu, & quidem ex toto corde appeto, te panem cælestem, omnem dulcedinem habentem; hoc est, te verum Deū cum Zachæo in domum pectoris mei reuerenter excipere, vt cœnes mecum, & habites mecum; sed propter vilitatem atque nimiam meam indignitatem id facere vereor & erubesco.

Ceterum, ô piissime Iesu, qui non semper actiones ipsas, sed & interdum desideria hominum intueris, & accipis; ecce quod sacramentaliter non audeo, id spiritualiter facere desidero. Ecce dilato os animæ meæ, & brachia desideriorum meorum latè ad te expando, veni, ô bone Iesu, veni cum omnibus meritis & gratijs tuis, vt anima mea te impatenter esuriens bonis tuis impleatur.

O gratiosissime Iesu, qui Sacerdotem hunc publicum Ecclesiæ tuæ ministrum nobis dedisti, vt sit nobis in ijs quæ sunt ad Deum, vt offerat dona & sacrificia pro peccatis, quodque oblatum est pro se, pro viuis omnibus & defunctis sumat; vt per eum, quasi per canalem sanctæ & viuificatricis huius immolationis fructus ad nos deriuentur; tolle quæso, si quod in me sit obstaculum; vt & ego horum donorum particeps fiam; portio quædam ad me dilabatur, mens mea hoc quotidiano & supersubstantia-

Heb. 5.

li pane spiritualiter saltem recreetur, & præclaro salutaris calice anima suauiter inebrietur. Amen.

28

Ex libello
cui titulus
Hymni &
Collectæ.

Luc. 13.

Chryso-
stomus.

Aug. lib.
3 de doct.
Christi.

Aug. in 6
cap. Ioan.

Sub Communione & deinceps.

Domine, non sum dignus vt intres sub tectum meum: dic tantum verbum, & sanabitur anima mea. Respice me à longè stantē cum Publicano, tundentem pectus, & dicentem tibi; Deus, propitius esto mihi peccatori.

Da trementi & adoranti tam horrenda mysteria spiritualiter saltem manducare carnem, & bibere sanguinem tuum. Da mihi per viuam in te fidem inuisibiliter saginari de te, dulciter videlicet recolenti & credenti, benedictam carnem tuam pro me in cruce fractam & immolatam, & sanguinem tuum de latere tuo effusum, in remissionem peccatorum meorum. Da spiritu participare, vt tu in me, & ego in te manens, spiritu tuo vegeter & incendar ad currendam viam mandatorum tuorum.

Reple me spiritu vnitatis & charitatis, & constabili me in societate omnium Sanctorum tuorum; quæ etiam hoc diuinissimo Sacramento signatur, quod ex his conficitur, quæ ex multis in vnum rediguntur. Da denique vt esuriam & sitiam, & toto corde desiderem hunc panem vitæ, qui de cælo descendit, nō modo spiritu per fidem, sed & in Sacramento de mensa tua, pura & secunda mente, &

casto

casto corpore frequenter accipere; vt hinc non solum animæ meæ, sed & carnis substantia fulciatur & custodiatur in vitam æternam. Amen.

Ad vltimam Collectam.

29

Aug. lib.
de con-
templ. di-
uina.

INuoco te clementissime Deus in animam meam, quam præparas ad capiendum te, ex desiderio quod inspiras ei. Intra rogo in eam, & coapta eam tibi, vt possideas illam quam fecisti, & sacris mysterijs tuis refecisti, vt habeam te velut signaculum super cor meum. Quæso pijsime inuocantē te non deseras, quia priusquam te inuocarem me vocasti, & quæsiuisti, vt ego seruus tuus te quærerem, quærendo inuenirem, & inuentum amarem.

Quæsiui & inueni te, Domine, & amare desidero. Auge desiderium meum, & da quod peto; quoniam si cuncta, quæ fecisti, mihi dederis, non sufficit seruo tuo, nisi te ipsum dederis. Da ergo te ipsum mihi Deus meus, redde te mihi. En amo te, & si parū est, validiūs amem. Tuo ergo amore teneor, tuo desiderio flagro, tua dulci memoria delector. Ecce dum tibi mens mea suspirat, & tuam ineffabilem pietatem meditatur, ipsa carnis sarcina minūs grauat, cogitationum tumultus magis cessat, pondus mortalitatis & miseriarum, more solito, non hebetat.

Assumat igitur spiritus meus pennas

vt

vt aquilæ, volet & non deficiat, volet & perueniat vsque ad decorem domus tuæ, & thronum gloriæ tuæ: vt ibi super mensam ciuium supernorum pascatur de occultis tuis, in loco pascuę, iuxta fluenta plenissima. Tu esto exultatio nostra, qui es spes nostra, salus & redēptio. Tu esto nostrum gaudium, qui es futurus præmium. Te semper quærat anima mea, & tu præsta, vt quærendo non deficiat. Amen.

30

D. Thomas Aquin.

Ad Benedictionem.

Anima Christi sanctifica me; Corpus Christi salua me; sanguis Christi inebria me; aqua lateris Christi laua me; passio Christi conforta me.

O bone Iesu exaudi me, intra vulneta tua absconde me; & ne permittas me separari à te; ab hoste maligno defende me, in hora mortis meæ voca me, & iube me venire ad te, vt cum Sanctis tuis laudem te in secula seculorum. Amen.

31

CANTICVM DE B.

Virgine Maria.

Ex hortulo deuotionis.

TE cæli Reginam laudamus; te mundi Dominam honoramus. Te laudant è iure vniuersæ creaturæ, Matrem immensæ claritatis; Aulam summæ Trinitatis; Sole diuinitatis amicta, Luna supplantans benedicta: Tota glorificata, His stellis es coronata. Tu æterni Patris es filia dilecta; Tu filij Dei genitrix

trix

trix electa; Sancta quoque sponsa Para-
 cleti. Tibi omnes obediunt Angeli; Te
 cæli cælorum inæstimabiliter amant;
 Tibi Cherubin & Seraphin ineffabili
 voce proclamant, Salue, Salue, Salue ô
 Domina gloriæ: Pleni sunt cæli & ter-
 ra suauitatis gratiæ tuæ. Tu Apostolo-
 rum Regina; Tu Euangelistarum do-
 ctрина; Te Prophetarum laudabilis nu-
 merus; Te Patriarcharum veneratur cu-
 neus. Tu Martyrum victoria; Tu Con-
 fessorum es gloria: Te Paradisi rosæ,
 Virgines formosæ, laudant & continen-
 tes in choro suo canentes. Aue regina
 dulcissima, gaude Domina nostra di-
 gnissima; Quæ gratiam sanctis infun-
 dis, quæ liberat animas de profundis: Te
 ergo & nos rei rogamus, ô Genitrix Dei,
 succurre populo isti, quem pretiosus filij
 tui redemit sanguis Iesu Christi. Super-
 na fac cum Sanctis & nos gloria mune-
 rari; Per te mereamur, ô Mater sancta,
 piè consolari semper. Tot prærogatiuis
 sanctitatis coronata, in gloria Patris;
 Tot priuilegijs dignitatis gaudens iure
 Matris; Iucundare, lætare, gaude maior
 omni laude. O clemens, ô pia, ô dulcis
 Virgo Maria.

Vers. Dignare me laudare te Virgo
 sacrata:

Resp. Da mihi virtutem contra ho-
 stes tuos.

ORATIO.

32

G

Con-

Ex Breui-
ario Ro-
mano.

Concede misericors Deus fragilitati
nostræ præsidium, vt qui sanctę Dei
Genitricis memoriam agimus; inter-
cessionis eius auxilio, à nostris iniquita-
tibus resurgamus. Per eundem Christum
Dominum nostrum. Amen.

33

Ad vltimam benedictionem.

Ex libello
cui titulus
Hymni &
Collectę.

Benedicat nos Deus Pater ✠: Custo-
diat nos Iesus Christus ✠: Illumi-
net nos Spiritus sanctus ✠ omnibus die-
bus vitę nostrę: Confirmet nos virtus
Christi, intercedentibus Sanctis suis in-
dulgeat nobis vniuersa delicta nostra.
Amen.

**CAPVT TERTIVM,
CONTINENS ORATIO-
NES POENITENTIVM, PRO
impetranda remissione
peccatorum.**

P R A E F A T I O.

Lib. 2 Cō-
stit. Apost.
cap. 39.

Genes. 5.

Genes. 7.

DEVS cū misericordia Deus sit,
inquit D. Clemens, à principio
singulas generationes ad pœni-
tentiā vocauit per iustos & Pro-
phetas. Atque illos quidem, qui ante diluuium
fuerunt, per Abel, Sem & Seth: præterea per
Enos & Enoch, qui fuit translatus. Qui in di-
luuiο reperti sunt, per Noe: qui erant Sodo-

mis,

mi, per hospitalitatem Loth. Eos qui post diluuium nati sunt, per Melchisedech, per Patriarchas, per S. Iob. Qui in Ægypto fuere, per Moysen: Israelitas per eundem, & per Iesum, Caleb, Phinees, & reliquos. Eos qui post legem fuere, per Angelos & Prophetas; eosdem per propriam incarnationem ex Virgine factam. Eos qui fuerunt paulò ante corporalem eius manifestationem, per præcursores Ioannem, dicentem; Pœnitentiam agite &c. Qui post eius passionem fuerunt, per duodecim Apostolos, per vas electionis Paulum; & nunc per Apostolorum successores. Ad quod igitur Deus omni ætate tam sollicitè suos adhortatus est, id nequaquam à nobis surda aure debet præteriri. Est enim pœnitentia secunda post naufragium tabula. Vt naufragus igitur alicuius tabule fidem, sic nos pœnitentiam amplectemur. Hæc enim nos peccatorum fluctibus mersos proleuabit, & in portum diuinæ clementiæ protelabit.

Huius pœnitentiæ si habitum inspiciamus, efficiens causa Deus est; à quo immediatè infunditur, sine nobis principaliter operantibus: est enim hæc mutatio dexteræ excelsi. si verò actus consideremus, nos Deo operanti cooperamur. Initio enim Deus peccatorem in inspiratione veræ pœnitentiæ (qua de admissis peccatis homo dolet) præuenit, & ad peccatorum exomologesin, satisfactionemq; congruam excitat, atq;

Genes. 19.

Genes. 14.

Tertull.
lib. de pœ
nitent.Vide Pro
sperū ad
obicctio.
vincenti
anam 15.

que impellit. Deinde fidem charitate destitutam, & peccati sordibus inquinatam Spiritu suo sancto suggerente redintegrat, & fiduciam sperande pietatis indulget; non in operum merito, quæ impius ipse in impietate sua fecit; sed in sanguine Iesu Christi repositam. Hac fiducia erectum ad se, & conuersum (dum homo firmum propositum amplius non peccandi concipit) per Sacramentum pœnitentiæ in verbo absolutionis à peccatis omnibus misericorditer absoluit, & liberat. Simulq; Spiritum suum sanctum, quem homo peccando contristarat, ac repulerat, in visceribus eius innotat, ac restituit: qui deinceps concupiscentiam, quæ ante conuersionem peccatoris violenter post se rapiabat, reprimit, & mortificare incipit: ut amodo non regnet peccatum in mortali corpore, nec obediatur concupiscentiæ, sed Deo: & moueantur membra ad seruiendum deinceps, non immunditiæ & iniquitati ad iniquitatem; sed iustitiæ ad sanctificationem. Sic Deus relapsum post baptismum restituit, & ex iniusto iustum facit. Siue igitur initium, siue medium, siue finem pœnitentiæ cōsideremus, ubiq; gratia & auxilio Dei nobis opus est, quæ nulla re facilius nobis, quàm oratione demeremur.

Partes autem Pœnitentiæ, quatenus Sacramentum est, tres sunt cuius notissima; Contritio, Confessio & Satisfactio: & in his singulis oratio nobis est necessaria. Quantum enim

ad Contritionem, non est in potestate peccatoris, vt ipse sibi largiatur hunc affectum: sed Dei donum est gratuitum, ab illo tamen lacrymis, precibus, alijsq; pijs studijs ambiendum. In Confessione adeò diuina nobis opus est gratia, vt cum densissimis in tenebris versemur sine hac inter peccatum & non peccatum diiudicare nequeamus: sed nec obscuros conscientie nostrae angulos sine diuini luminis ope scrutari, nec quod corde concepimus, ore (nisi aperiat illud Deus) proferre commodè valeamus. Hæc omnia precibus impetrantur. In Satisfactione adeò nobis oratio est necessaria, vt ipsa oratio satisfactionis nequaquam minima pars sit.

Cum itaque in singulis his partibus adorationis subsidium nobis recurrendum sit, nos singulis etiam suas peculiare orationes dedimus: vt habeat deuotus orator in promptu, quid quid in singulis pœnitentie actionibus sibi erit necessarium.

PRO CONTRITIONE.

TRES ORATIONES AD EX-

citandam in anima contritionem & dolorem peccatorum.

ORATIO I.

O Vnigenite fili Dei, magna & ineffabilia sunt, Domine mi, tua beneficia, quæ à te percepi: tu me de pulue-

I
Lod. Granat. lib. 2
Memorialis cap.

re & limo terræ assumpſisti, & animam meam de nihilo ad imaginem & similitudinem tuam creasti, gloriæque tuę pacem fecisti. Tu mihi intellectum, memoriam, voluntatem, liberum arbitrium, cum omnibus membris meis & sensibus dedisti, vt cum ijs te & cognoscerem, & amarem. Tu me custodisti in angustijs vteri matris meę, ne in illis sine Baptismo præfocarer. Tu me post tot peccata, vsque in præsentē diem, patienter sustinuisti: cū interim multi alij sint, qui minùs peccauerint, quàm ego; & tamen quia illos hucusque expectare noluisti, nunc forsitan in Inferno torquentur. Super hæc omnia verò placuit tibi incarnari, & inter homines pro me conuersari, pro me affligi & tribulari, sudore sanguineo perfundi, capi, ligari, palmis cædi, conspui, illudi, blasphemari, candida & purpurea veste vt morio vestiri; flagellis lacerari, spinis coronari, arundine percuti, oculis velari, ad mortem damnari, & ad locum supplicij duci; habens in humeris crucem cui duris clauis affixus es, interq; latrones duos suspensus, & pro malefactore iudicatus, fel bibisti, & acetum; denique morte crudelissima extinctus es. Tot me, Domine, laboribus & doloribus redemisti, & tamē ego vilissimus & peruersissimus peccator, tot beneficijs ingratus, toties nunc denuo te percussi, & peccatis meis in crucem egi. Quare dignus sum, vt

omnes

omnes creaturæ insurgant in me, & vindictam sumant de hac mea iniuria.

Quid dicam de abusu tuorum Sacramentorum, & medicamentorum, quæ mihi pretioso tuo sanguine, & institutisti, & comparasti? Tu me pro tuo suscepisti in Sacramento Baptismatis, ibi me in filium adoptasti, & quasi templum tuum consecrasti: ibi me tanquam Sacerdotem, Regem, & athletam, cui cum inimico luctandum esset, vnxiisti; ibi animam meam tibi desponsasti, & contulisti mihi omnem nobilitatem, quæ ad hanc dignitatem requirebatur. Sed quomodo his omnibus beneficijs & ornamentis à te acceptis vsus sum? Quas cogitationes habui de istis diuitijs conseruandis? Tu me suscepisti pro tuo filio, & ego factus sum seruus peccati. Tu me in templum tuum sanctificasti, & ego me feci habitationem Dæmonum. Tu me armasti, vt generosum militem, & ego defeci, & ad inimicos tuos transfugi: tu me Regem fecisti, & ego in Regno, quod mihi dedisti, superbiui: sponsasti animam meam tibi in perpetua charitate, & ego magis amaui vanitatem, quàm veritatem, plus creaturas, quàm Creatorem. AEquum sanè, imò equissimum esset, ô Domine, vt vel tandem flere, plangere, & lamentari inciperẽ, cùm tot & tam enormia facinora commiserim.

Hoc est quod tanto tempore à me ex-

pectasti, quanto mihi vitam dedisti: toties enim me vocasti, & tamdiu me sustinuisti; percussisti me, & iterum mihi blanditus es: omnes vias modosque tentasti, vt me ad te retraheres. Me expectasti, & ego tua patientia sum abusus; me vocasti, & ego ad tuas voces obsurdui: tu mihi dedisti tēpus pœnitentiæ, & ego illud in mea superbia consumpsi: tu percussisti me, & ego non sensi; tu afflixisti me, & ego nolui suscipere correctionem: tu sudasti, vt me mundares, & ego lotus non sum: tu igne me probasti, & rubigo vitiorum meorum non est extersa: flagellis tuis æquē vt tuis blanditijs induratus sum, ingratus his, rebellis istis.

Nihilominus Domine, cū tot & tanta pro me passus sis, præcepisti mihi ne desperarem, nec tibi diffiderem. Conuerto igitur me totum ad tuam misericordiam, & supplico tibi, da mihi gratiam, vt possim meipsum emendare: quō sic in posterum tibi placeam, tibi que feruiam, ne vnquam me rursus à te auertam: sed tibi semper adhæream, per omnia secula seculorum. Amen.

2

PRO CONTRITIONE ORATIO II.

Idem ibi
dē cap. 12.

O Supreme Factor omnium rerum creatarum, cū mecum cogito, quā grauit̃er infinitam tuam Maiestatē meis peccatis offendi, horreo, & insaniam

me-

meam detestor; considerans quàm benignum & venerabilem Patrem reliqui, execror ingratitude meam; cùm video de quàm nobili libertate in seruitutem tam miseram prolapsus sum, maledico inconstantiae meae; & nescio, quid mihi ante oculos statuam, nisi iudicium & infernum: iustitia enim tua, quam fugere non possum, terret meam conscientiam.

Econtrariò cùm intueor immensam tuam misericordiam, quae secundum Prophetæ tuæ testimonium superat omnia opera tua, mox aura iucundissima spei me refocillat, animamque meam nimis debilem corroborat: quemadmodum enim antea desperabam, sic inuenio hinc remissionem peccatorum in eo, qui per Prophetarum suorum scripta toties inuitat peccatores ad poenitentiam, dicens; Nolo mortem peccatoris, sed magis ut conuertatur & viuat. Sed & filius tuus vnigenitus multis similitudinibus ostendit, quàm paratus es ad ignoscendum his, qui poenitentiam agunt. Illud significauit per denarium amissum, per ouem perditam, & in humeris pastoris ad ouile relatum: potissimum autem per filium prodigum, cuius imaginem in me agnosco: ego enim ille sum, qui verè patrem meum amantissimum deserui, omnem substantiam meam dissipauì; qui obediens appetitibus carnis meae mandatorum tuorum obedientiam fugi, & in tur-

Psal. 144.

Ezech. 18.

Luc. 15.

pissimam peccati captiuitatem cecidi :
nunc in extrema necessitate constitutus
sum, ex qua quis me eruet planè ignoro,
nisi is quem deserui.

Recipe igitur, Domine, per tuam mi-
sericordiam me humilem seruū tuum,
à te remissionem suppliciter petentem.
Sed cum in hanc vsque horam me tam
benigniter (frustra tamen) expectasti) fa-
teor non sum dignus qui oculos meos
in cælum tollam, vel te patrem meum
appellem : tamen quia verè Pater meus
es, dignare me paternis oculis intueri. So-
lus enim aspectus tuus mortuos viuifi-
cat, & omnes errantes ad sese retrahit :
hanc enim qualemcunque poenitētiā,
quam nunc habeo, habere non potui-
sem, nisi tu me respexisses.

Quando vagans à te aberraueram, de
cælo tuo altissimo eminens me despexi-
sti, oculosque mihi aperuisti, vt memet-
ipse intuerer, conscientiam meam scru-
tarer, & me tantis malis exundantē con-
spicerem. Veni ergo Domine, ad recipi-
endum me ; da mihi cognitionē & me-
moriā innocentiae perditae. Non peto
amplexus tuos, non oscula tua ; non oro
vt des splendidam illā vestem, qua indui
soleo ; non antiquae meae dignitatis an-
nulum : non precor, vt me recipias in
statum & dignitatem tuorum filiorum ;
sed gratulabor mihi, si me inter merce-
narios domus tuae, stigmate tuo notatos,
& vinculis tuis ligatos numeraueris, ne
vnquam.

vnquam in posterū te fugiam : non erit mihi molestum, etiam si in hac vita vnus sim ex contemptissimis domus tuæ famulis, saltem ne me in perpetuum à te separes.

Exaudi me itaque pie Pater, & da mihi gratiam vnigeniti Filij tui, & mortis illius merita mihi communica. Da mihi Spiritum tuum, vt purificet cor meum, & corroboret illud in gratia tua, ne denuo per ignorantiam meam reuertar ad illud exilium, vnde tua me gratia reuocauit. Qui viuīs & regnas per omnia seculā seculorum. Amen.

PRO CONTRITIONE

ORATIO III.

3

HÆc oratio, Christiane Lector, per aliquot dies continuos recitari debet, cum omni attentione & deuotione, ab his, qui anhelant ad veram contritionem, & peccatorum remissionem : in ea namque videbit, quā iustis nominibus Deo est obligatus, & quā serio pœnitere debet, qui talem Dominum offendit.

Quis dabit capiti meo aquā, & oculis meis fontem lachrymarum, vt defleam noctes atque dies peccata mea, meamque ingratitudinem in Deū Creatorem meū? Multa inueniuntur, omni potens Domine mi, quæ compungunt animos hominum, eosque ad cognitio-

Idem ibi
dem.
Hier. 9.

nem suorum peccatorum adducunt : sed nihil tam efficax est, quàm consideratio magnitudinis tuæ bonitatis, & multitudinis tuorum beneficiorum, etiam erga ipsos peccatores. Vt igitur anima mea miserrima vel sic confundatur & erubescat, incipiam, Domine, bonorum tuorum, meorum verò malorum nonnulla commemorare, vt vel hinc manifestiùs intelligam, quis tu sis, & quis ego ; qualis tu erga me fuisti, & qualis ego in te.

Fuit aliquando, mi Domine, quando non eram ; & tu mihi esse dedisti, & me ex limo terræ assumpsisti, creans me ad imaginem & similitudinem tuam : deinde ab vtero matris meæ tu factus es Deus meus ; à primo namque momento, quo esse coepi, vsque in præsentem diem, tu es Pater meus, tu Redemptor, tu defensor, & omne bonum meum. Tu creasti corpus meū cum omnibus membris & sensibus meis ; tu creasti animam meam cum omnibus suis potentijs, & vsque huc vitam meam tuæ prouidentiae beneficijs conseruasti.

Omnia hæc (licet per se magna sint, imò penè omnia) exigua tamen sunt pro tua magnitudine. Ceterum quia gratis hæc habebas, nullo magno empti pretio, aliud mihi dare voluisti, quod cōstat tibi pretio maximo, vt magis me tibi obligares. Descendisti de cælo in terram, vt inuenires me, quærens me in omnibus vijs in quibus ego me amise-

ram.

ram. Humanitate tua naturam meam nobilitasti, tua captiuitate à vinculis meis me liberaſti; à potentia Dæmonis me vindicaſti, tradens te in manus peccatorum, & peccatum meum deſtruxiſti, formam peccatoris aſſumens. Voluiſti me tibi obſtringere tanta gratia, voluiſti me allicere hoc beneficio; ſpem meam corroborare tantis meritis; & deſtationē peccati in me generare, oſtendens mihi, quanta feciſti, quanta tuliſti, vt regnum peccati euerteres. Viuas prunas mortuis carbonibus cordis mei ſuperimpoſuiſti, vt tanta multitudine beneficiorum, quæ in hoc vno continentur, obrutus, cum amarem, qui tanta pro me fecit, & tantum mihi amorem exhibuit.

Ecce Domine, redemiſti me, ſed illud quid mihi prodeſſet, niſi baptizatus fuiſſem? In tanta infidelium multitudine, qui per totum orbem diffuſi ſunt, voluiſti me eſſe in numero fidelium, & eorum quibus tam felix ſors obtigit, vt ſint nimirum tui filij, aqua ſancti Baptiſmatis regenerati: illic pro tuo aſſumptus ſum, illic celebris & admirabilis ille contractus, ſeu ſœdus initum eſt, vt tu ſcilicet meus eſſes, & ego tuus: tu meus Dominus, & ego tuus ſeruus; tu meus pater, & ego tuus filius: vbi ſimul conuenimus, tu vt mihi facias opus patris, & ego vt ſeruiam tibi ſeruitute filij. Quid dicam de alijs Sacramentis, quæ in re-

medium meorum malorum instituisti, faciens medicamentum plagis meis ex tuo pretiosissimo sanguine?

Habens hæc subsidia & auxilia nondum in bono perstiti, sed tanta fuit mea malitia, vt non obstantibus his, primam adhuc innocentiam amiserim; & tua vicissim tanta fuit misericordia, vt vsque huc patienter peccantem me sustinueris. O spes mea, & remedium meum, quomodo potero sine lachrymis meminisse, quoties potuisti me occidere, & nihil mihi mali accidit? Quot animarum millia fortè nunc ardent in inferno, quæ minùs peccarunt, quàm ego peccaui, & non ardeo? Quid factum esset de me, si quo tempore illos abstulisti, etiam me abstulisses? quàm strictum fuisset mihi præparatum iudicium, si iustitia me tot delictis grauatum deprehendisset? Quis tunc, ô Domine, ligauit manus tuæ iustitiæ? quis cum ego dormiebam pro me deprecatus est? quis continuit flagellum indignationis tuæ, quando ego illā meis peccatis prouocabam? quid tibi placuit in me, cur mitiùs mecum ageres, quàm cum illis, qui in medijs periculis, atque adeò in feruore iuuentutis, è medio sublati sunt? Peccata mea clamabant ad te, & tu obturabas aurem tuam ne audires: malitia mea contra te crescebat quotidie, & tua vicissim quotidie erga me crescebat misericordia: ego peccabam, tu me expectabas: ego fugiebam,

tu me insequeris: ego defatigabar te offendendo, tu non defatigabaris me expectando; non aliter, atque si peccata mea fuissent beneficia, non offensæ: In medio peccatorum meorum multas à te bonas inspirationes, multasque pias reprehensiones accipiebam, quæ reprehendebant arguebantque vitæ meæ dissolutionem. Quoties me vocasti, & intus me inuitasti, dicens; Tu fornicata es cum amatoribus multis: tamen reuertere ad me, & ego recipiam te. Quoties me hac & simili voce amoris vocasti? quoties etiam me timore & minis terruisti, reducens mihi ad memoriam periculum mortis, & rigorem diuinæ iustitiæ? Quot concionatorum & confessoriorum ordines instituisti, ut suis verbis & consilijs me excitarent, & in via tua, Domine, ambularem iuuarent? Quoties me verbis tuis subsecutus es, inuitans me tuis beneficijs, & castigans me tuis flagellis; intercludens mihi vias omnes venatorum more, ne quæ fugere, aut me à te possem subducere? Quid igitur nunc retribuam tibi, Domine, pro omnibus his, quæ retribuisti mihi? Quia me creasti, debeo tibi omne quod sum; fecisti enim omnia: quia me conseruasti, debeo tibi omne quod sum, & uiuo; omnia enim conseruas: & quia mihi temetipsum dedisti in præmium, quid reddam tibi? Si omnium Angelorum vite & hominum essent meæ, & tibi eas in sacrificium offerrem,

Hier.3.

ferrem, quid esset hæc oblatio, si vni sanguinis, quem pro me tam copiosè fudisti, guttulæ comparetur.

Quis igitur dabit lachrymas oculis meis, vt plangam ingratitude meam, iniquamque meam pro tot beneficijs tuis retributionem? Da mihi ergo, Domine, auxilium, da mihi gratiam, vt debito modo meas in te queam iniquitates confiteri. Ego sum infelix ille, ego (licet talem me non gesserò) sum creatura tua, ad tuam imaginem & similitudinem facta: agnosce hanc figuram; tua enim est; aufer id quod ego feci, & inuenies id quod tu pia manu tua fecisti. Ego vires omnes meas intendi, vt tibi iniuriam facerem, & te offendi ipsis operibus manuum tuarum. Pedes mei veloces fuerunt ad malum, manus meæ fuerunt ad auaritiam extensæ; oculi mei dissoluti ad omnem vanitatē, & aures meæ semper nugis & mendacijs patuerunt. Nobilissimam partem animæ meæ, quæ oculos habebat ad contemplandum te, à pulchritudine tua auerti, & ad flores miserabilis huius vitæ conuerti: quæ noctes atque dies meditari debuisset tua mandata, iam noctes atque dies meditata est, quibus modis illa transgrederetur. Deprauato sic intellectu, quid faceret voluntas? Tu Deus meus, illam ad delicias cælestes inuitaueras, at illa terram cælo prætulit, expandens brachia tibi, Domine, consecrata turpi creaturarum amor.

Hoc

Hoc est, Domine, præmium, hic ille fructus, quem sensus, quos tu creasti, produxerunt. Ah quid potero miser respondere, si mecum in iudicium intraueris, & dixeris mihi; Ego plantaui te vineam electam omne semen verum: quomodo ergo conuersa es mihi in prauum vinea aliena?

Hier. 2.

Quòd si ad primam interrogationem hanc respondere non potero, quid ad secundam de beneficio conseruationis respondebo? tu, Domine mi, tua prouidentia conseruasti hunc, qui nihil aliud meditabatur, quàm quomodo mandata tua transgrediretur, quomodo seruos tuos persequeretur, quomodo ecclesiā tuam offenderet, & quomodo regnum peccati cōtra te muniret. Mouisti linguam, quæ te blasphemabat; rexiisti membra, quæ te offendeabant; & dedisti manducare his qui seruis tuis insidiabantur: adeò vt non tantum ingratus fuerim tuis beneficijs, sed etiam ipsa beneficia in arma, quibus te oppugnaui, conuerterim. Omnes creaturas in vsum meum condideras, vt illo beneficio illectus, amarem te; & ego illas adulteraui, cum toties te per illas offenderim. Malui donum, quàm donantem: & vnde sumenda erat occasio tuæ pulchritudinis cognoscendæ, inde excecatus sum, & non leuaui oculos meos, vt viderem, quanto pulchrior est Creator ipse creatura. Omnia dedisti mihi, vt me tibi redde

rem,

rem, & omnia mihi seruiuerunt; sed ego nunquam tibi aut gloriam, aut tributum debitum reddidi. Creature tuę semper ad meum obsequium paratę fuerunt, (id enim illis pręcepisti) at ego semper in hoc fui, vt te offenderem, & ad hoc omnibus rebus abusus sum: tu dedisti mihi sanitatem, & Diabolus fructus illius collegit: tu dedisti mihi fortitudinem, & ego illam in inimici tui obsequio impendi. Quid dicam? quare tot genera calamitatum & miseriarum, quas passim in alijs hominibus vidi, non suffecere mihi, vt vel ex ijs cognoscerem, omnia mala aliorum mea esse beneficia: ab omnibus enim illis liberaisti me? An igitur licitum cuiquam sit pro beneficio accepto vt ingratum se exhibeat? & quis ille, qui non debet gratiarum actionem pro beneficio accepto? Si feritas leonum & serpentum beneficijs leniatur, quare non erunt, ô Domine, tua sufficientia, vt doment & leniant me? vt vel aliquando possim dicere; Metuamus Dominum Deum nostrum, qui dat nobis pluuiam temporaneam & serotinam in tempore suo; plenitudinem annuę messis custodientem nobis.

Sufficiebat verè mihi, Domine, vt cognoscerem tuum esse, quod tãto tempore Esse meum sustinuisti, etiam si aliam demonstrationem, vel aliud testimonium tuę bonitatis non haberem. Quod si tam stricta futura sit ratio, quę

pro

pro rebus istis, quæ magno tibi non constant, postulabitur; qualis erit illa, quam exiges pro his, quæ pretioso tuo sanguine tibi comparasti? quomodo consilia tua perueri? quomodo violauim mysterium incarnationis tuæ? tu factus es homo, vt me faceres Deum; & ego vilitatis meæ amator, me feci bestiam, & filium Diaboli: descendisti in terram, vt me adduceres in cælum; & ego indignus tali vocatione, quasi qui non merebar, non cognoui illam; & cœno meæ vilitatis perseueraui: tu me liberaisti, & ego me denuo in veterem captiuitatem præcipitavi: tu me resuscitasti, & ego denuo mortem amplexus sum: tu me tecum concorporaueras, & ego me denuo cum Dæmonio coniunxi. Tot & tanta beneficia non hoc apud me potuerunt, vt te agnoscerem; nec tot amoris argumenta, vt te redamarem; nec tot merita, vt in te sperarem; nec talis iustitia, quæ in tua passione refulsit, vt te timerem. Tu te humiliasti vsque ad puluerem terræ, & ego effero me superbia; tu nudus pendes in cruce, & avaritiæ meę totus mundus non sufficit: tibi, qui Deus es, alapas in faciem dederunt; meam vestem si quis tangat, irascor, qui tantum vermis quidam sum vilissimus. Quid dicam Seruator mi? ecce quàm magna est misericordia & charitas tua erga me: mori voluisti, vt mea peccata occideres; & ego confidens in eadem

mise-

miserericordia, bonitate, & amore, peccare in te non sum veritus? Heu quæ maior esse posset blasphemia? Ego ex tua bonitate occasionem sumpsi meæ malitiæ: ex illo eodem medio, quo tu vsus es, vt peccatum occideres, ego occasionem captaui peccatum in me resuscitandi. Sic, sic, Domine, tua consilia peruerti, & inueni inuentiones meæ malignitati ex tua misericordia. Quia tu eras tam bonus, ego arbitrabar mihi impunè licere, si malus essem: & quia mihi tot contuleras beneficia, existimaui licere mihi totidem offensiones & iniurias tibi reddere: adeò vt medicamenta ipsa, quæ tu institueras contra peccatum, ego in occasiones peccandi conuerterim; & gladium quem mihi dedisti, vt me defenderem, & contra inimicos meos dimicaret, hunc in me acuerim, vt vitam mihi ipsi eriperẽ. Denique tu vt dominareris viuus & mortuis, mori voluisti, vt (Apostolo teste) qui viuunt iam non viuunt sibi, sed tibi, qui mori dignatus es pro illis: & ego vt filius Iezabel, sumpsi eandem mortem quasi medium, quo me tuis bonis priuarem, fugiens à tuo seruitio, & faciens me tuorum inimicorum mancipium. Heu quid meritis est, qui talia fecit? Si canes comederint carnes illius Iezabel pro peccato hoc; quomodo meæ poterunt integræ permanere, qui idem omnino feci? Quòd si Apostolus adeo exaggeret cordis humani maliti-

2 Cor. 5.

4 Reg. 9.

Rom. 9.

malitiam, cò quòd ex ipsa lege sumpfit occasionem violandi legem : quanto maior erit malitia ex gratia, si quis accipiat ex ea occasionem ipsam gratiam offendendi?

O patientissime Domine, qui alas pro peccatoribus sustinuiſti : sed multo patientior, qui ipsos suffers peccatores : ceterum durabit semper illa tua patientia? memini quid dixisti per Prophetam; Tacui, semper ſilui, patiens fui: sicut parturiens loquar. Video terram quæ non dat fructum, postquam pluuiam accepit, reprobari & maledici: vineam, quæ postquã bene culta est vuam tamen non producit, sed labruscas, iussu tuo excindi & dari in direptionem. Igitur ô sarmentum inutile & infructuosum, vt quid non times vocem potentis illius agricolæ, seu vinitoris, qui tollit palmites non facientes fructum, & in ignem proijcit? Omnem palmitem in me non ferentem fructum, ait ipse, tollet eum Pater meus, & in ignem mittet. Ecquid metuet ille, qui tale iudicium non metuit? Quàm surdus est ille, qui talem vocem non audit? quàm profundum dormit, qui tali tonitruo non excitatur? Oblectabat me habitatio hæc terrena: inter spinas ambulare iucundum erat mihi, ignis mearum passionum vrebatur me, concupiscentiarum mearum spinæ me pungebant, distractiones cogitationum mearum me diuidebant; me

Esa. 42.

Ioan. 15.

con-

scientiæ meæ vermis mordebat, & omnia hæc libertatem & solatium existimabam esse: tot tantaque mala pacem nominabam. O quàm ignarus eram & rudis in cognitione meiipsum, & quàm durus atque intractabilis in tuo cultu atque obsequio?

Quid faciam, mi Domine, quid faciam? fateor me dignum non esse, qui veniam in conspectum tuum, nec mereri, ut oculos tollam ad aspiciendum te. Quò ibo? & à facie tua quo fugiam? Nónne tu es pater meus, & quidem Pater misericordiarum, quæ nec terminum habent, nec mensuram? etsi enim ego iamdudum filius esse desiero; tu tamen usque huc Pater esse non desinis: etsi ego multa fecerim digna, cur me condemnes; tu tamen modum non amisisti, quo me salues. Quid igitur faciam, nisi ut me ante pedes tuos prosternam, & misericordiam petam? quem inuocabo? quis mihi succurret, nisi tu? Nónne tu Creator meus? Plasmator meus? Gubernator meus? Redemptor meus? Liberатор meus? Rex meus? Pastor meus? Sacerdos meus, & meum Sacrificium? Quò igitur ibo, quò fugiam nisi ad te? si tu me repellas, quis me suscipiet? si tu me reicias, ad quem confugiam? Agnosce Domine errantem hanc ouiculam: ecce venio totus vulneratus, tu potes me sanare; totus cæcus, tu me potes illuminare; totus mortuus, tu me potes suscitare;

totus

totus leprosus, tu me potes mundare. Asperges me Domine hyssopo, & mundabor: lauabis me, & super niuem dealbabor. Maior est misericordia tua, quàm mea iniquitas; maior tua clementia, quàm mea malitia: & tu potes plus remittere, quàm ego peccare. Noli me igitur Domine, noli me repellere; ne respicias multitudinē peccatorum meorum, sed infinitam misericordiam tuam, qui uiuis regnas & in secula seculorū. Amē.

Psal. 50.

POST CONTRITIONEM

4

animus ad diuinā misericordiā spem erigatur hac Oratione.

Memento iustissime ac benignissime Domine Iesu Christe, quòd misericors & redemptor meus es. Si iudex es, ad iudicandum reum tuum, es & Deus ad defendendum seruum tuum, es & creator ad conseruandum opus tuum, es & Deus ad saluandum credentem tuum, & baptizatum tuum.

August. in
lib. de cō-
tritione
cordis.

Ne ergo memineris iustitiæ tuæ solius aduersus peccatorem tuum, sed memor esto benignitatis tuæ erga creaturam tuam. Ne memineris iræ tuę aduersus reum tuum, sed memor esto miserationis tuę aduersus miserum tuum. Scio quidem & fateor, quòd conscientia mea meretur damnationem, & poenitentia mea non sufficit ad satisfactionem.

Parce ergo mihi Domine qui es salus mea, qui non vis mortem peccatoris:

parce

parce ergo peccatrici animæ meæ. Deus meus es, in te pono spem meā, tibi committo animā meam. Custodi animam meam dum dormio, conserua eam dum aliquid facio : memento eius dum ego obliuiscor tui : peccator sum & miser, sed peccasse me doleo, & miserum me cognosco. Misericors Deus miserere mei, miserere humilis tuæ creaturæ.

Peccare est Deum inhonorare, quod homo facere non debet, etiamsi necesse esset perire. Heu quia peccaui, Deum verum exhonoraui, omnipotentem prouocaui. Peccator quid feci ? quanta mala feci ? Væ mala agenti, væ bona negligenti. Væ, væ, ira omnipotentis Dei, ne irruas super me : ira Dei vbi poteris capi in me ? non est quod potest tolerare totam te in toto me.

Deus Dominus cuius bonitas non exhauritur, cuius scientia nō deficit, cuius misericordia non exinanitur, cuius potentia quicquid vult efficit, vnde potero respirare, qui sic ob peccata mea cogor desperare ? Nam si irasceris peccantibus, soles tamen benignè dare cōsiliū pœnitentibus. Doce me Domine vnde debeam sperare, vt possim saluari ; orare volo, sed nescio. Secundum ignorantiam meam non possum Dei misericordiam prouocare, ideo cogor desperare propter iniquitatem meam.

Scio quidem & fateor quia peccator sum, quia peccatum sponte subij : & iu-

stè non exaudior, quia non obediui. Vtique bone Domine peccaui, erraui: veruntamen te non negaui, nec detestor bonitatem tuam. Ideo fac mecum secundum misericordiam tuam, qui es benedictus in secula. Amen.

PRO CONFESSIONE.

ORATIO AD IESVM AN-
te Confessionem Sacramentalem
dicenda.

5

Domine Iesu Christe, nouę legis noue Sacerdos, qui non offers sanguinem hircorum aut vitulorum, pro peccatis hominum; sed propriū in ara crucis pro nobis effusum Patri continenter immolas, cuius virtutē nobis in septem mysticis illis ac sanctificantibus Sacramentis reliquisti, eaque cum tremore ac reuerentia frequentare præcepisti: ecce ego miser & infelix, à vertice capitis ad plantas pedum lepra pessima respersus, à te mundari flagitans; ad te venio, tibi peccata mea, quę super numerum arenę maris multiplicata sunt, humili confessione detegens. At tu Domine me sanare & expiare paratus es, & quidē non longinqua peregrinatione, non magnis sumptibus, non longa inedia, non denique sectionibus aut cauterijs; sed me ad ministrum tuum remittis; Sacerdoti me ostendere, ei que peccatorum meorum lepram reuelare & confiteri præcipis, vt

Collector.

H

ille

ille clauē sibi à te tradita officinam pœnitentiæ mihi aperiat, remedium sanguinis tui in hoc Sacramento repositum inde promat, illud mihi applicet, & me à peccatis omnibus, te in illo operante, absoluat.

4 Reg. 5.

Quid agam hîc Domine? Præceptum hoc tuum, non aliter atque Syrus ille verbum Helisei, contemnam, tanquam vile nimis & tantæ meę infirmitati minus sufficiens? (Quis enim facîle credat tot, tamque enormia peccata ab homine dimitti, nisi diuinæ tuæ voluntati sic fieri placuisset?) Nequaquam: dicam potius cum seruis illius; O anima mea, si rem grandem dixisset tibi Saluator tuus, certè facere debuisses: quanto magis, quia nunc dixit tibi, Vade ad Sacerdotem, & confitere illi peccata tua, & mundaberis?

Sed, ô bone Iesu, viâ modumque huic tuo mandato satisfaciendi nō inuenio, nisi me adiuues. Ego quidem quantum potui secretum conscientiæ meę ingressus sum, omnia eius latibula perscrutatus, mala mea ad memoriam reuocare, & quidquid illic sordium inuenio in vnum quasi fasciculum colligere cupio, vt per oris confessionem foras eijciam: sed tantam inuenio in me ignorantiam atque infirmitatem, vt cū omnium vicinorum meorum mores & crimina habeam perspectissima, eaque frequenter alijs referam, mea prorsus ignorem; &

cūm

cùm quid in aliena domo fiat habeam exploratum, quid domi meæ geratur nesciam, simque velut in mea regione peregrinus.

Huius tanti stuporis causa, ô benigne Iesu, quæ alia, quàm quòd omnem spiritualem sensum amisi, atque ita sine ullo doloris sensu peccauerim? Si enim conscientiae aculeis, cùm delinquo, pungerer, dolor ipse ignorare atque obliuisci non sineret, quod aculeum in animo infixum reliquisset. Oro itaque te, mi Domine, redde mihi sensum illum spiritualem, vt in posterum sentiam cum animi dolore & cruciatu, si qua in re tuam Maiestatẽ offendero, ne tam faciliẽ eius mihi memoria excidat. Sed & hoc præcipuẽ nunc oro, vt in hac hora conscientiae meæ tenebras lumine tuæ gratiæ sic illustres, vt qui trabes grauissimorum peccatorum nunc in ea non video, leuissimorum criminum festucas manifestẽ conspiciam, & per confessionem oris inde eiciam.

Verecundiam mentis meæ sic, ô dulcissime Iesu, moderare, ne nimius pudor os confitentis obstruat, nè impudentia reuerentiam, veræque contritionis sensum auferat: scio enim quòd in sacrificijs, quæ pro peccatis offeruntur, nec oleum lætitiæ, nec thus suauitatis imponitur.

Da quæso, vt hæc, quam paro, confessio sit pura, vt omissis ambagibus, quibus

Pfal. 140.

peccata mea tegi, vel inuolui possent, apertè, quæ palàm agere nō puduit, confiteri non erubescam. sed & ne declines cor meum in verba malitiæ, ad excusandas in peccatis excusationes. Sit vera; ne scienter vel ignoranter, etiam sub humilitatis specie, aliquid falsi inferatur, nec certa pro dubijs, nec dubia pro certis proferantur. Sit integra; ne expudore quodā subrustico ac pernicioso aliquod lethale crimen ex industria omittatur. Da denique vt sit humilis; quia scio te cor contritum & humiliatum non despicere.

Pfal. 50.

Adauge quoque in me fidem, ne de Sacramentorum tuorum, & præcipuè Cōfessionis virtute & efficacia vnquam dubitem, aut malè sentiam. sed sicut fidelis & obediens filius cum matre Ecclesia credam, ad absolutionem tui Sacerdotis, non aliter atque ad vocem Angeli catenæ de manibus Petri, peccata solui, vincula Diaboli rumpi, homini pectus tuum aperiri, illum in filium adoptari, Spiritu sancto vngi, virtutibus ornari, & regni tui hæredem institui.

Sed & ne quid, ô Domine, huic tanti ponderis operi, in quo salus & interitus meus versatur, desit, tuam obtestor bonitatem, vt Sacerdotem mihi concedas bonum, prudētem, taciturnum, scientia præditum, & potestate munitum: ne pro sincero doctore, impostorem; pro vero medico circumforaneum; pro pastore

tyran-

tyrannum inueniam; ne denique cæcus cæco ducatum præstet, donec ambo in foueam infernalem incidamus: sed qui me ab omni peccatorum meorum reatu legitimè absolutum consilijs etiam suis salutaribus doceat pœnam dignis operibus pœnitentiæ redimere, & regia deinceps via ad cælestem aulam contendere; Vbi tu Domine Iesu viuis & regnas cum Patre & Spiritu sancto Deus, per omnia secula seculorum. Amen.

Marth. 5.

CONSILIUM GRANATEN.
SIS TEMPORIS CON-
fessionis.

Statim post generalem confessionem, hæc quæ sequuntur, peccatorum enumerationi præmittantur.

Dicat pœnitens, se non cum eo dolore, contritione, & proposito emendandæ vitæ ad Confessionem accedere, quæ tantum Sacramentum, & peccatorum grauitas atque multitudo requirunt.

Quòd conscientiam suam non satis diligenter examinauit.

Quòd pœnitentiam sibi à Confessario in præcedenti confessione iniunctam non debita deuotione & alacritate perfecit.

Quòd Confessarij præceptum accuratè non satisfecerit: & hîc exprimat, si aliquid iusserit restitui, votum reddi, peccatum aliquod sin-

gulare relinquere, vel periculosam occasionem fugere, quod non fecit. Horum omnium se reum dicat. Deinde peccata sua reliqua commemorare incipiat.

6

GRATIARVM ACTIO

post Confessionem.

Collector

*Matth. 18.
Ioan. 20.*

Domine Iesu Christe Saluator & Redemptor mundi, tibi data est omnis potestas in cælo & in terra, cuius quidem Apostolos & omnes successores eorum participes esse voluisti, dans eis auctoritatem ligandi & soluendi sicut in terra, & in cælo; remittendi quoque & retinendi peccata. sub ijs verbis magnum, & certantibus in hoc spirituali & inuisibili stadio militantis Ecclesiæ necessarium Sacramentum instituens, ad quod milites tui confugiant, & curatis vulneribus iterum in campum redeant acrius bellaturi.

Pro qua paterna in nos cura & solitudine tua diuinæ tuæ bonitati immensas ago gratias; cum sine hoc salutari remedio planè de nobis esset conclamatū: & vix aliquis ad optatam gloriæ coronam peruenire posset. Etenim ea est naturæ nostræ imbecillitas, vt in tam diuturno cum aërijs potestatibus certamine non rarò vulneremur & concidamus; cui malo nisi succurisses, nobisque hoc emplastrum spirituale ad animæ vulnera sananda reliquisses, quotusquisque

nostrum

nostrum Domine coronandus, quotus-
quisque saluandus esset?

Tu quidem in veteri testamento remissionem peccatorum poenitentiam agentibus promissisti; sed quis de sua poenitentia certus, quis de remissione securus esse posset, nisi in noua lege hoc Sacramentum instituissem, in quo Sacerdote efficaciter absolutionis verba proferente, homo iustificatur, & fit noua creatura?

Quid itaque retribuam tibi, ô suauissime Iesu, pro omnibus quæ retribuisti mihi? formatus eram ex massa perditionis, natus perditionis filius, & tu me ab illa massa segregasti, & filium æternæ salutis regenerasti: tu, cum infirmus, imbecillis & timidus eram, me tuo sancto Spiritu confirmaisti, & oleo lætitiæ unxisti, vt tua castra sequerer, & pro tui nominis gloria, proque salute mea fortiter dimicarem: tu mihi multis opus habenti, & in hoc spirituali bello sepe esuriēti & sitiēti cibum & potū dedisti, non qualemcunque, sed quo nobiliorem nec terra nec cælum habet: tu denique me miserè vulneratum & seminiuum iacentem, omnibus donis tam naturæ, quam gratiæ spoliatum in xenodochium Ecclesiæ tuæ reduxisti, Confessionis Sacramento sanasti, & iam sanatum nouis charismatibus & gratiarum donis exornabis.

Misericordias igitur tuas in æternum

Psal. 88.

Psal. 102.

cantabo Domine, & in generationem
& generationem annuntiabo miserati-
ones tuas in ore meo. Quia tu propitia-
tus es omnibus iniquitatibus meis, tu
sanasti omnes infirmitates meas. Tu re-
demisti de interitu vitam meam, tu co-
ronabis me in misericordia & miserati-
onibus: tu replebis in bonis desiderium
meum, renouata est, vt aquilæ, iuuentus
mea. Non secundum peccata mea fecisti
mihi, neque secundum iniquitates me-
as retribuisti mihi. Quoniam secundum
altitudinem cæli à terra corroboraſti
misericordiam tuam super timentes te.
Quantum distat ortus ab occidente, lon-
gè fecisti à me iniquitates meas.

Benedicite igitur mecum Domino
omnes Angeli eius, potentes virtute, fa-
cientes verbum eius. Benedicite mecum
Domino omnes virtutes eius, ministri
eius, qui facitis voluntatem eius. Bene-
dicite mecum Domino omnia opera eius,
in omni loco dominationis eius. Bene-
dic anima mea Domino.

7

ORATIO PRAECEDENTI

gratiarum actioni subiicienda.

Collectio

SVperest, ô benignissime Iesu, vt qui
ſccepisti in me opus bonum, perficias.
Oro igitur, & cum animi summa demis-
ſione detestor, vt ſi quid in hac Confes-
ſione à me omiſſum, ſi quid peccatum, ſi
quid modo non debito factum ſit, id
omne mihi miſericors remittas. Vereor

enim

enim opera mea coram Deo meo plena non esse, & imperfectum meum vident oculi tui: Perfice igitur quod imperfectum, supple quod omissum, & ignosce quod peccatum est.

Apoc.3.
Psal.138.

Da mihi robur & fortitudinem, vt poenitentiam à Sacerdote, vicario tuo, pro peccatis mihi iniunctam, animo hilari & deuoto perficiam, nec carnis infrunitæ tergiuersationes, nec mundi obloquia, nec Dæmonis tentationes respiciam: sed potius in omnibus peccati turpitudinem, & iniuriam tibi à me illatam ob oculos semper habeam, vt durum non sit pro peccati mensura plagarum in me modum statuere: vt quantum glorificauit se caro, & in delicijs fuit, tantum illi tormentum detur, & luctus tantus in hoc seculo, ne pereat in futuro.

Apoc.18.

Obsecro denique, ô Iesu fili Mariæ Virginis, vt qui pro tua misericordia me in hoc Sacramento ab innumeris flagitijs, in quibus, tanquam iumentum in stercore suis, computrescebam, pretioso tui lateris sanguine abluisti & mundasti, gratiam deinceps mihi conferas tuam, ne tanquam canis ad vomitum, & sus lota ad volutabrum recurram: sed viam mandatorum tuorum indefinenter ambulem.

2 Pet.2.

Da mihi vt te, qui decem talentorum millia mihi condonasti, totus dulcedine amoris tui plenus, totus flamma cha-

August.in
Meditat.
cap.1.

ritatis tuę accensus, diligam ex toto corde meo, totisq̃ue medullis præcordiorum meorum; habēs te in corde, in ore, & præ oculis meis semper & vbique: ita vt nullus in me pateat locus adulterinis amoribus. Tribue mihi misericordiæ opera, pietatis studia; compati afflictis, consulere erroneis, succurrere miseris, subuenire egenis, consolari mœstos, releuare oppressos, flebiles, refouere: Dimittere debitoribus, parcere in me peccantibus, odientes me diligere, pro malis bona reddere, bonos imitari, à malis cauere, virtutes amplecti, vitia fugere, in aduersis patientiam, in prosperis modestiam; terrena calcare, sitire cælestia: vt fructus veræ pœnitentiæ per vitæ nouitatem in me multiplicentur. Amen.

PRO SATISFACTIONE.
DOCTRINA CATHOLICA
DE SATISFACTIONE.

Ex 3 Con-
ciōe Gra-
natenfis
de Pœni-
tentia.

Aliter Baptismus, aliter Pœnitentiæ sacramentum peccata remittit. Baptismus enim regeneratio quædam & natiuitas interni hominis est: Pœnitentia verò est languentis animæ medicina. Videmus autem in rerum ortu atque natiuitate nouam creaturam sic oriri, vt nihil in ea veteris formæ resideat. Cum enim ex ouo pullus nascitur, nihil in pullo ex ouo vnde formatus est, remanet. At in morborum curatione aliquando quidē æger sic à morbo

sana-

sanatur, vt nihil in eo veteris morbi aut imbecillitatis appareat: aliquando verò reliquie nonnullæ suæ pristini morbi, suæ infirmitatis & imbecillitatis in eo manent.

Cùm ergo Baptismus (vt antè diximus) regeneratio & natiuitas interni hominis existat, necesse est, vt nihil in eo, qui baptisma suscepit, veteris hominis resideat; sed noua creatura consurgat. Cùm autem vetus homo criminibus & criminum pœnis obstrictus sit, vtrumque noua natiuitas abolet: atque ita demum noua creatura omnis culpæ atque pœnæ expers in Christo renascitur.

At in sacramento Pœnitentiæ, quod languentis animæ curationem esse diximus, aliquando quidem tam acris animi dolor & pœnitentia est, vt (quemadmodum in baptismo) omnis culpa simul & pœna deleantur. Aliquando verò minor, quàm pro scelerum magnitudine est: atque hoc tempore culpa quidem, & æterna pœna culpæ debita remittitur, & pristinae gratiæ atque Dei amicitia homo redditur, & de temporaria etiam pœna portio aliqua remittitur.

Quòd si tota non relaxatur; non tam hoc sacramento, quàm negligentia nostræ tribuendum est: qui minùs parati ad illud accedimus, dum scelerum magnitudinem contritionis atque doloris magnitudinem non equamus. Quæ quidem contritionis infirmitas satisfactionis

labore sarcienda est. Hoc autem facimus, cum præscripta à Sacerdote pœnam amplectimur, & ipsi quoque nobis eam indicimus, quo diuinæ iustitiæ legibus satisfaciamus: atque ita nos ipsi & accusatoris, & iudicis, & carnificis officio fungimur: cum & crimina nostra accusamus, & pœnam nobis pro illis, vel ipsi indicimus, vel indictam à Sacerdote amplectimur, & nobis infligimus. Quod cum facimus, illud Apostoli implemus; si nos ipsos iudicaremus, non utique iudicaremur. Quisquis autem hoc agere renuit, sciat negligentiam hanc igne purgatorio luendam esse.

2 COR. II.

Eadem hæc auctor latius tractat in Memorialis libro 2 parte 3 cap. 1. & 2, ubi de veterum Monachorum satisfactionibus commemorat ex Climaci Scala Paradisi gradu 5 horrenda & notatidigna.

Præter charitatem in Deum & proximum, præter multas virtutes alias, præcipuè tres numerantur, quibus Deo pro peccatis nostris satisfacimus, Eleemosyna, ieiunium, & Oratio: tum quia maiorem præ cæteris pœnam secum adferunt, magisq; nos affligunt; tum quia diuitijs, corpore, & anima Deum offendimus, atque iisdem Deo per has virtutes reconciliamur; per Eleemosynam, dum offerimus illi diuitias per ieiunium, dum corpus; per Orationem dum animam; tum vel maximè quia tres offendimus, quibus totidem virtutibus

satis

*satisfacimus, Eleemosyna scilicet proximo,
ieiunio nobis, & Oratione Deo.*

SEQVVTVR ORATIONES
SATISFACTORIAE, QVIBVS
peccatorum remissionem à
Deo petimus.

OBLATIO OMNIUM LABO-
*rum, atque pœnarum Christi pro pec-
catis nostris.*

8

Quid retribuam tibi Domine, pro
omnibus quæ retribuisti mihi? qua
gratitudinis significatione tanta tua be-
neficia compensabo? quid tibi pro tam
insigni tua misericordia reddam? heu
quàm iniquè meritis tam liberalis & pijs
benefactoris respondi? Semper ingratus
fui tuis beneficijs, semper inobediens fui
tuis mandatis, semper inspirationibus
tuis animum clausi, culpam culpæ, &
peccatum peccato addidi.

ExMemo-
riali Gra-
natē. lib. 5

Confiteor Domine, quòd non sum
dignus vocari tuus filius, etsi ego te Pa-
trem meum agnoscam: tu enim verè
pater meus es, tu spes mea, tu fons mise-
ricordiæ, qui non repellis peccatores ad
te confugientes: sed recipis, lauas, & refi-
cis illos. Ecce igitur adiutor mi, vide
quomodo ego omnium creaturarum
pauperrimus ad te venio, nihil aliud ad-
ferens, quàm ingentem meorum pecca-
torum sarcinam.

Ante pedes tuæ pietatis me proster-

no, humiliter misericordiam flagitans, ignosce quaeso mihi, ô firma spes mea, salua me pro tua infinita clementia.

O dulcis Iesu, in remissionem meorum peccatorum offero tibi immensam charitatem tuam, qua tu Deus infinitæ Maiestatis motus, non dedignatus es pro me incarnari, homo fieri, & in hoc mûdo triginta tribus annis in multis tribulationibus, pressuris, angustijs, persecutionibus & laboribus versari. Offero tibi lethalem illam angustiam, sudorem illum sanguineum, & agonem illum, qui cor tuum affligebat & lancinabat, cùm in horto iacens in terram prostratus, patrem deprecabaris : offero tibi ardens illud desiderium, quo desiderabas pati pro nobis, quando te spontè in manus inimicorum tuorum beneplacitum patri sacrificium pro nobis tradidisti. Offero tibi omnes iniurias, blasphemias, alapas, verbera, sputa, aliaque omnia tormenta, quæ in ædibus Annæ & Caiphæ miserrima illa nocte sustinuisti. Offero tibi, ô bone Iesu, omnia hæc, rogans infinitam tuam bonitatem, vt per merita illorū mihi condones omnia mea peccata : pœnam simul cum culpa remittas, animam ab omnibus peccatorum reliquijs purifies, & tandem ad vitam eternam perducas.

Offero tibi humilitatem, obedientiam & patientiam illam inestimabilem, quam exhibuisti, cùm te ad columnam

durissi-

durissimam ligatum flagellabant, inde spinis coronabant, & purpurea te chlamyde ad maius ludibrium circūdabant satellites illi Satanæ, & perpetui gehennæ titiōnes : cū illudentes te salutabant, in faciem tuam expuebant, & arundine, quam in manu pro sceptro gerebas, saucium, fractumque caput tuū percutiebant. Offero tibi afflicti corpori tui lassitudinem, cruentata vestigia, & onus graue crucis, quod delicatis, & flagris miserè conscissis humeris tuis portabas. Offero tibi sitim illam, qua crucifigendus æstuabas, omniaque alia tormenta, quæ pro nobis mansueto cordi sustinuisti. Omnia hæc tibi cum gratiarum actione offero, tuam immensam obsecrans pietatem, vt per horum merita mea diluas peccata, poenam & culpam simul remittas, animam meam à peccatorum reliquijs purifies, eamque tandem ad vitam æternam perducas.

Dulcis Iesu, in satisfactionē pro peccatis meis offero tibi crudelissimos dolores, quos passus es, cū milites vestem tuam carni & ossibus concreto sanguine adglutinatam crudeliter corpori tuo detraherent, omniaque vulnera in flagellatione accepra renouarent : quando in crucem proiectus manus, pedesque sanctissimo ligno duris clauibus compaginari passus es, tanta cum violentia, vt omnes articuli atque membrorū iuncturæ locis suis naturalibus emotæ sint.

Cū

Cum pretiosus tuus sanguis ex omnibus tuis membris, haud aliter, quam flumina è fontibus, scaturiebat. Omnes & singulas pretiosi tui sanguinis guttulas tibi offero, tuæque pietati obsecro, vt per illarum merita mea diluas peccata, pœnam simul & culpam mihi remittas; animam meam à peccatorum reliquijs purifies, eamque tandem ad vitam æternam perducas.

Clementissime Iesu, offero tibi illam benignitatem & mansuetudinem, qua cum sustinuisti opprobria & impiorum conuicia, qui commouentes capita sua, subsannabant ac illudebant tibi, dum tu pro illis Patrem orabas. Offero tibi horrenda illa tormenta, quæ pertulisti, dum totus afflictionibus, cruciatibus & doloribus in prædam datus, omni consolatione interna & externa destitutus, atque à Deo & hominibus derelictus, miserrimè cruci affixus inter cælum & terram, medius inter duos nequissimos latrones, pendeabas.

Offero tibi intolerabilem sitim, qua in cruce affligebaris, humilitatemque & reuerentiam illam, qua cum spiritum tuum inclinato capite Patri commendabas: offero tibi salutiferum illum sanguinem de latere tuo, lancea militis aperto, profluentem. Omnia hæc tibi offero, atque pro ijs, quantas possum tibi gratias ago, te suppliciter orans, vt peccata mea mihi condones; culpam simul

& poenam tollas ; animam meam ab omnibus criminum reliquijs purifices, eamque tandem ad vitam æternam perducas, vbi tu viuis cum Patre & Spiritu sancto, per omnia secula seculorum. Amen.

ORATIO,

*Qua peccatoris anima, Deo reconciliata,
ei se commendat.*

9

DEprecor te Iesu Saluator, bone redemptor, quæ pretiosissime sanguine tuo redempta sum, vt propter carnis corruptionem non peream, neque veniam in mortem secundam, nec in terram obliuionis. Hæc vox in auribus misericordiæ tuæ sonet, vt tuam, non carnis faciam voluntatem, & omnis mens mea te meditetur, in te delectetur, te sequatur, te confiteatur, qui redemisti me.

August. in
lib de sa-
lutatibus
documē-
tis.

In æternum misericordia tua est, & in misericordia tua reuixi perdita peccatis, & surrexi à mortuis ; quoniam segregasti me à peccatis adolescentiæ meæ, & egi poenitentiam coram te ; quia seruasti mihi tempus conuersionis, & considerans peccata mea compuncta sum, & te inspirante egi poenitentiam coram te. Læta iam inde tibi nunc & semper innumeras gratias refero, quia vt inuenirem te, tu prius quesuisti me ; vt redirem ad te, tu compulisti me ; vt verberarer, tu pius pater respexisti ; vt confiterer, tu es operatus ; & vt me recognoscens plan-

getem,

gerem, tu dedisti mihi.

Pone Domine lachrymas meas in conspectu tuo, & perueniat ad te in cælum deprecatio mea. Adesto precor & subueni, atque in manibus tuis cōmendatam tibi meipsam suscipe, liberans me de ore sæuissimi Draconis, & de manu atrocissimi inferni, cū acceperis me, vt auferres de medio vmbre mortis: imò deduces in semitam lucis, in clarissimam regionem viuentium. Colloca me in caulis tutissimis gregum tuorum, quia tu es pastor bonus, quærens & reducens perditam, tueris & saluas inuenta, sanas & foues languida.

Et tu es misericors Dominus, qui sperantes in te non confundis; requirentes te non derelinquis; reuertentes ad te non respuis; sed exultando & laudando suscipis, atque in æterna beatitudine, vnā cum sanctis & electis tuis, æternaliter regnare concedis; quia est tibi cum æterno Patre & Spiritu sancto vna Deitas, gloria, virtus, imperium & potestas in secula secula seculorum. Amen.

10

ALIA QVA PETITVR

remissio peccatorum.

Granatē.
sis lib. 5
Memori-
alis.

O Pater omnipotens, æterne Deus, totus pius, totus misericors; ecce ego peccator omnium miserrimus ante pedes tuos humi prostratus iacens confiteor maxima, plurimaque peccata mea, quibus te vnquam, benignissime Pater,

offendi.

offendi. Agnosco magnam ingratitudinem meam, quòd tam paruipendi infinita, inestimabiliaque beneficia tua, mihi hætenus collata; vt qui inter alia tantum mihi amorem, tantamque benignitatem exhibuisti, & tam longo me tempore expectasti, vt conuersus ad te poenitentiam agerem, & in profundam Erebi abyssum non ruerem; prout peccata mea iam antea sæpe meruerāt: imò qui me tot modis ad iustitiam sectandam inuitasti, & vt sequi te possem gratiam tuam mihi obtulisti.

Mi suauissime Domine, quoties stetiisti ante ianuam cordis mei, & multifarijs tuis inspirationibus pulsaisti, cupiens à me tibi aperiri? quoties tuis me beneficijs prouocasti? quoties blanditijs tuis me pellexisti? quoties me tribulationibus & calamitatibus impulisti? nihilominus te semper à me repuli, tibi restiti, tibi dorsum obuerti: tu tamen pro infinita tua misericordia atque patientia me sustinuisti. Fateor Domine iustè, & pro meritis meis me in profundum inferni deturbare potuisses: sed pro tua clementia iræ tuæ impetum cohibuisti, quam tamē tot modis in me prouocaueram. Mirandum profectò Pater, & quidem vehementer mirandum est, cor meum dolore non disrumpi, quoties hæc omnia mecum perpendo. Indignus sum, qui creatura tua dicar: indignus, quem terra diutius sustineat; indi-

gnus,

gnus, cui terra fructus producat, quibus victitem.

Ad stuporem vsque mirari meritò quis posset, quòd elementa, & omnes simul creaturæ in me non insurgunt, & iniuriam communi omnium Domino à me illatam non vindicant. Tu tamen clementissime Pater miserere mei, & aperi mihi infinitæ tuæ pietatis viscera, ignosce mihi, quòd conuersionem meam ad te tam diu prorogavi. Aperi mihi benignum & paternum pectus tuum, & da mihi nutrimentum, quod filiis tuis dare consueuisti. Supplex te oro Domine, vel nunc tandem operare in me, propter quod me hactenus expectasti.

Confiteor tibi Domine ex toto corde, & ex tota anima mea, peccatorum omnium, qui in mundo sunt, me maximum esse: nihilominus de tua bonitate confido. Etenim peccata mea licet plurima sint, tuæ tamen miserationes numerari non possunt. O Pater amantissime, si vis, potes me mundare. Sana me Domine, & sanabor, quoniam me tibi peccasse confiteor. Memor esto verborum tuorum, quæ dulciora sunt super omne mel & fauum, quibus peccatori nullum esse potest maius solatium: ais enim per os Prophetæ; Tu fornicata es cum amatoribus multis, tamen reuertente ad me, & ego suscipiam te.

Quare, ô pie Pater, huic tuæ promissioni inhærens, atque innixus conuerto

ad te.

Math. 8.

Hier. 3.

ad te, & quidem ex toto corde, non aliter atque me hoc verbo solū vocasses, meq; solum ad tuā misericordiam inuitasses. Scio Domine, & fateor me omniū creaturarum creaturam esse miserrimam: ego enim sum filius ille prodigus, qui recessi à te patre luminum, à quo omne mihi bonum proueniebat. ego tanquam ouis perdita longissimè à tuo grege aberrauī; gratiam quam tu mihi liberaliter impartieras, turpiter dissipauī. Dereliqui te fontem aquæ viuæ, fodi mihi cisternas, & bibi aquas turbidas, plenas amaris consolationibus, & quæ breui tempore exiccantur. Omnes enim consolationes, omnesque huius mundi voluptates instar fumi euanescent.

Dereliqui te panem vitæ, glandesque ac filiquas à porcis conculcatas, & protrititas comedi, passionēs & affectus animi inordinatos, brutosque appetitus meos secutus. Recessi à te summo bono, secutusque sum terrena & transitoria, quæ me perdiderunt. Nunc autem, Pater mi, tibi supplico, ne memineris iniuriarum, quibus ego tuam Maiestatem affeci. illud autem non meorum supplico respectu meritorum, sed laborum atque dolorum vnigeniti filij tui intuitu, quos ille pro me sustinuit.

ET tu Vnigenite summi Patris Fili, Domine & Saluator mi, miserere mei. Omnes meas iniquitates, omnem iniuriam, ignominiam, iram, superbiam, auaritiā,

ritiam, inobedientiam, impudentiam, presumptionem, cum omnibus alijs malis, quibus te irritaui, in infinitam tuam bonitatem, clementiam, & sanctissima vulnera tua, in meum refugium latè patentia, projicio : me totum tibi reddo, tuæque gratiæ commendo. Tu enim es spes mea, tu es auxilium & fortitudo mea. Quantum me turbant & confundunt mea peccata, tantum me exhilarat & consolatur tua bonitas, infinitaque passionis tuæ merita.

Peccata mea licet per se pondere sint grauias, & numero infinita, in comparatione tamen tuarum miserationum leuia sunt, & pauca. hac fretus fiducia ad te venio, tibi confiteor, sperās quòd non perdes, quem ad tuam imaginem & similitudinem creasti, & cuius amore te nostræ naturæ, carnisque & sanguinis nostri fecisti participem. Spero me à te condemnatum non iri, quem tot laboribus & doloribus tanquam incomparabili pretio redemisti tu, qui viuis & regnas per omnia secula seculorum. Amen.

II

ALIA DEVOTISSIMA

pro peccatorum remissione.

Exhortu-
lo deu-
tionis.

O Iesu mi dilectissime, ego sum miser & infelix ille peccator, qui tibi tot vulnera infixi, teque rursus peccatis meis, heu nimis multis & magnis, crucifixi. Ecce ante te iudicem, patrem ta-

men

men meum, sto, tot criminum reus, tot peccatis obnoxius, obsecrans te per viscera misericordiæ tuæ, aperiuntur denovo vulnera tua omnia in conspectu patris tui, & fluant in miserā, immundam, & criminibus multis deturpatam animam meam, neque obstruantur, priusquam me abluerint & perfectè munda-uerint.

O dulcis Iesu, ne auertas faciem tuam à me; sed infinita misericordia tua me perfunde, & respice me oculis tuæ pietatis, quibus respexisti Mariam Magdalenam in conuiuio, Petrum in pontificis atrio, & latronem in Crucis patibulo. Da mihi veram cognitionem meorum peccatorum, da iustum dolorem; me in paradysum tuæ gratiæ recipe, me tuo feruente sanguine laua, & pretiosa tua morte me viuifica. Ignosce mihi, & aufer à me quicquid cor meum malè possidet; quia tu ipse dixisti; Si exaltatus fuero à terra, omnia traham ad meipsum.

Quapropter oro te, ô Redemptor animæ meæ, trahe me ad te, & ab occultis meis munda me. O lux vera, illumina tenebras mentis meæ. O ignis consumens, exure in me omnia peccata & vitia mea; veni & visita infirmam animā meam, munda conscientiam meam, & in ea gratum tibi fac habitaculum. O dilectissime Domine pro me in arbore crucis extense, è peccatorum meorū sordibus me trahe, me amplectere, me ab omni peccatorum

Luc. 7.

Luc. 22.

Luc. 23.

Ioan. 12.

Psal. 18.

macu-

macula mundatum exosculare. O nobilis botre in torculari crucis expresse, nudis & cādidis, sanguine tamen rubicundis brachijs tuis animam meam preme: da vt premaris vicissim ab ea, & tāquam myrrhæ fasciculus inter vbera illius commoreris. O confixe & transfixe miles, quā crudeliter in bello pro me suscepto vulneratus es? quā fortiter, ô mundi, Dæmonisq̃ue triumphator, pro me pugnasti, qui morte tua mortem deuicisti, & pretioso sanguine tuo omnia totius generis humani peccata expiasti? Heu quid tibi retribuam pro omnibus quæ retribuisti mihi? Modicum illud quod habeo id totum tibi offero, spiritum scilicet meum, vt in eo quiescas; animam meam, vt te diligat; corpus meum, vt tibi seruiat.

O nobilis Pelicane, qui pullos tuos proprio cordis tui nutris sanguine, animam meā fame ac siti spirituali deficientē eiarefice, vt illi nihil aliud sapiat, nihil aliud cupiat, quā carnem tuam edere, & sanguinē tuum bibere. O melliflue cælestiū deliciarum torrens, perflue omnia interiora mea, inebria me, & da, vt omnibus creaturis mortuus tibi soli viuam. O præclarum incomprehensibilis Trinitatis speculum, in quod desiderant Angeli & Sancti omnes prospicere, heu quā miserè propter me tractatus es; non est species neque decor in te, factus es opprobrium hominum, & abie-

ctio

Psal. 115.

Esa. 53.
Psal. 21.

ctio plebis. Eia fac me participem incomparabilis illius thesauri lytri pretiosi, quo me redemisti : aperi meritorum tuorum ærarium, & solue vniuersum debitum meum : fac me talem in hoc seculo, qualem habere vis in futuro, vbi tu regnas cum Patre & Spiritu sancto Deus per omnia secula seculorum. Amen.

CAPVT QVARTVM,
CONTINENS ORATIONES
RESIPISCENTIVM, QVL-
bus Deo pro nouitate vitæ
supplicamus.

PRÆFATIO.

PHILOSOPHORVM est sententia, rationem eorum quæ ad finem aliquem ordinantur ex fine petendam esse ; & frustra esse, quæ finem suum minimè consequuntur. Frustra enim nauigauit qui portum aliquem petens vi tempestatis iactatus ad portum appellere non potuit : frustra etiam varijs medicamentis vsus est, qui salutem, quam querebat, non est affectus. Quis autem pœnitentia finis est alius, quàm peccati abolitio, & honesta vitæ constitutio, nihil pristinae vetustatis retinens ? Frustra igitur contritus, frustra confes-

sus est, frustra carnem pro peccatis præteritis affligit, qui peccandi consuetudinem non relinquit. Inanis, inquit Augustinus, est pœnitentia, quam sequens coinquinat culpa: nihil profunt lamenta, si iterantur peccata; nihil iuuat à malis pœnitentiam agere, & mala de nouo iterare. Ad hoc namque instituta est pœnitentia, vt peccata cum Christo crucifigentes, & vnà cum illo resurgentes, in nouitate vitæ ambulemus.

Eccli 35.

Aug. de
dogmat.
eccles.

Non minima igitur pœnitentiæ virtutis pars est ipsa vitæ nouitas, & sacrificium salutare, attendere mandatis, & discedere ab omni iniquitate. Hoc autem facere absque Dei auxilio nobis est impossibile. Velle quidem nostrum est, perficere autem non inuenimus, nisi voluntas ipsa & admoneatur vt surgat, & sanetur vt valeat. Vt autem auxilium hoc impetremus, Deus feruenter orandus est. Rectè ergo idem Augustinus; Nullum, inquit, credimus ad salutem nisi Deo inuitante venire, nullum inuitatum salutem suam nisi auxiliante Deo operari, nullum nisi orantem auxilium promereri.

Optimo igitur ordine post pœnitentium orationes, resipiscientium, quibus auxilium Dei in vitæ nouitate incipienda & perficienda implorare possimus, poni posse existimamus.

ORA-

ORATIO, SEV OBLATIO

*pia, qua se homo offert Deo, petens vt expul-
sis vitiorum tyrannis, Deus posthac in anima
sua regnet, ibiq; agat, quæ ad nouitas
tem vitæ pertinent.*

O Deus meus, ô amor meus, ô spes mea, ô totum refugium & omne desiderium meum : ô Pater misericordiarum, & Deus totius consolationis, quoties mecû perpendo, qualis aliquando fui, quanta discrimina perditionis euasi, è quantis malis me eripuisti, cùm in peccatis mortuus & sepultus inueteratæ consuetudinis peccandi lapide mihi superimposito iacebam, tanta in me spes excitatur, vt non possim nō omnia, quæ ad meam salutem sunt necessaria, in posterum à te Domine flagitare.

Ex Gra-
nat. lib. 5
Memori-
alis.

Plasma namque tuum sum, manus tuæ Domine fecerunt me: opus igitur manuum tuarum ne despicias; vt quid enim dubitarem, quod mihi dabis bona tua, qui non dedignatus es suscipere mala mea? Dicam igitur cum Propheta; Ego in Domino sperabo, exultabo & lætabor in misericordia tua.

Psal. 30.

Sed quia non est segura spes sine obedientia, dicente quodam ex amicis tuis, Sacrificate sacrificium iustitiæ, & sperate in Domino; oro te ô dilectissime Domine, concede mihi vt spes tuæ misericordiæ mandatorum tuorum obedientia in me fulciatur: non enim minùs ti-

Psal. 4.

bi hæc obediētia, quàm spes, quàm amor, quàm reliqua debentur omnia. Tu enim es Imperator, tu Rex, tu Dominus meus, cui cælum & terra, mare & omnia quæ in eis sunt, obtemperant: quæ nunquam legem tuam præuaricata sunt, nunquam non mandata tua obseruarunt.

Tribue mihi Domine, vt & ego non minùs, quàm ceteræ creaturæ tuæ voluntati paream: vt qui pluribus, quàm illæ, tibi vinctus obstrictus sum. Da mihi, ô Rex Regum, vt tibi obediam, & à legum tuarum præscripto nusquam declinem. Regna tu in me Domine, & non regnet amplius in me mundus cum suo Principe: non regnet post hac in me caro, non propria voluntas mea; sed tua. Fugiant à me, & dissipentur omnes isti Tyranni, dominij tui inuasores, gloriæ tuæ fures, & iustitiæ tuæ euerfores pessimi: Tu solus dominare in me Domine, vt & ego regnem tecum, cuius regni non erit finis. Veni ô pie Pater, aufer scandala de regno tuo, aufer peccata de anima mea, vt regnes tu, qui debes, in ea. Venit enim auaritia, & vendicat sibi in me sedem; iactantia cupit dominari mihi, superbia vult esse mihi Rex; luxuria dicit, Ego regnabo; ambitio, detractio, inuidia & iracundia certant in me ipso de me ipso, cuius ego potissimum esse videar. Ego autem quantum valeo resisto; renitor quantum iuuor; te Dominum meum reclamo; tibi me defendo, quia tui

me

me iuris agnosco; te mihi Deum, te mihi Dominum tenco, & dico, Non habeo regem, nisi Deum meum. Veni ergo Domine, disperge illos in virtute tua; tu regnabis in me, quia tu es ipse Rex meus & Deus meus, qui mandas salutes Iacob. Non aliæ leges, non alia plebiscita, præter tua in me agnoscantur: non aliud nomen, non aliud sceptrum præter tuum in me adoretur: vt tua voluntas fiat in terra, sicut in cælo.

O Domine quando erit dies illa? quando ab istis tyrannis ero liber & immunis? Quando non alia vox, quàm tua in me audietur? Quando erit defecatum cor meum? Quando vires inimicorum meorum sic conterentur, vt nulla mihi occurrat in mandatorum tuorum obseruantia contradictio? quando hostium meorum arma sic confringentur, vt nulla in me vis tuis legibus inueniatur contraria? Quando tranquillū erit istud mare? quando serenum illud cælum? quando refrenati affectus & sopitæ passionēs, adeò, quòd nulli fluctus, nullæ nubes, nullæ turbæ in me inuenientur, qui regnum tuum in me poterunt perturbare? sed altam pacem, securam tranquillitatem, & mandatorum tuorum obseruantiam vbique deprehendam?

Da mihi, Domine, hanc obediētiam, aut (vt melius dicam) concede mihi illud in cor meum ius & imperium, vt ad nutum meum tibi nunquam obstrepe-

rum sit, sed in omnibus subijciatur.

Porro quemadmodum tibi obedire atque parere semper debeo, sic etiam me tibi offerre, me totum in holocaustum tibi immolare, & vtilitas suadet, & equitas postulat: quantus, quātus enim sum, totus tuus sum. Tuus, inquam, sum iustissimas ob causas: tuus, quia creasti me, & esse, quod habeo, dedisti mihi: tuus, quia in hoc esse me conseruasti, prouidentiaēque tuæ beneficijs & officijs me cumulasti: tuus, quia me ex seruitute in libertatem asseruisti, non auro, non argento, sed pretiosissimo sanguinis tui lytro redimens. Sum denique tuus, quia toties me tibi emisti, quoties ex aliquo peccato me eruisti.

Si itaque tot nominibus tuus sim, & tu vicissim meus sis Rex, meus Dominus, meus redemptor & liberator; ecce conuerto me, vt reddam tibi quod tuum est: hoc est; meipsum trado tibi in perpetuum mancipium & seruum; ecce do tibi claues meæ libertatis, dominiū meę voluntatis, vt posthac nec meus sim, nec alterius cuiuspiam; sed totus tuus, vt non viuam mihi, sed tibi: non seruiam mihi, sed tibi; adeo, vt siue comedam, siue bibam, siue quid aliud agam, omnia ad gloriam nominis tui referam. Me tibi sisto, me tibi trado, vt disponas de me, sicut de tuo; idque secundum voluntatis tuæ beneplacitum. Si volueris me viuere, aut mori; si sanum aut infir-

mum

mum esse; si diuitem aut pauperem; si laudatum aut illaudatum, in omnibus me tibi offero; me tibi deuoueo; ad manus tuas me totum resigno: iuri & possessioni mei ipsius renuncio, vt post hac non sim meus, sed tuus; donec id quod tuum est iure, tuum quoque fiat mea voluntate, idque non semel, non vno die, sed semper & vbique. Amen.

ORATIO SECVNDA, QVA

petit anima omnia ad vitæ nouitatem necessaria.

2

Domine Deus redemptor & saluator mundi, antequam carne hac mortali exuar, te obsecro, vt in me non sit concupiscentia libidinis; sed amor pulcherrimæ castitatis: sim ad malum audientum tarda, ad verbum tuum festina, ad perficiendum accelerans. Sim in timore tuo sollicita, in amore perfecta, in fide constans, in spe nullatenus dubitans. Dilectione proximi ferueam, odij ardore non vrar, nec inuidiæ liuore tabescam: sanctum in me semper opus spira vt cogitem; compelle vt faciam; suade vt diligam te; confirma me, vt teneam te; custodi me, ne perdam te. Non ingrediat, nec requiescat in domicilio meo, vbi tua debet esse mansio, pes superbiæ, nec gula, nec concupiscentia, nec fornicatio, nec auaritia, nec inuidia, nec ira, nec tristitia, nec vana gloriâ: sed profundam humilitatem posco à te, qui di-

August. in
libro de
salutari-
bus docu-
mentis.
cap. 65.

Esa 66.

xisti; Super quem requiescam, nisi super humilem & quietum?

Da mihi profundam humilitatem, qua curuetur altitudo carnis superbæ, quæ me suffocat. Da mensuratam abstinentiam, qua superflua ventris refrænetur edacitas, quæ me perimit. Da castitatem cordis, quæ me impollutam reddat. Da munditiam spiritûs, quia immunda carnis luxuria me demergit. Da manus largifluas ad erogandas elemosynas, qua tenax auaritia respuatur. Da dilectionis amorem, quo zelus extinguatur inuidiæ: concede tolerantiam patientiam, per quam ira, crudelis bestia, superata deficiat.

Tribue æterni gaudij spem, qua tristitiæ amaritudo demulceatur. Fac intrinsecus mentem de bono opere gloriari in te, vt vanæ gloriæ foras ex me non procedat iactantia. Dona etiam mihi in omnibus tenere iustitiam, magnanimitatem, temperantiã; & fac me cum simplicitate esse prudentem, vt beatam vitam sinceriter agam, & malum prudenter fugiam: fraudulentam & deceptoriam astutiam Diaboli intelligere valeam, ne me per speciem boni fallat; & discernere rationabiliter valeam & præuidere, quid boni agam, vel quid mali refugiam.

Fac me post hac beneuolam, mitem, pacificam, modestam, mansuetam sine simulatione; omnibus bonis concordem,

dem, in vigilijs, in ieiunijs, in orationibus constanter strenuam. Da etiam mihi in māsuetudine moderati sermonis adipisci silentium, vt loquar quod condecet; taceam quod loqui non oportet; vel quicquid ex virtutum fructibus conferre dignaberis. Da sine aliquo errore immaculatam tibi seruire fidē, & iuxta fidem digna esse opera mea; vt fidem rectam opere prauo non polluam, ne te, quem bene credendo confiteor, malē viuendo denegem, & te quem strenua fide sequor, actu & negligentie operibus non offendam. Fac me in sancto conuersari proposito, sequi iustitiam, diligere misericordiam, amare veritatem, refutare mendacium, falsum nihil meditari vel loqui.

Fac me indefinenter te timere, te diligere, tua præcepta seruare, pacem sine dolo cum omnibus retinere, discordes sine simulatione ad concordiam prouocare, charitatem cunctis insimulatam offerre, nullum scandalizare, nulli me præferre; sed omnibus inferiorem iudicare: reuerentiam & honorem non propter timorem potentum, sed ob altissimum exhibere senioribus, obedientiam & charitatem æqualibus offerre. Principibus & potestatibus Christianis in nullo resistere, sed in omnibus obtemperare, gratiam oportunæ dilectionis minoribus ostendere, fraterna onera siue pericula æquanimiter sustinere. Amicum

velut animam meam diligere, proximum sicut memetipsum amare, cunctis simul prodesse, non obesse: nulli nocere, nulli aduersari, nullum calumniari, nulli offendiculum ponere, nullum iudicare, nulli detrahere, nullius vitam carpere, nullius semitam explorare; sed de me ipsa tantum esse sollicita, malum pro malo nequaquam rependere, iniuriarum mearum nec memorem esse, nec vindicem: sed in omni bonitate superare malitiam. Maledicenti benedictionem parare, inimicum ut amicum diligere, contumelias & conuitia irascentium sustinere, non rependere iniurias; sed citò obliuisci offensionum mearum, & ignoscere. Ad veniam concedendam semper paratam esse.

Da mihi, Domine, aliena non concupiscere, nec occasione qualibet auferre; mea verò non habentibus misericorditer erogare, aduenam & peregrinū propter te, qui redemisti me, retinere: esurientem reficere, sitientem potare, hospitem colligere, nudum operire, visitare languidum, redimere incarceratū, consolari tristem, afflicto & lugenti compati, non habenti præbere necessaria, victum & vestitum diuidere cum egeno. Amplecti indigenam, fouere domesticum, tueri pupillum & orphanum: suffragari viduæ, subuenire oppresso, præstare auxilium desolato, dirumpere colligationes impietatis, vel quæcunque

præce-

præceptorum tuorum documenta declarant diligenter credere & audire, ardentè inuestigare, prudenter scire, festinanter exercere, desideranter implere, & coram te humilem semper existere; vt surgam, non deiiciar; erigar, non subruar; ascendam, non descendam: quia caro cum qua inhabito semper ducere me vult ad peccatum: mecum vult coronari, sed non mecum decertare.

Nullum peiorem patior hostē quàm corpus meum, in quo habito. Est enim quasi leo subuersor in domo mea, vndique me pestifero morſu dilacerando consumens. Ideo longa trahens suspiria clamatō dicam; Infelix ego homo, quis me liberabit de corpore mortis huius? Gratia Dei. Per quem? Per Iesum Christum Dominum nostrum, cui est honor & gloria in secula seculorum. Amen.

Rom. 7.

TERTIA RESIPISCEN-

3

tis Oratio.

Domine tu qui creasti me solus Deus meus, solus Dominus meus, Creator meus & Redemptor meus es, in quo spero, cui confido, à quo omnia quæ ad salutem animæ meæ requiruntur expecto. Non deseris sperantes in te. Tu dulcissimus, tu benignissimus, tu liberalissimus Deus meus es, tu Pater luminum, à quo omne datum optimum, & omne donum perfectum desuper in me descendit. Tu me cum nihil eram creasti, tu me

Collector.

Iacob. 1.

Psal. 58.

Ephes. 4.

1 Ioan. 4.

Ioan. 15.

Ioan. 6.

2 Cor. 3.

creatum & perditum redemisti, tu amis-
sam stolam innocentiae primam in ba-
ptismo restituiſti, tu me poſt acceptam
notitiam veritatis denuò voluntariè
peccantem, & in huius mundi pelago
periclitantem, per ſecundam naufragij
tabulam, hoc eſt, per ſacramentum pœ-
nitentiae ſeruaſti. Et hæc omnia quidem
gratis, ex ſola tua gratia. Nam ſi ego te
bene operando præueni, ubi eſt quod
Propheta tuus ait ; Miſericordia eius
præueniet me ? Si quid ego operationis
bonæ dederim, vt gratiam tuam mere-
rer, ubi eſt illud Apoſtoli tui ; Gratia ſal-
uati eſtis per fidem, & hoc non ex vobis :
donum enim Dei eſt ? Si mea dilectio te
præuenerit, quomodo verum erit illud ;
Non quia nos dilexerimus eum, ſed ipſe
prior dilexit nos ? Si ſine tuo munere no-
ſtra virtute ſequamur te, ubi eſt quod
vnigenitus Filius tuus dicit ; Sine me
nihil poteſtis facere ? &, Nemo poteſt
venire ad me, niſi Pater meus traxerit
eum ? Omne igitur quod habeo, totum
id quod ſum, gratuitum eſt, donum tu-
um eſt, liberalitas & miſericordia tua
eſt : adeò, vt ne cogitando quidem dona
bonorum operum virtute mea præueni-
re potuerim. Non enim ſufficientes ſu-
mus cogitare aliquid ex nobis, quaſi ex
nobis : ſed ſufficientia omnis noſtra ex
te eſt.

Quid igitur faciam miſer ego & mi-
ſerabilis, nudus & pauper ? Infirmus ego

&

& claudus, sed donis ac beneficijs tuis diues atque opulentus, per mare nauigabam; oborta verò tempeſtas demerſit nauem, omnes diuitias, omnes merces meas vno infortunio amiſi. Tua bonitate, etſi naufragium paſſus, ego tamen euaſi: anima mea incolumis, ope vnus tabulæ ad terrā enatauit: ſed quid nunc agam? non habeo vnde viuam, & propter infirmitatem lucrari nil poſſum. Vnicum eſt remedium vt mendicem: ſed quis tam liberalis vt velit, tam diues vt poſſit tam deſperato pauperi ſubuenire, niſi tu ſolus Deus, benignus & miſericors, diues & omnipotens? Ad te igitur clamabo, ad te vociferabor, ad oſtium tuum ſine intermiſſione clamabo.

Ceterum hīc iterum me terret conſcientia, reſclamat pudor & verecundia: quicquid enim antea poſſidebā, & nunc amiſi, id totum tuum erat; id mihi credideras, id totum tibi adhuc debeo: in ſuper & te offendi, tibi injurius fui, tuis bonis in tui ignominiam abuſus ſum. Noua igitur à te petere, quæ erit impudentia? Ergone deſperabo? ergone dicam cum Cāin; Maior eſt iniquitas mea, quā vt veniam merear? ergone vagus & profugus ero à terra viuētium? Nequaquam: Scio enim quòd Deus meus & Dominus meus miſericors & clemens eſt, patiens & multę miſerationis. Scio, quia Dominus meus benignus eſt, & multæ miſericordiæ, & præſtabilis

Genef.4.

Exod.34.

Ioel.2.

Matth. 18.

super malitia. Scio, quia seruo suo debenti millia talentorum decem, postquam supplicem vidit, omne debitum dimisit. Dicam igitur & ego cum seruo illo, Domine patientiam habe in me, & omnia reddam tibi.

Matth. 11.
Esa. 55.

Sed vnde reddam ô Domine, nisi tu prior dederis? & cui dabis, nisi petenti te? quis autem petere non audeat, cum omnes tam liberaliter inuites, dicens; Venite ad me omnes qui laboratis, & onerati estis, & ego reficiam vos. Venite omnes sitientes ad aquas: & qui non habetis argentum, properate, emite & comedite. Venite, emite absque argento, & absque vlla commutatione vinum & lac. Hac tam benigna prouocatione tua incitatus ego ecce venio ad te, & precor, vt des mihi vnde reddam omnia quæ tibi debeo: da scilicet vt te debite adorem, te timeam, te laudem, tibi reuerentiam & honorem exhibeam: tibi pro tuis beneficijs gratias agam, te ex toto corde diligam, in te spem omnem ponam, tuis mandatis obtemperem, me totum tibi offeram, tuis me manibus totum commendem; & has, similesque gratias à te petere discam, vt foris ante oculos meos, & intus in corde meo nominis tui gloria & animæ salus meæ veluti scopus mihi præfigantur.

Granat. lib. 5. Memorialis.

Oro etiam te Domine, vt mihi tribuas peccatorum meorum remissionem, veram contritionem & poenitentiam:

da

da gratiã ne in posterum offendam te de-
nuo, vel ijs peccatis, quæ hætenus mi-
hi familiaria fuerunt, vel alijs quibuf-
cunque. Potissimùm autem gratiam à te
Domine peto, & vires, vt carnem me-
am castigare, linguam refrænare, cordis
appetitus inordinatos mortificare, dis-
persas, vagasque imaginationis meæ
cogitationes colligere valeam; vt sic
totus foris & intus reformatus, nouaque
creatura effectus, merear esse viuum
templum, & gratum, in quo requiescas,
habitaculum.

Largire mihi virtutes etiam illas,
quibus illud tuum habitaculum nõ tan-
tùm purgetur, sed etiam ornetur; vt
sunt nominis tui sanctus timor, firma
spes, profunda humilitas, integra pati-
entia, prudens discretio, paupertas spiri-
tûs, perfecta obedientia, continua forti-
tudo, & diligens alacritas in omnibus
ijs, quæ ad tuum cultum & obsequium
pertinent: ante omnia verò ardentissi-
ma charitas, tam erga te, quàm erga pro-
ximum.

Ceterùm quia scio me omnibus his
indignum, nihilque horum promerui-
sse, memor esto precor, ô Domine, mise-
rationum tuarum antiquarum: memo-
rare quòd non vis mortem peccatoris,
vt ipse testaris, sed vt conuertatur & vi-
uat: recordare quia non venit vnigeni-
tus tuus Filius in hunc mundum vocare
iustos, sed peccatores: memento quanta

Ezech. 18.

Matth. 9.

fecit,

fecit, quanta tulit à die natiuitatis suæ, vsque dum in cruce moreretur. Quæ omnia tibi, ô clementissime Pater, offero, vt sint pro peccatis meis sacrificium in odore suauitatis : nec pro peccatis tantum, sed & pro omnibus necessitatibus meis : quidquid enim oro, quidquid peto, id in illius, non in meo nomine postulo. de te namque dicitur, quòd honoras patres in filiis, & vni parcis, propter alium ; quemadmodum & Dauid olim Miphiboseth propter Ionathan patrem eius honorauit. Honora igitur & tu vnigenitum filium tuum in me, benefaciens mihi propter illum : quia ipse pater meus, & secundus Adam meus est : ego autem filius illius, licet dyscolus atque immorigerus. Aspice Domine, quia ego ad te confugio, ad ostium misericordiæ tuæ venio, tibi paupertatem meam expono, tibi vulnera mea detego ; quia verus medicus meus es tu. animam meam coram te effundo, & Dauidico inflammatus spiritu ad te clamo, dicens ;

Psal. 85.

Inclina Domine aurem tuam, & exaudi me : quoniam inops & pauper sum ego. Custodi animam meam, quoniam sanctus sum : saluum fac seruum tuum Deus meus sperantē in te. Miserere mei Domine, quoniam ad te clamaui tota die : lætifica animam serui tui, quoniam ad te Domine animam meam leuaui. Quoniam tu Domine suavis & mi-

tis,

tis, & multæ misericordiæ inuocantibus te. Auribus percipe Domine orationem meam: & intende voci deprecationis meæ. In die tribulationis meæ clamaui ad te: quia exaudisti me. Deduc me Domine in via tua, & ingrediar in veritate tua: lætetur cor meum vt timeat nomen tuum. Confitebor tibi Domine Deus meus in toto corde meo, & glorificabo nomen tuum in æternum. Amen.

QUARTA RESIPISCENTIS

4

Oratio, qua petitur sensuum & potentiarum animi reformatio.

O Affluentissime fons totius sapientiæ, flos diuini consilij, & spiritualis intellectus. Olumen clarissimum, ô inextinguibile felicitatis ingenium. O altissima, subtilissimaque profunditas cælestium secretorum, Domine Iesu Christe, fili Dei altissime, via omnium visibilium & inuisibilium creaturarum, Deus omnium origo indeficiens, qui cuncta verbo creasti, qui ambulas super penas ventorum, qui habes clauēs mortis & inferni, cui data est omnis potestas in cælo & in terra: Pater omnipotens æterne Deus, te rogo supplex, mitte hodie de excelso cælorum habitaculo Spiritum sanctum in cor & in animam meam. Fac vt sancti Angeli tui descendant super me, & visitent me, doceantque omnem scientiam, dixisti enim: Dilata os tu

Ex hortu
lo deuoti-
onis.

Psal. 17.
Apoc. 1.
Matth. 28.

Psal. 80.

um

um & implebo illud.

Infunde ergo cordi meo lumen septiformis gratiæ tuæ, quod SS. Apostolis infudisti, vt cælestem thesaurum tuæ sapientiæ perfectè obtineam : da mihi intellectum mirabilia de lege tua percipientem, & memoriam in mandatis tuis die ac nocte meditantem : interiores atque exteriores animæ meæ potentias plenitudine gratiarum perfunde, & spiritu sapientiæ, intellectûs, consilij & fortitudinis; spiritu scientiæ, pietatis, timoris & amoris tui corrobora, vt totus ad imaginem & similitudinem tuam renouatus, gratam tibi in posterum seruitutem seruiam.

Rogo etiam te Rex Regum potentissime, Princeps principum sapientissime, vt lumen claritatis tuæ sensibus meis infundere digneris; visum illuminando, auditum aperiendo, odoratum, gustum, tactum regendo, reficiendo, sanctificando : vt omnes qui me viderint & audierint glorificent Patrem tuum, & a vitijis resipiscant.

O imago summæ bonitatis Domine Iesu Christe, apud quem omnis sapientia & scientia requiescit, ago tibi gratias, quòd tuorum cælestium secretorum profunditatem à sapientibus & prudentibus huius mundi abscondisti, & reuelasti ea paruulis: fac me etiam humilem & paruum in oculis meis, & da mhi intellectum & sapientiam, vt viuam. Mit-

te mihi Spiritum sanctum consilij, tu qui es magni consilij Angelus, qui cor, mentem, sensum, phantasiam & intellectum meum purificet ac illuminet.

Reple cor meum tui saporis dulcedine, vt te semper sitiam fontem sapientiae, fontem æterni luminis : vt nō obliuiscar verborum tuorum, quia declaratio sermonum tuorum illuminat, & intellectum dat paruulis. Illumina quoque tenebras mentis meæ lumine tui splendoris ; quia tu es fons vitæ, & in lumine tuo videbo lumen, per te Domine Iesu Christe, qui cū Patre &c. Amen.

QVINTA ORATIO RESIPISCENTIS pro emendatione vitæ.

CHriste Domine Verbum Patris, qui venisti in hunc mundum peccatores saluos facere, rogo te per indulgentissima misericordiae tuæ viscera, emenda vitam meam, meliora actus meos, compone mores, tolle de me quod mihi nocet, & tibi displicet : & da quod nosti tibi placere, & mihi prodesse. Quis potest mundum facere de immundo conceptū semine ? Tu es Domine Deus omnipotens infinitæ bonitatis, qui iustificas impios, & viuificas mortuos propter peccata ; qui mutas peccatores, & non sunt.

Tolle ergo de me quicquid tibi displicet in me ; imperfecta enim mea plurima videt oculi tui. mitte quæso manum

pieta

Psal. 118.

5

D. Augustinus Meditat. c. 36.

Iob 14.

pietatis tuæ in me, & tolle de me, quidquid offendit oculos tuæ pietatis in me. Coram te Domine sanitas & infirmitas mea; illam precor serua, istam sana. Sana me Domine & sanabor, saluum me fac & saluus ero; tu qui infirma sanas, & sanata conseruas: tu qui solo nutu tuo conseruas, restauras diruta & collapsa.

Si enim dignaris in agro tuo, corde meo serere bonum semen, necesse est vt manu pietatis tuæ spinas prius euellas vitiorum meorū. Dulcissime, benignissime, pulcherrime Domine Iesu Christe: infunde obsecro multitudinem dulcedinis tuæ & charitatis tuæ pectori meo, vt nihil terrenum, nihil carnale desiderem, vel cogitem: sed te solum amem, te solum habeam in corde & ore meo, nunc & semper & in secula seculorum. Amen.

6 SEXTA ORATIO RESIPISCENTIS ad vite nouitatem impetrandam.

Collector.

Rom. 7.

Omnipotens æterne Deus, pater Domini nostri Iesu Christi, infirmus ego & imbecillis legi quidem tuæ condelector secundum interiorem hominem; sed aliam in membris meis inuenio repugnantem legi mentis meæ, & captiuantem me in lege peccati: ita vt non quod volo bonum, hoc faciam, sed quod nolo malū, hoc agam: non enim habitat in me, hoc est in carne mea bo-

num.

num. Velle quidem adiacet mihi, perficere autem non inuenio: nec itaque boni quicquam agere sine te, nec viuere secundum legem tuam, absque tua gratia possum. Peccare possum, & quidem facillimè; bonū autem operari non possum, nisi tu ipse in me opereris.

Obsecro igitur te, ô benignissime Domine, cum me hominem secundū imaginem & similitudinem tuam creaueris, perditum per vnigenitum Filium tuum quæsieris, inuentum ad ouile tuum reduxeris, à mundo, carne, diabolo, peccato & perenni condemnatione liberaueris, in filium adoptaueris, & vitę semperternę participem feceris, perfice opus tuum, quod in me cœpisti, & Spiritum sanctum tuum ne deneges mihi: vt eius ope atque virtute, eius operatione & co-operatione te patrem æternum, haud secus atque filius, imò seruus manu missus per totum vitę meę curriculū adorem, colam, laudem & glorificem. Doce me facere voluntatem tuam, duc me in semitas mādatorum tuorum; præcepta tua desiderabilia mihi sint, super aurum & lapidem pretiosum multum, dulciora super mel & fauum.

Psal. 118.

Tribue mihi Domine, vt si fortè alibi impingam, imò si cecidero, & à Diabolo, carne & sanguine meo præoccupatus fuero, statim per veram peccatorum meorum agnitionem, & sinceram pœnitentiam iterum resurgā, peccata mea

in

in amaritudine cordis tibi confitear, apud te indulgentiam & remissionem quæram, & quasi infans modò lotus, qui se confestim rursus commaculat, pedes vnigenito filio tuo extendam, eiûque la-uacro sanguinis sui mundandos præ-beam.

Tu enim Domine vita mea es, tu vir-tus & fortitudo mea. Tu sanctificator meus, tu dux & rector vitæ meæ. Con-serua igitur me ab omni impuritate vi-tæ, à moribus dissolutis & inordinatis. tolle à me spiritum cenodoxiæ, & red-de modestiam: tolle superbiam, & red-de humilitatem: tolle æstum libidinis, redde mentis & corporis castitatem: tol-le ebrietatem & gulam, redde in edendo bibendoque temperantiam: ab omni ira & vindictæ cupiditate me protege, patientiam verò & longanimitatem da mihi: omnis auaritia & impostura pro-cul sit à me, ne quem fratrum meorum in negotijs circumueniam, sed potius in omni illius necessitate larga manu pro-ximo succurram, atque illum nō lingua aut verbo, sed opere & veritate diligam. Quid multis? tolle à me, ô Pater meus & Deus meus, quidquid tibi displicet in me, & redde mihi, quidquid exis à me: iube quod vis, & da quod iubes.

Aperi aures meas, vt audiant manda-ta tua: solue linguam meam, vt annun-ciet laudem tuam: tribue gratiam, vt carnem meam cum concupiscentijs eius

cruci-

crucifigam, ne quæcunque appetit, ea faciam; sed quæ lex tua præcipit, hæc agam. mundum, qui totus in maligno positus est, peccatisq; & offendiculis abundat, neque ea quæ in mundo sunt diligam: tibi me totum subijce, cor meum super omnia, quæ in mundo sunt, eleua, vt quæ sursum sunt quæram, vbi Christus filius tuus est in dextera tua; quæ sursum sunt sapiam, non quæ super terram: te solum cogitem, te desiderem, ad te suspirem; dissolui, & esse tecum cupiam, qui viuus & regnas cum filio & Spiritu sancto Deus per omnia secula seculorum. Amen.

SEPTIMA ORATIO RESI-

7

piscentis, ex Psalmis compilata.

AD te Domine leuauit animam meam: Deus meus in te confido, non erubescam.

Psal. 24.

Dirige me in veritate tua, & doce me: quia tu es Deus Saluator meus, & te sustinui tota die.

Vnam petij à Domino, hanc requiram, vt inhabitem in domo Domini omnibus diebus vitæ meæ, Vt videam voluntatē Domini, & visitem templum eius.

Psal. 16.

Ibi labia mea laudarent te, ibi benedicerem te in vita mea, & in nomine tuo leuarem manus meas. Sicut adipe & pinguedine repleretur anima mea, & labijs exultationis laudaret os meum.

Psal. 62.

Reple.

Psal. 70.

Repleatur os meum laude, vt cantem gloriam tuam : tota die magnitudinem tuam. Os meum annuntiabit iustitiam tuam : tota die salutare tuum.

Psal. 72.

Quid enim mihi est in cælo ? & à te quid volui super terram ? Defecit caro mea, & cor meum : Deus cordis mei, & pars mea Deus in æternum.

Psal. 83.

Quia melior est dies vna in atrijs tuis super millia. Elegi abiectus esse in domo Dei mei, magis quàm habitare in tabernaculis peccatorum.

Psal. 85.

Custodi animam meã Domine, quia sanctus sum : saluum fac seruum tuum Deus meus sperantẽ in te : lætifica animam serui tui, quoniam ad te Domine animam meam leuaui.

Psal. 118.

Reuela oculos meos, & considerabo mirabilia de lege tua.

Aufer à me opprobrium & contemptum : viuifica me secundum verbum tuum. Viam iustificationum tuarum instrue me, & viam iniquitatis amoue à me, & de lege tua miserere mei.

Deduc me in semitam mandatorum tuorum, quia ipsam volui : & custodiam legem tuam semper, in seculum, & in seculum seculi.

Inclina cor meum in testimonia tua, & non in auaritiam : auerte oculos meos ne videant vanitatem, in via tua viuifica me. Statue seruo tuo eloquium tuum, in timore tuo.

Veniat super me misericordia tua

Domini

Domine, salutare tuum secundum eloquium tuum; & ne auferas, de ore meo verbum veritatis vsquequaque.

Paratus sum & non sum turbatus, vt custodiam mandata tua: fiat cor meum immaculatum in iustificationibus tuis, vt non confundar.

Confige timore tuo carnes meas: à iudicijs enim tuis timui. Gressus meos dirige secundum eloquiū tuum, & non dominetur mei omnis iniustitia.

In quacunque die inuocauero te, exaudi me: multiplicabis in anima mea virtutem. Pone custodiam ori meo, & ostium circumstantiæ labijs meis.

Non declines cor meū in verba malitiæ, ad excusandas excusationes in peccatis.

Eripe me de inimicis meis Domine, ad te confugi: doce me facere voluntatem tuam, quia Deus meus es tu.

Educ de custodia animam meam ad confitendū nomini tuo: me expectant iusti, donec retribuas mihi.

Psal. 137.

Psal. 140.

Psal. 142.

Psal. 141.



CAPVT QVINTVM,
CONTINENS ORATIO-
NES ANTE ET POST SA-
cram Communionem
vsurpandas.

PRAEFATIO DOCENS
quomodo dignè communicare
quis poterit.



OMNIA nouæ legis Sacramenta
dispositionem & præparationem
aliquam in suscipientibus ea rea-
quirunt: alia tamen alijs maio-
rem, & accuratiorem, pro excellentia & di-
gnitate sua: quædam enim dolorem peccato-
rum tantum requirunt, vt Baptismus; alia
præter dolorem & contritionem, etiam exi-
gunt eorundem peccatorum confessionem, vt
Pœnitentia. Sacramentum verò altaris, quia
omnium est nobilissimum, perfectissimam, ex-
quisitissimamq; postulat dispositionem, & præ-
parationem. Non enim sola contritione &
confessione peccatorum hæc præparatio perfici-
tur, sed alia multa requiruntur, vt quis non
indignè ad hoc Sacramentum accedat, effe-
ctumq; & gratiarum, quæ in hoc Sacramen-
to distribuuntur, particeps fiat.

Est enim hoc Sacramentum virtutis infi-
nite; Habens in se Christum, qui fons est

omnium

omnium gratiarum; omniaq; merita Domini-
 nicæ Passionis, quæ similiter nec modum has-
 bent, nec numerum in se continent. Proinde
 quanto maior est præparatio, qua cum ad hoc
 Sacramentum accedimus, tanto maior erit &
 gratia, quam in illo percipimus. Quemadmo-
 dum enim is, qui ad puteum venit, vt aquam
 hauriat, tantum haurit, quantum eius vas ca-
 pit: quòd autem plus non haurit, id vasi, non
 puteo imputandum est, qui plus daret, si vas
 amplius caperet: Sic qui ad diuinum hoc Sa-
 cramentum veniunt, tantum gratiarum hau-
 riunt, quanta est deuotionis & præparationis
 capacitas: secundum namque subiecti disposi-
 tionem causæ operantur. Requirit autem hu-
 ius Sacramenti nobilitas atque excellentia

I. Puritatē conscientie ab omni peccato mor-
 tali, & quantum fieri potest etiam veniali:
 quare Confessio Communioni semper est præ-
 mittenda, si communicaturus se alicuius crimini-
 nis reum agnoscat.

Concil.
 Trid. Sess.
 13. cap. 7.

II. Puritatem intentionis; vt scilicet bono fi-
 ne quis accedat, non priuato commodo prouo-
 catus, non timore pænæ coactus, non ex con-
 suetudine, non vt sensibilem aliquam deuotio-
 nem & dulcedinem in eo percipiat: sed ex in-
 tentione pura. Huiusmodi intentiones variae
 sunt, quas commemorat Bonauentura his ver-
 bis; Aliquos trahit amor Dei, vt dilectum ad se
 sæpius inuitent, eumq; in semetipsis delectabi-

De pro-
 cessu Re-
 ligionis
 cap. 22.

liter amplectentur. Aliquos propriæ infirmitatis intuitus, vt eum quasi medicum ad se vocent, per quem ab infirmitate curētur. Aliquos conscientia delictorum suorum, vt per eam, quasi per hostiam placationis ab omnibus peccatis expiati purgentur. Alios pressura alicuius tribulationis, vt per eum, qui omnia potest, ab omni aduersitate citius liberentur, & tutius protegantur. Aliquos desiderium alicuius gratiæ, vel beneficij impetrandi per eum, cui Pater nihil negare potest pro se intercedenti. Aliquos gratiarum actio pro beneficijs diuinis. Aliquos laus & honor Dei & Sanctorum: aliquos charitas & compassio proximorum: cum pro salute viuorum, & requie defunctorum nihil efficacius interpellat, quam sanguis Christi pro nobis effusus. Hæc ille. Primarius autem, & proprius finis huius Sacramenti est, vt mediante illo, in quo Christus realiter inest, in anima nostra Christi spiritum excipiamus, cuius beneficio transformemur in illum, viuamusq; sicut ille vixit, in omni charitate, obedientia, paupertate spiritûs, mortificatione corporis, contemptu mundi, &c. hoc est, vt vnum quid cum illo per imitationem vitæ illius efficiamur. Deinde vt memoriam quoque passionis eius renouemus, & pro inestimabili redemptionis nostræ beneficio Redemptori gratias agamus.

III. Requirit huius Sacramenti preparatio
actuas

actualem deuotionem. Est autem hac deuotio affectus quidam generalis spiritus, ex alijs affectibus & desiderijs spiritualibus compositus: quibus anima ad venerabile hoc Sacramentum accedentis plena esse debet. Rectè namque Ambrosius. Quanta, inquit, cordis contritione & lachrymarum fonte, quanta reuerentia & tremore, quanta corporis castitate atque animi impuritate illud diuinum & celeste mysterium est celebrandum, Domine Deus, ubi caro tua in veritate sumitur? ubi sanguis tuus in veritate bibitur? ubi summis ima, humanis diuina iunguntur? ubi sanctorum adest Angelorum presentia? ubi tu es Sacerdos & sacrificium mirabiliter & ineffabiliter.

In oratio.
præparat.
ante Mis-
sam.

Vt igitur aqua quedam odorifera ex varijs boni odoris floribus & herbis distillatur, sic deuotio hac ex multis spiritualibus, Deoq; gratis affectibus componitur; ut sunt inter alios profunda humilitas, summa reuerentia, firma fiducia, ardens amor, impatiens fames, & intolerabile desiderium huius panis super celestis.

AD huiusmodi præparationem certum aliquod tempus ante communionem requiritur; ne, quod multi faciunt, recenti adhuc peccatorum memoria, siccante etiamnum eorum turpitudine, & fumigante nondum satis extincta peccandi libidine, ad tam tremendum mysterium accedamus. Sex mensibus se præparabant

Hest. i.

Exod. 19.

puellæ in conspectum Regis Assueri venturæ,
& tribus diebus populus legem accepturus:
multo igitur maiori iure saltem tridui præpa-
rationem postulat huius Sacramenti sumptio.

Toto illo tempore communicaturus pijs stu-
dijs vacet, conscientiam suam examinet, pec-
cata confiteatur, & post confessionē ab omni
peccato mortali, etiam veniali, quantum fieri
potest, abstineat: peccandi occasiones fugiat, à
mundi conuersatione, humanarumq; occupatio-
num strepitu sese subducatur. Ante omnia cor
diligenter custodiat, ne in lectulo cælestis sponsi,
quem floridum requirit sponsa, spinæ & tribus
li inueniantur. Orationibus igitur, meditatio-
nibus, & pijs lectionibus toto illo triduo im-
pugnandum est.

Vesperis, cum postridie communicandū erit,
nihil, aut parum homo in cæna comedat, post
cænam mox surgat, fabulis non indulgeat; sed
in cubiculo solus cum Deo colloquatur. Ante
somnum Deum oret, vt ea nocte se custodiat
ab omni Dæmonis illusione, omniq; peccato, &
noxio phantasmate. Mane cum expergiscitur,
persuadeat sibi, quod in brachijs Christi ia-
cet, incipiatq; passionem Dominicam medi-
tari.

HÆC sunt quæ ex parte hominis ad præ-
parationem, huic Sacramento præmittendam,
requiruntur: quæ tamen non sufficiunt, nisi
Deus ipse cor hominis præparet: si enim ne-

mo ad augmentum gratiæ poterit disponi, si-
ne ope ipsius gratiæ; multò minùs poterit quis
disponi ad dignè Deum percipiendum, sine ope
ipsius Dei. Quamobrem necesse est, vt auxilia-
um Dei humilibus orationibus & obsecratio-
nibus inuocetur, quo cooperante purgetur &
ornetur conaculum, in quo Christus nobiscum
Pascha suum manducabit. Ad hoc debito modo
faciendum accommodatæ sunt meditationes,
& orationes quæ sequuntur.

MEDITATIO DEVOTISSI-
ma, & ante Communionem vtilissima, qua
anima ad timorem & amorem
excitatur.

Q Vis es tu Domine mi, & quis sum
ego, qui audeo tibi appropinquare?
quid est homo, vt possit in se Deum reci-
perè factorem & Redemptorem suum?
Quid est homo, natura sua, nisi vas cor-
ruptionis & putredinis? filius Demonis?
hæres inferni? operator peccatorum?
contemptor Dei, & creatura ad omne
bonum inepta, ad omne verò malum
aptissima, promptissimaque?

Quid est homo, nisi animal omni-
bus in rebus miserabile? in consilijs cæ-
cum, in operibus suis inconstans, in ap-
petitibus immundum, in desiderijs lu-
bricum? in omni opere suo paruum, &
in proprijs oculis magnum? Vide Do-
mine, vide quis sim ego.

Granatēf.
lib. 3 Me-
morialis.

At tu Domine mi, quis & qualis es? Tu magnus es sine quantitate, tu bonus sine qualitate, tu sapiens sine mensura, tu æternus sine tempore. Tu es omnipotens in virtute, immensus in sapientia, admirabilis in consilijs, terribilis in iudicijs, perfectus & absolutus in omni virtute.

Iob 21.

Quomodo igitur tã vilis & immunda creatura audebit adire & contingere Deum tantæ Maiestatís? Ecce Luna etiam non splendet, & stelle nō sunt mundæ in conspectu eius. Columnæ cæli contremiscunt, & pauent ad nutū eius. Altissimi illi Seraphin contrahunt alas suas, & in conspectu tuo fatentur se papiliones, & vilissimos esse vermiculos. Quæ igitur audacia, quæ temeritas, vt homo vilissima, abiectissimaque creatura audeat tantum Dominum in se recipere?

Luc. 3.

Ioan. 1.

Sanctus ille Baptista Ioannes, in utero matris suæ sanctificatus, non fuit ausus, cum baptizaret Dominum, verticem illius tangere: imò indignum se testatus est, qui solueret corrigiam calceamenti eius.

Luc. 5.

1 Reg. 21.

Princeps Apostolorum exclamat dicens; Exi à me Domine, homo enim peccator sum. & ego peccatorum omnium facile princeps tibi appropinquare non formidabo? Si panibus propositionis, qui tantum vmbra erant profundissimi huius mysterij, nemini licuerit ve-

sci,

sci, nisi qui mundus erat & sanctificatus; qui potero securus esse ego, qui manduco panem Angelorū, cum interim tam procul absum ab omni sanctitate?

Agnus ille paschalis, qui erat typus & figura huius Sacramenti, iuxta mandatum Dei comedi debebat cum panibus azymis & lactucis agrestibus: qui autem comedebant, renes accinctos, & calceamenta in pedibus habere iuebantur. Ah quomodo audebo ego ad verum hunc agnum paschalem accedere, qui nullam harum præparationum habeo? Quid enim aliud panis azymus, quam puritas sine fermento malitiæ? quid lactucæ amaræ, nisi vehemens contritio? vbi est puritas renum? vbi pedum; id est sanctorum desideriorum mundities?

Exod.12.

Timeo Domine, & vehementer timeo, ne fortè malè excipiar in hac mensa, si quid horum mihi desit apparatus tuum.

Hac mensa prohibitus, imò ab ea reiectus est ille, qui sine veste nuptiali, hoc est, sine charitate accesserat: ligatisque manibus & pedibus in tenebras exteriores deturbatus est. quid ego aliud nunc expecto, si me absque hac veste in conuiuium hoc ingesserō?

Matth.22.

O diuini oculi, quibus aperti sunt & manifesti omnes animæ meæ sinus & anguli, quid fiet de me, si in conspectum tuum nudus & vacuus accessero?

Arcam, quæ figura tantum erat huius

2 Reg. 6.

Sacramenti, attingere tantum nefas fuit, vt Sacerdos Oza, qui ad eam casum minitantem manum extendit, & tenuit, subitanea morte percussus sit: quî possem ego non timere, & pœnam eandem metuere, si indignè percepero id, cuius arca illa figura tantum fuit?

1 Reg. 6.

Bethsamitæ nihil aliud deliquerant, quàm quòd Arcam fœderis curiosius erant intuiti, cum ea per fines eorum defereretur: & tamen adeò indignatus est Dominus, vt ob eam solam causam septuaginta de populo viros, & quinquaginta millia plebis occiderit. Sed ô misericordissime Domine, quanto augustius est Sacramentum hoc Arca fœderis? quanto periculosius est recipere te, quàm videre te?

Non immeritò igitur horrere, & cōtremiscere debeo, quoties venio ad sumendum Dominum tantæ Maiestatis & iustitiæ? Et si tot causæ sint, cur debeam timere tuam magnitudinem, quot erunt rationes metuendi, si perpendam peccatorum meorum multitudinem? memor enim sum Domine multorum, grauiumque criminum meorum, quibus diuinam tuam Maiestatem offendi in hoc mundo.

Fuit, fuit aliquando (gratia tibi Domine, quòd iam non est) tempus illud, quando infinitam illam tuam pulchritudinem, summa obliuione apud me sepultam, minimè amarem: quando pul-

uis creaturarum tuarum maiori apud me in pretio fuit, quàm thesaurus gratiarum tuarum, & spes gloriæ sempiternæ. Lex & regula vitæ meæ erant mea desideria & inordinati appetitus: nullam tui rationem, nullam tui habebam reuerentiam, quoniam te non cognoscebam.

Ego sum insipiēs ille, qui dixi in corde meo; Non est Deus. tam dissolutè siquidem aliquamdiu vixi, vt moribus meis profiterer, quòd crederē te aut non esse, aut nihil posse. Non dedi operam, vt in amorem tuū me insinuarem: non timui iustitiam tuam, non veritus sum legem tuam præuaricari: gratias, quas debui, non reddidi tibi: etsi te omnibus in locis præsentem sciebam, non tamen in tuo conspectu peccare securè, & quidem grauius erubui.

Quicquid oculi mei desiderârunt, id omne illis permisi, nec cordi meo vim intuli, quòd ipsi delectationes eius subtraherem; & quod genus flagitij est, quo anima mea sese nō coinquinauit? Quid aliud fuit vniuersa vita mea, quàm assiduum bellum contra te? quid aliud, quàm renouatio omnium tormentorum, totiusque vitæ tuæ passionum? Quoties ego te pro momentanea voluptate, aut minimo lucro, tanquam alter Iudas vendidi? Et nunc veniens, vt te percipiam, quid aliud ago, quàm osculum tibi paro, cum ipso Iuda, quo te tra-

dam, quem iam antea vendidi? Quid aliud feci, cum alias communicaui, quam quod cum militibus te delusi, tibi que insultaui, hic genu flectens, & te adorans, illic arundine benedictum caput tuum percutiens?

Quomodo igitur audebo recipere te Domine in statu tam immundo & flagitioso? quomodo tam temerarius esse potero, ut sacratum corpus tuum reponam in speluncam draconum, & in nidum viperarum? quid aliud est anima peccatoris, quam habitaculum Dæmonum, nidus bestiarum, porcile, & cloaca omnis immunditiei?

2. Cor. 6. Quomodo tu requiesces hic Domine, qui puritas es virginalis? & qui fons es omnis pulchritudinis, quomodo in loco tam abominabili poteris habitare? Quæ participatio iustitiæ cum iniquitate? aut quæ societas luci ad tenebras? quæ autem conuentio Christi ad Belial? O flos campi, ô lilium cōuallium, ô panis Angelorum, quomodo pabulū nunc factus es bestiarum?

Cant. 2. Quare diuinum hunc cibum das canibus, & pretiosas margaritas mittis ante porcos? O amator animarū purarum & mundarum, qui pascaris inter lilia donec aspiret dies, & inclinentur umbræ: quod pabulum tibi dare potero in hoc corde meo, ubi nihil crescit præter tribulos & spinas? Lectulus tuus est de lignis Libani; columnæ eius aureæ, re-

clina-

clinatorium tuum aureum, & ascensus purpureus : in cubili cordis mei nihil horum reperitur. quam igitur sedem tibi illuc intranti ponam ? quem lectulum sternam ?

Sanctissimum corpus tuum de Cruce sublatum mundissimæ sindoni fuit inuolutum, atque in sepulchrū nouum positum, in quo nemo fuerat iam antea sepultus. Quæ verò pars animæ meæ munda est ; quæ noua, in qua te potero sepelire ? Quid os meum aliud, quam sepulchrum patens, de quo nihil præter fœtores & putredines meorum peccatorum procedit ? Quid cor meum, nisi fons pessimorum appetituum & desideriorum ? Quid volūtas mea, nisi domus & reclinatorium Dæmonis ?

Quomodo itaque audebo appropinquare tibi ? te recipere ? te impuris labijs meis exosculari ? nullus angulus est in anima mea mundus aut purus, quiq̃ue non sæpius diuersis peccatorum generibus est prophanatus. Non habeo sepulchrum mundum & nouum in quo te condam. O Redemptor & Seruator mi, pudore suffundor, quoties me in tali statu video : erubescō, perpendens qualis ad hoc augustum & regale tuum conuiuium accedo, qualis in amplexus Sponsi cælestis irruo, qui stat iterum paratus, vt me benignè recipiat.

Altera pars huius meditationis.

Agnosco Domine, agnosco magnam indignitatem meam : sed maxima quoque misericordia tua non est à me abscondita : hæc est, quæ mihi suggerit audaciam, & fiduciam ad te veniendi dat, qualis qualis etiam sum. Quò enim indignior ad te venio, eò magis glorificaris tu, si non repellas me, aut odio prosequaris creaturam tam immundam.

Domine, tu non soles repellere peccatores, sed vocare, & ad te conuertere. Tu es qui dixisti ; Venite ad me omnes, qui laboratis, & onerati estis, & ego reficam vos : & alibi ; Non opus est sanis medico ; sed his qui male habent. De te publicè dictum est, quòd publicanos & peccatores recipiebas, & cum illis manducabas. Domine mi, tu non mutasti naturam, quam tunc habuisti : ideoque firmiter credo, quòd etiam nunc de cælo vocas illos, quos tunc in terra viuens vocasti.

Quapropter & ego pia illa vocatione illectus venio ad te, peccatorum pondere prægrauatus : & tu me exonerabis. venio laborans & oneratus, & tu me reficies. Venio tanquam infirmus ad medicum, & tu me sanabis : tanquam peccator ad fontem iustitiæ, & tu me iustificabis. Tu recipis peccatores, atque māducas cum illis ; cibusque tuus est conuersari cum illis, & deliciæ tuæ, esse cum hominibus.

Si tantopere delecteris, Domine, tali-

bus

Matth. 11.

Matth. 9.

bus conuiujs, ecce habes hîc insignem peccatorem, quo cum potes manducate panem tuum. Credo equidem Redemptor mi, multo plus te oblectasse lachrymas illius publicæ peccatricis, quàm superbum illud epulum tumidi illius Pharisæi : propterea nec despexisti illā, nec à te, vt peccatricem reiecasti : sed potiùs benignè recepisti, peccata illius dimisisti, contra calumniantium oblocutiones defendisti ; propter paucas lachrymarum guttas, multa illi peccata condonasti.

Luc. 7.

Ecce Domine, hîc noua tibi maioris gloriæ offertur materia, datur occasio. ecce hîc iacet peccator, qui multo quidem plura habet peccata, lachrymas verò multo pauciores. Illa nec prima, nec vltima fuit, quam tua misericordia suscepit. multa similia fecisti Domine, & multa similia tibi adhuc restant facienda. Intra Domine nunc numerum eorum, auspicare opus tuum, recipe in gratiam eum, qui te grauiùs offendit, & qui leuiùs propter offensionem plāgit. Non habet hic tot lachrymas, vt pedes tuos queat lauare : sed tu tantum sanguinis effudisti, quāntum sufficit ad ablutionem peccatorum, non tātum meorum, sed totius etiam mundi.

Ne indignè feras Domine mi, quòd talis existens, qualem me vides, audeam venire in conspectum tuum. Memento quòd non indignatus es, cùm pauper cu-

la illa,

Matth. 9.

la illa, quę sanguinis fluxum patiebatur, clām ad te venit, quærens remedium sue infirmitatis, & apprehendens fimbriam vestimentorum tuorum : sed potius laudasti illam, & cōsolatus es, dicens ; Confide filia, fides tua te saluam fecit. Ecce ego & maiorem & periculosiorem sanguinis fluxum patiens, quique minū est curabilis, quid agam ? quō me vertam ? ad quem ibo, nisi ad te Domine, vt beneficium sanitatis, adipiscar ?

Domine mi, tu nec officium tuum, neque consuetudinem aut naturam tuam mutasti, quam habuisti, cū nobiscum in terris versabaris, etiam si nunc in cælos abieris, & procū à nobis abesse videaris. Si enim mutatus esses, alia scriptura, & alio nobis opus esset Euangelio, quod doceret nos quid nunc de te credere, quid de te in cælo residente sperare debeamus.

Luc. 6.

Lego in sanctis tuis Euangelijs, quod omnes qui malè habebant, ad te confluxerunt, & quod omnis turba quæsiuit te tangere, eo quod virtus exhibat de te, & sanabat omnes. Ad te venerunt leprosi, & tu extendens benedictas manus tuas, mundaisti illos. Ad te venerunt cæci, surdi, paralytici, dæmoniaci. Ad te denique omnia monstra huius mundi properarunt, nullique eorum opem tuam denegasti. In te solo salus est, in te medicina & remedium malorū omnium. Promptior es tu ad dandam salutem, quā il-

li ad

li ad poscendam.

Quò itaque ibimus in necessitatibus nostris Domine, nisi ad te? Scio enim Domine, quòd diuinum hoc Sacramentum non est tantum cibus eorum, qui sani sunt; sed medicina quoque malè habentium & infirmorum: nò tantum fortitudo est viuentium; sed & resurrectio mortuorum: non tantum recreat & oblectat iustos; sed sanat etiam & purificat peccatores.

Vnusquisque accedat huc, & accipiat eam partem, quam sibi putat fore salubriorem. Veniant iusti & manducent, & lætentur in hac mensa: sonetque vox confessionis eorum, & laudis in isto salutari calice.

Nusquam esse possum sine hoc mysterio, nusquam sine illo viuere; & vbi-
cunque sum, excusari nò possum, si non
sumpsero: omni enim in loco, omni in
re istud est mihi necessarium. Si infirmus
sim, hìc sanabor: si sanus, hìc con-
seruabor: si viuus, hìc confortabor: si
mortuus, hìc resuscitabor: si amore di-
uino ardeam, hìc magis accendar: si te-
pidior sim, hìc inflammabor. Non time-
bo, etiam si Dominus cæcum me inue-
niat; quoniã ille cæcos illuminat: non
metuam, licet me lapsum conspiciat;
ipse enim labentes erigit. Non fugiam
à facie eius, sicut quondam fecit Adam,
quantumuis nudus sum; ille enim po-
test nuditatem meam tegere: non me

abscon-

abscendam, quamuis immundus & plenus peccatis videar; ille enim est fons misericordiæ: non erubescam licet pauper sim; ille enim Dominus est omnium rerum creatarum.

Non magnopere sollicitus sum, quod ille audaciam meam suam iniuriam interpretabitur: sed occasionem me illi gloriæ maioris daturū arbitror; ut dum ego ceteris omnibus sim inferior, dilucidius in me resplendeat diuinæ misericordiæ magnitudo, eo ipso, quod mihi auxiliabitur.

Ioan. 9.

Tenebræ illius, qui à natiuitate cæcus fuerat, gloriæ Domini famulabantur: natus enim cæcus erat, ut manifestarentur opera Dei. sic & miseria meæ conditionis seruiet illi, quoniam in ea magnitudo bonitatis eius conspicietur; si nimirum ille, qui tam sublimis est, tam miseram atque inopem creaturam iuuare nō dedignetur: idque potissimum, cum hīc nulla ratio mei habeatur; sed tantum meritorum Domini nostri Iesu Christi, propter quæ Pater æternus nobis bene vult, & nos in filios suos adoptat, habetque benignè, ut tales haberi solent.

2 Reg. 9.

Oro itaque supplex, & obtestor te nūc Deus meus, Pater Domini nostri Iesu Christi, ut quemadmodū sanctissimus ille Rex Dauid Miphiboseph debilem pedibus ad mensam suam admisit, quia erat filius magni & chari amici illius Ionathæ, volens hoc modo filium ho-

nora-

norare, non propter filium ipsum, sed propter merita patris illius: sic & tibi Pater cælestis placeat me pauperem & immūdum peccatorem ad regale tuum conuiuium admittere; non propter me, sed propter merita & honorem singularis amici tui Iesu Christi, Domini & Patris nostri; qui cum tantis laboribus & doloribus ad gloriam & honorem tuum nos regenerauit in arbore crucis; qui & tecum viuit ac regnat in secula seculorum. Amen.

ORATIO ANTE COM-

munionem.

TE laudo, tibi gratias ago dulcissime Domine Iesu, Seruator & Redemptor mi, pro tantis tuis beneficijs, quæ in tam vilem & miserabilem creaturā conferre dignatus es. Tibi gratias ago Domine mi, pro omnibus miserationibus tuis, quibus erga genus humanū, in mysterio potissimum incarnationis, vsus es; in natiuitate scilicet, circumcisione, in templo præsentatione, in Ægyptum fuga, in ieiunio & tentatione, in laboribus & itineribus multis, in prædicationibus & persecutionibus mundi huius, in tormentis & doloribus acerbissimæ tuæ passionis, & in omnibus quæ in carne pro me passus es.

Ante omnia verò gratias tibi ago immensas, pro ineffabili tua charitate, quæ te pro me pati impulit: quæ profecto

cunctis

Granatē-
sis ibid.

cunctis operibus tuis sine vlla comparatione maior est. Insuper & quas possum gratias ago, quòd non dedignaris me ad sanctissimam tuam mensam admittere, participemque tui ipsius, & omniũ meritorum, inæstimabilisque thesauri tuæ passionis facere. O Deus meus, & Seruator meus, quibus obsequijs hoc nouum & inauditum misericordiæ tuæ genus compensabo? Quis es tu, & quis sum ego, quòd tu Dominus supremæ Maiestatis dignaris te venire in luteum, terrenumque habitaculũ meum? Domum tuam, Domine, decet sanctitudo in secula seculorũ. Cur itaque venis in domum meam, quæ nunquam non malignitate abundat? Cælum hospitium, & sedes tua est, & terra scabellum pedũ tuorum: quia & cælum & terram implet tuæ Maiestatis gloria; quomodo igitur non abhorres ad tam vile hospitium meum diuertere? Ergone putandum est, inquit Salomon, quòd verè Deus habitet super terram? si enim cælum & cæli cælorum capere te non possunt, quanto magis domus hæc quam ædificaui? O res admiranda, qui sedet super Cherubin, & intuetur abyssos, nunc se ad abyssum vsque humiliat, & in infimo loco sedem suam collocat.

Parum tuæ bonitati visum est, quòd Angelos nostro ministerio destinasti, ipse ad nos venire voluisti, & in animas nostras intrare, vt proprijs manibus illic

negotia

Psal. 92.

3 Reg. 8.

negotia nostræ salutis operareris. Ibi tu
 uisitas infirmos, erigis lapsos, doces
 ignorantes, reducis in viam errantes.
 Quid multis? tu ipse es, qui curas ibi vul-
 nera & languores nostros omnes, non
 alterius manibus, sed proprijs; non lon-
 gè petita medicina, sed propria carne,
 proprioque sanguine tuo semper bene-
 dicto mederis.

O optime Pastor, quàm abundè satis-
 fecisti tuæ promissioni, quam olim per
 Prophetam enunciaſti, dicens; Ego pa-
 ſcam oues meas, & ego eas accubare faci-
 am. Sed quis erit dignus hac gratia: quis
 erit dignus hoc beneficio: sola tua miſe-
 ricordia, Domine, bonis tam infinitis
 nos potest dignos facere. Et quoniam ſi-
 ne illa nemo dignus eſſe potest, illa Do-
 mine mihi ſit propitia, illa me tãtorum
 myſteriorum faciat participem, faciat &
 me gratum tam inæſtimabili beneficio.
 Suppleat quęſo quicquid mihi deest gra-
 tia tua, dimittat mihi omnia peccata
 mea miſericordia tua, præparet animum
 meum Spiritus tuus, ditent paupertatem
 meam merita tua, & eluat omnes macu-
 las animæ meæ, totiusque vitæ meę ſor-
 des ſanguis ille tuus pretioſus: vt dignè
 poſſim tremendum hoc Sacramentum
 ſuſcipere.

Exultat & lætatur anima mea, ô Do-
 mine, quoties recordor inſignis illius
 miraculi, quo mortuus mortuum olim
 cadauer ſolo attactu corporis ſui reſuſci-

tauit.

Ezech. 34.

4 Reg. 13.

tauit. Nam si tantum potuerit corpus Prophetæ mortui, quid non poterit corpus viuum omnium Prophetarum Domini? Certus sum Domine mi, quòd tua potentia non est minor potentia Prophetæ, & anima mea non minùs mortua est, quàm corpus illius hominis, nec minoris efficaciz contactus hic, quàm ille. Quare igitur simile beneficium in me non expectabo? quare maiora miracula faciet corpus in peccatis conceptũ, quàm corpus conceptum à Spiritu sancto? quare maiorem prærogatiuam habebit corpus serui, quàm corpus Domini? quare corpus tuum non resuscitabit animam meam in tuo sanguine sanctificatam, quæ cohæret & coniungitur tibi per fidem, cùm resuscitet illud corpora quæ contingit? Et quia corpus hoc resuscitatum fuit, vitam non petens, sed sola virtute ossium beati Prophetæ tui; placeat quæso infinite misericordiz tuæ Domine mi, vitam mihi per medium huius Sacramenti petenti & obsecranti reddere, vt iam non viuam ego, sed tu viuas in me.

O bone Iesu, per illam inæstimabilem charitatem, quæ te pro me tradidit, & ignominiosam mortem obire fecit, te supplex oro, vt me ab omni peccato munda, omni virtutum genere, omnibusque meritis tuis me exornes, & gratiã concedas, vt sacrosanctum hoc Sacramentum tanta cum humilitate & reuerentia, tan-

to cum

to cum timore & tremore, tanto cum dolore & peccatorum meorū pœnitentiæ, denique tanto cum amore & charitate excipiam, quantam augustissimum hoc mysterium requirit.

Da mihi, benignissime Domine, illam intentionis puritatem, cum qua dignè ad mensam tuam mysticam accedere potero, ad gloriam nominis tui sancti, & ad remedium omnium infirmitatum, necessitatumque mearum; vt virtute huius Sacramenti corroboratus, fortiter contra inimicos meos pugnare, illos vincere, meque viuificante hoc cibo in vita spiritali sustentare valeam. sed & huius Sacramenti beneficio fac, vt vnum quid tecum fiam, tibi que concorporatus inseparabiliter inhæream, vnus tecum spiritus effectus.

Offeratur hoc sacrificium pro salute omnium fidelium, viuentium & defunctorum. Omnes enim adiuuantur virtute inæstimabilis huius Sacramenti, quod pro salute omnium est institutum, & Ecclesiæ tuæ relictum à te, qui viuis & regnas in secula seculorum. Amen.

ORATIO ANTE COMMUNIONEM *secunda.*

OMnipotens sempiterne Deus, ecce ego indignissimus peccator accedo ad Sacramentum vnigeniti filij tui, Domini nostri, Iesu Christi. Accedo tanquam infirmus ad medicum vitæ, im-

mundus

Idem ibidem ex D. Thoma.

mundus ad fontem misericordiæ, cæcus ad lumen claritatis æternæ, pauper & egenus ad Dominum cæli & terræ, nudus ad Regem gloriæ. Rogo ergo immensæ largitatis tuæ abundantiam, quatenus meam curare digneris infirmitatem, lauare sceditatem, illuminare cecitatem, ditare paupertatem, vestire nuditatem: vt panem Angelorum, Regem Regum, Dominum dominantium tanta suscipiam reuerentia & humilitate, tanta contritione & deuotione, tanta puritate & fide, tali proposito & intentione, sicut expedit saluti animæ meæ.

Da mihi Domine corporis & sanguinis Dominici non tantum suscipere Sacramentum, sed etiam rem & virtutem Sacramenti. O mitissime Deus, da mihi corpus vnigeniti filij tui, Domini nostri Iesu Christi, quod traxit de virgine Maria, sic suscipere, vt corpori tuo mystico merear incorporari, & inter eius membra connumerari. O amantissime Pater, concede mihi dilectum filium tuum, quem nunc velatū in via suscipere propono, reuelata tandem facie perpetuo contemplari. Qui tecum viuit & regnat in secula seculorum. Amen.

ORATIO ANTE COM-

munionem tertiæ.

Ex hortu-
lo deuo-
tionis.

Salue salus infirmorū, ô lux pulcher-
rima sedentes in tenebris illuminās:
salue Patriarcharum & Prophetarum

desi-

desiderium: salue ô amantium te amor
amicorum; ô panis Angelorum candi-
dissime, salue ô sapor in corde deuoto-
rum optime. Tu es manna, tu mel, tu si-
mila, tu panis Asar, præbens delicias Re-
gibus: tu gustus suauitatis, & satietas
suauissima fame fatigatis.

Tu es quem cor meum desiderat, te
verè Deum & hominem confiteor, quid-
quid in mea conscientia obscurum &
immundum latitat, eia id tua præsentia
clarum fiat & purum: nihil apud me
maneat, quo fortè offendaris; sed amor
tuus totum me absorbeat, & tua dilectio
me complectatur. Cor meum amore tui
diuinitus accende, & præsentem hîc te
inuisibiliter ostende. Cordis mei nebu-
las diuinitatis tuę radij penetrēt, omnes-
que maculas eluant, & languores inde
eijciant: virtutibus illud omnigenis ex-
ornent, & varijs sancti Spiritus charis-
matibus corroborent.

Veni, veni Rex optime, veni Iesu cha-
rissime, & in animæ meæ sinu dulciter
hospitare: Charitas quæ aureo te trans-
fixit telo, vt nos ab æthereo visitares cæ-
lo, vulneret te hodie, vt ad me venire di-
gneris, ô Rex gloriæ. Tibi in me fac ha-
bitaculum, tibi sedem & triclinium in
corde miseri peccatoris. O amantissime
Deus, mihi coniungere, & animæ meæ
peccatrici nequaquam irascere. O dul-
cissime Domine, hoc vnum à te precor,
benignè fac in bona voluntate tua, vt

ego hodie te dignè suscipiam, & tu ad me, licet indignum, ingrediaris; mihi totus coniungaris, & cor meum, ô fidelis hospes, totum possideas. Quis sim ne consideres, quia peccator sum, & multorum scelerum reus: sed tu, ô Deus, memento cur homo factus es, & in hunc mundū venisti. In charitate nimia qua crucem ascendisti, te oro, amoris tui brachia super me extende, vt te per virtutem tuam in hoc Sacramento presentem esse sentiam: accelera, ingredi, veni, festinanter peccatori iungere, & me tecum vnum effice: en totum te habeo, quem sitiuit anima mea; totum te teneo, totum possideo. quid retribuam tibi, ô Domine, pro omnibus quæ retribuisti mihi?

O adoranda Deitas, te innoco in fide: ô admiranda bonitas, nunc audi me, & vide, tuæ celsitudinis cælum mihi pateat, & lumen tui luminis, fac vt mihi splendeat. visita nos Domine in tuo salutari, & tuæ præsentiae da nos dignè præsentari. Cælesti mentes adipe fac nostras impinguari, & igne tuo præcipe cor nostrum inflammari. Thesaurum tuum repera, & verum manna plue; nos confederatos fac dilectioni tuæ. Mihi primum pauperi de te præsumenti piam manum aperi, misertus nil habenti. Ne, ô Deus optime, quàm vilis sim attende, sed tu amantissime quàm pius sis ostende.

Me despectum hominem digneris exaudire, & tuam dulcedinem mihi da sentire. Vt vacuus sim hodie ne finas homo Deus; sed in Christi tui facie sit plenus amor meus. Omnem hinc desidia & scrupulum erroris, peruersam pelle fidei sententiam, & ignauæ mentis negligentiam, per gratiæ tuæ præsentiam.

Cælestis aulæ nunciij præsentēs hîc estote, in hora sacrificij vos nostri mementote, Diuinitas altissima super nos intende, & in hora tam beata nobis condescende. Ecce nunc altissima coniunguntur imis, ad loca tam humilia venit Rex sublimis. O Iesu dulcis hospes animæ, da mihi dignè te suscipere, & tibi soli viuere: te solum diligere, qui pro me Deus homo natus, & in crucem subleuatus: Nunc Patris sedes in dextera, tibi sit laus, decus & gloria. Amen.

ORATIO ANTE COM-

munionem quarta.

Ple Domine Iesu Christe, confiteor me maximum esse peccatorem, & vermiculum immundum, qui non sum dignus in tuum prorepere conspectum. Indoneum quoque & planè indignum me agnosco, qui recipiam te in domicilium animæ meæ, eo quòd non est munda ab omni macula & iniquitate, quodque ornata & præparata non est virtutibus atque operibus internis, quæ tamen

Frâciscus
de Euia.
habetur
in fine li-
bri 4 de
orat. &
meditat.
Granatès.

apparatum Maieſtas tua requirit, antequam ſuſcipiaris tu Deus meus, Creator meus, Redemptor meus: ideoque metuo & contremiſco, nec appropinquare tibi nunc audeo. Magna tamen fulcit me fiducia, quòd tu Deus meus es vita viuens, quæ viuificat corpus & animam, omnibusque rebus, quæ vitales ſunt, vitam largitur: neque deſideras, aut vis mortem peccatoris, ſed vt conuertatur & uiuat. Tu enim expaſiſ brachijs hærens in cruce, vt recipias nos, alta voce clamas, & nos vt veniamus inuitas, dicens;

Matth.ii.

Venite ad me omnes qui laboratis in præſenti vita, & onerati eſtis peccatis & tribulationibus, & ego reficiam vos. quietem vobis dabo, & conſolabor vos. Et

Ioan.7.

alio loco; Qui ſitit, qui ſalutem appetit, veniat ad me, & bibat de fonte miſericordiæ, deque torrente pœnitentiæ.

His, alijsque verbis dulciſſimis, quæ paſſim in Euangelio tuo reperiuntur, & populo pro concionibus ſoles propo-
re, vehemente accendor; atque ex ijs fiduciam talem concipio, vt audeam propius ad te accedere.

Sed & memor infinitæ illius bonitatis & miſericordiæ tuæ, qua motus non deſpexiſti Latronem in cruce tibi conſiſtentem, & indulgentiam rogantem; nec Magdalenam, licet peccatricem tota Iudæa celebrem; nec reieciſti preces Chananæ, quamuis Ethnicæ: nec te puduit mulieris in adulterio deprehenſæ, cuius

in tua

in tua accusabatur præsentia. Non repulisti Matthæum sedentem in telonio, nec humilem Publicanum: non lachrymas Petri te negantis, nec ignorantiam Pauli te persequentis. Quid multis? non detestatus es malitiam & iniquitatem eorum, qui te crucifixerunt, posteaquam ipse pro ijs in cruce omnipotenti Patri tuo supplicaueris.

Hæc, aliaque exempla plurima animum mihi addunt, & fiduciam in me excitant, vt iam cum audaci quadam humilitate veniam ad recipiendum te; omnino confidens fore, vt tu Domine Deus defectus, indignitatemque meam meritis sanctissimæ passionis & mortis tuæ suppleas: Qui cum Patre & Spiritu sancto viuis & regnas per omnia secula seculorum. Amen.

ORATIO ANTE COMMUNIONEM quinta.

Cum tuam Maiestatem, Domine, meamque vilitatem considero, totus horreo, contremisco & in memetipso confundor. Tanta enim est iniquitatum mearum magnitudo, vt nec ego illas corrigere, nec pro illis queam tibi satisfacere. Quid ergo faciam Deus meus, auxiliator meus, & consolator in necessitatibus? Scio. quid faciam: Vnigenitus filius tuus perfectissimum in ara crucis pro me tibi obtulit sacrificium. Idem & ego offeram tibi nunc pro peccatis meis,

Granatensis lib. 4
de orat. &
Meditat.

vt illud satisfaciatur pro me. Scio enim nihil esse aut in cælo, aut in terra, quod tibi magis placet, aut quo facilius homo tibi reconciliatur. Nec tantum offeram hunc filium tuum tibi, sed & ore & corde meo, licet impuro, illū sumam, comedam, & in animæ meæ viscera transmittam : vt hoc modo magis tibi gratificer, eundemque filium tibi reddam pro omnibus donis, gratijs, & beneficijs, quibus me adeo deuinctum tenes, vt aliter, nisi hoc modo, dignas tibi referre gratias nunquam potero.

Offero igitur tibi, ô æterne Pater, amantissimum filium tuum, & sumam illum, vt per illius gratiam & potentiam vincam inimicos meos, Diabolum, Mundum, & Carnem, mihi insensissimos. Suscipiam filium tuum, vt illius diuitiæ succurrant meæ paupertati; infinita illius bonitas meam expellat malitiam; incomprehensibilis illius diuinitas restauret, perfectamque faciat meam humanitatē per peccata corruptam & debilitatam. Ore & corde, ô suauissime Pater, amantissimum filium tuum percipiā, vt illo Mediatore me tibi proximum facias assidere, ibique me immotum detineas, non aliter atque olim filius tuus pro me in cruce detentus est : de qua descendere noluit, priusquam me perfectē sibi cōparasset, atque me tibi reconciliasset.

Per huius itaque filij tui charitatem

tibi

tibi supplico Pater, vt digneris me adiuuare, meque tibi tam arcte astringere, vt nunquam te deseram, etiam si totum terrarum orbẽ à te videro declinare. Quam gratiam non pro me tantum peto, sed & pro omnibus illis, quibus aliquo vinculo sum obstrictus: imò pro omnibus hominibus, viuis & defunctis.

Et tu, ô benignissime Saluator, qui dedisti nobis corpus tuũ in cibum, sanguinem in potum, & animam in redemptionem nostram, miserere, miserere famuli tui: da misericordiam poscenti, da gratiam indigenti, & fac me talem, vt dignè te in hoc Sacramento, ad quod nunc accedo, suscipiam: si enim indignus accessero, iudicium incurro: & nisi tu me dignum feceris, frustra laboro. Porrige itaque dexteram, ô pie Iesu, miserimo famulo tuo, de proprijs vitibus diffidenti: supple de tuo, quod deest de suo, & fac tibi in me cœnaculum grande, stratum, & ornatum, in quo requiescas dulciter, mirabiliumque tuorum, beneficiorum quoque & acerbissimæ passionis tuæ memoria habitet sine fine, nec vnquam inde excidat. Qui viuis & regnas Deus per omnia secula seculorum. Amen.

ADMONITIO SVB COM-
MUNIONE.

TEmpore communionis accessurus ad altare Dominicum existima te audire vo-

Granatẽs
lib. 5 Me-
morial.

Matth. 25. cem illam Euangelicam; Ecce sponsus venit, exite obviam illi. exite ut excipiat is illum: Non enim in alio aliquo Sacramento Deus tam manifestè se sponsum animarum nostrarum esse ostendit, quàm in Eucharistia. Effectus siquidem huius Sacramenti est copula, & unio animæ cum Deo, ut fiat ex duobus quid unum. hoc namque proprium est matrimonij spiritualis. Accirco ut dignè hunc sponsum possis excipere, necesse est diligenter consideres, quomodo & qualis ad te venit: ut & tu talis illi obviam procedas. Venit enim plenus charitate, suauitate, bonitate, misericordia; dicens, quòd desiderio magno desiderauit hoc Pascha manducare tecum. Tu itaque exi in occursum illi, & excipe eum cum omni deuotione, amore, timore, reuerentia & gaudio: & quicquid in te est, illi obviam effunde. Exis enim ad recipiendum verum sponsum animæ tuæ, verum Deum tuum, Creatorem tuum, & summum bonum tuum. Considera magnitudinem deuotionis & exultationis, qua cum Ioseph ille Simeon puerulum Iesum in brachia sua excepit, quando à matre Virgine offerebatur, ob cuius visionis desiderium tantummodo vitæ prorogationem optarat. Tali cum desiderio & deuotione procedas oportet, qui venisti ut in sanctissimo hoc Sacramento eundem Dominum percipias. Perpende quoque deuotionem & gaudium, cum quo mater Ioannis Baptistæ

ptistæ Dominum hunc in ædes suas excepit, cum in hæc verba plena deuotionis erūperet; Vnde hoc mihi, vt veniat mater Domini mei ad me? Dic igitur & tu;

Luc. i.

EXCITATIO MENTIS AD

deuotionem tempore Communionis.

VNde mihi tanta misericordia, vt Dominus Angelorum & gloria celi ad me venire dignetur? O pater, o pastor, o Domine, o Deus meus & omne bonum meum, cui non satis fuit me ad tuam similitudinem creasse, tuoque me sanguine redemisse; sed voluisti insuper venire ad me, & in me quiescere: voluisti me in te transformare, & facere me tecum vnum. Vnde hæc mihi Domine mi? an quia opera opera mea promeruerunt? an quia tu bonorum meorum es? Nequaquam Domine: sed sola bonitas tua & misericordia tua te mouent, vt tu delecteris amplius habitare mecum, quam ego tecum. Ego ad te venio, quia ope tua indigeo: tu ad me venis, quia bonus es. Ego te desidero, quia miser & miserabilis sum; tu quæris me, quia misericors es: ego ad te, quia beneficia expecto à te; tu ad me, quia promptus es ad dandum: tu quia paratior ad dandum quam ego ad accipiendum: tu quia liberalior, quam ego indigus. ideoque tu magis oblectaris habitare mecum, quam ego tecum, vt ipse confessus es, dicens; Deliciæ meæ esse cum filiis hominum.

Idem ibidem.

Prouer. 3.

ORATIO SVB IPSAM

Communione.

QVis ego sum Domine, & quæ est domus patris mei, vt tu venias ad me, quem Præcurſor tuus præ reuerentia non auſus fuit tangere? cæli clauiger timuit accedere? omnesque glorioſi principes cæleſtis curiæ adorant & reuerentur? Fretus tamen ego immenſa pietate & clementia tua accedo ad te fontem miſericordiæ, medicum vitæ. Sed tu qui ſolus ex indignis dignos facis, ne me dimittas ieiunum, ne deficiam in via. parce mihi cum Magdalena ad genua tua prouoluto, mihi remitte peccata mea, quæcunque vel ex infirmitate, vel ignorantia, vel etiam voluntariè perpetravi. Tribue cæco huic te inuocanti lumen mentis, paralytico robur & fortitudinem ſpiritus. Exeat virtus de te o bone Ieſu, fili Dauid, quæ ſanet fluxum concupiſcentiarum mearum, dum tango, non ſimbriam veſtimentorum tuorum, ſed te totum ſumo, licet indignus. Obluiſcere peccatum meum, pro quo fudiſti ſanguinem tuum. Veni & viſita domum iſtam nomini tuo dedicatam. Venio ad te, non in meis meritis, ſed in miſerationibus tuis immenſis: ſupple queſo de te, quod minus habeo in me. Serua domum iſtam nomini tuo dedicatam, ne inimicus reuertens faciat nouiſſima mea peiora prioribus. Amen.

CVM

CVM SALVTAREM HOSTI-

*am vides in manu Sacerdotis,**dic tecum.*

HOc corpus in præsepi reueriti sunt Magi, & viri impii, & Barbari longo itinere confecto, cum timore & tremore plurimo adorauerūt. Propter hoc corpus non ampliùs terra & cinis ego sum, non ampliùs captiuus, sed liber: propter hoc cælum, & ea quæ in eo bona sunt, me accepturum spero. Hoc corpus cruci affixum, verberatum, morte victum non est. hoc corpus sol crucifixum videns radios suos auertit: propter hoc velum templi scissum est, & petra & terra vniuersa tremuit. Hoc idem corpus cruentatum, lancea vulneratum fontes sanguinis & aquæ vniuerso orbi salutares scaturiuit.

EVCHARISTIAM ORE

excipiens, dic:

Domine non sum dignus, vt intres sub tectum meum: sed tu Domine, qui dixisti; Qui manducat meam carnem, & bibit meum sanguinem, in me manet, & ego in eo; propitiùs esto mihi peccatori, per sumptionem corporis & sanguinis tui: & præsta, vt non ad iudicium damnationis illud sumam; sed misericordia tua tribuente in salutem & remissionem omnium peccatorum meorum. Amen.

Chrysoft.
homil. 83.
in Matth.

D. Tho.
mas Aquinas.
Ioan. 6.

ADMONITIO POST
COMMVNIONEM.

Ex lib. 3
cap. 6 Me-
morialis
Granatēſ

Postquam salutarem hostiā sumpsisti, eam aliquamdiu in ore tuo retine, donec paululum humectetur, vt possit facilius digluti. Erit enim nonnunquam, vt hac cautela non vtentibus adhareat palato, tantumq; pariat in reuellendo molestiam, vt impediatur, ne cogitet aut meditetur homo, quæ sunt vel tunc maxime meditanda.

II. Cave ne statim post Cōmunionem expuas: si vrgeat necessitas, fiat hoc in loco munda, & à pedibus hominum remoto.

III. Sed nec statim post Communionē comedendum est; sed expectandum, donec species sacramentales digestæ sunt, & resolutæ.

IIII. Colloquia humana, fabulas, & otiosa verba hoc tempore deuota: magna namque incivilitas est, mox ubi tantum hospitem in domum tuam exceperis, illi dorsum obuertere, aduentum felicem non gratulari, nolle cum eo sermocinari; sed fugere & ad inanes fabulas conuerti.

V. Toto igitur illo die oportet te occupatum esse orationibus, diuinis laudibus, mediationibus de amore Dei, de passione Domini, de beneficijs diuinis, Deoq; pro illis gratiæ indefinenter agende sunt. Quamdiu enim species Sacramentales in pectore manent (ait Caietanus)

tanus)

tanus) tamdiu mirabiles effectus hoc Sacramentum in animabus nostris operatur: ita vt hîc dici possit illud, quod olim dixit de semetipso Saluator; Quamdiu sum in mundo, lux mundi sum, Et sol non tantum illuminat mundum cum supra horizontem conspicitur, sed ante ortum, & post occasum horapene integra: sic & Sol iustitiæ in hoc Sacramento latitans, non tantum in ipso communionis momento, sed ante & post illud radios suos exerit, ante illud per spem & desiderium, post illud verò percepti beneficij memoria.

MEDITATIO INSIGNIS

post Communionem prima.

O Deus meus, & misericordia mea, quomodo dignas potero tibi gratias agere, quod tu Rex Regum & Dominus dominantium non dedignatus es visitare animam meam, & pauperculum miseræ meæ domunculæ tectum subire, ibique facere, vt tu & ego Vnum simus, idque mediante inæstimabili virtute huius Sacramenti? Quo munere tantum beneficium compensabo? quibus officijs tantam tuam bonitatem remunerabo? quam gratiam poterit dare creatura misera, pauper & inops pro munere tam diuite & pretioso? Non enim satis tibi fuit nos in hoc mysterio participes facere supremæ tuæ Deitatis; sed simul nobis communicare voluisti sanctissimam tu-

Granatēs.
lib.3 Memorialis.

am humanitatē, vnā cum omnibus meritis, quæ per illam & cum illa pro nobis lucrificasti: dās enim nobis hīc carnem & sanguinem tuū, nos etiam participes facis totius thesauri, omniumque meritorum, quæ eadē carne & sanguine comparasti. O admirabilem communionē. O thesaurum nullo pretio comparandum, & hominibus nondum satis cognitum; dignum tamen cuius præconia noctes atque dies in Ecclesia magna decantentur. O clementissime Reparator animarum nostrarum, quibuscum maioribus diuitijs & pretiosioribus monilibus nos locupletari potuisti, quā hoc augustissimo Sacramento? Meritò dixisti Domine in oratione tua, qua sub ipsam passionis horam Patrem interpellasti; Ego me sanctifico pro eis, vt sint & ipsi sanctificati in veritate. Nouo scilicet modo sanctificandi, Sanctificatori difficiliore, & sanctificato faciliore. Tua enim Domine est sanctitas, mihi verò fructus sanctitatis: tu laborasti, ego mercedem accipio: tu impensas fecisti, ego lucrum colligo: tu castigaris, & mihi peccatorum datur venia: tu amaram potionem bibis, & ego amissam sanitatem cum vita recupero. Pro me satisfecerunt tui dolores, tui clauī, tuæ alapæ, tuæ spinæ, & pretiosus ille sanguis tuus, non per guttas, sed per riuos effusus. Me lauant tuæ lachrymæ, me sanant tua vulnera, & pro me satisfaciunt tua flagella.

O di-

Ioan. 17.

O diues communio. O fraternitas infinitorum meritorum. O commercium inæstimabilis thesauri. Quod peculium, aut quam sortem nos in hanc societatem misimus? quid nos deposuimus, vt tam copiosum lucrum ad nos redeat? Non est profectò tantæ felicitatis alia causa, præter tuam bonitatem. Quare sol terras illuminat? quare ignis obiectum corpus calefacit? cur idem aqua refrigerat? res in propatulo est: sunt enim hæ naturales eorum proprietates, tales enim creaturæ tales produciunt effectus. Et tibi Domine propriū est ignorare, tibi misericordiam facere, idque alijs potius quam tibi ipsi. Tua bonitas nostra est, eaque non qualiscunque, sed summa. Vt enim proprium boni est, esse diffusium seu communicatiuum, sanè summum bonum summè quoque erit diffusium. Et hæc fecisti nobis, quia totum te nobis dedisti. Nascendo factus es noster frater, nutriendo cibus, moriendo pretium, & regnādo præmium. Denique, o anima mea, si vnico verbo complecti velis omnia illa bona, quæ secum adfert tam admirabile Sacramentum, considera illud quod Dominus iste in hunc mundum attulit, cum homo factus in mundum venit. Cū enim in mundum venit, dedit mundo vitā gratiæ, cum omnibus quæ gratiam subsequuntur: ita & cū per Sacramentum in animam venit, eandem vitam animæ

largi-

largitur. O cibum diuinum, per quem filij hominum in filios Dei transformantur, & per quem humanitas omnis in nobis mortificatur, vt viuat in nobis Deitas. O panem dulcissimum dignum qui adoretur, animam non ventrem nutriendem; cor corroborantem, & corpus non grauantem; spiritum letificantem, & intellectum non cōturbantem; cuius virtus appetitus nostros moderatur, voluntatem propriam interficit, vt efficax sit in nobis voluntas diuina.

Exod. 16.

Quas igitur gratiarum actiones referam, quas laudes tibi cantabo Domine, pro hoc beneficio? Si gratitudo debeat respondere dono, quod quæso gratitudinis genus sufficiet tali dono? Tu dixisti aliquando famulo tuo Moyfi: Accipe vas aureum, & imple illud manna, & absconde illud in arca fœderis, & conseruetur ibi in generationes futuras, vt videant cibum, quem comedere feci vos in deserto annos quadraginta. Si tanti fecisti, Domine, cibum illum corruptibilem, quem dedisti populo in deserto, vt volueris illum seruari ad perpetuam rei memoriam in veneratione; quanto apud nos in honore debet esse cibus incorruptibilis, qui dat vitā æternam his qui manducant. Manifestè video differentiam eandem, quæ est inter vnum cibum, & inter alium, etiam esse inter vnum beneficium, & inter aliud; & proinde debere eandem quoque esse

inter

inter vnā gratitudinem, & alteram. Ille cibus erat terrenus, hic cælestis: ille corporis erat, hic animæ: ille non dabat veram vitam manducantibus, hic verò dignè sumentibus est vita æterna. Sed quid comparationem hanc vnus ad alterum instituo? quæ enim differentia est inter Creatorem & creaturam, eadem est inter hunc & illum cibum. Si itaque tu, Domine, talem memoriam & gratitudinem poposceris, eò quòd populū tuum cibo corporali & corruptibili nutriueris: quam requires à nobis, quos cibo nutritis tanto meliori, quātum Creator præstat creaturæ? Non est laus, non est gratiarum actio, quæ digna est hoc beneficio. Cū itaque diffidam de viribus & facultatibus meis, nec viam, modumque inueniam vllum soluendi, quod tibi debeo, non est mihi aliud remedium reliquum, quā accipere cum Propheta Calicem salutarem, & inuocare nomen Domini; id est, non remunerare beneficia præterita, sed petere noua, & gratiam supra gratiam postulare. Oro itaque, Domine, vt concedas mihi hoc Sacramentum accipere in satisfactionem omnium peccatorum meorū, & ad emendationem vitæ meæ prioris. Per illud reparetur in me quidquid collapsum est; quidquid mihi deest suppleatur, & paupertas mea diuitijs gratiarum tuarum ditetur. Virtute huius Sacramenti mortifica in me, quidquid diuinis oculis tuis

Psal. 115.

displi-

displacet, & fac me conformem tuæ voluntati. Largire mihi Domine, vt per mysterium hoc semper in te perseuerem, teque amem perfectè & perseueranter; vtque semper tibi vnitus & coniunctus maneam, pro gloria & honore sanctissimi nominis tui. Propitius esto Domine omnibus peccatis meis; non meis tantum, sed & aliorum. Fac Hereticos & Schismaticos ad vnitatem Ecclesię redire: illumina infideles, vt te agnoscant. Adiuvā omnes, pro quibus orare sum obligatus, & hos qui se meis precibus commendāunt. Consolare patrem, matrem, fratres & sorores, amicos & inimicos meos, cum omnibus qui mihi vnquam benefecerunt. Fac misericordiam cum omnibus illis, pro quibus pretiosum sanguinem tuum fundere non dubitasti. Da gratiam viuīs, & requiem defunctis. Tibi autem sit laus, honor, virtus & gloria, qui viuīs & regnas in secula seculorum. Amen.

MEDITATIO POST COMMUNIONEM *secunda.*

Granatēf
ibidem.

ET si omnes creaturæ, quæ in cælo sunt, Domine, & in terra, linguæ essent, etiā disertissimæ; omnesque promptæ essent ad obsequium meum, mihi quæ ad reddendam tibi gratiarum actionem operam suam offerrent, certum est, quòd ne pro minimo tuo beneficio dignas tibi gratias agere possemus. *Quòd*

si ne

si ne pro minimo quidem beneficio gratias tibi sufficientes agere potero, etiam tot creaturarum choris mihi assistentibus & auxiliantibus; quid potero solus, pro tot beneficijs, ijsque infinitis modis maioribus? O Deus meus, ô Domine, & Seruator mi, quas gratias tibi reddam? quas laudes dicam? quoniam hoc die voluisti me visitare, consolari & honorare tua præsentia. Sancta illa mater Prodromi tui Ioannis, plena Spiritu sancto, quando per ostium domus suæ vidit intrantem Virginem, in cuius utero tu, tanquam sponsus in thalamo, quiescebas, expauescens tantæ rei admiratione exclamauit, dicēs: Et vnde hoc mihi, vt Luc. I. veniat mater Domini mei ad me? Quid itaque faciam ego vilissimus vermiculus, omnium huius mundi peccatorum primus & maximus? Intrauit ad me hodie hostia consecrata, in qua ipse Deus continebatur, qui ad me venit: quanto itaque maiori cum ratione & ego exclamare potero & dicere, Vnde mihi hoc, vt non mater Dei, sed Deus ipse, Dominus & creator omnium ad me veniat? Ad me, qui tanto tempore fui receptaculum & vas Sathanæ: ad me, qui toties hunc ipsum Dominum offendi: ad me, qui semper illum spreui, contumelia affeci, & crucifixi: ad me, qui toties illi fel pro suauis potu propinaui, quoties peccaui: cui toties ianuam cordis mei oclusi: quem toties à me repu-

li? Dignus itaque sum, qui nunquam in posterum hunc Dominum accipiam, cò quòd tam turpiter eum à me reieci: dignus sum, qui nunquam posthac ad cœnam eius admittar, quoniam venire nolui cùm me vocauit.

Sed quare ad me, ô Domine? Tu Rex Regum & Dominus dominantium, qui non eges vllius rei creatæ? Cuius sedes est cælum, & cuius regale scabellum est terra? cuius ministri sũt exercitus Angelorum? quem laudant stellæ matutinae? in cuius manibus sũt omnes fines terrarum? Tu qui sedes super Cherubin, & intueris abyssos, id est, secretissima quæque, & mundo abscondita, penètrans tua sapientia altissima cum profundissimis? Tu Domine incomprehensibilis Maiestatìs & magnitudinis venire voluisti hodie in locum tam humilem, abiectum, immundum? An fortè voluisti denuo ad Inferos descendere? an iterum manibus tradi nocentium decreuisti? aut iterũ in stabulo bestiarum nasci, & in præsepio reclinari, fœnoque aut paleis quiescere? Idem sanè tibi animus, eadem voluntas ni fallor tibi nunc est, quæ fuit olim; quod enim semel fecisti pro peccatoribus, id quotidie facis pro eisdem. Et siue hoc, siue alio modo me visitaeris, semper id tuæ debetur misericordiæ. Nunc autem non solum visitasti me, sed ad me, & in me intraisti, in me manes, me in te transformas, & Vnum

quid

quid tecum facis, vnione quadam admirabili & supernaturali, quæ similitudinem & comparisonem quandam habet cum ea diuinissima & altissima cōmunionē, quæ est inter te & Patrem tuum. Quemadmodum enim Pater est in te, & tu in Patre; sic qui māducat te, manet in te, & tu in illo: quæ res potest esse mirabilior? Admiratus est quondam Rex David, quòd Deus tanti faceret hominem. Quid est, inquit, homo quòd memor es eius, aut filius hominis quia visitas eum? Mirabatur David, quòd Deus esset memor hominis. At ego miror, quòd ipse homo pro homine factus est, ipse cum homine commoratus est, ipse pro homine mortuus est, seipsum homini manducandum dedit; Vnum quid cum homine factus est. Mirabatur Rex Salomon, quòd Deus voluit habitare in tēplo, quod ille tot annis, tot sumptibus, tot laboribus ædificārat, dicens; Ergōne putandū est, quòd verè Deus habitat super terrā? si enim cæli cælōrū te capere nō possunt, quanto magis domus hæc quam ego edificauī? Ceterū multò magis admirandū est, quòd idem cælōrū Deus & Dominus, alio excellētiori multò, & nobiliori modo in pauperculā ac vilē animulā non exhorrescit venire, in eaque manere; quæ tamē vix vna die tota laborauit, vt sedem illi præpararet. Mirabatur olim totius mundi machina, & obstupecebant omnes creaturæ,

Psal. 3.

3 Reg. 3.

De-

Deum videntes incarnatum, & hominem factum, descendentem de cælo, & nouem menses continuos in vtero Virginis recubantē. Nec iniuria. Erat enim hoc omnium mirabilium diuinorum maximum, optimum opus Dei, & beneficium cum nullo alio comparandum. Sed vterus ille virginalis plenus erat Spiritu sancto, splendidior stellis cæli, purior Angelis paradisi, virtutibus & gratijs magis adornatus, quàm cælum ipsum, quàm terra ipsa cum omni suo apparatu ornatuque: & proinde habitaculum illud erat dignum Deo, à Spiritu sancto præparatum. Sed quòd idem Dominus vult habitare in me, qui impurior sum cœno aut quouis sterquilinio, qui obscurior sum nocte, & quauis cloaca immundior, quis hoc non ad stuporem usque admirabitur? Esto, per infinitam bonitatem illius nunc lotus sim; aqua gratiarum illius mundatus sim; Sacramentis illius sanctificatus sim; an ne adhuc summa est misericordia, quòd Dominus omnis puritatis, fons candoris & munditiei non abhorret à loco, qui tanto tempore immundus, sordibus & stercorebus quibus scatebat, penè computruerat? Quem Principum & Magnatum non præter modum offenderes, si ad mensam eius adferres vas seruitijs Nosocomij destinatum, in quo vomitus ægrotantium excipi consuevit, etiam si laueris & mundaueris illud sæpius, vt

intus

intus & foris instar niuis candidum esse videatur? Memoria enim præteritarum sordium, fastidium confestim parit in-
tuentibus. Quàm immensa itaque est, ô Domine & Saluator mi, tua misericordia, qui non exhorrescis, etiamsi inter alia vasa electionis, ponatur in mensa tua vas corruptionis & putredinis, quo minus in eo & ex eo comedas. Et si enim nunc tua gratia mundatum est, remanet tamen in eo recens peccatorum memoria & pestilens odor, reliquæ, fæces, & vestigia, quæ difficulter ex anima eluuntur. Quomodo itaque tam benignè pateris, vt tale vas in mensam tuam inferatur, sitque hierotheca, in qua consecrata illa hostia recondatur. O Domine, tibi Angeli benedicunt pro tam immensa gratia, & pro tam infinita misericordia; pro tam excellenti opere, & pro tanto bonitatis tuæ argumento. Nemo iam amplius dubitat, sed fatentur omnes, te tui ipsius nunc maximè esse diffusiuum vel communicatiuū: cum vsq; adeò temetipsum humiliaueris, atq; omni iuri tuo lubens renūciaueris, tantū vt nobis benefaceres. Nūc abūdè satis liquet, quā-
tus sit amor tuus erga genus humanum. Charitas enim, vt ait Apostolus, non est

1 Cor. 13.

ambitiosa, nec querit quæ sua sunt; quia tu nō fastidis rem tā sordidam & immū-
dam, qualis est cor hominis peccatoris.

Sed quid tandem erit, si prædictis omnibus adiunxerimus illud, quod ad-

mirabile

mirabile hoc Sacramentum mihi prædicat, & in me operatur? O quantam lætitiā, & quā nouum gaudium parit mihi hoc mysterium? Confirmat me in nomine tuo, & contestatur mihi quòd Pater meus es, & non solum Pater, sed etiam dulcissimus Sponsus animę meę. Scio enim, Domine, proprium huius Sacramenti effectum, ob quem instituisti illud, esse sustētare & delectare animam spiritali quadam voluptate, & vnum quid eam tecum facere. Quod si ita sit, & ex operibus iudicetur cor; quod quæso cor est, de quo talia bona procedunt? Vnio enim vel copula propriè cōiugum est, nec dulci amplexuum obsequio domini fruitur seruus, nec filius patris, nisi paruulus is sit, tenellus, & vehementer à patre adamatus: sed sponsæ hæc propria sunt, cui oscula & amplexus sponsi debentur. Patris est non tantum ea procurare filio, quæ ad vitam sustentandam pertinent; sed etiam quæ ad æstimationem eius & honorem, quæ ad viuendi commoditatem & oblectandi se, recreandi quę facilitatem faciunt. Talis tantus quę amoris effectus, quantus hic est, mundo erat detegēdus; sed ad tuum aduentum, læti quę Euangelij tempus reseruabatur. Cum itaque in alijs Sacramentis & beneficijs tuis ostendas te Regem meum esse, te Saluatorem, Pastorem, Aduocatū, Medicū, Magistrum, Tutorem, Redemptorem, Defensorem,

& vt

& vt simul omnia dicam, te Dominum meum & Deum meum esse, in hoc tamen solo Sacramento (in quo supernaturali quodam modo animæ meæ coniungeris, vniris, & admirabili quadam voluptate eandem consolaris) apertissimè demonstras, te Sponsum meum & patrem meum esse, nec qualemcunque Patrem, sed talem, qui tenerrimè filium diligit: quemadmodum Iacob dilexit Benjamin, super omnes fratres illius. Illud mihi Sacramenti huius effectus testatur, hæc noua bona mihi annunciat. Non fallūt neque fucata sunt opera tua: sed quod foris pollicentur, intus habent & conferunt. Per hunc itaque effectum causæ bonitatem agnosco, per hoc opus cor tuum iudico, per humanam hanc tractationem tuam, perque benignam hanc tuam consolationem, in certissimam cognitionem amoris tui, quo me complecteris, deuenio. Quod enim beneficium maius, quam maiorem gratiam, quam amoris maiorem hac significationem potuisti mihi monstrare? O materia lætitiæ, ô fons voluptatis, ô vena virtutis, mors vitiorum, panis vitæ, medicina sanitatis, ignis amoris, resectio spiritualis, regale conuiuium, prelibatio totius felicitatis, satietasque cælestis. Quid itaque faciam Domine mi? quas gratiarum actiones tibi reddam? quo cum amore te diligam? Si enim tu tantus Dominus me vilissimum abie-

tissimumque vermiculum amare non
 dedigneris, quomodo ego te altissimū,
 ditissimum, nobilissimumque animæ
 meæ sponsum, non redamabo? Amabo
 itaque te Domine, desiderabo te, mandu-
 cabo te, & bibam te. O amoris dulcedo,
 ô inæstimabilis amor dulcedinis, man-
 ducet te anima mea, & omnia interiora
 mea dulcissimo suauitatis tuæ liquore
 impleantur. O charitas immensa Dei
 mei, ô dulce mēl, suaue lac, panis dele-
 ctabilis, cibus magnorum, fac me cresce-
 re in te, vt dignè possim exultare & gau-
 dere de te. O satietas & dulcedo volun-
 tatis meæ, ô amor & desiderium cordis
 mei, quare non totus ardeo amore tui
 inflammatus? quare non sum totus in-
 star candentis ferri in amorem trans-
 formatus, vt nihil aliud quæram, præter
 purum putum amorem? O ignis cæle-
 stis. O flamma dulcis. O suaue vulnus.
 O carcer voluptatis, quare catenis istis
 non sum compeditus? quare sagitta ista
 confossus non sum? quare igne isto non
 flagro, ita vt viscera mea in amore defi-
 ciant, & planè consumantur? Filij Adā,
 generatio cæca & errore multiplici flu-
 ctuās, quid facitis? quò properatis? quid
 quæritis? Si quærat is amorem, ecce hic
 amor est nobilissimus, dulcissimus, &
 super omnia, quæ in mundo sunt, vene-
 randus. Si quærat is voluptates, ecce hic
 voluptas suauissima, fortissima, & castis-
 sima. Si diuitias sectemini, ecce hic the-

sauros cæli, pretium mundi, pelagus omnium bonorum. Si honores ambiatis, ecce hic est Deus, & cum illo maiestas totius diuinitatis, quæ venit vt te ad æternos honores euehat.

MEDITATIO POST COMMUNIONEM tertia.

AD sacratissimam hanc mensam admissus, & in amplexibus tuis, dulcissime Domine, requiescens, tanta voluptate perfusus, & tot beneficiorum vinculis constrictus, super omnia verò diuino amoris philtro correptus, in posterum renūcio omni delectationi, & amoris externo, propter amorem hunc. Mundus amplius meus non erit. Voluptatibus carnis posthac frui nolo, pompam seculi, eiusque vanitatem non sequar amplius: procū faceffant à me omnia falsa illa & decipientia nos bona, solum verum illud & vnicum bonum apud me cōmorabitur. Qui enim manducat panem Angelorum, indignum est vt ille pabulo bestiarum vescatur. Qui in sedem animæ suæ recepit creatore ipsum, quid necesse vt creaturas etiam recipiat? Si mulier tenuis fortunæ, & ex infima plebe nata, Regi vel Magnati cuidam nupserit, actutum vilis eius habitus excutitur, ipsa mores, incessum, & gestus omnes humiles immutat, eaque assumit, quæ conueniunt eius gloriæ, cuius nunc coniunx est. Eodem modo si ani-

Idem ibidem.

Simile.

ma mea admirabili quodam matrimo-
 nio iuncta sit tantæ Maieſtati, diuino
 hoc Sacramento interueniente, quomo-
 do ſeſe ad priſtinam vilitatem poterit
 abiicere, humilisque & plebeia vite ve-
 ſtigijs inſiſtere? Quomodo poterit ha-
 bere ianuas cordis mundo, & his quæ in
 eo ſunt, apertas, qui ipſius mundi Crea-
 torem in ſe habet commorantem? Quo-
 modo locum dabit in anima ſua rebus
 prophanis, qui nunc totus conſecratus
 eſt & ſanctificatus præſentia diuina?
 Non admittit Salomon, vt filia Regis
 Pharaonis vxor ſua habitaret in ædibus
 ſuis, eò quòd arca Domini in illis ali-
 quamdiu ſeruata fuiſſet, licet iam aliò
 deducta, non eſſet ampliùs apud Salo-
 monem. Si ſapiens ille Rex noluit vt
 propria coniunx, & coniunx tanti no-
 minis, Regis Pharaonis filia, pedem in
 locum vbi arca ſteterat inferret; eò quòd
 Ethnica eſſet, & veræ veri Dei Religio-
 nis ignara: quomodo ego admittere po-
 tero, vt res prophanae & ſeculares cor-
 meum ſubeant, in quo Deus ipſe mora-
 tur? quomodo admittam cogitationes
 & deſideria hominum Ethnicorum ad-
 lectum, in quo Deus ipſe requieſcit? Que
 temeritas eſſet, ſi obſcœna & inhoneſta
 proferret lingua, per quam Rex Regum
 paulò antè ad me intrauit? Si idem Rex
 Salomon atrium templi, eò quòd holo-
 cauſtum & ſacrificium in illo feciſſet,
 ſanctificauerit, ne in poſterum res in illo

3 Reg. 7.

3 Reg. 8.

pro-

prophanæ tractarentur; quanto magis
erit rationi consentaneum, vt & anima
mea sanctificetur, ad quam nunc intra-
uit ille, quem omnia sacrificia & sacra-
menta legis antiquæ significabāt: Quia
verò hac benigna tua visitatione, Do-
mine, animam meam tam opulenter
ditasti, & honore tam celebri nobilita-
sti, tribue mihi quæso gratiam tuā con-
comitantem, cuius virtute & diuitias
illas, & honores potero conseruare. Tu
neminem soles honoribus impartire,
cui non etiam auxilium addis gratiæ,
quo cum honores illos tueri potest &
conseruare: proinde quoniam & me
honore præsentia tuæ dignatus es, obse-
cro te, sanctifica etiam me tua virtute, ne
fortè collatus mihi honor excidat. Sic
enim soles facere in omni loco, ad quem
ingrederis. Ingressus es virginalem vte-
rum sanctissimæ Matris tuæ, & quomo-
do inæstimabili gloria illam exaltasti,
sic etiam inæstimabilē gratiam illi con-
tulisti, quò gloriam istam tueretur &
conseruaret. Intraisti mundum hunc, vt
cum hominibus conuersareris, & quem-
admodum mundum tuo aduentu nobi-
litasti, ita & illum reparasti, atque illu-
minasti tua gratia. Ingressus es Infer-
num, & Infernū in Paradisum conuer-
tisti, beatos faciens tua gloria, quos ho-
noraueras tua visitatione. Denique cum
figura Sacramenti huius, quæ fuit arca
foederis, intrauit in domum Obededom,

2 Reg. 6.

Gethei, extēplò benedixisti Obededom, & omnē domū eius, volens hospitalitatem istā diuite p̄mio remunerare. Quia verò tuæ bonitati placuit, Domine, vile tectū animæ meæ subire, & ibidē diuersari, incipe quæso benedicere domui serui tui, & da mihi gratiā, vt honorē istum possim defendere, te dignum me faciens habitaculū. Placuit tibi Domine, vt ego essem quasi sanctum illud sepulchrū, in quo corpus tuū à morte fuit depositum: da mihi etiā habere omnes illius sepulchri proprietates, vt digno præstem obsequio id, cuius officium refero. Da mihi petrae firmitatem; da sudarium humilitatis, da myrrhae mortificationem qua cum appetitus meos prauos, & voluntatem rebellem occidam, vt tibi totus viuam. Placuit tibi vt essem quasi Arca fœderis, in qua tu habitasti: da mihi gratiam, vt quemadmodum pretiosissimum, quod in Arca fuit, monile Decalogi fuere tabulae, ita & in corde meo nihil sit prius, nihil antiquius, quàm sanctissimæ legis tuæ desiderium & meditatio. Tu voluisti mihi in hoc Sacramento ostendere, quòd Pater meus es; vt filium enim me tractasti, & non filium qualemcunque, sed eum qui tenerimē à patre suo diligitur. Da mihi gratiam precor, vt huic tanto beneficio dignè queam respondere, amando te non solum fortiter, sed dilectione tam tenera, vt omnia viscera mea intus liquefcat

amore

amore tui, & vt ad solam memoriam tui
nominis animus & cor meum deficiant.
Da mihi etiam spiritum & cor erga te
filiale, qui est spiritus obedientiæ, reue-
rentiæ, amoris & confidentiæ, vt in om-
nibus meis tribulationibus ad te con-
fugiam tanta cum fiducia & securitate,
quanta cum solet fidelis filius ad patrem
recurrere, quem plurimum amat. Et su-
per hæc omnia voluisti mihi palam in
hoc Sacramento denunciare amorem
Sponsi ad Sponsam, & tanquam Spon-
sus animam meam contrectare. Da ita-
que mihi Domine tale cor erga te, quod
amet te amore tam fideli, & forti, vt ni-
hil sit sub sole, quod me possit à te se-
gregare. Dulcissime Sponse animæ meæ,
extende brachia tua candida, & amore
casto plena, tam arctè me constringe, vt
nunquam neque in vita neque in morte
à te diuellar. Ad vnionem hanc forman-
dam diuinum illud Sacramentum insti-
tuisi; sciebas enim multo securius tuti-
usque creaturam in te, quàm in seipsa
manere: qui enim in te manet, manet in
Deo; qui verò manet in se, manet in de-
bili creatura. Aquæ gutta, quæ sola est,
& seorsim per se manet, breui tēpore sic-
catur & ab aëre absumitur: in mare verò
recidens, & manēs iuncta suo principio,
in suo statu manet, aut semper, aut diu-
tissimè. Abduc itaque me Domine à me-
ipso, & recipe me in te, in te enim viuo,
in me verò morior: in te sanus sum, in

Luc. 24.

Hier. 6.

Esa. 5.

me vero infirmus : in te stabilis sum & constans, in me vacillo, & tanquam fumus euanesco. Ne discedas à me, Domine, mane nobiscum, ô bone Iesu, quoniam ad uesperascit : inclinatur iam dies, & nox appropinquat, nō vna nox, sed multæ noctes : appropinquat enim nox mortis, nox mundi, nox peccati, nox tribulationis, nox tentationis, & nox solitudinis cum absentia diuinæ gratiæ. Omnes istæ noctes accelerant, vt irruant in nos, vt tenebris suis nos cooperiant ; ne deferas neque derelinquas nos fidelis Custos hominum. Ab omni parte lux nos destituit, charitas refrigescit, crescit malitia, & quid nobis restat Domine, si etiam à te deferamur : Væ nobis, ait Propheta, quia declinavit dies, quia longiores factæ sunt umbræ vesperi. Quia cum vera lux, quæ est cognitio Dei & verorum bonorum, fugit, & nos deserit, succedit confestim umbra falsarū & transitoriarum rerum, quæ magna videtur esse & digna, quam omnes meritò sectentur. Mane itaque nobiscum Domine, tu, qui es lux mundi, in qua singula qualia qualia sunt videntur, & cuiusque rei natura cognoscitur : ne fortè imitemur illos, qui malum dicunt bonum, & bonum malum : ponentes dulce in amarum, & amarum in dulce. Magna mihi profectò felicitas accedit hodie, qui te summum bonum in hospitium animæ meæ excepi, & in cubile cordis mei introduxi :

nunc

nunc enim optima mihi est occasio tecum secretè de rebus salutis meæ agere, audire tua consilia, & tua sequi decreta. Sed non immeritò turpissima notabor ignominia, si tantam commoditatem frustra mihi excidere patiar, aut intercipi. Non te relinquam Domine, tecum ego tota nocte luctabor: nec dimittam te, nisi benedixeris mihi. Muta Domine nomen meum, & da mihi nomen nouum, id est, spiritum nouum, cor & modum viuendi nouum; tange neruum femoris mei, & obstupe scat pes vnus altero incolumi, & integro permanente. Claudicet in me amor huius mundi, sano autem & integro pede stet amor tuus, vt extinctis & interfectis in me omnibus alijs amoribus, & desiderijs, te solum diligam, te solum desiderem, te solum cogitem, cum te solo permaneam, & in te solo habitem: tibi soli viuam, in te omnis voluntas & cogitatio mea firmetur, ad te in omni tribulatione mea confugiam, à te omne solatium & auxilium accipiam. Denique tu, Domine, semper esto meus, & ego semper sim tuus. Qui viuis & regnas Deus, per omnia secula seculorum. Amen.

Genes. 32.

ORATIONES ET GRATIARVM ACTIONES POST
Communionem.

ORATIO PRIMA.

M 5. Gratias

Granatēf.
ibid. ex D.
Thoma.

Gratias tibi ago Domine sancte Pater, omnipotens æterne Deus, qui me peccatorem indignum famulum tuum, nullis meis meritis, sed sola dignatione misericordiæ tuæ, satiare dignatus es pretioso corpore & sanguine filij tui, Domini nostri, Iesu Christi. Et precor, vt hæc sancta communio non sit mihi reatus ad pœnam, sed intercessio salutaris ad veniam: sit mihi armatura fidei, & scutum bonæ voluntatis: sit victorum meorū euacuatio, concupiscentiæ & libidinis exterminatio, charitatis & patientiæ, humilitatis & obedientiæ augmentatio: contra insidias inimicorum omnium tam visibilium, quàm invisibilium firma defensio: motuū meorum tam carnalium, quàm spiritualium perfecta quietatio: in te vno ac vero Deo firma adhæsiō, atque finis mei felix consummatio. Et precor te, vt ad illud ineffabile conuiuium me peccatorem perducere digneris, vbi tu cum filio tuo, & Spiritu sancto, Sanctis tuis, es lux vera, satietas plena, gaudium sempiternum, iucunditas consummata, & felicitas perfecta, per Christum Dominū nostrum. Amen.

ORATIO SECVNDA

post Communionem.

Borch. in
suo En-
chiri d. ex
D. Thomæ

Gratias ago Domine Iesu Christe, Rex Regum, & Dominus dominantium, reuerentiæ ac immensæ Maiesta-

ti tuæ, qui sacro corpore & pretioso sanguine tuo animam meā nimis aridam, dulciter reficere dignatus es. Rogo te, vt quicquid in me vitiosum, tuæque sanctissimæ voluntati contrarium inuenitur, communione huius Sacramenti funditus euacuetur: vt cor meum dignum habitaculum Spiritus sancti præparetur. Sitque mihi dulcissime Iesu hoc sacrosanctum corporis & sanguinis tui Sacramentum impetratio veniæ, medicina vitæ, stabilimentum gratiæ, memoria sacratissimæ passionis tuæ, viaticum peregrinationis meæ, suauitas & dulcedo animæ meæ, salus & sanctitas in tentatione, pax & gaudium in omni tribulatione, lumen & virtus in omni verbo & opere, solamē & tutela finalis in morte. Sic immuter palatum cordis mei, vt præter te nullam vnquam sentiat dulcedinem, nullam amet pulchritudinem, nullum quærat amorem, nullam desideret consolationem, nullam admittat vnquam delectationem, nullum curet honorem, nullamque timeat crudelitatem. Amen.

ORATIO POST SACRAM

Synaxin tertia.

TRansfige dulcissime Domine Iesu medullas & viscera animæ meæ suauissimo ac saluberrimo amoris tui vulnere, verā, serenaque & apostolica sanctissima charitate, vt langueat & liquefi-

D. Bona-
uentura.

at anima mea solo semper amore & desiderio tui : te concupiscat, & deficiat in atria tua ; cupiat dissolui, & esse tecum. Da vt anima mea te esuriat panem Angelorum, refectionem animarum sanctarum, panem nostrum quotidianum supersubstantialem, habententem in se omnem dulcedinem & saporē, & omne delectamentum suauitatis : te in quem desiderant Angeli prospicere semper esuriat & comedat cor meum, & dulcedine saporis tui repleantur viscera animæ meæ : te semper sitiāt fontem vitæ, fontem sapientiæ & scientiæ, fontem æterni luminis, torrentem voluptatis, vberitatem domûs Dei : te semper ambiat, te quærat, te inueniat, ad te tendat, ad te perueniat : te meditetur, te loquatur, & omnia operetur in laudem & gloriam nominis tui cum humilitate & discretione, cum dilectione & delectatione, cum facilitate & affectu, cum perseuerantia vsque in finem ; & tu sis solus semper spes mea, tota fiducia mea, diuitiæ meæ, delectatio mea, iucunditas mea, gaudium meum, quies & tranquillitas mea, pax mea, suauitas mea, odor meus, dulcedo mea, cibus meus, refectio mea, refugium meum, auxilium meum, sapientia mea, portio mea & possessio mea, thesaurus meus, in quo fixa & firma & immobiliter semper sit radicata mens mea, & cor meum. Amen.

ORATIO POST COM-
munionem quarta.

Domine mi Iesu Christe, qui verus es Deus, & homo verus, qui que me hodie tot & tantis beneficijs cumulasti, vt qui mihi omnia mea peccata per merita sanctissime passionis tuæ, virtutem que Sacramenti Pœnitentiæ (hoc enim immota fide & spe firmissima credo) condonasti, quin & participem me fecisti pretiosi corporis & sanguinis tui in sacrata illa hostia, quam mox de manu Sacerdotis licet indignus, & absque vllis meis meritis accepi: te oro per infinitam tuam bonitatem & misericordiã tuam, per que omne id quod es, vt non respiciens ad peccata mea præterita, in tua me gratia, tuoque cultu & obsequio conserues. Da mihi Domine virtutem, vt possim obedire mandatis tuis, ea que obseruare non segius, quam obseruari vis & præcipis.

Tibi supplico Domine, vt gratiam mihi concedas, ne ad peccata mea antiqua tanquam canis ad vomitum reuertar: etsi credere & confidere non desinã, quin mihi tanquam verus Pater misericordiarum, & Deus totius consolationis toties per merita sanctissimæ tuæ passionis ignosces peccata mea, quoties cum vera contritione ad te conuersus fuero.

Te glorifico, te laudo, tibi Domine quas possum gratias ago, etsi non eas

Francis.
Euia. habetur lib.
4 de Meditat. &
orat. Granatens.

possim quas debeo, & quas tua postulat magnificētia. Optarem igitur vt omnes huius mundi creaturæ mecum tibi infinitas redderent gratias, pro beneficijs tuis præteritis & præsentibus, quibus me onerasti, & pro ijs omnibus, quæ adhuc de manibus tuis expecto, tam in hac vita, quàm in illa futura. Sit Domine sanctissimū illud, quod suscepi, Sacramentum mihi non ad supplicium, aut maiorem damnationem, sed cedat in salutem & meritum. Sit mihi meorum peccatorum remissio, sit animæ meæ purificatio. Sit mihi robur, sit virtus, sit remedium contra omnia vitæ huius pericula: sit infirmitatis meæ fortitudo, sit mihi contra tentationes omnes propugnaculum, ne mundus, ne caro, ne Diabolus se aduersum me præualuisse gloriatur: tua enim gratia, tuoque subsidio munitus eos facillimè superare potero.

O Deus meus, ô misericordia mea, & omne bonum meum: ô vita & satietas animæ meæ, me tibi commendo, me tuis manibus deuoueo; sub vmbra alarum tuarum volo nunc, & toto vitæ meæ tempore, vsque ad extremum mortis articulum suauiter quiescere: credens firmiter, quidquid credit mater Ecclesia, peccatorumque meorum iugiter à te petens remissionem. Oro præterea & inuoco gratiam sacratissime Virginis Matris tuæ, omnium beatorū Angelorum, omniumque Sanctorum, & quæ sunt in

illa

illa cælesti curia Sanctarum, vt pro me
orent, mihi patrocinentur, pro me inter-
cedant : vt beneficium hoc ineffabile,
quod tu mihi hodie Redemptor mi præ-
stitisti, ad inæstimabilem, diuinumque
hunc cibum me admittens, vtile mihi
sit & salutare : Sed & robur conferat ta-
le, quale olim contulit Helix panis ille
subcineritius : vt in fortitudine cibi illi-
us ambulem, & sine periculo perueniam
ad montem tuæ gloriæ, ibique cælesti &
perenni tuo fruar conuiuio ; quod tu
Domine cum omnibus Sanctis tuis si-
ne fine celebras in abundantia tuæ sua-
uitatis, & in multitudine gloriosissima-
rum, dulcissimarumque dapum tuarum,
quæ fastidium pariunt nullum. Vbi tu
Domine fons es gratiarum cunctos ine-
brians, purissima sanctitas omnes san-
ctificans, lux serenissima omnes illumi-
nans. Vbi tu es gaudium perfectum, fe-
licitas vera, & gloria sempiterna, vi-
uens & regnans per omnia se-
cula seculorum.

Amen.



CAPVT SEXTVM,
CONTINENS ORATIO-
NES, QVIBVS SACERDOTES
ante & post Missarum solen-
nia vti possunt.

Laurent.
Iustinia-
nus ser-
mone de
Corpore
Domini.

MAGNA prorsus & admiranda est Sacerdotum dignitas, maxima est illis collata potestas: sua namque prolatione eloquiorum celestium, & ad eorum penè libitum corpus Christi de panis transubstantiatur materia: descendit de caelo in carne Verbum, & altaris verissimè reperitur in mensa. Hoc illis prerogatum est ex gratia, quod nusquam datum est Angelis. Assistent Deo, illum contrectant manibus, tribuunt populis, in seque recipiunt. Quamobrem rectè colligitur, quantum veneratione ibi debeat astare Sacerdos, cui consecrandi hostias, offerendi incensum, atque intercedendi pro populo est impensa auctoritas. Et quia Angelorum siue astantium, siue ministrantium vice funguntur, potius angelicam, quam humanam debent habere conuersationem. Accedat igitur sacerdos ad altaris tribunal, ut Christus; assistat, ut Angelus; ministret, ut sanctus; populorum offerat vota, ut Pontifex; interpellet pro pace, ut mediator; pro se autem exoret ut homo. Que au-

tem vitæ puritas in huiusmodi sacerdote requiritur: idem Iustinianus multis paginis docet, in eodem sermone. Breuior est D. Ambrosius, cuius hæc sunt verba.

Separauit Dominus sacerdotes à populo; & postea ipsum Moysen intra nubem introire præcepit: vides diuisiones? Nihil in sacerdotibus plebeium requirit, nihil popolare, nihil commune cum studio atque usu & moribus inconditæ multitudinis. Sobriam à turbis grauitatem, seriam vitam, singulare pondus dignitas sibi vendicat sacerdotalis. Quomodo enim potest obseruari à populo, non dispar à multitudine? Quid enim in te miretur, si sua in te recognoscat? si nihil in te aspiciat, quod vltra se inueniat? si quod in se erubescit, in te, quem reuerendum arbitratur, offendat?

Vt ergo ministri altaris conscientia libera atque sincero corde assistant Altissimo, apostolica exhortatione admoniti, introrsus redeant, se statuam ante se, ac diligentissimè probent: mentis detergant, si quas inuenerint, maculas; deplorent facinora. ardeni desiderio in spiritualibus die noctuq; insudent profectibus, orationi vacent, delectentur in Domino, Deo libentiùs famulentur, quàm seculo: spiritui potiùs intendant, quàm carni. sint pudici corpore omni tempore, sint corde humiles, sint conuersatione sancti, sint temporalium contemptores facultatum, & à terrenorum

Ambros.
epist. 1. ad
Irenæum.

solicis

solicitudine liberis; quatenus Deo expeditius vacent, atque sacramentalis panis sumptione digni sint. Quæ omnia cum ardua sint, carniq; & sanguini difficilia, assiduus precibus atque orationibus à Deo petantur.

ORATIO ANTE SACRIFICIUM Missæ, qua sacerdos suam indignitatem confitetur.

Ex Liturgia B. Iacobi Apostoli.

Peccatorum meorum multitudinem iniquitatum ne me spreueris Domine Deus noster. Ecce enim accedo ad diuinum hoc & supercæleste mysterium tuum indignus quidem, sed de tua bonitate confusus: emitto tibi vocem, Deus sis mihi peccatori propitius: peccaui in cælum, & coram te, neque dignus sum, qui oculos obuertam huic sacræ ac spirituali mensæ, in qua vnigenitus filius tuus, & Dominus noster Iesus Christus mihi, qui peccator sum, & omnibus maculis labefactus, mysticè proponitur in sacrificium.

Proinde hanc orationem & gratiarum actionem tibi offero, vt mihi Spiritus tuus paracletus mittatur, fortificans ac instaurans me ad hanc Missam, dignumque me habe, vt actionem hanc sacram pro populo citra meam damnationem peragam, in Christo Iesu Domino nostro, cum quo benedictus es, vnà cum omnibus modis sancto, & bono, & viuificatore atque consubstantiali tibi Spi-

ritu,

ritu, nunc & semper, & in secula seculorum. Amen.

SACERDOTIS ORATIO

pro suis peccatis, qua D. Basilus celebraturus uti solebat.

Sacerdos magne, ac religiosorum Domine, Christe Deus noster, qui te ipsum obtulisti genitori tuo hostiam piacularem, placasti que per sacrificium (quod ipse eras) Patrem tuum humanitati nostre offensum, supernaque cum infernis consociasti, ac pacem nobis omnibus per proprium tuum sanguinem donasti. Tu rerum omnium Domine sustine quæso per misericordiam, expiationem que tuam, infirmitatem meam, qui nunc coram te consisto. Neque Domine ob respectum foeditatis animæ meæ expertem reddas populum tuum sanctificationis Spiritus sancti tui, aut propter conscientiam meam impuram Domine illum non negligas, vel non exaudias. Ne obsecro Domine detesteris victimas eorum, qui tuum nomen profitentur, ob iniqua facinora quæ patrarunt manus meæ. Ne obsecro Domine respexeris me impurissimum peccatorem, meæque causa iratus sis populo tuo.

Ne memineris Domine turpium sermonum quos ex meo ore protuli, ut non exaudias preces meas, quæ abs te misericordiam flagitant pro Ecclesia tua, quæ modò coram te conuenit. Sed inclina,

Translata
ex Syrico
per Andre
am Masi-
um.

Do

Domine, aurem tuam, atque audi petitionem meam. Parce prauitati meæ; elue maculas peccatorum meorum, exterge sordes cordis mei, emunda mentem meam ab omni putredine delictorū. Constitue Domine custodiam ori meo, & animo meo, ne loquantur labra mea verba nugatoria, scurrilæ, aut derisione, detractiōneque plena. Ne occuper cogitationibus turpibus & impuris, quæ aut vigilantī aut dormienti mihi obrepant.

Contine mentem meam in metu iudicij tui formidabilis, quod in tuo aduentu secundo exercebis: in quo mortales omnes examinandi sunt: neque operam det vanarum rerum recordationi, aut improbo studio teneatur: sed concede mihi Domine, vt mundus, purusque animo & corpore efflagitem, atque consequar cum mihi ipsi, tum vniuerso gregi tuo, qui purè nunc coram te congregatus est, misericordiam atque clementiam. Pro cunctis autem gratijs, beneficijsque tuis, quæ nobis exhibita sunt, laudem & gloriam offeramus tibi, & Patri tuo, qui te misit nobis Redemptorem, sanctoque tuo Spiritui nunc, & semper, & in secula secula seculorum. Amen.

ORATIO ANTE MISSAM,

*in qua Sacerdos intentionem suam Deo explicat, peccata confitetur, veniamque sibi
& gratiam proximis petit.*

Borckēsis
in Enchi-
ridio.

ECCE benignissime Domine Iesu
Christe, fili Dei viui, ego indignus
peccator memor tam inestimabilis cha-
ritatis tuæ, quā humano generi exhibu-
isti, quando nascens ex Maria Virgine
homo fieri voluisti. exemplo sanctissi-
mæ conuersationis tuæ, & verbo prædi-
cationis viam æternæ salutis nos docu-
isti, innumeros labores & iniurias pro
nobis pertulisti; multa dura etiam atque
indigna passus, crucifixus, & mortuus
es, vt ab æterna morte redimeres nos.
Insuper vulneratus lancea militis tu-
um pretiosum sanguinem copiosè in re-
missionem & ablutionem peccatorum
meorum de tuo piissimo latere effudisti.
Qui etiam ad perpetuam tantæ charita-
tis memoriā in coena tua vltima, transi-
turus de hoc mundo ad Patrem, venera-
bile & salutiferum tui corporis Sacra-
mentum instituisti, & in eodem Sacra-
mento teipsum cibum & potum saluta-
rem animarum nostrarum nobis præ-
parasti, & sumendum imperasti, dicens;
Accipite & comedite ex hoc omnes. Sed
& qui ipsum venerandū Sacramentum
per famulos tuos presbyteros in altari
quotidie confici, & in eodem Sacramen-
to tuipse per mysteriū pro nobis iterum
pati, & manibus eorundem presbytero-
rum per singulos dies pro salute nostra,
in tui memoriam offerri voluisti.

Tantæ ergo dilectionis tuæ memor
intendo facere, quod tu Domine fecisti

tunc,

tunc, & à nobis famulis tuis presbyteris fieri præcepisti : & quod Ecclesia tua, te auctore, fieri instituit : volens scilicet te cooperante consecrare seu conficere corpus & sanguinem tuum, & offerre te Dominum Deum & Saluatorem meum cum apertis & defluentibus vulneribus tuis Deo patri tuo, tibi que & Spiritui sancto, in memoriam pijsimæ mortis tuæ, imò omnium amarissimorum dolorum tuorum, corporalium & spiritualium, quos pro nobis miseris redimendis, & inflammandis ab instanti conceptionis tuæ in utero Virginis matris tuæ, usque ad mortem crucis magnis ardoribus, amore nostro crebrius sustinuisti. In memoriam insuper gloriosæ resurrectionis tuæ, & admirabilis ascensionis ; ad gloriam & honorem summæ Trinitatis ; ad venerationem & congratulationem benedictæ matris tuæ, totiusque curiæ cælestis ; pro gratiarum actione omnium beneficiorum tuorum, pro contritione, pœnitentia & satisfactione omnium peccatorum ab origine mundi commissorum, & pro pace & salute Ecclesiæ tuæ sanctæ militantis viuentium & defunctorum.

Accedo ergo licet indignus ad altare tuum sanctum Domine, ubi etiam te miserante recipere cupio Dominum Deum & Saluatorem meum, in tui memoriam, & infirmæ animæ meæ medicinam. Qui es prædulcissimus cibus & potus dilectissimus sanctissimæ matris tuæ,

san-

sanctorū quoque Angelorum tuorum,
ac omnium beatorum.

Sed confiteor tibi Domine Iesu Chri-
ste, & benedictæ matri tuæ semper vir-
gini Mariæ, sancto Angelo meo, ac o-
mnibus supernorum Spirituum ordini-
bus, sancto Ioanni Baptistæ, sanctis Apo-
stolis, Euangelistis, Martyribus, Confes-
soribus, Virginibus, & omnibus Sanctis
tuis, quod nequaquam dignus, heu, ne-
quaquam præparatus sum suscipere te
agnum Dei immaculatum in tam im-
mundum & prophanum cordis & cor-
poris mei hospitium, propter innumera
peccata mea, quibus te Dominum Deum
meum à pueritia mea, vsque nunc ad
iracundiam prouocaui, & meam con-
scientiam pollui & grauavi.

Peccaui, heu, contra mandata tua
multipliciter, ea transgrediendo. Pecca-
ui, heu, contra Sacramēta Ecclesiæ mul-
tipliciter, ea indignè sumendo, tractan-
do & ministrando : & contra omnia iu-
ra & maiorum meorum instituta varijs
modis agendo. Peccaui, heu, multiplici-
ter contra professionem & ordinem me-
um, & contra vota monastica corde, ore,
opere & omissione. Confiteor tibi Do-
mine, quod interiora & exteriora mea à
planta pedum meorum, vsque ad verti-
cem capitis mei, varijs iniquitatibus &
peccatis multipliciter inquinata sunt, &
foedissimis turpitudinibus respersa. Ad-
huc confiteor tibi Domine, & grauiter

me

me coram te accuso, quòd de his omnibus peccatis commissis vel omissis in te, in proximum, aut in meipsum nō tantum ex toto corde contritus nō sum, sed nec ea debite confessus, nec condigna pœnitentia pro illis satisfeci.

At te, indulgentissime Domine, qui venisti populum tuum saluum facere à peccatis eorum, cui proprium est misereri semper & parcere, qui dixisti ore tuo benedicto; Petite & accipietis: qui misertus es Dauid adulterantis, & occidentis; Petri Apostoli te negantis, & amare flentis; Mariæ Magdalenaë tuos benedictos pedes suis lachrymis rigantis, & latronis serò pœnitentis: qui mulierem in adulterio deprehensam condemnare noluisti, qui innumeris peccatoribus te humiliter inuocantibus peccatorum veniam præstitisti; te, inquam Domine, contrito & humili corde oro, vt me tam indignum peccatorem non spernas propter multitudinem & magnitudinem meorum peccatorum: sed propter infinitum meritum totius crucifixæ vitæ tuæ, ac propter merita & preces benedictæ Matris tuæ, & omnium Sanctorum omnia peccata mea, quibus iram promerui, mihi misericorditer dimitte: & fac me tuum Sacramentum tam deuotè tractare, & sumere, vt consequi merear virtutem declinandi à peccatis, & gratiam sectandi quodque rectum est in conspectu tuo faciendi.

Pacem

Pacem veram & finem bonum, tuæ protectionis consilium & auxilium mihi tribue. Post hanc verò miseram vitam fac me participem tuæ redemptionis. Insuper misericorditer respicere digneris illos & illas, pro quibus te specialiter offerre propono, vt bonos confirmes, malos ab errore reuoces, afflictos consoles, tentatos eripias, discordes in bono concordēs, purgandos à purgatorio liberes, & omnes fideles adhuc viuentes in viam salutis æternæ dirigas, ac omnibus fidelibus defunctis, pro quibus orari velis, requiem & lucem perpetuam tribuas. Qui viuis & regnas Deus per omnia secula seculorum. Amen.

ALIA ANTE MISSAM.

DEus qui de indignis dignos, de immundis mundos, de peccatoribus iustos facis, munda cor & corpus meum ab omni sorde & cogitatione peccati, & fac me dignū sacris altaribus ministrū, & concede propitius, vt in hoc altari, ad quod indignus accedo, hostias acceptabiles offeram pietati tuæ, pro peccatis & offensionibus meis, & pro omnibus fidelibus Christianis, & omnibus circumstantibus, omnibusque mihi familiaritate, vel consanguinitate coniunctis; omnibusque, qui mei memoriam in suis continuis orationibus habent: vt per eum sit tibi acceptabile meum votum, qui se tibi obtulit in sacrificium, Iesus

Idem ibidem.

Christus Dominus noster. Amen.

A L I A.

DEus qui non mortem, sed poenitentiam desideras peccatoris, me miserum fragilemque peccatorem à tua pietate non repellas, neque aspicias ad peccata & scelera mea, & immundas turpesque cogitationes, quibus flebiliter à tua disiungor voluntate; sed ad immensas misericordias tuas, & ad fidem, deuotionemque eorum, qui per me tuam expetunt misericordiam. & quia me indignum medium inter te & populum tuum fieri voluisti, fac me talem, vt possim dignè tuam exorare misericordiam, pro me peccatore, & pro eodem populo: & adiunge voces nostras vocibus Angelorum tuorum, vt sicut illi te laudant incessabiliter & infatigabiliter in æterna beatitudine, ita nos quoque eorum interuentu te mereamur inculpabiliter laudare in hac peregrinatione, Iesu Christe, qui viuis & regnas Deus per omnia secula seculorum. Amen.

Preparationem ad Missam habet Sacerdos in Diurnali Romano ex decreto Concilij Tridentini edito, circa finem.

O R A T I O N E S D I C E N D Æ
cum Sacerdos induitur sacerdotalibus paramentis pleræq; ex eodem Diurnali.

Cum

Cum lauat manus.

DA Domine virtutem manibus meis
ad abstergendam omnem maculam,
vt sine pollutione mentis & corporis
valeam tibi seruire: Per Christum Do-
minum nostrum. Amen.

Ioannes
Faber.

Ad amictum seu Humerale.

Impone Domine capiti meo galeam
salutis, ad expugnandos diabolicos
incurfus: Per Christum Dominum no-
strum. Amen.

Ad Albam.

Dealba me Domine, & munda cor me-
um, vt in sanguine Agni dealbatus
gaudijs perfruar sempiternis.

Ad Cingulum.

Præcinge me Domine cingulo puri-
tatis, & extingue in lumbis meis hu-
morem libidinis, vt maneat in me vir-
tus continentiae & castitatis.

Ad Manipulum.

Merear Domine portare manipulum
fletus & doloris, vt cum exultatione
recipiam mercedem laboris.

Ad Stolam.

Redde mihi Domine stolam immor-
talitatis, quam perdidisti in præuari-
catione primi parentis: & quamuis in-
dignus accedo ad tuum sacrum mysteri-
um, merear tamen gaudium semper-
num.

Preparando calicem dicat

Ex Missa-
li Colo-
nienfi.

IN nomine Patris, & Filij, & Spiritûs
sancti. Amen.

Infundendo vinum.

Sanguis exiuit de latere Domini no-
stri Iesu Christi,

Infundendo aquam.

ET aqua in remissionem peccatorum.
Fiat hæc commixtio vini & aquæ
pariter in nomine Patris, & Filij, & Spi-
ritus sancti. Amen.

Oremus.

DEus qui humanæ substantiæ digni-
tatem mirabiliter condidisti, & mi-
rabilius refecisti, da quesumus per huius
vini & aquæ mysteria eius diuinitatis
nos esse consortes, qui nostræ humani-
tatis fieri dignatus est particeps, Iesus
Christus Dominus noster. Qui tecum
viuit & regnat &c.

Ad Casulam.

Indue me Domine ornamento humi-
litis, pacis, & charitatis: & concede
mihi protectionem contra hostem insi-
diatorem, vt vndique munitus atque
protectus virtutibus possim resistere vi-
tijs & hostibus.

LAVDES POST MISSAM
HABENTVR IN DIVRNALI

Romano, circa finem.

ORATIO SACERDOTIS

post Missam I.

Iam

I Am dulcissime atque amantissime Ie- Boikenfis
su vnica spes salutis meæ nullatenus in Enchi-
tibi dignè regratiari possum, de vniuer- ridio.
fis beneficijs mihi impensis. Ago autem
gratias humiles tibi clementissime De-
us, quòd me dulcissimo corpore, & pre-
tiosissimo sanguine tuo reficere volui-
sti. Gratias tibi ago misericors Deus,
quòd me ad officium sacerdotale elegi-
gisti, & rogo te Domine Iesu Christe, vt
remittas mihi vniuersas negligentias
meas, & omnia errata mea: parce &
remitte mihi propitiabilis Deus, quòd
sanctissimum corpus & sanguinem tu-
um tractaui & sumpsi tam irreuerenter
& indeuotè. Parce quæso benignissime
Deus, & remitte omne quod in hac Mis-
sa tam in dicendis, quàm in agendis va-
nis seu vagis cogitationibus transui in-
cautè seu negligenter.

Eia deprecor te misericors Deus, vt
tibi hoc sacrificium gratum sit & acce-
ptum, quod obtuli in honore nominis
tui, & gloriosæ virginis & matris Ma-
riæ, atque ad honorem sancti N. & san-
ctæ N. omniumque electorum tuorum,
pro viuorum & mortuorum salute. Da
igitur mitissime Deus viuis omnibus
gratiam & misericordiam, defunctis re-
quiem & veniam, Ecclesiæ tuæ pacem
& concordiam, nobis autem miseris pec-
catoribus hîc ambulanti bus fidem re-
ctam, spem firmam, charitatem perfe-
ctam, & tandem vitam consequi sempi-

ternā. Qui viuis & regnas Deus per &c.

ALIA GRATIARVM

actio post Missam II.

Ex tabel-
la manu-
scripta.

Gratias tibi ago Domine pijsime, quod me ad officiū sacerdotale elegisti. Gratias tibi ago dulcissime Deus, quod me tuo dulcissimo corpore & sanguine refecisti. Gratias tibi ago Dñe clemētissime, pro deuotione, qua me in hac Missa spiritualiter respexisti. Gratias ago tibi benignissime Deus, quod me protegēdo à periculosīs negligētijs custodijsti.

Mi Domine Deus, ecce pro tā gratissima electione, pro tā dulcissima refectiōe, pro tā pijsima respectiōe, pro tam benignissima protectione & custodia tibi optime Deus ex toto corde gratias ago, te benedico, te laudo, te glorifico in æternū. Eia nūc oro pijsime Deus, vt sit mihi hoc dulcissimū sacramentum contra omniū peccatorum meorum vulnera efficacissimū medicamentū. Sit mihi benignissime Deus hoc dulcissimū sacramentū omnis virtutis & gratie victoriosissimū complementū. Sit mihi pijsime Deus hoc suauissimum sacramentū tam in vita, quā in morte cōtra omnia pericula validissimū tutamentum. Sit mihi dulcissime Deus hoc amoenissimum sacramentum ad eternam beatitudinem solidissimum fulcimētum. Mi Domine Deus, per sumptā queso Eucharistiam da mihi, vt à peccatis emūdatus, merito fecundatus, sine bono consummatus, tecū

in

in perpetuum sim beatus: Cui est honor
& gloria in secula seculorum. Amen.

ORATIO SACERDOTIS

post Missam III.

OMnipotens sempiterne Deus, qui me peccatorem sacris altaribus astare voluisti, & sancti nominis tui laudare potentiā: tuam deprecor clemētiam, vt per ea quæ sumpsi perpetuæ salutis sacramēta me famulū tuū, licet indignum, interuentu sanctę Dei genitricis Marię, & omniū electorum tuorū, à cunctis iniquitatibus meis propitius emundes, atque ab omnibus aduersitatibus protegas, & æternę felicitatis confortem efficias.

Ex Missali Coloniensi.

Famulos etiā & famulas tuas, qui mihi cōsanguinitatis, familiaritatis, commēdationis, confessionis, vel dilectionis vinculo innectūtur, viuos & defunctos, quorum nomina tibi viuunt, pro quibus misericordiam tuam exoro, precibus omniū sanctorum tuorū à cunctis iniquitatibus exuas, & ad sempiterna promissa perducas. Per Dominum nostrum &c.

ORATIO SACERDOTIS

post Missam dicenda IIII.

ET si Angelicā puritatē, & S. Ioannis Baptistę sanctitatē haberē, ô Domine Iesu, fateor nequaquā dignus essem sacris altaribus tuis astare, manibus meis te Deū meū contrectare, & pollutis labijs meis sumere: tamē, ô Dñe, quod meis nō debebatur meritis, id vltro tua donauit gratia: sanctissima nāq; carne tua de virgi-

Ex variis locis libri 4 de Imitat. Christi Cāpen- sis collecta.

ne sumpta me satiasti, & sanguine tuo
 purpureo me inebriasti. Metuebam qui-
 dem ad te venire, sed variæ me ad hoc
 necessitates meæ impellebant. Pro reme-
 dio namque ad te accessi, pro consolati-
 one & refrigerio te deprecatus sum. Ad
 omnia scientem locutus sum, cui mani-
 festa sunt omnia interiora mea, & qui
 solus potes me perfectè consolari & ad-
 iuuare. Tu scis quibus bonis indigeo
 præ omnibus, & quàm pauper sum in
 virtutibus.

Ecce sto ante te pauper & nudus gra-
 tiam postulans, & misericordiam im-
 plorans. Refice esurientem mendicum
 tuum, accende frigiditatem meā amore
 ignis tui, illumina cæcitatem meā clari-
 tate præsentiae tuæ. Verte mihi omnia
 terrena in amaritudinem, omnia graua
 & contraria in patientiam, omnia infir-
 ma & creata in contemptum & obliui-
 onem. Erige cor meum ad te in cælum,
 & ne dimittas me vagari super terram.
 Ex quo enim te gustavi omnia interio-
 ra mea incredibili dulcedine perfusa
 sunt: ne deseras me Domine, quia tu es
 cibus meus & potus meus; tu amor me-
 us & gaudium meum; tu dulcedo mea
 & totum bonum meum. Tua me præ-
 sentia vtinam accendas, comburas, & in
 te transmutes, vt vnus tecum spiritus ef-
 ficiar.

Accipe hæc vota mea Domine Deus
 meus, desideriaque infinitæ laudationis

& im-

& immensæ benedictionis, quæ tibi secundum multitudinem magnitudinis tuæ debentur, in me adauge. Hæc enim tibi reddo, & reddere desidero per singulos dies, & momenta temporum: atque ad reddendum mecum tibi gratias ac laudes omnes cælestes spiritus, & cunctos fideles tuos precibus & affectibus inuito & exoro. Laudent te vniuersi populi, tribus, & linguæ; sanctum ac mellifluum nomen tuum cum summa iubilatione & ardenti deuotione magnificent, dicentes; Magna & mirabilia sunt opera tua Domine Deus omnipotens: iustæ & veræ sunt viæ tuæ Deus Rex seculorum: tibi benedictio, & honor, & gloria, & potestas in secula seculorum. Amen.

Apoc. 15.

Apoc. 8.

CAPVT SEPTIMVM, QVO CONTINENTVR

orationes pro impetrando
amore Dei.

PROLOGVS.

PERFECTIONEM vitæ Christianæ, ad quam p̃j omnes certatim (eisi non paribus passibus) contendunt, in amore Dei consistere, communis omnium est Theologorum sententia: quamobrem Paulus quodam loco Charitatem vocat, vinculū perfectionis;

Colos. 3.

1 Tim. 1.

et alio in loco, finem legis. Tunc enim res est in sua perfectione, quando ad suum peruenit terminum, finemq; vltimum, ad quē creata est. Cum verò vltimus finis, et quasi centrum rationalis creaturæ Deus sit, in quo solo inuenitur omne id, quod vel intellectus humanus capere, vel voluntas potest amare, vel appetere: consequens est, in amore Dei, vel charitate, hominis perfectionem consistere: cuius officium est vnire hominem cum Deo per amorem, vnumq; cum Deo efficere, vt testatur Eu-

1 Ioan. 4.

angelista, cum dicit: Deus charitas est, & qui manet in charitate, in Deo manet, & Deus in eo. Quo igitur quis in amore Dei perfectior, eò et sanctior est.

Generatur hæc virtus in anima Christiani hoc modo: Deus initio immittit in animam certam et perfectam suæ bonitatis, suauitatis, nobilitatis et c. cognitionem; quam homo per experientiam probat, et quasi manibus palpat. Ex hac cognitione gignitur ardens voluntatis inflammatio: ex inflammatione hac admirabilis quedam delectatio: ex delectatione ardentissimum desiderium: ex desiderio noua satietas; ex satietate ebrietas, et ex illa securitas atque perfecta quies in Deo, quo cum anima spiritali suum celebrat Sabbatum.

Incredibilis huius virtutis itaque dignitas est, quam nullus mortalium aut eloqui, aut de-

scribere

scribere potest. Si quis autem in ea enarranda dignam aliquam operam prastiterit, is certe Granatensis noster est; vt patet initio libri septimi Memorialis vitæ Christianæ, & Appendicis primæ, capite primo: quibus duobus integris libris agit de dignitate, prærogatiuis, & admirandis eius effectibus: docet item quæ eius cognata, quæ contraria, quibus meditationibus desiderium eius in animabus nostris accenditur, & quibus orationibus à Deo impetratur.

Sunt enim due viæ, quæ nos ad amorem diuinum adducunt: quarum prima vocatur scholastica, cum scilicet consideramus cuncta, quæ nos amore diuino possunt inflammare: qualia sunt beneficia, perfectionesq; Dei: altera dicitur mystica, cum scilicet orationibus ardentissimis, inflammatoq; desiderio caeleste hoc donum à Deo petimus. Ad priorem illam viam pertinent variæ meditationes de beneficijs & perfectionibus Dei, quales plurimæ inueniuntur apud Granatensem libro primo de Oratione & meditatione: libro 6 Memorialis, & in Appendice posteriori. Iuuare quoque hæc possunt orationes due priores capituli harum precum sequentes: & quæ toto capite decimo traduntur gratiarum actiones. Ad posteriorem viam spectant orationes sequentes, ex eodem Auctore desumptæ.

ORATIO PRIMA PRO

amore Dei impetrando.

Granatēf.
lib. 7 Me-
morialis
vitę Chri-
stianę.

O Dulcissime, benignissime, aman-
tissime, pulcherrime, charissime, al-
tissime: ô admirabilis, ineffabilis, inæ-
stimabilis, incomparabilis: ô potens,
magnifice, liberalis, incomprehensibi-
lis, infinite, immense Deus. Tu totus bo-
nus es, totus pius, totus amabilis; tu mel-
le dulcior, niue cādidior, omni volupta-
te delectabilior, omnibus delicijs suauio-
r, auro & gēmis es pretiosior. Tu es Deus
meus, vita mea, vnica spes mea. Da mihi
Domine, vt te diligam: si non quantum
mereris, saltem quantum in hac vita di-
ligi potes ab homine peccatis subdito, &
multis necessitatibus obnoxio.

Matth. 8.

Cum leproso illo Euangelico Domi-
ne in conspectum tuum venio, clamās,
Domine si vis, potes me mundare: potes
inquam mundare animam meam ab
omnibus peccatis illius, potes illam tan-
quam aurum in amoris tui igne purga-
re. Si vis, potes pauperem hunc cōfestim
ditare: si vis, potes me latissimum face-
te, omniumque qui in mundo sunt bea-
tissimum. Quid oberit tibi Domine, si
tantum bonum mihi præstiteris? quid
ex eo tibi incommodi? quam rerum tu-
arum iacturam facies?

Age igitur Domine, cū tu sis pēla-
gus infinitę bonitatis, liberalitatis, &
diuitiarum: quid misericordias tuas in
ira tua aduersum me detines? Cur ini-

qui-

quitates meæ tua bonitate sunt potenti-
ores? Cur potius me mea damnabunt
peccata, quam tua me saluabit miseri-
cordia?

Si contritionem & dolorē meorum
criminum à me exigas: ecce in tantum
me delictorum meorum pœnitet, vt
mille mortis genera subijsse malim,
quàm semel in te peccasse. Si postules sa-
tisfactionem, ecce tibi corpus hoc: effun-
de in illud iram tuam, exerce pœnas in-
dignationis tuæ in illo quas libet: sal-
tem ne amorem tui mihi deneges.

Da itaque vt amem te Deus meus, for-
titudo mea, refrigerium meum, libera-
tor meus, adiutor meus & spes mea. Te
solum quæro, te solum desidero, ad te
solum clamo, Domine mi. Tu enim es
primum principium meum, tu finis vl-
timus. Res huius vitæ me non fatiant,
nullam habent suauitatem, stabilitatem
& firmitudinem nullam. Quidquid pre-
ter te video paupertas est, sine te quid-
quid vsquam gentiū est, aqua mihi tur-
bida est, & falsa, quæ sitim non restin-
git, sed accendit. Te solum quæro, te
solum volo, tuam solummodo faciem
Domine mi desidero: te oro, charitatem
tuam ne elongaueris à me.

Tenebo te, nec dimittam, priusquam
benedixeris mihi: adhærebo tibi, nec
discedam à te, priusquam introduxeris
me in cellam vinariam, & ordinaueris
in me charitatem. clamabo post te, nec

Cant. 2.

Psal. 17.

tacebo, dicam cum Propheta : Diligam te Domine fortitudo mea. Te mediter per dies sine cessatione, te sentiam per soporem in nocte, quia bene est mihi, cum tecum sum; malè, si tecum non fuero : quia tu solus beatam facere potes animam meam, tu Deus meus & Dominus meus in secula seculorum. Amen.

ORATIO SECUNDA

pro amore Dei.

Granatès.
in procemio lib.
4 de Oratio. & Meditat.

O Bone Iesu, ô dulcedo cordis mei, ô vita & salus animæ meæ, quando tibi in omnibus & per omnia placebo? quando mihi ipsi perfectè moriar? quando præferam te ceteris omnibus creaturis? quando non viuet amplius in me quicquam præter te? Miserere mei Domine & adiuua me. Tua vulnera Domine tanquam rosas vernantes saluto, absconde me Domine in illis, & laua me in illis, vt per omnia mundus sim, & amore tui inflammatus. O Domine Deus, ô principium admirabile: ô pietas amabilis charitatis, ô clarissima lux intellectûs mei, ô quies meæ voluntatis, quando te ardentè amabo? Dignare Domine transfigere animam meā amoris tui iaculo; dignare me tibi consociari, vt vnum quid tecum fiam. O desiderium meum, ô spea mea, ô refrigerium meum. Ah si anima mea digna tuis esset amplexibus, vt omnis torpor, omnisque

torpor

tempor meus ab igne tui amoris absumeretur. O anima animæ meæ, ô vita vitæ meæ, te totum desidero, & me totum tibi offero, totum toti, vnum vni, & vnicum vnico. O si locum haberet in me, quod tu Patri dixisti; Pater sancte sint vnum, sicut & nos vnum sumus. Ego in eis, & tu in me: vt sint consummati in vnum.

Ioan. 17.

Nihil aliud volo, nihil aliud desidero, nihil aliud à te peto: tu namque solus mihi sufficis. Tu meus es pater, tu mea mater, tu defensor, tu ductor, tu omne bonum meum. Tu es totus amabilis, totus delectabilis, totus fidelis. Quis vnquam tam liberalis fuit, vt dederit semetipsum? quis vnquam tam tenerè dilexit, vt semetipsum pro vili creatura in mortem tradiderit? Quis tam humilis, qui adeò minuit & humiliavit suam Maiestatem? O Domine tu neminem despicias, neminem fastidis, neminem repellis, qui te quærit? Imò vocas & excitas, vt ad te veniāt omnes: tuæ namque deliciæ sunt esse cum filiis hominum.

Prouer. 8.

Tibi Domine benedicunt Angeli, & quid inuenisti in nobis aliud quamordes peccatorum? Quare voluisti nobiscum esse vsque in consummationem seculi? An non sufficebat tibi, quòd pro nobis passus, etiam Sacramenta nobis in medicinam, & Angelos in socios & tutores reliqueras? Et si nos quidem tan-

Matt. ult.

tis

tis beneficijs simus ingrati, tamen inter nos habitare voluisti. tam bonus enim es, vt ne quidem temetipsum negare potueris.

Ineamus itaque (si sic tibi placeat Domine) pactum : tu curam habe mei, & ego curam habebō tui : tu dilige me, & ego diligam te : tu corpus & animam meam protege & conserua, & ego legem tuam te iuuante obseruabo. Fac mecum Domine quod tibi placet : tu enim scis quid desit mihi, & quid expediat mihi. tuus esse volo, nō alterius. Da mihi gratiam Domine, ne quicquam præter te quæram, aut desiderem ; & vt totum me tibi offeram.

O ignis qui me accendis ; ô charitas quæ me inflammas ; ô lumen me illuminans ; ô requies mea, ô vita mea, ô amor meus qui semper ardes & nūquam extingueris, quando te perfectè redamabo ? quando te nudis animæ meæ brachijs amplexabor ? quando me & mundum vniuersum amore tui cōtemnam ? Quando anima mea cum omnibus potentijs & viribus eius tecum vnietur ? quādo in abyſſo amoris tui absorbebor ?

Dulcissime, amantissime, pulcherrime, sapiētissime, ditissime, nobilissime, pretiosissime & dignissime qui ameris & adoreris, quando sic te amabo, vt in amore tui totus iaceam absorptus ? ô vita animæ meæ, quæ vt me viuificares, mortem subiisti, & moriens mortem oc-

cidi-

cidisti. occide etiam & me; hoc est, omnes meas peruersas ad malum pronitates; voluntatem quoque propriam, & quicquid impedit, quo minus tu mecum uiuas. Postquam autem me sic occidisti, fac me tecum uiuere per amorem & bona opera, ut obseruem fideliter omnia tua mandata, iussaue superiorum meorum, & ea solum sequar, quæ sunt spiritus.

O benignissime Iesu, da mihi perfectam renunciationem atque odium peccati. Perfectam quoque cordis ad te conuersionem, ut omnes meæ cogitationes, omniaque mea desideria in te solo, & circa te solum versentur. O uita sine qua morior; ô ueritas sine qua fallor; ô uia sine qua deuios; ô salus sine qua perco; ô lumen sine quo in tenebris ambulo. Noli Domine, noli permittere, ut vnquam à te diuellar: in te enim solo uiuo, & sine te morior: in te saluus, & sine te perditus sum: in te aliquid sum, extra te nihil sum. quoniam omnino non essem, nisi tu esses in me: & nisi ego essem in te, non esses in me. Esto igitur in me ô bone Iesu, in memoria mea mane, ex ea te cognoscam, in ea te inueniam, cum reminiscor tui, & delector in te, & de te, ex quo omnia, per quem omnia, & in quo omnia. Amen.

ORATIO TERTIA PRO

amore Dei.

Ex libro 5
Memori-
alis.

SI debitum, quo benefactoribus nostris pro beneficijs acceptis obstricti sumus, tantum sit; si singula beneficia sint quasi faces, & amoris incentiua; si iuxta multitudinem lignorum ignis quoque sit magnitudo: quantus, ô Domine, meritò ignis amoris in præcordijs meis flagrare debet, si ligna beneficiorum tot sint, quæ succendunt & nutriunt illum? Si mûdus vniuersus tam visibilis, quàm inuisibilis, cum omnibus quæ in eo reperiuntur, sint mera tua erga me beneficia, quàm ingens erit amoris flamma, quæ in me debebat rutilare? Atque id eò amplius, quia non debeo te amare ob ista tantum beneficia, sed etiam quia in te reperiuntur omnes amandi causæ & rationes, quæ in cunctis sunt creaturis; & singulæ quidem in summo perfectionis gradu.

Si namque bonitatem consideremus, quis te melior inuenitur? Si respiciamus pulchritudinem, tu es pulcherrimus in cuius faciem Angeli prospicere desiderant. Si quæramus benignitatem & suauitatem, quis te suauior aut benignior reperitur? Si appetamus diuitias & sapiëntiam, quis ditior aut sapientior quàm tu? Si amicitiam, quis amabit aliquid amplius eo, qui pro nobis animam suam posuit.

Si autē ad beneficia reuertamur Domine, à quo est omne id quod habemus, nisi à te? Quid de spe dicemus, cùm à te

solo

solo, & à tua misericordia speremus, & expectemus quidquid nobis deest? Si iure solius naturæ summus debeat amor patribus carnalibus, quis magis pater illo, de quo dicitur: Patrem nolite vocare vobis super terram: vnus enim est Pater vester, qui in cælis est.

Math. 23.

Si sponsus tam tenerè à spōsa diligatur, quis alius est sponsus animæ meæ, quàm tu Domine? quis replebit sinum cordis mei, & desideria mea, nisi tu? Si Philosophi dicant vltimum finē amore diligi infinito, quis est principium meum, quis vltimus finis meus, nisi tu Domine? Vnde enim originem traxi, & quò vadam vt perficiar, nisi à te, & in te? A quo est omne id quod habeo, & à quo spero me accepturum ea, quibus mihi adhuc opus est, nisi à te?

Denique si similitudo sit amoris causa, ad cuius imaginem & similitudinem creata est anima mea, si non ad tuam? Age si solus iste titulus, & singuli prædictorum sint amoris incentiua, quale debet esse id, quod ex omnibus istis simul iunctis deriuabitur? Sanè quanto abundantius est mare cūctis fluminibus, quæ intrant in illud, & quanto illud vincit magnitudine; tanto etiam abundantior, & tanto maior atque præstantior est amor tui, ceteris omnibus amoribus externis.

Tam iustas Domine causas, tam prægnantes amandi te occasiones cum ha-

beam,

beam, cur te non debeam ex toto corde, ex tota anima, ex totis viribus, & ex totis visceribus diligere? O spes mea, gloria mea, gaudium meum: ô amabile principium meum, ô satietas & sufficientia mea, quando erit ille dies cum te verè, & ex toto corde diligam? quando me tibi gratum in omnibus, & pro omnibus exhibebo? Quando mortuum in me sentiam omne id, quod tibi aduersatur? Quando ero totus tuus? quando desinam esse meus? quando veniet illa hora, in qua nihil præter te in me viuet? quando me totum amore tui inflammatum sentiam? quando rapies me cum impetu? quando inebriabis me vberum tuorum dulcedine? quando me totum in te transferes? Quando videbo felicem diem illum, quo sublatis omnibus impedimentis, animique perturbationibus facies vt vnus spiritus tecum sim, nec in posterum à te diuel- lar?

Ah Domine, quanti constitit tibi quòd me redemisti? sed redempto semel quàm facile potes benefacere? cum enim benefacis homini, quid ex tuis ædibus aufertur, quid ex tuis diuitijs perditur, quid ex infinitis thesauris tuis aufertur? cur, ô Domine, ira tua cum misericordia tua aduersum me pugnât, cum tu pelagus sis infinitæ liberalitatis & clementiæ? Memento igitur Domine, quòd ego tuus sum, & tu meus. No.

Ex 1 Ap-
pendice.

li er-

li ergo me fugere Domine, sed sine vt inueniam te. Longum iter facio, sæpe fatigor, sæpe sto, sæpe regredior, ne pigeat te Domine meexpectare, qui non possum paribus tecum passibus ambulare.

O Deus meus & salus mea, cur adeò desidiosus sum? cur non summa cum alacritate curro ad te summum bonum, in quo omnia simul bona reperiuntur? Diligam te Domine amore arctissimo, fortissimoque. Extendam omnium affectuum & desideriorum meorum brachia, vt amplectar te sponse dulcissime anime meæ, à quo bonum omne mihi polliceor. Hedera vicinam arborem tam fortiter apprehendit, vt singulæ fibræ singula videantur esse brachia: hoc enim adminiculo suffulta in altum ascendit, & suam consequitur perfectionem. Ego autem Domine cui arbori adhærebo, nisi illi, quæ plantata in monte Caluariæ, facta est mihi palus securissimus? Non tam largè crescit hedera, nec tam latè pulchritudinem ramorum suorum explicata ab arbore subleuata, quantum anima crescit in virtutibus & gratijs, quæ ab hac arbore fulcitur.

Cur igitur omnia membra mea non vertuntur in brachia, vt omni ex parte amplectar te? cur nõ amabo te? cur non omnem in te fiduciam collocabo? Adiua me Domine & Saluator mi, trahe me in altum post te: pondus namque

morta-

Ioan. 12.

mortalitatis semper deprimat me. Tu Domine qui ascendisti arborem crucis, vt omnia traheres ad te, tu qui ex tam immensa charitate copulasti naturas duas, adeò inter se differentes, vnamque ex illis personam fecisti, vt vnum quid fieres nobiscum; dignare quæso corda nostra tecum vnire charitatis vinculo indissolubili & tam arcto, vt vnū quid tecum efficiamur. Da mihi vnum hoc Domine, & sufficit mihi. Opes enim mūdi huius non satiant me, te solū volo, te quæro, faciem tuā videre cupio, ad amorē tui semper aspirabo, & cum Propheta cantabo; Diligam te Domine fortitudo mea: Dominus firmamentū meum, & refugium meum, & liberator meus. Deus meus adiutor meus, sperabo in eum: Protector meus, & cornu salutis meæ, & susceptor meus. Laudans inuocabo Dominum: & ab inimicis meis saluus ero. Amen.

Psal. 17.

ORATIO QVARTA PRO *amore Dei impetrando.*

Ex prima
Appendi-
ce Memo-
rialis Lo-
do. Gra-
natenf.

FLexis genibus cordis mei, & absorptus in abyſſo vilitatis meæ, cum omni timore atq; reuerētia venio in conspectum tuum, o Deus meus, vt qui sum infelicissima, pauperrima atque vilissima huius mūdi creatura. Sisto me iuxta fluentia tuæ misericordiæ, iuxta torrentem tuarum gratiarum: ante splendorem veri Solis iustitiæ, cuius radij dif-

fun-

funduntur per vniuersum orbem terrarum, & liberaliter sese communicant omnibus, qui illis fenestram non occludunt.

Ecce datur hîc in manibus artificis sapientissimi cretæ massa, & truncus rudis atque impolitus ab arbore præcisus: fac clementissime Pater ex illo, quod facere decreuisti. Magna est audacia, quòd creatura tam vilis audet à te petere amorem tam pretiosum & excelsum. Vellem quidem, cum tanta mea sit indignitas, minus quippiam à te petere; sed quid faciam miser, cum tu præcipias vt amem te? Tu me creasti vt te diligerem, & minaris mihi nisi te diligam. Mortuus es, vt te amarem, & præcipis mihi, vt nihil feruentius à te petam amore: sed & tantopere à me diligi cupis, vt videns me absque amore tui, institueris Sacramentum admirabilis virtutis, quo cor meum amore tui inflammaretur.

O Saluator mi, quis ego sum, vt tu amorem meum expetas, & hunc in finem tot, tamque admirabiles vias modosque quæsieris? Quid ego tibi sum, nisi tormentum, crux, & quotidiana tribulatio? at tu quid mihi es, nisi salus, quies & omne bonum? Si itaque tu ames me, qui tibi per omnia sum molestus, cur ego non redamabo te, qui mihi per omnia utilis es & salutaris?

Fretus igitur, ô dulcissime Domine, his amoris tui pignoribus, pioque illo

man-

mandato, quo vsque ad finem vitæ placuit tibi tam benignè me inuitare, & precipere mihi, vt te diligam, per singularem hanc gratiam tuam, aliam similem oro, vt tu scilicet prior mihi tribuas, quod tibi à me retribui vis : non enim hoc possum dare tibi, nisi tu prior dederis mihi. Non enim dignus sum ego qui diligam te ; sed tu dignus es, qui à me diligaris : ideoque petere non audeo, vt tu me diligas, sed vt des mihi licentiam, vt ego diligam te. Noli fugere Domine, noli fugere : ne respuas amari à tuis creaturis amore quo possunt maximo.

O Deus qui essentialiter amor es ; amor increatus, amor infinitus, amor sine mensura ; non tantum amator, sed totus amor, à quo procedit amor omnium Seraphin, & cunctarum creaturarum, non aliter atque lux omnium stellarum à lumine Solis : cur non amabo te ? qui potero non vri ab hoc amoris igne, qui totum mundum, & quicquid in illo est inflamat, & penè comburit ?

O Deus qui essentialiter es ipsa bonitas, à quo bonum est, quidquid bonum dicitur : à quo omnium creaturarum bonitas (non aliter atque à mari omnia flumina) deriuantur ; in comparatione cuius plus quam excellentissimæ bonitatis non est aliquid in cælo, nec in terra, quod bonum dici potest. Cur igitur non amabo te, cum obiectum amoris sit bonitas ?

Si amare nō potero te, ō Domine mi, ob tuam excellentiam, quomodo potero te non amare, vel ob meam vtilitatem? Filius amat patrem, quia ab illo accepit quod est; membra diligunt caput, & se se morti offerunt pro illo, quia per illud in sua essentia conseruantur. Omnes effectus amant suas causas: ab illis enim acceperunt quidquid sunt, & ab illis expectant quod nondum habent. At tu Domine & pater meus es, & caput meum, & causa mea: quod igitur filius patri, quod membrum capiti, quod effectus debet causæ, id omne, & quidem multo plus, debeo tibi.

Tu mihi dedisti esse quod habeo, multo perfectius, quàm ipsi parentes mei. Tu me conseruas in hoc esse quod dedisti, multo accuratius quàm caput membra. Tu absolues in me quod deest mihi, donec ad vltimum punctum perfectionis me adduxeris. Tu es pater, qui me fecisti; tu caput qui me regis; tu sponsus, qui das animæ meæ perfectam felicitatem. Tu architectus es huius ædificij; tu pictor huius figuræ ad tuam imaginem & similitudinem factæ, quam etiam perfectam efficies. Quidquid habet, à te accepit; quidquid deest ei, id abs te recipere sperat. Quemadmodum enim nemo potuit ei dare quod est, nisi tu Domine: sic etiam nemo potest perficere, quod imperfectū adhuc est, nisi tu. Quidquid igitur habet, quidquid est, quidquid spe-

rat, id omne tuum est. Quem igitur intuebitur nisi te? cui rationem reddet nisi tibi? in cuius oculis ambulabit, nisi in tuis? quò diriget omnem amorem suum nisi in te, qui es omne bonum illius?

Si tu igitur Domine sis ornamentum & pulchritudo animæ meæ, quomodo tui potero obliuisci? Quid mihi in cælo, & à te quid volui super terrā? caro mea deficit & cor meum, Deus cordis mei & hereditas mea in sempiternum. O amor increate qui semper ardes, & nunquam extingueris: ô amor qui semper viuis, & in pectore diuino æstuas. O paterni cordis æternum iaculum, quod semper ferit vultum filij vulnere amoris infiniti: eia vulneret me iaculum istud, inflammet me ignis iste, sequar te dilectum meū, psallam alta voce canticum nouum, deficiat anima mea in tuis laudibus amoris ineffabilis iubilo.

O sanctissime Pater, ô clementissime Fili, ô amantissime Spiritus sancte, quando tu dilectissime Pater habitabis in anima mea, & in secreto cordis mei moraberis, atque me totum possidebis? Quando ego ero totus tuus, & tu totus meus? Quando erit illud, ô mi Rex? Quando veniet dies ille? O quando? ô si adesset? Nunquàmne illum videbo? ô quàm ingrata mora, quàm odiosa dilatio? Propera ô bone Iesu, prospera & noli tardare: reuertere, reuertere & curre instar capree hinnuliq; ceruorū, super montes Bethel.

O Deus

O Deus meus, refrigerium vitæ meæ, lumen oculorum meorum, consolatio mea in tribulationibus, finis meorū desideriorū, paradisus cordis, centrum animæ, pignus gloriæ, socius peregrinationis, gaudiū exiliij, medicina vulnerum, clemens vltor meorū peccatorum, magister ignorantium, dux viæ, nidus in quo requiescit anima mea; portus in quo conseruatur, speculum in quo se ipsam contemplatur, baculus cui innititur, lapis super quem ædificatur, & thesaurus pretiosus in quo gloriatur.

Si tu igitur Domine mihi sis hæc omnia, quomodo vel ad momentum poterō tui obliuisci? Si oblitus fuero tui, ō Deus meus, obliuioni detur dextera mea: adhæreat lingua mea faucibus meis, si non recordatus fuero tui. Non dabo somnum oculis meis, ō beata Trinitas, nec palpebris meis dormitationem, nec requiem temporibus meis, donec inueniam hunc amorem, donec inueniam locum Domino in corde meo, & tabernaculum Deo Iacob in anima mea, qui viuit & regnat in secula seculorum. Amen.

ORATIO QVINTA PRO

amore Dei.

Diligam te Domine virtus mea, diligam te ineffabilis exultatio mea, & viuat iam non mihi, sed tibi tota vita mea, quæ perierat in miseria mea, resus-

Psal. 36.

Psal. 21.

Ex appē-
dice pri-
ma.

citata est in misericordia tua. Serò Maie-
statem tuam timui, serò te amaui pul-
chritudo tam antiqua, tam noua: serò
te amaui. Ego te refrigerium meum quæ-
rebam, & non inueniebam: quia non
rectè quærebam te. Quærebam te extra
me, & tu habitabas intra me. Circuiui
vicos & plateas ciuitatis huius mundi,
quærens te, & non inueni: quia malè
quærebam foris, quod erat intus.

Interrogauì terram si esset Deus me-
us, & dixit mihi, quòd non: & omnia
quæ in ea sunt, hoc idem confessa sunt.
Interrogauì mare & abyssos, & reptilia
quæ in ipsis sunt, & responderunt; Non
sumus Deus tuus, quære super nos eum.
Interrogauì flabilem aërem, & inquit
vniuersus aër, cum omnibus incolis su-
is; Non sum ego Deus tuus. Interrogauì
cælum, Solem, Lunam & stellas; Neque
nos sumus Deus tuus, inquiunt. Interro-
gauì denique omnes creaturas, & clama-
uerunt ad me voce grandi; Ille qui nos
fecit, verus Deus & Dominus tuus est. Et
dixi; Vbi est ergo Deus meus? Vbi quæ-
ram illum? ostendite mihi. Et audiui
vocem dicentem mihi; In omni loco
Deus est, quære illum in temetipso. Ipse
implet cælum, implet terram, implet &
cor tuum.

Et redij ad me, & intraui in me, & aio
ad me: Quomodo huc intraisti Domine
mi? quod ostium ingressus es? Cœpi in-
quirere & examinare singulos sensus

meos,

meos, si per quem eorum intraueris: Sed nec ipsi sciebant, quomodo, & quā intraueris. Nam oculi dicunt; Si coloratus non sit, per nos non intrauit. Aures dicunt; Si sonitum non fecit, per nos non transiuit. Nasus dicit; Si non oluit, per me non venit. Gustus dicit; Si non sapuit, per me non introiuit. Tactus etiam addit; Si corpulentus non est, nihil me de hac re interroges.

Ingressus itaque ô amor meus quomodo es animam meam, & non ingressus es per aliquod ostium? Lux quidem es in tenebris illuminans, sed quam non capit oculus: vox es super omnem vocem dulcis, sed quam non capit auris: odor es super omnem odorem fragrans, sed quem non capit naris: dulcedo es super omnem dulcedinem delicata, quam tamen non capit gustus: amplexus es super omnem amplexū iucundus, quem tamen non capit tactus.

Vbi eras igitur mi Deus, vbi eras mea lux, vbi eras spes mea? Interrogabam, & dictum est mihi; Ascende in superiores partes cordis tui, & illic Deum inuenies. Verè tu magnus es Deus, qui nostram sapientiam deuicisti. Tu solus potens & verè beatus. Tu es Rex Regum, & Dominus Dominantium. Tu es immortalis, & lucem habitas inaccessibilem, quem nemo mortalium vidit, aut videbit vnquam, & viuet. Multa sunt & magna quæ dicuntur de te Domine: minora ta-

men & pauciora, quàm de te dici possent : & verba deficiunt, vbi tu non defici-
cis. Excedis enim omne quod dici, omne
quod potest cogitari.

Psal. 90.

Tu dilexisti me amor vnice, Domine mi, antequam ego diligerem te, & ad imaginem tuam creasti me, omnibus creaturis tuis præposuisti me. Insuper facis Angelos tuos spiritus propter me, quibus mandasti vt custodiant me in omnibus vijs meis, ne fortè offendam ad lapidem pedem meum. Noluisti me nasci in terra infidelium, sed fidelium, in qua ex aqua & Spiritu sancto regeneratus & sanctificatus sum. Diuitias nimias, aut nimiam paupertatem non dedisti mihi, ne aut superbirem, aut nimium vilescerem : sed intellectum mihi & voluntatem dedisti, quibus te cognoscerem & amarem.

Vocaſti me cùm eram perditus, & pulsaſti oſtium meum : ſed ego non reſpondebam. Ego pro meo arbitrio viuebam, & fortitudini meæ nimium tribuebam, cùm tamen non eſſet fortitudo, ſed mera imbecillitas. Volebā currere, & mox deſaſſabar, atque vbi ſecurum me fore arbitrabar, ibi maximè periclitabar. Receſſi à te ſicut filius prodigus, & abiui in regionem longinquam, atque inhabitatam, vbi amans vanitatem vanus factus ſum. Cæcus eram, & cæcitatem deſiderabam. Seruus eram, & ſeruiturem amabam. Vinc-tus eram, & vincu-
la non

la non horrebam. Amarum dulce, & dulce amarum credebam. Miser eram, nec cognoscebam.

In hoc perditissimo statu cum viuerem, oculos tuæ pietatis in me coniecisti, & licet ego sine intermissione peccabam, tu tamen me à peccatis reuocare non desistebas. Quando erraui, in viam reduxisti me: quando ignorauì, docuisti me: quando peccaui, corripuisti me: quādo tristis fui, cōsolatus es me: quando desperaui, cōfortasti me: quando cecidi, erexisti me: quādo steti, tenuisti me.

Perieram, mortuus eram, ad mortuum descendisti, mortalitatem suscepisti; ad seruum Rex descendisti, vt seruum redimeres te ipsum tradidisti. In tantum me dilexisti, vt sanguinem tuum in pretium dares pro me. Dilexisti me Domine, plus quā te, quia mori voluisti pro me. Tali pacto, tam caro pretio reduxisti me de exilio: redemisti me de seruitute, retraxisti me de supplicio, vocasti me nomine tuo; signasti me sanguine tuo, vt memoriale tuum semper esset apud me, & nunquam recederet à corde meo, qui pro me non recessit à cruce.

Cognoscam igitur te Domine cognitor mei, cognoscam te virtus animæ meæ, ambulem semper in lumine tuo o Sol iustitiæ. Mihi enim adhærere Deo bonum est, ponere in Domino Deo spem meā. Mox enim vbi à te auertor, statim ad perituras res conuertor, vanisq̃ue co-

Psal. 72.

gitationibus distrahor.

O me miserum igitur & infelicem, quando tam inseparabiliter adhærebo tibi, vt nunquam diuellar à te? Quando cogitationes, verba & opera mea ab æquitatis & iustitiæ tuæ regula non amplius discrepabunt? Tu Domine solitudinem amas, & ego hominum commercia; tu silentium, & ego fabulas; tu veritatem, & ego vanitatem: tu munditiam, & ego immunditiam sequor.

Oro igitur te Domine per te ipsum, oculos meos tua luce illumina, cor meum tuo amore vulnera, gressus meos in viam mandatorum tuorum dirige, ne vnquam ab illa declinem. Libera Domine captiuum, vagum in vulnera tua introduce: lapsus erige, ab omni parte debilitatum refice. Da cor quod te semper cogitet, animum qui te semper diligat, mentem quæ te semper recolat, intellectum qui te intelligat, rationem quæ tibi semper summo delectabili fortiter adhæreat.

Ne fugias à corde meo; ab ore & operibus meis ne decesseris: sed semper adesto mihi; quia adiutor meus es in omni tribulatione. Sine te morior, & recolens te suscitor. Odor tuus me recreat, memoria tui me sanat, lux tua me illuminat, & ad vocem tuam reuiuifco: sed satiabor, cum apparuerit gloria tua. Amen.

ORATIO SEXTA PRO

amore Dei.

SI inter omnia quæ nos ad amorem
 prouocant, nil forma & pulchritu-
 dine reperiatur efficacius, cur non ego
 merito amabo te Domine mi, qui fons
 es omnis pulchritudinis & decoris? Tu
 es pulchritudo vniuersæ mundi huius
 machinæ: quidquid enim in illa pul-
 chrum est, per te, & à te pulchrum est,
 quia tu creasti. Pulchritudinem tuā mi-
 rantur Sol & Luna: in faciem tuam An-
 geli prospicere desiderant: in eius nam-
 que visione consistit vltima felicitas, &
 omnium Spirituum supernorū gloria.

Ex appē
 dice pri-
 ma.

A te suam sortiūtur pulchritudinem
 volucres, flores, fontes, agri, flumina,
 maria, nemora, siluæ, arbores, terra, mō-
 tes, valles, & quidquid in illis cōspicitur.
 Tu ornasti cælum stellis, aërem auibus,
 aquam piscibus, prata floribus, & terram
 infinita plantarum atque animalium va-
 rietate. In omni loco mundi tu pulcher
 es, quia vbique tuæ pulchritudinis con-
 spiciuntur indicia. In cælo es pulchri-
 tudo gloriæ, in inferno iustitiæ, in bo-
 nis hominibus gratiæ, in malis pati-
 entia.

Sed & amabo te Domine mi, quia o-
 mnium rerum es perfectio. Tu laus es
 Angelorum, præmium Sanctorum, spes
 Patriarcharum, lumen Prophetarum,
 gaudium Apostolorum, corona Marty-

rum, gloria Confessorum, puritas Vir-
ginum, & salus omnium Electorum.
Omnes beati Spiritus laudant te, à facie
tua columnæ cæli contremiscunt, te
honorant & reuerentur omnes mundi
creaturæ.

Tu repleas omnia, nec dilataris : tu
penetras omnia, nec moueris : tu in o-
mnibus rebus es, nec vlla concluderis.
Tu creasti omnia absque necessitate, tu
gubernas omnia absque vlllo labore : tu
mutas omnia, & ipse non mutaris. Tu
solus iudicas sine vlllo errore; tu solus
castigas sine vlla perturbatione; tu solus
dona distribuis & nihil thesauro tuo de-
cedit. Tu solus es tibi & omnibus rebus
sufficiens. Qui te igitur habet, is
habet omnia : & qui te non habet, eti-
am si omnes habeat huius mundi the-
sauros, pauper est, nudus est, miser est &
miserabilis.

Vna sæpe res nos ad tam insanum
creaturæ alicuius amorem impellit, vt
pro ea mille mortes appetere non dubi-
temus. In te autem Domine, cum tot,
tantæque simul concurrant, cur te non
diligam ? cur non lubēs acerbissima que-
que pro nominis tui gloria perferam ?
cur non lubēs pro te sanguinem meum
fundam, qui tuum tam liberaliter pro
me effudisti ? Si considerem beneficia,
nulli plus quàm tibi debeo : si amorem,
nemo mihi melius vult quàm tu : si co-
gnationem, non habet anima mea te

con-

coniunctiorem. Magna profectò amoris causa est similitudo, & quæ maior similitudo, quàm quæ est inter te Domine, & animam meam, quæ creata est ad imaginem & similitudinem tuam? Tu es spiritus, & anima mea spiritus est: tu es inuisibilis, & anima mea inuisibilis est: tu immortalis, & anima mea immortalis: tu intellectum habes, memoriam & voluntatem; eadē habet & anima mea potentias.

Tu cū sis simplicissimus & inuisibilis, totus es in toto mundo, & totus in singulis eius partibus: & anima mea cū eiusdem sit conditionis, tota est in toto corpore, & tota in quolibet eius membro.

Cū itaque tanta sit inter me & te, o amor mi, similitudo, cur non diligam te? An quia tu excelsus es, & ego humilis? an quia tu creator, & ego creatura? an quia tu essentia es perfectissima, & ego totus imperfectus? Non hoc impedire, sed augere debet nostram dilectionem: multo namque amabilior est similitudo cum inæqualitate proportionata, quàm quæ omni ex parte est æqualis. Maior est amor patris in filios, & vxoris in maritum, quàm fratrum inter se, qui sunt æquales. Suauius sonant voces inter se differentes, si ad proportionem reducantur, quàm quæ consonæ sunt & vniformes. Et hæc igitur inæqualitas, quæ est inter te & animam meam,

maioris sit, Domine, causa dilectionis.

In te igitur, ô dilectissime sponse animæ meæ, in te sunt omnes amoris causæ, quæ possunt excogitari, dignissimisque es qui amore diligaris infinito: sed voluntatem in me deprehendo cum in modum deprauatam, vt id præstare nequeat, taceo quòd subinde semetipsam plus, quàm te diligat.

Quare nisi tu Domine sanes naturam meam infirmam gratia tua, & nisi in cor meum virtutem charitatis per Spiritum sanctum infundas, nunquam potero te amore gratuito & supernaturali (quali cum amari dignus es, & vis) diligere. Da igitur mihi misero gratiam, vt quod vis & iubes præstare possim. Da mihi vt te diligam, si non amore quo tu dignus es, saltem eo quem mea potest capere natura: hoc est, ex toto corde meo, tota anima mea, tota fortitudine mea, & totis viribus meis: ita vt omnia viscera mea intrinsecus ardeant, & amore tui liquefiant.

Da mihi vt te diligam amore simplici, & gratuito, non mercenario, vel vlla mihi proposita vtilitate: da vt amore puro, nulla peruersa intentione maculato; nihil vt cupiam, quàm te propter te. Da mihi Domine amorem fortem & inuictum, qui nulla pericula, nullos labores, nulla damna, nullas iniurias, nullos cruciatus pro te pati recusset, aut abhorreat. Da amorem alacrem & diligentem,

qui

qui semper occupetur in rebus ad cultum tuum pertinentibus. Da amorem vnitiuum, qui nunquam intermittat amare te, aut vnquam separetur à te. Da Domine amorem inæstimabilem, qui omnia contemnat propter te: da amorem discretum, qui non excedat legem tuam zelo & feruore immodico.

Da denique, ô Deus meus, vt te diligam amore ordinato, qui omnia diligat iuxta dignitatis cuiusque proportionem: te autem super omnia, amore dulci & suauis, qui in nulla re dulcedinē aut oblectationem inueniat præterquam in te: amore zelo æstuante, qui nihil desideret magis, quàm tuam gloriam, nihil magis odio habeat, quàm ignominiam sancto nomini tuo irrogatam: denique amore tam violento, vt auellat cor meum ab omni re peritura, semperque ad te sursum rapiat, donec transeam ex hoc loco exilij in patriam illam cælestem, vbi facie ad faciem tuæ videns pulchritudinis magnitudinem, diligam te perpetuò, cum perfectis illis amatoribus, qui nunquam cessant amare & laudare te Regem Regum, Dominum Dominorum, & Deum Deorū in Sion. Amen.

ORATIO SEPTIMA PRO

amore Dei impetrando.

O Summe, optime, omnipotentissime, misericordissime, iustissime, fortissime, incomprehensibilis Deus, Do-

Ex appē-
dice pri-
ma.

Iob. II.

mine mi : tu qui es omni melle dulcior, omni lacte candidior, omni luce clarior, omnibus margaritis pretiosior, infinita sunt quæ me in amorem tui rapiunt. Tu enim excelsior es cælo, profundior inferno : tua mensura longior terra & latior mari, vt inquit Propheta tuus. Quis te perfectior ? quis te melior ? quis te pulchrior ? quis te benignior ? quis nobilior ? quis potentior ? quis sapientior ? quis ditior ? Omnia hæc in te sunt Domine, & propter singula meritò diligendus es, cum summum bonum sis.

Cant. 2.

Ceterum cum omne quidē bonum amabile sit per se, magis tamen vnusquisque diligit bonum proprium. Diligam igitur te Domine Deus meus, non tantum quia summum bonum es : sed & quia bonum meū es. Cum enim considero, & mecum perpendo, quot titulis ac modis meus factus es, liquefiunt interiora mea, & clamo cum sponsa, Dilectus meus mihi, & ego illi.

Tu enim Domine creator meus es, tu sanctificator & glorificator meus es : tu mihi dedisti esse naturæ, dedisti esse gratiæ, dabis & esse gloriæ. Tu meus es adiutor, meus gubernator, defensor, tutor, & custos : tu denique Deus meus, Dominus meus : tu salus, tu spes, tu gloria, tu omne bonum meum es.

Et quidem hæc omnia mihi es, quatenus Deus, quatenus Creator & con-

ser-

seruator es omnium. Quatenus autem homo, multi sunt alij tituli, officia alia, & alia vincula, quibus ego tibi, & tu mihi deuinctus es: propter quæ & ego te amore (si fieri posset) infinito diligere meritò deberem. Tu namque meus es restaurator: restituiisti enim in integrum naturam humanam, quæ per peccatum erat debilitata. Tu meus es liberator: tua namque captiuitate me à tyrannide peccati, mortis, inferni & Dæmonis, hostis mei capitalis vindicasti. Tu meus es redemptor: pretio namque & incomparabili sanguinis tui thesauro profuso, me à seruitute, in quam per peccatum eram prolapsus, redemisti.

Tu meus es Rex: regis namque me tuo spiritu; pro me pugnasti, & me ex hostium manibus eruisti. Tu meus es Sacerdos: orasti enim, & oras indefinenter, tanquam æternus Sacerdos, pro me, in conspectu Patris tui cælestis. Tu meum es sacrificium: obtulisti namque te metipsum in ara crucis, vt mea crimina clemēs expiares. Tu meus es aduocatus: cùm enim Diabolus me accusat, & libellum, in quo peccata mea descripta sunt, Patri tuo porrigit, tu causæ meæ patrocinaris: tu deponis de tuo, & supple omnem id, quod meæ deest iustitiæ. Tu meus es mediator: es enim Deus simul & homo, amicus hominum & verus homo, amicus etiam potens Dei, & verus Dei filius: atque ita te medium inter

me & Deum interponis.

Tu meus es pastor : pascis enim & regis animam meam, tanquam ouem gregis tui. Tu meus es cibus : tu enim ipse es quo nutrior in illo diuinissimo altaris Sacramento. Tu meus es Pater, & pater futuri seculi : regenerasti me namque grauissimis doloribus in arbore crucis, & nouam essentiam mihi per Spiritum sanctum dedisti. Tu caput meum es, & quidem vniuersale caput Ecclesiæ : à te namque, tanquam à capite vero defluit in illam, omniaque illius membra virtus, vita & sensus spiritualis. Tu verus medicus meus es : sanguine namque tuo vulnera & liuores animæ meæ sanasti.

Tu meus es magister : doctrinæ namque tuæ luce viam ad cælestem patriam mihi demonstrasti. Tu meum es exemplum : non enim verbis tantum, sed multo magis operibus & vitæ suæ sanctissimis exemplis in hanc me viam deduxisti. Tu mea es fortitudo & gaudium : non enim est tribulatio vel dolor tam ingēs, quem memoria tuarum, quas pro me sustinuisti, passionum non faciat mihi dulcem & tolerabilem. Tu meus es honor & gloria : factus namque homo pro me, fecisti me fratrem tuum, tuæque naturæ confortem.

Tu denique meus Saluator es, & quidem talis Saluator, qui vbique, semper, & in omnibus mihi sufficis : perfectissimè namque omne id quod ad salutem

meam

meam requirebatur, in medio terre operatus es. Ignorantiam meam tua doctrina illuminasti, debilitatem meam tuis exemplis corroborasti, teporem meum tuis beneficijs inflammasi, animā meam tuis mysterijs erudisti, paupertatem meam tuis meritis ditasti, vulnera mea tuis Sacramentis curasti, tuis doloribus pro meis voluptatibus satisfacisti, & nūc in cælis ad dexteram patris tui sedens, pro me intercedis. Quid multis? Tu factus es mihi sapientia & iustitia & sanctificatio & redemptio: ac proinde bonum omne.

1 Cor. 1.

Quæ igitur impudentia non amare Dominum, qui hæc omnia mihi factus est, & cui ratione tot titulorum ac beneficiorum deuinctus sum? Si homines eodem amore, quo diligunt semetipsos, etiam diligant omnia quæ sua sunt; cur ego non amabo te Domine, si te meum esse velim, idque tot officijs & beneficijs, tamque prægnantibus in rebus? Quod si pro singulis horum beneficiorum tibi totum cor meum debeam, nec vnū hoc tantum, sed plura si haberem; ecquid tibi debebo, si hæc omnia beneficia simul coniungamus? Quæ iniquitas igitur esset nolle dare cor vnum quod habeo, cui tot etiam alia merito debentur? Et si singula horum beneficiorum incētiua sint atque stimuli dilectionis, quinetiam & sagittæ corda hominum transfigentes, quomodo ego inter tot incendia dilecti-

one

one non ardeo? quâ fit vt totus frigidus permaneam? inter tot tela quomodo non vulneror? quomodo quasi carens sensu in duritie cordis mei perseuero?

Tibi Domine de stupore atque insensibilitate cordis mei conqueror; tibi in fidelitatem illius confiteor: tu enim pluens in illud amoris causas innumera- biles, nihil ab illo refers dignum tot obligationibus. O cor ipsis feris ferius, saxo insensibilius, durius adamante, quod tot ictibus non mollitur.

Te itaque, ô speciose præ filiis homi- num, te oro, da mihi vt desiderem te, amem te quantum volo, & quantum de beo. Imensus es, & sine mensura debes amari, præsertim à nobis, quos sic ama- sti, sic saluasti, pro quibus tanta & talia fecisti. O amor qui semper ardes & nun- quam extingueris, dulcis Christe, bone Iesu, charitas Deus meus; accende me totum igne tuo, amore tui, dulcedine tua, dilectione tui, desiderio tui, charita- te tua, iocunditate & exultatione tua, quæ sancta est & bona, quæ casta est & munda, vt totus amoris tui dulcedine plenus, to- tus flâma charitatis tuæ incensus, diligâ te Dominum meum dulcissimum ex toto corde meo, ex tota anima mea, ex totis viribus meis, ex tota intentione mea, & nihil in me sit, quod te non diligat. Si enim hæc omnia, & quidē tot nominibus ac titulis tua sint, quem diligâ præter te?

Et quia diligere est bene velle huic,

quem

quem diligimus, tuque Domine tot bonis abundes, ut plura tibi optare non possim, quam habes; id vnicum volo, ut etiam cor meum habeas, & omnia mea tua sint, proque infinita gloria tua summas tibi gratias ago. Similiter & hoc volo, ut omnes creaturae tibi seruiant, te honorent, laudent, glorificent, atque vniuersa terra tuis laudibus repleatur. Hoc sit semper meum desiderium, hoc cibus, hoc delicie meae, tibi omni tempore ut benedicam, & laus tua in ore meo sit semper. Sed quia non est laus pulchra in ore peccatoris, oro Sanctos & Sanctas omnes, omnesque caelestis aulae Spiritus, ut semper te laudent: eorum enim est laudatio.

Benedicite igitur omnia opera Domini Domino, laudate & superexaltate eum in secula. Angeli & Archangeli benedicite Domino, laudate & superexaltate eum in secula. Virtutes & Dominationes benedicite Domino, laudate & superexaltate eum in secula. Principatus & Potestates benedicite Domino, laudate &c. Beati Throni, in quibus sedet atque iudicat Dominus, benedicite Domino, laudate &c. Cherubin & Seraphin, qui amore Creatoris vestri toti igniti exardescitis, benedicite Domino, laudate &c. Apostoli & Euangelistae fundatores Ecclesiae Christianae benedicite Domino, laudate &c. Gloriosi exercitus Martyrum benedicite Domino, laudate &c. Virgines inclytae & continen-

tes omnes benedicite Domino, laudate
& superexaltate eum in secula. Benedi-
ctus es Domine patrum nostrorum, &
benedictum nomen glorię tuę, sanctum
& laudabile, & superexaltatū in omni-
bus seculis. Amen.

CAPVT OCTAVVM,
VARIAS AD SANCTIS-
SIMAM TRINITATEM ORA-
tiones continens.

CONFESSIO FIDEI DE
S. Triade.

August. in
libro de
Speculo.



Onfiteor te Patrem, & Fili-
um, & Spiritum sanctum, in
personis trinum, in substan-
tia vnum: verum Deum, o-
mnipotentem, visibillum &
inuisibillum conditorem, non corpus,
aut in corpore positum, neque ex diuer-
sis speciebus admixtum, aut membro-
rum compaginibus effigiatum: sed vni-
us simplicis & incorporeę naturę: te
quidem verum patrem, summę bonita-
tis & totius Deitatis principium, incir-
cumsriptę & ingenitę Maiestatis De-
um, ex nullo ducentem initium, sed o-
mnibus initium dantem.

Credo & confiteor nō corporali pro-
genie, nec extrinsecus, non necessitate,
neque voluntate, sed natura filium ge-
nerantem. Confiteor & verū te filium,

ex pa-

ex patre sine initio ineffabiliter natum, verum Deum, vnigenitum, per quem omnia facta sunt: & verum Patris Verbum, non factum, non creatum, non ad optium: sed genitum, & vnus cum Patre substantiæ: atque ita per omnia æqualem Deo patri, vt nec tempore, nec gradu, nec potestate possis esse inferior. Tantumque te esse confiteor, qui genitus es, quantus & ipse, qui te genuit. Non autem quia dico genitū à patre filium, diuinæ & ineffabili generationi aliquod tempus adscribo, sed nec Patrē aliquando cœpisse, nec te eius filium. Quia semper fuit pater, nunquam igitur non fuisti filius. Non enim aliter confiteri possumus æternum Patrem, nisi confiteamur te cœternum filium. Ex filio namque pater dicitur, & quia semper pater fuit, semper habuisse filium dubium non est,

Te quoque credo Spiritum sanctum verum Deum, nō factum, non creatum, nec genitum, neque ingenitum: sed ex patre & filio inenarrabiliter procedentem, & in patre, simulque filio substantialiter permanētem. Sic igitur ab utroque procedis, vt inseparabiliter in utroque permaneas. atque ita Deo patri & filio per omnia æqualem, cœternum, consubstantialē: vt neque potestate, neque volūtate, neque æternitate, neque substantia differri possis ab eis, neque præcidi à quibus procedis.

Igitur

Igitur æternum Patrem sine natiuitate, æternum Filium cum natiuitate, æternum Spiritum sanctum cum processione sine natiuitate: totum patrem in filio & Spiritu sancto: totum filium in patre & Spiritu sancto: totum Spiritum sanctum in patre & filio permanentem, Patrem filium & Spiritum sanctum vnum Deum, omnipotentem, vna Maiestate, vna æternitate, ex tunc & nunc, semper & vbique regnantem corde credo, ore confiteor, & mente diligo.

PRIMA ORATIO AD SAN-
ctissimam Trinitatem, de magnitudine
Maiestatis eius.

Ex lib. 5
Memori-
alis vitæ
Christia-
næ Gra-
natenfis.

Domine Deus, expers principij, immortalis, incomprehensibilis, incircumscripte, incorporee, indefinite, imperuestigabilis, inuisibilis, immutabilis: vbique præsens, sed latens, vbique totus, sed immensus, qui sapientia tua nunquam satis laudanda immensum hunc mundum creasti, in ipsoque hominem collocasti, Sancta Trinitas, vnus Deus miserere mei.

Luc. 18.

Luc. 7.

Si Publicanus ille Euangelicus non ausus fuerit oculos suos ad cælum attollere, sed à longè stans pectus suum percusserit, dicens; Deus propitius esto mihi peccatori: Si peccatrix illa sancta timuerit in conspectum Domini venire, sed stans retro secus pedes eius lachrymis ab oculis suis defluentibus peccatorum

suorum

suorum remissionem impetrauerit: Si sanctus ille Patriarcha Abraham volens cum te Deo sermonem miscere, dicebat; Loquar ad Dominū meū, cū sim puluis & cinis. Si illi omnes tam humiles, cuique reuerentes fuerūt, in conspectum diuinæ Maiestatis tuæ venientes, cū tamē essent sanctissimi; quid faciet pauper & miserrimus peccator, qualis ego sum? quid faciet puluis & cinis? quid faciet abyssus omnium miseriarum & peccatorum? Sed quia, mi Domine, non possum obtinere timorem illum illamque reuerentiam quæ tantæ Maiestati debetur, nisi meos oculos in ea immitto figam, da mihi licentiam vt audeam oculos meos ad te tollere, nec splendor gloriæ tuæ aspectus mei fragilitatē impediat. Video quidem te esse magnum illum Deum, qui omnem intellectus nostri captum transcendit. Scio nullum intellectum creatum te posse comprehendere, & quamuis hoc ita sit, non possum tamen facere quidquam vtilius, quā vt oculos in te figam meos.

Igitur, ō Summe, omnipotentissime, misericordissime, iustissime, pulcherissime, fortissime, stabilissime, simplicissime, perfectissime, incomprehensibilis, secretissime, & tamen omnibus præsens, inuisibilis & tamen videns omnia; immutabilis omnia mutans & renouans, quem spatia non dilatant, nec angustiae coarctant, nec varietas mutat, nec corru

ptio perdit, nec tristia conturbant, nec læta mouent in sua essentia : cui nec obliuio tollit, nec memoria quicquam addit, nec præterita præterierunt, nec futura succedent : cui nihil dedit principium, nec tempus augmentum, nec finem quicquam daturum est : viuus enim & regnas in æternum. Tu es ille qui possides omnia à termino vsque ad terminū, & qui cuncta disponis suauiter. Tu es ille, qui creasti omnia sine vlla necessitate; & conseruas omnia sine labore; & tegis omnia sine molestia; & moues omnia ipse immobilis. Tu totus es oculus, totus pes, totus manus; tu enim vides, sustines, & operaris omnia. Tu in omnibus es, nec tamen cōclusus; tu extra omnia, nec tamen disiunctus; tu sub omnibus, nec tamen subiectus; tu super omnia, nec tamen eleuatus. Tu es summus & verus Deus, summa & vera vita, à qua & per quam vitam habent & viuunt omnia. Tu Domine es ipsa bonitas & pulchritudo, à qua, & per quam pulchrum & bonum est omne, quod pulchrum & bonum est. Tu es ille, qui iubet nos quærere, & das inuenire; iubet pulsare, & aperis, quando te inuocamus. Tu es ille, à quo recedere cadere est; & cui appropinquare est resurgere, & in quo stare est in æternum durare. Tu es ille quem nemo deserit nisi insipiens, nemo quærit nisi vocatus, nemo inuenit nisi purgatus. Tu es ille quem cognoscere est

re est viuere; cui seruire regnare est; quē
 laudare salus est, & tu ipse gaudium es
 laudantium te. Quid ego itaque, Rex mi
 & Saluator mi, quid ego dicam? ego in-
 quam miser vermiculus quid dicam de
 tanta laudum magnitudine? Dicam
 id quod Prophetæ tui Spiritus numine
 afflati dixerunt; Quis mensus est pugil-
 lo aquas, & cælos palmo ponderauit?
 Quis appendit tribus digitis molem ter-
 ræ, & librauit in pondere montes, & col-
 les in statera? Quis adiuuit Spiritū Do-
 mini, aut quis consiliarius eius fuit, &
 ostendit illi? Cum quo iniit consilium,
 & instruxit eū, & docuit eum semitam
 iustitiæ, & erudiuit eum scientiam, &
 viam prudentiæ ostendit illi? Ecce, Gen-
 tes quasi stilla situlæ, & quasi momen-
 tum stateræ reputatæ sunt: Ecce, Insulæ
 quasi puluis exiguus. Et ligna Libani nō
 sufficient ad succendendum, & anima-
 lia eius non sufficient ad holocaustum.
 Omnes gentes quasi non sint, sic sunt
 coram eo, & quasi nihilum & inane re-
 putatæ sunt ei. Etenim si in præsentia
 Solis omnes stellæ cæli non lucent, imò
 sunt tanquam non essent, cum tamen &
 ille, & hæ creaturæ sint; quid erunt o-
 minia creata in conspectu tuo, qui Crea-
 tor es totius Vniuersi?

Esa. 40.
 Sap. 11.

Igitur, ô Domine, te principaliter ad-
 oro cum humilitate profunda, & reue-
 rentia tibi debita, cum illa adoratione
 latriæ, quæ tibi soli debetur, nulli autem

Apoc. 22.

creaturæ: quo cultu adorant te Dominationes cælestes & omnes mundi creaturæ: quarum licet multæ non cognoscant te, non possunt tamen non adorare te illarum singulæ in suo genere, & suo modo diuinitatis tuæ sceptro homagium offerre, tuamque magnitudinem cognoscere: Tu enim solus es Deus Deorum, tu solus Rex regum, tu solus Dominus dominantium, & causarum causa. Tu es A & Ω, Principium & Finis omniū rerum. Tu principiū es sine principio, & sine fine finis. Tu solus es ille qui es: omnia namque alia, quantumvis præstantia, habent esse ab alio mutuatum: esse autem tuum est summum, perfectum, vniuersale, & quod à nullo alio dependet. Ideoque meritò diceris esse, qui es: quia quidquid creatum est, non habet esse, si tecum conferatur.

Apoc. 3.

Quare, Domine, agnoscens omnia hæc magna & mirabilia, prostratus ante pedes diuinæ tuæ præsentiae, cum omni qua possum humilitate te adoro, quomodo adorant te beati illi Spiritus, qui procidentes ante sedentem in throno Maiestatis tuæ, & mittentes coronas suas ante pedes tuos, adorant te, & confitentur omnia quæ habent, à te procedente. Sic & ego Domine, qui sum omnium creaturarum vilissimus, adoro te, & milles te veneror, confitens, quia tu es meus verus Deus & Dominus, quodque omne id quod sum, & in me inuenio, vt
esse,

esse, viuere, & spirare, totum tuum est; atque ideo omnes creaturas inuoco, vt simul mecum te laudent, te adorent, te glorificent, diuino illo cantico Prophetæ, dicentis; Venite, exultemus Domino, iubilemus Deo salutari nostro. Præoccupemus faciem eius in confessione, & in psalmis iubilemus ei. Quoniã Deus magnus Dominus, & Rex magnus super omnes Deos. Quia in manu eius sunt omnes fines terræ: & altitudines montium ipsius sunt. Quoniam ipsius est mare, & ipse fecit illud: & siccâ manus eius formauerunt. Venite, adoremus, & procidamus, & ploremus ante Dominum qui fecit nos: quia ipse est Dominus Deus noster, & nos populus pascuæ eius, & oues manus eius.

Psal. 94.

Quamobrem, Domine mi, cùm tu adeò dignus sis, qui adoreris & honoreris; da mihi gratiam, vt sine intermissione adorem te; non tantùm verbis & lingua; sed corde etiam, opere, & tota vita mea. Tu qui viuis & regnas per omnia secula seculorum. Amen.

ORATIO SECUNDA AD

sanctissimam Trinitatem, de magnitudine diuinæ Maiestatis.

OMnipotens æterne Deus, trinus in Idem ibi
 personis, vnus in substãtia, æquum dem.
 omnino & rationi planè consentaneum
 est, vt totam vitam meam exercitio pœnitentiæ & timoris impendā, cùm tam

Psal. 64.

iustas habeam & plangendi & metuen-
di causas. Quemadmodū igitur magni-
tudo gloriæ tuæ me impellit ad colen-
dum & adorandum te: sic etiam iubet
vt laudem & glorificem te. Te enim de-
cet hymnus in Sion, & tibi reddetur vo-
tum in Ierusalem; eo quòd pelagus es om-
nium perfectionum, & mare sapien-
tiæ, potentiæque, pulchritudinis, magni-
tudinis, diuitiarum, suauitatis, maiesta-
tisque abyssus; in qua sunt omnes per-
fectiones, & pulchritudines omniū cre-
aturarum, quæ in cælo & in terra sunt,
& singulæ perfectiones istæ in summo
gradu, & fastigio in te inueniuntur. Ti-
bi collata omnis pulchritudo deformi-
tas est; omnes diuitiæ paupertas, omnis
fortitudo debilitas, omnis sapiētia igno-
rantia, omnis dulcedo amaritudo, & vt
paucis multa concludam, omnia quæ in
cælo & in terra sunt, multò minùs in
tuo conspectu fulgent, quàm exigua can-
dela in splendore Solis.

Tu in omni re perfectus es, sine ali-
qua deformitate, magnus sine quantita-
te, bonus sine qualitate, fortis sine infir-
mitate, verus sine falsitate, sine loco ubi-
que præsens, sine diuisione in omni loco
totus. In magnitudine es infinitus, in
virtute omnipotens, in bonitate sum-
mus, in sapientia inæstimabilis, in con-
silijs terribilis, in iudicijs iustus, in cogi-
tationibus secretus, in verbis verus, in
operibus sanctus, in misericordia copio-
sus;

fus; erga peccatores patiens, erga pœn-
tentes pius.

Sed quid potissimum de sapientia tua
dicam, nisi id quod olim dixit Propheta:
Domine intellexisti cogitationes meas
de longè: semitam meam & funiculum
meum inuestigasti. Et omnes vias meas
præuidisti: quia non est sermo in lingua
mea. Ecce Domine tu cognouisti omnia
nouissima & antiqua: tu formasti me, &
posuisti super me manum tuam. Mira-
bilis facta est scientia tua ex me: confor-
tata est, & non potero ad eam. Quò ibo à
spiritu tuo? & quò à facie tua fugiam? Si
ascendero in cælum, tu illic es: si descen-
dero in infernum, ades. Si sumpsero pen-
nas meas diluculo, & habitauero in ex-
tremis maris: Etenim illuc manus tua
deducet me, & tenebit me dextera tua. Et
dixi, Forsitan tenebræ conculcabunt me:
& nox illuminatio mea in delicijs meis.
Quia tenebræ non obscurabuntur à te, &
nox sicut dies illuminabitur: sicut tene-
bræ eius, ita & lumen eius. Oculi enim
eius (inquit alius) super vias hominum,
& omnes gressus eorum considerat. Non
sunt tenebræ, & non est vmbra mortis,
vt abscondantur ibi, qui operantur ini-
quitatem.

Sed quid dicam de magnitudine tuæ
potentiæ? dicam quod olim dixit Pro-
pheta me docens: Deus autem rex noster
ante secula, operatus est salutem in me-
dio terræ. Tu confirmasti in virtute tua:

Psal. 138.

Iob. 34.

Psal. 73.

Psal. 88.

Iob 12.

contribulasti capita draconum in aquis. Tu confregisti capita draconis: dedisti eum escam populis Æthiopum. Tu dirupisti fontes & torrentes: tu siccasti fluuios Ethan. Tuus est dies, & tua est nox: tu fabricatus es auroram & Solem. Tu fecisti omnes terminos terræ: estatem & ver tu plasmasti ea. Et in alio loco dicit idem Propheta: Domine Deus virtutum, quis similis tibi? potēs es Domine, & veritas tua in circuitu tuo. Tu dominaris potestati maris: motum autem fluctuum eius tu mitigas. Tu humiliasti sicut vulneratum, superbum: in brachio virtutis tuæ dispersisti inimicos tuos. Tui sunt cæli, & tua est terra, orbem terræ & plenitudinem eius tu fundasti: aquilonem & mare tu creasti. Thabor & Hermon in nomine tuo exultabunt: tuum brachium cum potentia. Cognouit hanc tuam omnipotentiam B. Iobus, cum ait: Apud ipsum est sapientia & fortitudo, ipse habet consiliū & intelligentiam. Si destruxerit, nemo est qui ædificet: si incluserit hominem, nullus est qui aperiat. Si continuerit aquas, omnia siccabuntur: & si emisit eas, subuertet terram. Apud ipsum est fortitudo & sapientia: ipse nouit & decipientē, & eum qui decipitur. Adducit consiliarios in stultum finem, & iudices in stuporem. Baltheum regum dissoluit, & præcingit fune renes eorum. Ducit sacerdotes inglorios, & optimates supplantat, Com-

mutans

mutans labium veracium, & doctrinam
senum auferens. Effundit despectionem
super principes, & eos qui oppressi fue-
rant releuans. Qui reuelat profunda de
tenebris, & producit in lucem vmbra
mortis. Qui multiplicat gentes, & perdit
cas, & submersas in integrum restituit.

Hæc, ô Domine, sunt testimonia tuæ
magnitudinis: & quid de diuitijs tuæ
gloriæ, de quæ vena tuæ felicitatis dicam?
Si peccaueris, inquit Scriptura, quid ei
nocebis? & si multiplicatæ fuerint ini-
quitates tuæ, quid facies contra eum? por-
rò si iustè egeris, quid donabis ei? aut
quid de manu tua accipiet? Homini qui
similis tui est nocebit impietas tua, & fi-
lium hominis iuuabit iustitia tua. Sed
tu, Domine, talis es, & tam beatus, vt bo-
norum alterius non egeas: talem ego te
confiteor, pro tali te laudo, & glorifico
nomen sanctum tuum. Infunde lumen
cordi meo, & da verba in ore meo, vt
cor meum tuam magnitudinem sem-
per cogitet, & laus tua in ore meo sit
semper. Sed quia laus hæc nō est pulchra
in ore peccatoris, ideo rogo Angelos ce-
li omnes, omnesque mundi creaturas, vt
te vnà mecum laudent, meamque sup-
pleant inopiam, inuitans illas ad id, glo-
rioso illo cū cantico, quod cecinere pue-
ri in medijs flāmis fornacis illius Baby-
lonicæ, dicentes: Benedictus es Domine
Deus patrum nostrorum, & laudabilis,
& superexaltatus in secula. Et benedi-

Iob 35.

Dan. 3.

ctum nomen gloriæ tuæ, sanctū & laudabile & superexaltatum in omnibus seculis. Benedictus es in throno regni tui, & superlaudabilis & superexaltatus in secula. Benedictus es qui intueris abyssos & sedes super Cherubin, & laudabilis & superexaltatus in secula. Benedictus es in firmamento cæli, & laudabilis & gloriosus per omnia secula seculorum. Amen.

ORATIO AD S. TRINITATEM III.

Theologi
alicuius
doctissi-
mi è Græ-
co in La-
tinū ver-
sa.

DEus Sancte Sanctorum, Deus omnipotēs, Deus æterne, Deus fortis, Deus spirituū, & omnis carnis, à cuius vultu tremit & cælū & terra, cuiusque vultui cuncta obediunt elementa, in vnitte trinitas, & in trinitate vnitās, Pater, Filius, & Spiritus sanctus : essentia mihi esse præstans, vita me viuificans, lumen me illuminans, scientia me scire faciens, omni tamen essentia, vita & lumine, scientiaque superior : te adorant, te celebrant, omnes creaturæ. Et ego mea erga te fide adductus, hodie genua cordis mei flecto, sub tuæ Maiestatis pedes.

Gratias tibi ago, quòd me cùm nihil essem, non solum finxisti, sed etiam ad imaginem tuam, hoc est, optimè finxisti; quòd mihi nihil promerito pietatem indideris : quòd arcanis Ecclesiæ tue Sacramentis sanctificaueris : quòd me

bonis

bonis tuis omnibus iam inde à puero educaueris. Atqui ô Conditor & cæli & terræ & maris, cùm tibi vsui esse non queam, cuiusnam gratia tuam in me beneficentiam ostendis? Quî fit vt me in tantum diligas? Nam tibi quid dedi, cuius causâ mihi referas gratias? At vbi erâ antequam fierem, vt potuissem prior in te benignitatem ostendere? Verum tuo beneficio & olim sum factus, & innumerabilibus donis ornatus. Tuum beneficium, & tua benignitas omnia hæc fecit. Ipse verò cùm pro horum vno gratias agere non sufficiam, quomodo pro tot millibus referre possem? Et quomodo tenebrę laudabunt lucem? quomodo vanitas veritatem? quomodo mortalis, cui est naturæ fragilitas, tuam immortalitatem? quomodo materia crassa eum, qui ab omni materiæ pondere est immunis? quomodo immundities puritatem? Quis verò collaudabit opera tua? quis tuas annunciabit laudes? Sed tu vt indulgentissimus Pater vota nostra suscipis, & liberorum tuorum gratiarum actiones qualescunque boni consulis.

Itaque dignum me fac Deus bone, vt tibi gratias agam, vt tuæ charitati perpetuò adhæream, vt tibi pro beneficijs & multis & magnis, quibus me honoratum fecisti, gratias agā, vt periculorum nomine, quibus me sæpe liberaisti, gratias persoluā: pro omnibus denique tum iucundis, tum aduersis officium tibi re-

pendam. Quandoquidem omnia in bono iudicio fecisti; quandoquidem tu Dominus existis animarū & corporum nostrorum, vitæ & mortis, sanitatis & morbi, felicitatis & infelicitatis. Breuiter omnium rerum momēta in tua sunt manu. Lætificas beneficia conferendo, contristas obiurgando, differs corrigendo, & consolaris nostram ignauiam ad te reuocando.

Gloria variæ tuæ potentiae, Laus insatiabili tuo in genus humanum amoris. Guberna & vitæ nostræ reliquum dux mitissimus & gubernator vigilantissimus. Eripe me Domine ab omnibus inimicis meis, visibilibus & inuisibilibus. Porrige benignam manum tuam, quæ nos ex profundis aquis frementium huius mundi fluctuū extrahat, eripiatque, quæ nostræ nauigationis discrimina alleuet. Guberna ipse mitissime Rex magistratum, quem nobis credidisti. Tu enim gubernator, nos clauus: dirigat igitur clauum tua manus inuisibiliter, quò ipsa voluerit, quò ipsa decreuerit. Neque enim ego in arcu meo sperabo, neque gladius me seruabit; sed dextera tua, sed brachium tuum, sed illuminatio clarissima vultus tui. Fiat optime Rex voluntas tua, vt in cælo & in terra, sic & in nobis. Quòd si fortè à tuæ voluntatis decretis declinauerimus, ne statim iram conceperis misericors Deus, quum non ignores, quàm fragile sit nostræ creature

figmentum. Quin si tu vis seruare me, potes; fac idem te velle. Nisi enim tua potentia me firmauerit, ego quod volo, non possum.

Itaque consolare cor meum ineffabili tuæ benignitatis dulcedine; nimirum vt futuri gaudij æterni, quo in te fruemur, tenuis quidem sensus nostram subleuet mentem. Postremò dignum me redde, qui post præsentem hanc vitam percurram ad te Dominum & Deum, vt tui regni diuitias liceat inspicere, & claritatem tui vultus contemplari. Id quod ratum fac sancte Rex Deus verè & conditor meus, per tuum & matris Deipatæ, ac sanctissimæ Virginis filium, Dominum nostrum Iesum Christum. Amen.

I ORATIO AD PATREM,

qua iustificationem petimus.

Qui in æternum dominaris, & solus potes omnia, Deus cæli & terre moderator, ad cuius nutum omnes creature contremiscunt, & cæli cardines nutant. O Domine cælestis, perfectus opifex, & figule, ego miser de limo effectus, vel potius limus sordidus, cum timore & trepidatione ad thronum tuæ Maiestatis venio; agnosco & confiteor meam imbecillitatē, scio quòd nihil sum, imò quòd abominatio mera & horror existam coram tuo aspectu, si tua gratia & misericordia destituar. Sine te nihil boni cogito, sine te nihil boni facio, sine

Ioannes
Faber.

te sum reptile quoddam deperditum.

Non possum saluari sine te, in tua manu est omnis mea salus: ago tibi gratias, ô Deus, vel propter hoc, quòd eam cognitionem mihi dederis, vt videam & agnoscam me nihil esse, vel posse absque te. Tu es figulus, ego limus; qualem me esse vis, talem potes effingere & formare: si beatum me reddis, ostendis misericordiam tuam & gratiam: si conijcis in perditionem, demonstras iustitiam, & tuum exequeris iudicium, nec meum est contradicere, cur hoc, aut qua ratione facis: Etenim cui tu bene vis, misereris. Hæc ego mecum reputo, ô Domine, & iudicia tua extimesco.

Cùm igitur omnis mea incolumitas & salus ex te pendeat, & in manu tua atque potestate sita sit: cumque vniuerso mundo maximè placabilem & misericordem Deum te exhibueris, eumque te esse re declaraueris ipsa, per hoc quòd filium tuum charissimum Iesum Christum innocentem pro nobis noxijs mori, & nostra peccata suo sanguine in cruce voluisti expiare: cùm denique docueris nos in omni nostra perturbatione te inuocare, tuam gratiam & misericordiam efflagitare, quòd daturus sis nobis omnia, quæ in nomine filij tui sumus petaturi, venio ad te limus vel massa lutæ, ô clemens & cælestis figule, à te peto suppliciter, vt misericordia tua vtaris, ex hac, licet indigna, materia facias vasculum.

lum ad æternā gloriam. Digneris etiam ex mera tua gratia ad fidem veram, ad spem solidam, ad castum & sanctū amorem voluntatem meam permouere, vt per hæc tua dona iustificatus integer, perfectus, bonus & sanctus, secundum tuum beneplacitum, in medio vitæ meæ, & in fine, tum in extremo die iudicij inueniar.

O mitis Pater, concede mihi veniam omnium peccatorum meorū, per mortem filij tui amantissimi Iesu Christi. Fac vt tibi vni placeam, tibi gratus sim filius, & hæres: adauge in me clementer iustitiam qualemcunque diuinitus mihi datam, & concessam, vt in ea pergam viuere: auge in me fidem acceptā, confirma spem meam, accende & illustriorem redde in me tui amorem, vt auxilio tuo, tuæque gratiæ præsentia, & ex operatione tuæ sanctissimæ voluntatis vitam eternam, quam tu nobis promissisti, impetrare queam, vt te laudem, tibi que gratias agam in regno tuo per æterna secula. Amen.

II Oratio ad Patrem.

Domine Deus noster, Deus pie, Deus bone, Deus omnipotens, Deus ineffabilis, & incircumscriptæ naturæ, Deus institutor omnium rerum, & Domini nostri Iesu Christi pater, qui eundem dilectum filium tuum Dominū nostrum dulcissimum misisti de sinu tuo, ad pu-

August. in
Meditat.
cap. 17.

Ioan. 14.

blicum bonum nostrū, suscipere vitam nostram, vt nobis donaret suam, esset-
 que perfectus Deus ex te patre, & perfe-
 ctus homo ex matre : totus Deus, &
 totus homo; vnus idemque Christus,
 æternus & tēporalis, immortalis & mor-
 talis, creator & creatus, fortis & infir-
 mus, victor & victus, nutritor & nutri-
 tus, pastor & ouis, temporaliter mortu-
 us & tecum viuens in æternum, suis di-
 lectoribus vitæ municipium promit-
 tens, suis discipulis dixit; Quodcunque
 petieritis Patrem in nomine meo, dabit
 vobis.

Per ipsum summum Sacerdotem, ve-
 rum Pontificem & verum pastorem, qui
 se tibi obtulit in sacrificium, ponens a-
 nimam suam pro grege suo, te rogo :
 per ipsum, qui sedet ad dexteram tuam,
 & interpellat pro nobis, Redemptorem
 & Aduocatū nostrum bonitati & pie-
 tati tuæ supplico, clementissime, aman-
 tissime & benignissime amator homi-
 num Deus, vt des mihi cum eodem filio
 tuo & Spiritu sancto te in omnibus be-
 nedicere, & glorificare, cum multa cor-
 dis contritione & lachrymarum fonte,
 cum multa reuerentia & tremore : quia
 quorum vna est substantia, vnum est &
 datum.

Sap. 9.

Sed quoniam corpus quod corruppi-
 tur aggrauat animam, excita quæso tor-
 pore meū tuis stimulis, & fac me stre-
 nuè perseuerare in præceptis & laudibus

tuis.

Psal. 38.

Ioan. 6.

Ioan. 14.

tuis die ac nocte. Tribue vt cōcaleat cor meum intra me, & in meditatione mea exardescat ignis. Et quia ipse vnicus tuus natus, in quo tibi complacuisti, dixit; Nemo venit ad me, nisi pater, qui misit me, traxerit eum: & Nemo venit ad patrem nisi per me; Obsecro & suppliciter rogo, trahe me semper ad ipsum, vt ipse me tandem perducatur ad te illuc, vbi est in dextera tua sedens: Vbi est sempiterna vita, sempiternè beata: vbi est amor perfectus & timor nullus: vbi est dies æternus & vnus omniū spiritus, vbi summa est & certa securitas, & segura tranquillitas, & tranquilla iucunditas, & iucunda felicitas, & felix æternitas, & eterna beatitudo, & beata tui sine fine visio atque laudatio: Vbi tu cum illo, & ille tecum in communione sancti Spiritūs æternaliter ac sempiternaliter viuis & regnas Deus, per omnia secula seculorum. Amen.

III Oratio ad Patrem, vt propter Filium nostri misereatur.

Frāciscus
Isella in
sua insti-
tutiōe ad
moriētes.

Pater noster qui es in cælis, ecce ego loquor ad te, cū sim puluis & cinis. Non sum dignus vocari filius tuus, sed obsecro te, delicta iuuentutis mee & ignorantias meas ne memineris. Ne secundum peccata mea facias mihi, neque secundum iniquitates meas retribuas mihi: sed secundum multitudinē miserationum tuarum dele iniquitatem meam.

Obedi-

Obedientia filij tui dilectissimi omnem inobedientiam meam, qua pro-
caciter tua præcepta contempsi, excuset.
respice in filium obedientē, & inobedi-
enti famulo ignosce: si me repellas, quis
me suscipiet? recipe me quæso pro ista
charitate, quā filius tuus me redemit.

Si hæc mea oratio multis nefandis
criminibus maculata te ad iram prouo-
cet, purissima caro filij tui, amore mei
tam crudeliter flagris lacerata, te moue-
at ad misericordiā: humilitas eius me-
am tegat superbiā, labores eius sarciant
meam negligentiam, ieiunium eius ab-
tergat meam crapulam & intemperan-
tiam. liberalitas eius meam auaritiam,
patientia eius meam iracundiam, puri-
tas eius meam immunditiam, charitas
eius meam deleat inuidiam, & iustitia
eius pro mea satisfaciat iniquitate.

Quid mali facere potui, o Pater cæle-
stis, quod dilectus tuus filius suo sangui-
ne non sustulit, & abluuit? Intuere quæso
sancta eius vulnera roseo perfusa sangui-
ne, & putida peccatorum meorum vul-
nera tibi sint abscondita. Fateor debitum
meum est magnum, sed infinitus est the-
saurus, quem tuus nobis filius, Redem-
ptor meus, suo sanguine comparauit,
cum quo, & cum Spiritu sancto viuus &
regnas in secula seculorum. Amen.

AD FILIVM ORATIO I.

Gene-

Hominis
cuiusdam
docti &
pij.

Generis humani Conditor ac Redemptor Iesu Christe, qui dixisti; Ego sum via, veritas, & vita: Via doctrina, præceptis, & exemplis: veritas in promissis; vita in præmio: oro te per ineffabilem tuam charitatem, qua te totum seruandis nobis impendere dignatus es, ne patiaris me vnquam aberrare abs te, qui via es; nec vnquã diffidere promissis tuis, qui veritas es, & præstas quicquid polliceris; nec in vlla alia re conuiuiscere, quoniã vita es æterna, vltra quam nihil est quod desideretur, neque in cælo, neque in terra.

Per te didicimus certum & expeditum iter ad verã salutem, ne diutius in huius vitę labyrinthis aberraremus. Tu nos exacte docuisti quid credere, quid agere, quid sperare, in quo conuiuiscere debeamus. Per te didicimus, quã ex primo illo Adam fuerimus infeliciternati; per te didicimus, non esse spem salutis, nisi per fidem in te.

Te vnicam esse lucem, quæ præluces omnibus per huius seculi desertum, perque mentis nostrę noctem, à tenebris Ægyptiorum proficiscentibus ad illam beatam terram, quam promissisti mitibus, tuamque mäsuetudinem imitantibus. In nobis enim nihil erat præter profundam caliginem, qui neque calamitatem nostram videre poteramus, neque vnde mali remediũ petere debebamus. Tu dignatus in terram descendere, di-

gnatus

gnatus nostram naturam assumere, vt doctrina tua discuteret nostræ ignorantia caliginem ; præceptis tuis dirigere pedes nostros in viam pacis; vitæ tuæ exemplis strauisti nobis viam ad immortalitatem, ac tuis calcatam vestigijs, è salebrosa & aspera commodam leuemque nobis reddidisti. Ita nobis via factus es, quæ nescit errorem, in qua ne lassesceremus, tua benignitas nos magnis, certisque promissis fulcire dignata est. Quis enim posset delassari, reputans per tua vestigia ingredienti paratam esse vitæ cælestis hæreditatem ? Ergo dum in hoc itinere sumus, spem certâ baculi loco nobis esse voluisti, qua sustentemur.

Nec his contenta fuit tua bonitas, sed agnoscens nostræ carnis imbecillitatem, interim solatio tui Spiritûs subinde reficis vires nostras, quo ad te curamus alacriter. Atque vt tu nobis factus via, propellis omnem errorem ; ita factus veritas, tollis omnem diffidentiam.

Denique factus nobis vita : das hîc peccato mortuos viuere per Spiritum tuum, omnia viuificantem, donec in resurrectione abolita prorsus omni mortalitate semper tecum, & in te viuemus: cùm tu eris nobis omnia in omnibus. Vita enim æterna est nosse Patrem, & Filium, & Spiritum sanctum esse vnum verum Deum.

Proinde obsecro clementissime Seruator,

uator, vt adaugeas famulo tuo fidem, ne vacillem vnquam in cælesti tua doctrina ; adauge obedientiam, ne deflectam vnquam à præceptis tuis ; adauge constantiam, vt tuis ingrediens vestigijs, nec Satanæ blandimentis illiciar, nec terribilamentis deiiciar : sed in te, qui solus es vera via, perseuerem, vsque ad mortem. Adauge mihi fiduciam, vt tuis fretus promissis, nunquam segnescam in studio pietatis ; sed à tergo relictorum oblitus, semper ad perfectiora contendam.

Adauge gratiam in me tuam, vt indies magis ac magis in meipso mortuus, viuam, agarque Spiritu tuo ; nihil metuens præter te, quo nihil est amabilius : in nullo glorians, præterquam in te, qui vera es gloria Sanctorum omnium : nihil expetens, præter te, quo nihil est melius ; nihil desiderans, præter te, qui plena, perfecta que es felicitas cum Patre & Spiritu sancto per omnia secula. Amen.

Ad Filium Oratio II.

NE memineris dulcissime Iesu tuæ iustitiæ aduersus peccatorem tuum, sed esto memor benignitatis tuæ aduersus creaturam tuam. Ne memineris iræ aduersus reum, sed memor esto miserationis erga miserum. Obliviscere superbi qui te ad iram prouocauit, respice nunc miserum te inuocantem. Quid

enim

August.
lib. Medit.
tat. cap. 39

enim est Iesus, nisi Saluator? Ergo Domine Iesu per te metipsum exurge in adiutorium mihi, & dic animæ meæ; Salus tua ego sum. Multū Domine in tua bonitate confido, multum spero, quoniam tu ipse docuisti & iussisti nos petere, quærere & pulsare; & ideo tua oratione admonitus, peto, quæro, pulso. Sed tu, o clementissime, qui iubes petere, fac vt accipiam: consulis quærere, da vt inueniam: doces pulsare, aperi mihi pulsanti, & ianuam tuæ gratiæ mihi reclude.

Confirma me infirmum, repara me perditum, suscita me mortuū, & omnes sensus meos, cogitationes & actus dirigere & gubernare digneris in beneplacito tuo, vt de cetero tibi seruiam, tibi viuam, tibi que me totum tradam. Scio Domine mi, quia ex hoc quod me fecisti, debeo tibi me ipsum: & quia me redemisti, & pro me homo factus es, deberem tibi plus quam me, si haberem. Ecce nec plus habeo, nec quod habeo dare tibi possum, sine te: sed accipe me tu, & trahe me ad te, vt tuus sim in imitatione, & dilectione, sicut tuus sum condicione & creatione. Qui viuis & regnas in secula. Amen.

Ad Filium Oratio III.

O Oriens, o splendor lucis æternæ, o speculum diuinæ Maiestatis, qui cum in forma Dei esses, non rapinam arbitratus es, æqualem esse te Deo: propter
nimiam

nimiam tamen charitatem tuā in nos, formam serui assumpsisti, & habitu inuentus es vt homo, vt nos homines perpetuæ damnationi obnoxios, à potestate Dæmonis erueres, atque hæreditatis æternæ participes nos faceres. Cuius humilitatis & charitatis tuæ excellentiam quoties mecum perpendo, obstupefactus exclamo ; O Domine quid est homo, quòd memor es eius ? aut filius hominis, quia visitas eum ? Visitas inquam eum in visceribus misericordiæ tuæ ; non enim superficiem misericordiæ tuæ exhibuisti nobis, sed intima quæque : totam nobis illam effundens, nihil tibi reseruans, quod nobis impartitus non es, omnia factus in omnibus.

Psal. 8.

Si vulnera mea curare cupiam, medicus es : si febribus æstuem, fons es : si grauer iniquitate, iustitia es : si auxilio indigeam, virtus es : si mortem timeam meam, vita es : si cælum desiderem, via es : si tenebras fugiam, lux es : si cibum quæram, alimentum es. Quid multis ? sicut per peccatum Adæ omne malum in nos deriuatum est, sic per iustitiam tuam omne bonum in nos effusum est, neque enim Adam plus potuit in malo, quam tu in bono. Hæc fides mea est, hoc certissimè credo. Quænam enim iustitia est, vt plus noceat humana atque terrena, quam valeat diuina atque cælestis generatio ?

Tu es Verbum vitam præbens vt opi-

fex ;

fex; tu magister bene viuere docens; tu Deus semper viuere suppeditans. Tu antiquæ legis populo ignobile vinum propinasti, nobis optimum seruasti: illos vili hircorum & vitulorū cruore mundaſti, nos in extremo ſeculo pretioſo tuo ſanguine expiaſti: illos in terram reſpromiſſionis, anguſtis limitibus terminatam, intromiſiſti: nobis amplos paradifi ſinus pandis; tu inæſtimabile præparas regnum; tu introducis in cælum.

Pro tot, tantisq̃ue beneficijs quid retribuam tibi Domine? etiam ſi per ſingulos dies morerer pro te, qui me ita dilexiſti, nequaquam meritū exoluerem: imò ne minimam meriti partem reponerem. Sed ſcio quid à me requiras Domine: Vis cum generoſitate pretij conſentire dignitatem redempti: tale conuerſationis noſtræ expectas meritum, quod ſanguinis tui poſſit valere cōmercium. Quod cū ſine tua gratia reddere non poſſim, ſupplex oro te Domine, ſerua opem, vt cuſtodiam ſolicitè quod tanti ſudoris cōmercio redemiſti: da ne quod tu eluiſti ego iterum polluam; vulnera quæ tu ſanaſti, ego iterum ſcindam: & quod ſemel in me diluit ſanguis tuus, ruſſum excoquere neceſſe habeat ignis inferni.

Regnum peccati in me deſtrue, non ſolū verba & opera mala exclude, ſed prauas quoque cogitationes, noxia conſilia, affectus furioſos, & ſœdum huius

carnis cursum cordi meo euellere. Membra mea ad iustitiā in sanctificationem obsequio tuo adhibeantur; in omnibus tibi placitis operibus exuberanter crescā, nec posthac viuā in carne, sed ab omnibus illius maculis & contagione abhorream, adeoque in regnum tuum pretioso sanguine tuo inauguratus, peccatorum meorum perfectam remissionem indies plenius consequar.

AD SPIRITVM SAN-

Etum Oratio I.

SAncte Spiritus Paraclete, qui in die Pentecostes super Apostolos descendisti, charitate, gratia & sapientia eorum implens pectora: oro te per illam ineffabilem misericordiā & liberalitatem, vt digneris finem animæ meę implere tua gratia, ineffabiliq̃ue amoris tui dulcedine interiora mea viscera perfundere. Veni sancte Spiritus, & emitte cęlitus lucis tuę radium.

Granatēs.
lib. 5 Memorialis.

Veni pater pauperū, veni dator munerum, veni lumen cordium. Veni consolator optime, dulcis hospes animæ, dulce refrigeriū. Veni medice languentium, veni purgator criminū, veni fortitudo fragilium, veni peccantium remedium. Veni doctor humilium, veni destructor superbiorum, veni omnium virtutum singulare decus, morientiū vnica salus. Veni Deus meus, & adorna tibi thalamum, in quo dignè tecum omni-

bus

bus diuitijs & misericordijs tuis suscipiam. Inebria me dono sapientiæ, illumina me dono intellectûs, rege me dono consilij, confirma me dono fortitudinis, instrue me dono scientiæ, vulnera me dono pietatis, & transfige cor meum dono sancti tui timoris.

O dulcissime amator mundorû cordium, vre & inflamma omnia mea viscera igne amoris tui suauissimo : vt ignita in te rapiantur, & in te ferantur, qui es centrum & omnium bonorû meorum finis vltimus. O dulcissime sanctarum animarum amator, cùm non ignores me nihil ex me, neque per me posse, extende piam manum tuam super me, & fac vt exeam à me, & perueniam ad te. Mortifica, extingue & dissolue in me, quidquid tibi displicet, vt in omnibus me tuę volûtati facias conformem: vt vita mea in posterum perfectum sit coram te sacrificium, seu potius holocaustum, quod tui amoris igne totum comburatur.

O quis mihi tribuet, vt ad summum illud bonum tandem perueniam? Respice Domine, respice & vide quomodo hæc paupercula creatura ad te nocte ac die suspirat, anima mea ad te sitit Deum suum. Quando veniam & apparebo ante faciem gratiæ tuæ? quando intrabo in locum admirabilem tabernaculi tui, vt perueniam ad domû Dei mei? quando me adimplebis lætitia vultus tui? quan-

do

do præsentia tuæ gloriæ satiabor? quando per te liberabor ab omni tentatione, & mortalitatis huius fragilitatem superabo? O fons æterni splendoris, reduce me ad abyssum æterni boni, à quo creatus sum; vt ibi cognoscam te sicut & cognitus sum, teque diligam sicut à te dilectus sum, te videam, teque fruam in societate omnium electorum, quemadmodum & tu me vidisti ab æterno. Amen.

Ad Spiritum sanctum Oratio II.

O Diuini amor numinis, patris omnipotentis, prolisque beatissimæ sancta communicatio, paraclete Spiritus, mœreriū consolator clementissime: tu cordis mei penetralibus potenti illabere virtute, tenebrosa pectoris neglecti latibula corusci tui luminis fulgore irradia & lætifica: tui roris abundātia longo ariditatis marcentia squalore visitando fecunda, tange & faucia cor meum amoris tui iaculo; torpentes medullas flamma tua salutari penetrans; succende intima mentis meæ, sancto feruoris tui igne illustra. Pota me torrente voluptatis tuæ, vt mūdānam dulcedinem, que venenata est, degustare amplius non libeat. Doce me facere voluntatem tuam, quia Deus meus es tu.

O alme Spiritus, o præclare artifex, in quocunque inhabitas, in eo patris pariter & filij condis domicilium. Veni er-

August.
Meditat.
cap. 9.

go benignissime dolentis animæ con-
 solator, in omni tribulatione me protege.
 Veni mundator scelerum, curator vul-
 nerum: veni fortitudo fragilium, & do-
 ctor humilium. Veni orphanorum pius
 pater, viduarum dulcis iudex; veni spes
 pauperum, refocillator deficientium:
 Veni pulcherrimū sydus nauigantium,
 & portus naufragorum: Veni omnium
 viuientium singulare decus, moriētium
 vnica salus veni sanctissime Spiritus,
 veni & misere mei; apta & accommo-
 da me tibi, & cōdescende propitius mi-
 hi, vt mea tuæ magnitudini exiguitas,
 roborique tuo mea imbecillitas, secun-
 dum multitudinem tuarum complace-
 at miserationum, per Iesum Christum
 Seruatorem nostrum. Amen.

Ad Spiritum sanctum Oratio III.

Cāpanus
 Episcop.
 Interāni-
 ensis ora-
 tio. in die
 Pētecost.

SANCTissime Dei amor, quas tibi age-
 mus mortales gratias? Tu nos quan-
 ti sumus effecisti omnes; quidquid ha-
 bemus rerum, aut natura produxit, aut
 productura sit, tu contulisti nobis: feci-
 sti cælum, quo nos ornares; fecisti ter-
 ram, qua nutrires. Omnia quæ gignun-
 tur & crescunt, non quia tu egebas, sed
 ad nostram vtilitatem produxisti: finxi-
 sti nos ad tuam imaginem, & teipsum
 inclusisti pectoribus nostris, cū vitæ
 spiraculum inspirasti. Conflasti vitam
 nostram, conciliasti nos nobis: consili-
 um, rationem, pietatem præbuiisti. Dece-
 ptos ab hoste vt redimeres, & tuam exi-
 miam

miam charitatē ostenderes, filio Dei proprio non pepercisti. Venisti ad nos, ad dirigendos pedes nostros in viam pacis; vitæ semitam linguis igneis demonstrasti, & ad institutionem nostræ salutis è piscatore ianitorem cæli, è numulario Euangelistam, è recalcitratore acerbo defensorem acerrimum, & vas electionis effecisti. Dedisti robur, quo pro te omnia paterentur; dedisti scientiam, quò te omnes gentes confiterentur.

Tu ergo Spiritus Domini, qui replesti orbem terrarum, fac vt te quæramus, qui nunquam quæri te pateris, quin inueniaris. Refluat amor noster ad fontem tuum vnde defluxit: amemus te, à quo tantum sumus amati. Templum tuum in nobis peccatoribus consecra, carnē nostram tua in habitatione innoua, & effice, vt in omni sapientia & prudentia vñctione & gratia crescamus. Excita corda nostra tua virtute, adiuua nostram imperfectionem; tua virtute nostram imbecillitatem suffulci; distribue te in corda nostra, & nos tui fac participes, quo dilectio Dei per nos diffundatur. In locum puerorum per te adoptemur, tuo confirmemur testimonio, vt ob signatione tua nos filios Dei cognoscentes aditum ex te securum ad Deum patrem cælestem habeamus, per Iesum Christum Dominum nostrum.

Amen.

Borkensis
in Enchirid.

CAPVT NONVM,
CONTINENS VARIAS
ORATIONES DE VITA
& morte Salua-
toris.

PROLOGVS.

In prolo-
go de me-
ditatione
vitæ Chri-
sti.

INTER omnia exercitia spiri-
tualia (si Bonauentura creda-
mus) nullum est vtilius medita-
tione vitæ & mortis Saluatoris.

Ea enim meditatio, præterquam quòd cõtem-
ptum rerum omnium visibilium in nobis ge-
nerat, etiam nos armat aduersus omnem
mundi, carnis & Diaboli potentiam; fami-
liaritatem cum Deo parat, amorem eius conc-
iliat, fiduciam creat, animamq; ad omnium
virtutũ culmen, supremumq; perfectionis fas-
tigium adducit. Vbi enim perfectiũs virtutem
altissimæ paupertatis, profundissimæ humili-
tatis, perfectissimæ charitatis, obedientiæ, pa-
tientie, mansuetudinis, ceterarumq; virtutum
inuenitur, quàm in vita Saluatoris? Rectè er-
go Bernardus: Homo qui virtutes sibi vult
comparare, frustra laborat, si eas alibi qua-
rat, aut ab alio petat, quàm à Domino virtut-
um: cuius doctrina est regula prudentiæ, cuius
misericordia est opus iustitiæ, cuius vita
exemplum est temperantiæ, cuius mors est

Serm. 22.
in Cant.

vexillum

vexillū patientiæ. In hoc exercitio idem melifluus Doctor totam vitam suam consumpsit, ex omnibus anxietatibus & amaritudinibus Christi fasciculum sibi colligans, qui inter vbera eius iugiter commorabatur, vnde ipse testatur.

Operæ igitur pretium facturus est hominipius, si vel orando, vel meditando, vt minimum semel in septimana, totam vitam Saluatoris percurrat: cum nulla gratioresit oratio ea, in qua vitæ suæ sit commemoratio. Vt autem commodius id fieri posset, Granatensis noster vitam, mortem & resurrectionem Christi septem orationibus complexus est, vt totidem septimanæ diebus inseruirent: idq; per modum gratiarum actionis, cum nullumbeneficium sit, pro quo Deo maiores gratiæ debentur. Eas igitur orationes huic nono capiti reseruauimus, & nunc ordine subiiciemus.

Constant orationes hæ articulis 53. ex quibus facile confici potest Rosarium, si post singulos articulos legatur Angelica salutatio, & post vnāquamque decadem oratio Dominica, vnā cum salutatione Angelica. Supererunt quidem articuli tres, qui facile vel initio, vel in medio, vel in fine cum alio articulo misceri, & ter duo sub vna salutatione Angelica, proferri possunt.

Granatēs.
lib. 5 Me-
morialis.

1
Christus
de czlo
descendit
& concipitur
in
vtero Vir-
ginis.

2
Maria vi-
sitat co-
gnatam.

ORATIO PRIMA DE VITA IESV.

Immortales, ô dulcissime Iesu, ago tibi gratias, quòd amore mei de regal tuo palatio, atque ex altissimo Patris sinu, in hanc vallem miseriarum descendisti, & in sanctissimo castissimæ Virginis Matris tuæ vtero carnem humanam assumpsisti. Oro te Domine, vt cor meum tibi præpares habitaculum, cumque in finem id omnigenis virtutum floribus adornes, vt tu solus perpetuò in illo habites. Vtinam, Domine, tuæ placeret bonitati, vt tale esset cor meum, ne verer te inuitare, sed vt in me venires habitatum, & ego te mererer recipere suauiter, tuque in eodem corde requiesceres sine fine dulciter. O si te amplexari possem brachijs amoris tam potentis, vt nunquam à te aut cogitatione, aut affectione diuellerer.

Ago tibi gratias dulcissime Iesu, quia postquam conceptus es in vtero glorio-
sæ Virginis Mariæ, voluisti eā per montana visitare cognatam suam Elisabeth, vt saluaret eam, ei que tempore partus ministraret. Tu non dedignatus es gloriosissimis Matris tuæ visceribus nouem mensibus claudi: ideoque te oro, da mihi veræ humilitatis gratiam, & dignare me illā cordis mei penetralibus imprimere, vt illius beneficio semper me paratum inuenias in rebus ad tuum ministerium

sterium pertinentibus. Fac Domine, vt cor meum res humanas semper fastidiat, & te suum habere habitatorem & Dominum perpetuò desideret.

Ago tibi gratias, suauissime Iesu mi, 3
 qui de sacratissima Virgine sine dolore, Christus
 & puritatis virginalis damno natus es; nascitur.
 quæque te natum mox in præsepe posu-
 it, vt pauperem & mortalem, teque hu-
 militer adorauit, vt Deum & omnium
 Creatorem. Precor diuinam tuam mise-
 ricordiam, vt digneris continuè nasci in
 me, per nouum charitatis ardorem : &
 vt vnicum sis meum desiderium, sola sa-
 tietas, & firma spes cordis mei. Placeat
 tuæ bonitati, vt te solū semper quæram,
 de te semper cogitem, te solum amore
 ardentissimo diligam.

Infinitas ago tibi semper gratias, 4
 dulcis Iesu, quod in intensissimo natus Christus
 frigoris horrore, non dedignatus es vi- pānis in-
 lissimis inuolui pannis, & virgineū lac uoluitur.
 de gloriosæ Matris pectore sugere, & qua-
 si simplex atque innocēs pusio Virginis
 papillas lambere, cum verè Deus esses o-
 mnipotens. Concede mihi, Domine, vt
 in conspectu tuo semper verus sim in-
 fantulus humilitate, & verè pauper spi-
 ritu. Da vt amore tuo non recusẽ fer-
 re quæcunque aspera & laboriosa; nihil
 amem in hoc mundo præter te; nihil in
 hoc mundo præter te desiderem possi-
 dere.

Gratias ago tibi benigne Iesu, quod

5

Q 4

statim

Christus
à pastori-
bus ado-
ratur.

statim cum natus esses iucundissimis Angelorū canticis concelebrari voluisti, & à pastoribus maximo cum gaudio & admiratione adorari. Da mihi gratiā, Domine, vt iugiter in tuis laudibus cum gaudio perseuerem, vtque te in societate pastorum quæram, & quærendo te inueniam, & inuentum te in æternū possideam.

6
Christus
circuncidi-
tur, &
Iesus vo-
catur.

Laudare semper, & glorificare, bone Iesu, quod octauo die (secundum consuetudinem aliorum infantum) circuncidi voluisti, & in ætate illa tenerrima sanguinem amore mei fundere cœpisti: vtque me ineffabili cōsolatione beares, Iesus vocatus es. Supplico tibi, Domine, vt digneris me referre in album electorum tuorum, & nomē meum in librum beatorum scribere: vtque cor meum ab omni superfluitate circuncidas; hoc est, otiosa & noxia verba, opera iniqua, cum impuris, inanibusq; cogitationibus abscindas. Redemptor mi, tu vocaris Iesus, hoc est, Saluator; tibi enim soli conuenit dare salutem. Idcirco peto à te Domine, vt suauissimi huius nominis memoria expellat à me omnem inordinatam pusillanimitatem & torporem, & mihi misericordiæ tuæ spem firmam tribuat, & defendat me ab omnibus inimicorum meorum persecutionibus.

7
Christus
à Magis
adoratur.

Gratias ago tibi, dulcissime Iesu, qui à Magis, te ex intima deuotione, fideque sincera quærentibus, inuentus es; idque

stella

stella coruscante ductore; qui ante te pedibus procumbentes obtulerunt aurum, thus, & myrrham. Concede mihi, Domine, vt te in consortio istorum sanctissimorum Regum quæram, non in Bethlehemi, sed in cordis mei præsepio, in eoque inuentum te adorem in spiritu & veritate; offeram tibi aurum splendentis charitatis, incensum deuotionis, & myrrham perfectæ mortificationis. Da mihi denique gratiam, vt omnes vires, omnemque animi fortitudinē imitandæ sanctissimæ vitæ tuæ promptus & alacris impendam.

Ago tibi gratias, Domine Iesu Christe, qui vt dares nobis exemplum obedientiæ, atque humilitatis, voluisti legi amore nostri subijci, & ad templū in brachijs sanctissimæ Matris tuæ deferri; & pro te oblationem non diuitis, sed pauperis offerri. Quare iustus & senex ille Simeon cum Anna Prophetissa, ob tuam præsentiam exultantes, celeberrimum tuæ gloriæ dederunt testimonium. Placeat bonæ voluntati tuæ, Domine, ne vnquam in posterum cor meum subintret vel minima vanitatis cogitatio. Ah quā beatus essem, si à me omne genus præsumptionis exularet, omnisque appetitus mundani fauoris, cum toto mei ipsius amore inordinato extinctus esset. Dignare mihi gratiam tuam largiri, vt mihi ab omni humana laude caueā, omnibusque me hominibus subijciam, ijsque

8
Iesus in
templo
præsen-
tatur.

9
Iesus in
Ægyptū
fugit.

non inuitus obediam.

Ago tibi gratias, dulcis Iesu, quia cū
esses adhuc paruulus persecutionem sus-
tinere incepisti, vnā cum charissima tua
Matre: nec dedignatus es in Ægyptum
fugere. Da mihi gratiam, vt in omnibus
persecutionum mearum tempestatibus,
in omnibus meis tribulationibus & ten-
tationibus ad te fugiam, te quæram, te
solum inuocem; & quotiescunque præ-
dicta mihi de manibus tuis aduenient,
fac, Domine, vt ea cum gaudio suscipi-
am, & tranquillo corde sufferā, tibi con-
tinuas agens gratias pro omnibus, quæ
tibi de me statuere placebit.

10
Iesus se-
det inter
doctores.

Gratias quoque infinitas ago tibi, Do-
mine Iesu, quia charissima tua Mater
cum maximo te dolore quesuit, cū tu
in tēplo remansisti, & post tres dies cum
summo gaudio te in medio doctorum
sedentem inuenit, quos audiebas & in-
terrogabas cum incredibili sapiētia. Ah,
Domine, pro tua sola bonitate, da mihi,
vt nūquam ego separer à te, nec tu à me.
Expelle à me omnem socordiam & tor-
porem; extermina frigiditatem animi,
quæ tibi tantopere displicet; & da mihi
perfectam deuotionem, & ardentem tuę
iustitię sitim, quæ ita possideat cor me-
um, vt nunquam lassus, nunquam serui-
endo tibi sim satiatus. Pater noster. Ave
Maria.

Granatēs.
ibidem.

SECUNDA ORATIO DE
VITA IESV.

Agg

AGo tibi gratias, dulcissime Iesu, qui Iordanis fluentia ingressus voluisti manu Præcursoris tui Ioannis baptizari. Dignare me, Domine, per merita tua purificare in hac vita, & ab omnibus vitijs meis me mundare, & inebriare amore tui, & cælestis patriæ desiderio. Fac me antequam anima mea ex huius carnis exeat ergastulo talem, qualem me esse vis, vt discedens ex hac peregrinatione, confestim tecum sim: vt te semper videam, te semper fruar in beata illa æternitate, quæ finem nullum agnoscit.

Gratias sine fine tibi ago, benigne Iesu, quòd agens in deserto, priusquam Euangelium prædicare cœpisti, inter animalia fera vixisti, & perseverans in ieiunio quadraginta diebus, & quadraginta noctibus, vigilansque in continuis orationibus & suspirijs, postea voluisti à Sathana tentari: & postquam victor extitisti, venerunt angeli & ministrauerunt tibi. Concede mihi, Domine, vt cum tua gratia possim castigare carnem meam, & omnes vitiosos affectus spiritui submittere, vtque cum dono perseverantiæ me exerceam ieiunijs, vigilijs, & orationibus, alijsque omnibus exercitijs spiritualibus. Præcipue autem, Domine, concede mihi, vt auxilio tue gratiæ liber sim à vitio gulæ, & ab omnibus alijs laqueis & impugnationibus Diaboli; nulla tentatio aduersum me præualeat, nulla me à te separet; imò fac, Domine, vt omnia

11
Iesus baptizatur.

12
Iesus in deserto tentatur à Diabolo.

hæc mihi maiorem præbeant occasionem arctius me tibi adiungendi & vni-
uendi.

13
Iesus di-
uersis la-
boribus
& neces-
sitatibus
affligitur.

Ago tibi gratias, dulcis Iesu, qui amo-
re mei afflictus es in hoc mundo multis
doloribus, & diuersis necessitatibus, estu,
frigore, siti, fame, lassitudine & sudori-
bus: varijs itineribus, vigilijs, persecuti-
onibus, & tribulationibus cuiuscunque
generis. Da mihi, Domine, vt pro amore
tuo cum gaudio omnes aduersitates, tã-
quam à manibus tuis mihi venientes
suscipiam, easque magna cum patientia
perferam. Da vt in quacunque re prospe-
ra vel aduersa, tristi vel læta, turbida vel
tranquilla, semper in te perseuerem, nec
latum vnguam à te discedam, vt in o-
mni re tua fiat voluntas, non mea.

14
Iesus orat
& p̄dicat.

Ago tibi gratias, suauissime Iesu, quia
plurima passus es, dum animę meę quæ-
ris conuersionem & salutem, tanquam
verus Pastor & Saluator mundi, perno-
ctando in orationibus, fatigando te in
itineribus, cælestem promulgando do-
ctrinam, de prouincia in prouinciam, de
castello in castellū discurrendo; in nul-
la re officium boni pastoris omittendo.
Quæso, Domine, hanc impartire mihi
gratiam, vt de cætero nunquam tardus
aut ignauus in tuo inueniar seruitio;
sed vt semper promptus & alacris sim
ad omne bonum agendum. Da, vt salu-
tem omnium ardentissimè sitiam, &
zelum honoris tui semper habeam, in

eoque

eoque me totum occupem.

Gratias ago tibi, benigne Iesu, quòd conuersando cum hominibus benigne illos cōsolari voluisti, & pro magna tua misericordia infirmitates eorum curare. Da mihi, Domine, cor pia quadam affectione in omnes plenum, vt omnibus compatiar, quos in afflictionibus videbo. Fac quoque, Domine, vt aliorum misérias meas esse existimem, vtque sincero corde, & sine aliqua passione aliorum imperfectiones feram, opemque illis pro posse meo feram in omni illorū necessitate. O Domine, purga perfectè mentem meam ab omnibus vitiosis passionibus, & ab omnibus malis desiderijs, quæ in illa dominantur, vt ab his omnibus malis sanata, omnibusque impedimentis his immunis, liberrimè in cælum euolet, nec prius quiescat, quàm ex purissimo amore mereatur ad diuinos tuos amplexus peruenire.

Ago tibi gratias, bone Iesu, quòd propter amorem tuum, quo me complexus es, innumeras iniurias, blasphemias, calumnias, & persecutiones ab ijs potissimū, quos infinitis afficiebas beneficijs, perpeffus es. Obsecro, Domine, largire mihi cor verè simplex & innocens, vt inimicos meos diligā, & malum illorū ex corde mihi doleat; semper eos si qua in re delinquant, excusē; vt reddendo bonū pro malo, tuæ perfectæ charitatis, tuæque patientiæ sim verus imitator.

15

Iesus cū
hominibus con-
uersatur:

16

Iesus plu-
rima pro
nobis pa-
titur.

17
Iesus in
Ierusalē
venit.

Ago tibi gratias, dilectissime Iesu, quòd venisti in Ierusalem humilis, & mansuetus sedens super asinam; & canentibus ijs, qui obuiam tibi procedebant, iucundissimis hymnis & gloriosis laudibus, tu lachrymas amaritudine plenas effudisti, quas dolor de tam celebris urbis destructione, & de tot animarum perditione conceptus, exprimebat. Da mihi, Domine, intrinsecam quandā mei ipsius cognitionem, ut aperte meam vilitatem agnoscam, & me profundè humiliem: me ipsum adeò contemnam, ne post hac mihi adulationes aut commendationes hominum placeant, sed ut assiduus maneam in plangēdis tam meis, quàm proximi mei peccatis, omne illius malum meum malum reputans. Pater noster. Ave Maria.

TERTIA ORATIO DE VITA IESV.

18
Iesus in
cœna pe-
des suorū
lauat.

AGo tibi gratias, Domine Iesu Christe, quia ut legi veteri finem imponeres, Agnum paschalem in Ierusalem cum discipulis tuis manducaſti; dans-
que illis exemplū maximæ humilitatis, & ineffabilis amoris, positis genibus pedes omnium lauiſti, extergēs eos linteo, quo præcinctus eras. Oro te, Domine, penetret exemplum hoc cor meum, & eiciat ex eo quamcunque præſumptionem & superbiam, quæ in ipſo reperitur. Da mihi, Domine, profundissimam humili-
tatem.

litem, cuius beneficio gaudeam omnibus subijci, sine alteratione. Adde & perfectam obedientiam, qua cum integrè tuis mandatis satisfaciam, vnà cum præceptis eorum, qui præfunt in tuo nomine. Excita in me feruentissimam charitatem, qua te purè diligam, & per amorem tuum omnes homines amem.

Ago tibi gratias, dulcis Iesu, quòd ex charitate tua excellentissima instituísti Sacramentum corporis & sanguinis tui, quodque ex admirabili quadam liberalitate te nobis donasti in cibum: nec te piguit corporaliter nobiscum in hoc mundo, vsque in consummationem sæculi permanere. Ah, Domine, excita precor in me viuum desiderium, & ardentissimam famem venerabilis huius Sacramenti. Concede mihi gratiam, vt ad hanc vitæ mensam accedam suscepturus te cum amore casto, humilitate profunda, cordis puritate, & mentis sinceritate. Da etiam, vt anima mea sic te sitiat, sic amore tuo vulneretur, vt tandem merear diuinis tuis frui voluptatibus, pro honore & gloria tui nominis.

Ago tibi gratias, melliflue Iesu, quòd volens exire mundo, admonuísti & consolatus es tuos discipulos, idque verbis amore sancto plenis, nec minùs ardenti oratione illos Patri commēdasti, ostendens quanto amore illos complectebaris, & omnes eos, qui per eorum doctrinam essent in te credituri. O, Domine,

sentiāt

19

Iesus Eucharistiā instituit.

20

Christus suos in cœna cōsolatur.

sentiat cor meum dulcedinem in tuis verbis, & vt illa mihi dulciora semper sint super mel & fauum : viuat in pectore meo spiritus tuæ affectionibus plenæ exhortationis, vt me totum in tuum amorem transformē. Dirige omnes actiones meas, vt in me, & de me semper tua fiat voluntas.

21

Iesus in
horto Pa-
trē orat.

Gratias ago tibi, dilectissime Iesu, quòd procidens in terram extensis brachijs Patrem precatus es, te totū ad manus illius resignans, petens vt in omnibus, non tua, sed Patris tui voluntas fieret. Obsecro, Domine, da mihi gratiam, vt in omni angustia & necessitate mea per orationem ad te curram ; meque totum tuæ concedam prouidentiae, sine meæ voluntatis electione, aut alicuius proprii commodi expectatione. Ne fugiam vnquam aduersitates, neque propter illas à bono cœpto meo resiliā : sed quidquid mihi superuenerit, id animo accipiam pacato, tanquam id quod à pijs tuis manibus donatur, ferendo omnia corde humili & quieto.

22

Iesus ca-
pitur.

Ago tibi gratias, ô pie Iesu, quòd ab armatis militibus capi, & funibus tanquā homo sceleratus & maleficus vinciri voluisti, inde ad Annam duci, & eius iudicio sisti non horruisti. O stupenda mei Redemptoris mansuetudo: dum apprehenderis, dum ligaris, dum illuderis, dum malè tractaris, non lamētaris, non murmuras, non reluctaris : sed tacendo

seque-

sequeris vestigia illorum, qui te ducunt, imò trahunt, & fatigant; obtemperas imperantibus tibi, & summa cum patientia perfers tormenta, quibus cruciaris. O Domine, ne inuideas mihi, vt exemplum tale, & rāta virtutis in me resplendeat, pro gloria & honore nominis tui sanctissimi.

Gratias ago tibi, ô Iesu amabilis, Rex cæli & terræ, quia stans ante superbum & inflatum Pontificem, non aliter atque si homo vilis & abiectus fuisses, percussus es, & patientissimè crudelem alapam tulisti, quam vnus ex impijs illis ministris tibi in faciem impegit. Precor te, Domine, mortifica in me omnes effervescentes impetus iræ, omnem indignationem comprime, omne odium tolle, omnemque scintillam cupiditatis vindictæ extingue; vt cum iniuria me quis afficiat non perturber, de vindicta non cogitem, sed omnia patienter sufferens pro amore tuo reddam bonum omnibus, qui mihi malefaciūt. Pater noster. Ave Maria.

QVARTA ORATIO DE VITA IESV.

Gratias tibi ago, dulcis Iesu, qui in nocte passionis tuæ irrisus, & delusus, a tuis inimicis pugnis percussus, & calcibus protrititus, diuersisque iniuriarum modis diuexatus es. Tu scis, Domine mi, quā graue & molestum mihi est,

23

Iesus alapa in faciem percutitur.

Granatès
ibid.

24

Iesus nocte qua captus est varijs modis diuexatur.

est, vel minimam iniuriā perpeti; tu scis me virtutem habere nullam, volūtatem meam esse tardam, & omne bonum desiderium in me frigere. O Domine, pro tua misericordia meam adiuua infirmitatem. Da mihi gratiā, ne ad quemcunque aduersitatis imperum animus meus demittatur, & quasi humi serpere videatur. Succurre mihi, ne deficiam sub onere tribulationum, quæ mihi superuenient, nec iniuriæ ab alijs irrogatæ mihi stomachum faciāt: sed in omnibus gratias agens tibi, omnia ad honorem & gloriam nominis tui referam.

25
Iesus corā
Pilato
accusatur

Ago tibi gratias, Domine Iesu, quòd stans ante Præsidentem Pontium Pilatum, ad falsas querelas & accusationes non respondisti: sed quasi agnus mansuetus, qui non aperit os suū, & coram tondentibus obmutescit, sic tanquam aure surda omnia præterijsti. Concede mihi, Domine, ne oblocutiones, murmura, & detractiones mihi bilem moueant; sed vt exemplo tuo edoctus, omnes qui me iniuriantur & diffamant tacendo vincam. Largire mihi perfectæ humilitatis gratiam, vt nec laudari ab hominibus appetam, nec propter te vituperari metuum.

26
Iesus ad
Herodem
ducitur.

Ago tibi gratias, clementissime Iesu, quòd in summo strepitu & furore populi, iussu Pilati ductus es ad Regem Herodem. Tribue mihi fortitudinem, vt persecutiones me non confundant, nec ini-

mico-

micorum iniuriæ ad iracundiam incitent, nec eorum impudentia me faciat erubescere: sed omnia quæque cum mansuetudine feram, & tacendo vincam, vt in patiëntia mea possideam animam meam; secundum sanctorum mandatorum tuorum præscriptum.

Gratias ago tibi, Iesu pie, quòd ante Herodemstans, & de multis criminibus & flagitijs à Pontificibus & Sacerdotibus accusatus, ad nullum respondere voluisti; sed silendo causam tuam iustificasti. Da mihi, Domine, dexteritatē linguam meā refrenandi, ne mihi vnquam incesset cupiditas, otiosa, vana, vel turpia loquēdi; nec in rebus sterilibus & infructuosis narrandis tempus inutiliter consumam: sed concede, vt nihil præterquam quod iustum, quod honestum, quod vtile est, mea lingua sonet, quodque diuinæ tuæ volūtati est consonum. Fac vt detester vitium maledicendi, & de omnibus bona audire & loqui luceat.

27
Iesus coram Herode accusatur.

Ago tibi gratias, dulcis Iesu, quòd comparatus cum infami & seditioso latrone Barraba, illo peior iudicatus es, vitæque indignior: adeò vt homicida libertate donatus, & tu auctor vitæ ad mortem sis condemnatus. O Rex æternæ gloriæ, qua quæso potuisset affici tua Maiestas maiori, ignominia? Hic, Domine, hic liquet te esse lapidem illum viuum, reprobatū ab hominibus, quem sibi

28
Iesus Barraba sceleratior iudicatur.

Deus

Deus elegit, & fecit in caput anguli. Placeat tibi, Domine, ne tibi quicquam anteponam, nec te quoquam permitem; sed omnia tibi comparata sint mihi tanquam stercora. Da, ne venenum inuidiæ vnquam animum meum inficiat; sed in te semper quiescam, & in te omnem meam salutem constituam.

29
Iesus flagellatur.

Ago tibi gratias, amantissime Iesu, quòd spoliatus vestimentis tuis sacram illam & virginream carnem nudam conspici passus es: inde funibus duris ad columnam ligatus, horrēdis flagellis eandem carnem dilaniari voluisti; vt tuis vulneribus nostra vulnera sanares. O Domine, spolia cor meum omnibus immundis cogitationibus; exue me veterem hominem, cum omnibus operibus suis, & indue me nouum, qui creatus est ad imaginem & similitudinem tuam, in iustitia & sanctitate: & da mihi, vt cum omni patientia & humilitate paternæ tuæ visitationis flagella sustineam.

30
Iesus coronatur.

Ago tibi gratias, benigne Iesu, quòd post tot vulnera, tot liuores in immani illa flagellatione accepta, post sanguinem tam copiosum toto corpore effusum, varijs modis illusum & subfannatus es. Ad maiorem verò ignominiam tuam purpurea te chlamyde circumdederunt, & plectentes coronam de spinis, imposuerunt eam capiti tuo; arūdinem in manu pro sceptro dederūt, flectētesq; genua, Regem te salutarunt (imò ludificarunt)

carunt) dicentes ; *Aue Rex Iudeorum*.
 Fac Domine, vt memoria istius miserrimæ
 tragœdiæ cordi meo imprimatur, nec vnquam
 inde deleatur : transfige illud ardentissimæ
 charitatis tuæ sagittis, vt te solum amem,
 de te solo cogitem, in te solo requiescam,
 nec tribulationes, angustia, vel persecutiones
 vllæ me à te separent ; nec ægrè sustineam, si quando
 propter te contemptui sim, & ab homi-
 but flocci fiam.

Ago tibi gratias, dulcis Iesu, quòd
 post tot labores, angustias, tribulationes,
 fannas, & vulnera pro me perpeffa,
 voluisti etiam crucem tuam in fractis
 tuis humeris vsque in montem Caluarie
 supplicij locum portare : idque cum
 summo labore, & lassitudine, præ nimia
 ponderis grauitate, exhaustique corporis
 debilitate. Largire mihi, Domine, vt
 alacri & deuoto corde crucem tuam
 amplectar, negando memetipsum, & exem-
 plum virtutum tuarum cum feruenti
 charitate imitando, vt te humiliter in
 mortem subsequi merear.

Ago tibi gratias, ô bone Iesu, qui in
 hoc laborioso itinere, quando crucifi-
 gendus educebaris, lamentantes foeminas
 benigniter exhortatus es, ne super te,
 sed super se, & super filios suos plange-
 rent. Da Domine, vt & ego pias compas-
 sionis & amoris lachrymas fundam, ad-
 eò copiosè, vt durities cordis mei lique-
 fiat, & acceptabile in conspectu Maiesta-

tis

31
 Iesus cru-
 cem por-
 tat.

32
 Iesus cru-
 cem ba-
 iulâs fœ-
 minas al-
 loquitur.

tistux reddatur. Concede mihi Domine, vt sanctissimi tui amoris flammis accensus, parui aut nihili faciam res mundanas; te verò solum diligam, & in te sine fine requiescam. Amen. Pater noster. Ave Maria.

Granatēs.
ibidem.

QVINTA ORATIO DE
VITA IESV.

33
Iesu acetum pro-
pinatur
felle mix-
tum.

AGo tibi gratias, benigne Iesu, quòd lassus, & viribus exhaustus, nimio Crucis tuę pressus pondere, ad locum sacrificij tandem venisti: vbi inuentus es totus afflictus, siti penè enecatus, quo tempore scelerati & barbari illi satellites acetum tibi felle mixtum bibendum obtulerunt. Placeat tibi, Domine, vt huius poculi memoria in me extinguatur inordinata gulę concupiscentia, carnisque delectatio: & fac ne vllò vnquam tempore turpibus & illicitis delectationibus consensum præbeam. Sed largire mihi honestissimam, maximeque necessariam temperantię virtutem, tam in edendo, quàm in bibendo, alijsque rebus seruandam: vt refrenatis omnibus gulę appetitionibus te solum esuriam, te solum sitiam, in te solo sit omnis mea voluptas.

34
Iesus vestibus spoliatur.

Ago tibi gratias, benedicte Iesu, qui denuo vestimentis tuis spoliatus, nudus coram omni populo stetisti, vbi omnia vulnera detractis vestibus, quę concreto sanguine carni adhærebant, recrudue-

runt,

runt, & renouata sunt: ex quibus iterum
vberimus sanguis effluxit, non sine do-
lorum tuorum redintegratione. Largi-
re mihi, Domine, verum paupertatis a-
morem, ne vnquam ob rerum munda-
narum defectum contrister; sed cum o-
mni patientia perferam inopiam, & hu-
ius vitæ necessitates. Spolia, Domine,
cor meum omnibus imaginationibus &
afflictionibus terrenis, & renoua in me
quotidie viua sancti amoris tui desi-
deria.

Ago tibi gratias, Iesu bone, qui cru-
deliter funibus in diuersa raptus & dis-
tractus es, cum te crucifigere volebant.
ita vt omnes sanctissimi tui corporis
iuncturæ locis naturalibus emotæ sint:
sed & perpeffus es, vt sanctæ manus, san-
ctique pedes tui duris, crassisque clauis
foderentur, & cruci hærent affixi. Da
mihi, Domine, vt semper animo fideli
& grato memor sim ardentissimæ illius
tuæ charitatis, qua motus tam benignè
tua brachia extendisti, & manus tuas a-
peruisti, vt foderentur, pedesque tuos ac-
commodasti, vt duro clauo perterebra-
rentur. Age, Domine, exurge, & vulnera
cor meum perfecta charitate; eodem amo-
ris tui clauo sensus meos omnes transfi-
ge, ne vnquam meæ cogitationes & de-
sideria à te separentur.

Gratias tibi ago, ô sancte Iesu, quòd
trium horarum spatio pependisti in cru-
cis ligno, multis, intolerabilibusque

oppro-

35
Iesus cru-
cifigitur.

36
Iesus in
cruce pē-
det.

opprobrijs exagitatus, sanguinem copiosè profundens, in omnibusque membris tuis immensos dolores sustinens. Affige, Domine, eidem ligno miseram animam meam, quæ iacet humi, & purga illam ab omni peccatorum & appetituum immunditia, lauans illam fluentibus tui sanguinis riuulis. O sanguis, qui vitam tribuis & salutem. Ne dedigneris, Domine, illo me lauare sanguine, sanctificare, & purificare me liquore illo pretiosissimo. Offer illum, Domine, summo Patri tuo in perfectam satisfactionem, & remedium omnium malorum meorum. Oro te, concede mihi, vt merear corde meo bibere, & lingua animæ meæ lambere pretiosas diuini illius sanguinis guttulas, vt gustem ibi, quàm suauis tuus est spiritus, & quàm dulcis ille tuus liquor pretiosissimus.

37
Iesus pē-
det inter
duos la-
trones.

Ago tibi gratias, dulcis Iesu, qui amore mei suspendi in medio duorum latronum voluisti, & pro tali etiam haberi: vt hac tua incredibili humilitate & patientia superbiam & impatientiā nostram sanares, & planè destrueres. Oro te, Domine, exalta spiritum meum, vt omnia, quæ in hoc mundo cernuntur despiciam, & te solum aspiciam, te solū amem, nunquam de alio quàm de te cogitem, ad te suspirem, de te loquar, in te me oblectem, & omnis mea actio sit semper in te, & per te, & extra te nihil sit, quod animum meum queat satiare.

Ago

Ago tibi gratias, dilecte Iesu, qui fuisti tam bonus in illos qui erant pessimi, qui etiam pro ijs, qui crucifigebant te, Patrem oraueris, dicens; Pater dimitte illis, non enim sciunt quid faciunt. Da mihi gratiam, Domine, vt habeam veram patientiam, & mansuetudinē, quibus armatus (iuxta exemplū, quod mihi dedisti, & mandatum quod mihi reliquisti) inimicos meos diligam, & beneficiam his, qui mihi malefaciunt, & orem te pro ijs, vt illis omnem iniuriam ex animo ignoscas.

38
Iesus pro
crucifigē-
tibus se
orat.

Ago tibi gratias, benigne Iesu, qui derisus & despectus es ab inimicis tuis, & tot blasphemijs atque iniurijs exceptus es, etiam eo tempore, quo doloribus & angustijs in cruce affligebaris ineffabilibus. Concede mihi gratiam, Domine, vt memor illius humilitatis & patientiæ, qua cum tantos dolores, & tanta sustinueris opprobria, ego quoque simili patientia quamcunque aduersitatem perferam, tecum in cruce patientiæ vsque ad mortem perseverans. Nullus tentationis impetus, nulla tribulationis tempestas, nullæ iniuriarum procellæ me ab incepto bono proposito abducant; nec mors, nec vita, nec præsentia, nec futura, nec aliqua creatura me à te separet.

39
Iesus in
cruce ir-
ridetur.

Gratias ago tibi, optime Iesu, qui etiam blasphemias & sannas vnius latronis perpeffus es, & qui alteri confitenti sua peccata, & pia fide tuam innocentiam

40
Iesus la-
troni pa-
radisum

pollice-
tur.

am predicanti, gloriam Paradisi promi-
sisti. O beatum me, si vnquam tam felix
fierem, vt mererer oculis tuæ misericor-
diæ respici, quibuscum fortunatum il-
lum latronem aspexisti; & auxilio tuæ
gratiæ tam innocenter viuerem, vt sub
finem vitæ meæ dignus essem audire
dulcissimum illud verbum tuum; Ho-
die mecum eris in Paradiso. Pater no-
ster. Aue Maria.

Granatē.
ibidem.

SEXTA ORATIO DE VITA IESV.

41
Iesus ma-
trē disci-
pulo cō-
mendar.

Gratias quas possum maximas ago
tibi, Domine Iesu, quod ex arbore
Crucis aspiciens Matrem tuam plenam
doloribus & afflictionibus, lachrymis-
que perfusam, misertus conditionis illi-
us, eā dilecto tuo discipulo Ioanni com-
mendasti: deinde & illum matri com-
mendasti, & nos omnes in persona illi-
us. Da mihi, Domine, vt amem & hono-
rem hanc beatam Virginem amore ar-
dentissimo, vt, cū eam matris loco ha-
beā, merear, vt illa me in filium suscipi-
at, atq; vt talē me tractet. Da mihi illam
Aduocatam in omnibus necessitatibus
meis, maximè aut in hora mortis meæ.

42
Iesus à
patre se
dereliētū
queritur.

Ago tibi gratias, dulcissime Iesu,
quod apertis vulneribus, capite spinis
coronato, manibus ac pedibus cruci affi-
xis, dixisti; Deus meus, Deus meus, vt
quid me dereliquisti? Operare Domine
in me, vt in omnibus meis aduersitati-
bus

bus & tentationibus ad te pium Patrem confugiam, & de meipso diffidens, tibi soli confidam, & me totum ad manus tuas resignem. Peto, Domine, vt vulnere interiora animæ meæ tuorum vulnere memoria: fac vt ea imprimantur intimis meis præcordijs; & ita me tuo sanguine inebria, vt de alio non cogitem, nec alium præter te quæram: vt quærens inueniam te, & possideam te in æternum.

Ago tibi gratias, Domine Iesu Christe, qui corpus habens debilitatum, & præ grauissimis tormentis, nimiaque sanguinis effusione siccum, vehementissimè sitiisti, ardensque nimio desiderio salutis nostræ dixisti; Sitio. Da mihi, Domine, vt ardentissimè tuum sitiam honorem, & animarum omnium salutem; in eo me totum occupem, conformem me sanctæ tuæ voluntati, faciens quantum mihi secundum statum meum concedetur. Oro te, ne vllus amor rerum transitoriarum me corripiat, nulla creatura me in periculosos laqueos trahat: imò omnia, quæ amari digna sunt, amore tui diligam, te autem plus omnibus amem, & in te solo quietem inueniam.

43
Iesus in
cruce sitit

Ago tibi gratias, ô misericordissime Iesu, quòd in hora mortis tuæ, vt sitim restingueres, voluisti ori tuo applicari spongiam aceto plenam; vt gustando amarum illud refrigerium, in afflictissi-

44
Iesus in
cruce fel
bibit.

mo illo tuo statu, æterno Patrī satisfacere, pro omni nostra intemperantia & voluptate, nobisque mirabile paupertatis exemplum relinqueres. Tribue mihi gratiam, vt amore tui contemnā omnes saporū delicias, & epulas exquisitiores; & vt contentus sim id cum modestia & temperantia solum edere & bibere, quod sufficit ad huius corpusculi sustentationem, tibi reddens pro illo infinitas gratias. Purifica & sana palatū animę meę, vt quicquid tibi gratum est id mihi dulce sit; & quicquid tibi displicet, id mihi non sapiat, sed fastidium pariat.

45
Iesus Redemptio-
nis nostre
operi finē
imponit.

Ago tibi gratias, Iesu amator generis humani feruentissime, quod tam absolute, & ordine tam concinno nostre redemptionis operi finem imposuisti, offerens temetipsum sacrificium viuum in altari Crucis, pro peccatis mūdi. Oro te, Redemptor mi, vt tu solus esse digneris signaculum cordis mei, & scopus mearum cogitationum, verborum, & operum: vt in omnibus rebus cum pura & casta intentione solum spectē, & agam, quod honor tuus postulat, nihil autem extra te mihi placeat, aut aliquid præter te desiderem. Tribue quæso, ne post hac vnquam ignauus aut lassus fiam in tuo ministerio: sed vt renouato quotidie in me feruore spiritus, in te laudando, tibi-que seruiendo magis magisque crescat diligentia.

46

Ago tibi gratias, dulcis Iesu, qui cūm
voluisti

voluisti mortem vocasti, & venerabili tuo capite inclinato spiritum tuum in manus Patris tui commendatum è carne migrare iussisti: qua in re declarasti, te verum illum esse pastorem, qui posuisti animam pro ouibus tuis. Da mihi, Domine, vt omnibus peccatis & vitijs mortuus, tibi soli viuam; vt vitæ huius cursu in charitate peracto, confestim ad te, qui es verus animarum nostrarum Paradisus, ingrediar.

Gratias tibi ago, mansuetissime Iesu, qui voluisti diuinum pectus tum à quodam milite lancea aperiri, ex quo sanguis & aqua ad lauandas & viuificandas animas nostras exiuit. Placeat tibi, Domine, sic cor meum sancti amoris tui lancea ferire, vt nihil queam velle, quod non idem & tu vis. Ingrediat, Domine, anima mea vulnus pectoris tui, & pergat vsque ad sedem tuæ charitatis, & thesaurum tuæ diuinitatis: yt ibi adorem te Deum meū, pro me crucifixum, & mortuum; & reijciēs à memoria mea omnium rerum visibilium figuras, ad te solum respiciam, & te solum in omni te præsentem habeam.

Ago tibi gratias, dilecte Iesu, qui cum magno planctu amicorum tuorum de cruce sublatus es, pretiosissimisque vnguents delibutus, in syndone munda inuolutus, & in alienum sepulchrum illatus es. O Domine, sepeli tecum omnes sensus meos, vt tibi forti amoris vincu-

Iesus e-
mittit spi-
ritum.

47
Iesu latus
lancea a-
peritur.

48
Iesus se-
pelitur.

lo coniunctus, in his quæ tibi displicent
 sim quasi mortuus, & in omnibus rebus
 tibi contrarijs quasi extra me raptus:
 Econtrariò verò in rebus quæ tibi pla-
 cent, sim totus viuax, promptus & ala-
 cer: in te solo vnico Redemptore meo,
 & thesauro animæ meæ me oblecter.
 Pater noster. Ave Maria.

Granatès.
 ibid.

ORATIO SEPTIMA DE
 VITA IESV.

49
 Iesus de-
 scendit ad
 inferos.

AGo tibi gratias, dulcis Iesu, qui cum
 potentia descendisti ad Inferos, ibi-
 quæ fortitudinem Satanæ debellasti, &
 cum tua præsentia sanctos Patres, qui ibi-
 dem captiui detinebantur, exhilarasti: &
 educens illos ex tenebris, ad perpetua Pa-
 radisi gaudia adduxisti. Oro te, Domi-
 ne, vt virtus passionis & sanguinis tui
 descendat super animas patris, matris,
 cognatorum, amicorum, & benefacto-
 rum meorum, omniumque fidelium de-
 functorum, vt à pœnis Purgatoriij libe-
 ratæ in æternam beatitudinem recipi-
 antur.

50
 Iesus re-
 surgit à
 mortuis.

Ago tibi gratias, bone Iesu, qui victo-
 riosus exiens è sepulchro cum nobilissi-
 mo triumpho, post victam & interfe-
 ctam mortem, tertia die resurrexisti, &
 indutus glorioso corpore, immensoque
 splendore amictus, amicos tuos visitans,
 eos incredibili gaudio perfudisti. Con-
 cede mihi quoque Domine, vt à morte
 vitiorum & veteris conuersationis re-
 susci-

fufcitatus in nouitate vite ambulem, ea-
que fola quæram, quæ alta funt & fubli-
mia, non autem vilia & tranfitoria; vt
cùm tu vera Vita fecundò appariturus es
in terris, ego tecum appaream in tua
gloria.

Gratias tibi ago, ô pie Iefu, qui tranf-
actis quadraginta diebus poft tuam re-
furrectionem, afpicientibus difcipulis
tuis gloriofus & triumphans in cælum
afcendifti: vbi fedēs à dexteris Patris vi-
uis & regnas in fecula feculorum. Pla-
ceat bonitati tuæ, Domine, vt anima
mea langueat amore tui, & faftidiat o-
mnia quæ funt in mundo; femper ad te
aspiret, defiderans cæleſtia, eaque conti-
nua & feruenti voluntate appetat. Nihil
illam exhilaret, nihil affectet, niſi te ſo-
lum Dominum meum & Deum meum.

Ago tibi gratias, amantiffime Iefu,
quòd Spiritum ſanctum tuum miſiſti ſu-
per electos tuos, qui in oratione perfeue-
rabant, eosque miſiſti prædicare & do-
cere gentes per vniuerſum mundū. Sup-
plico tibi, Domine, purifica interiora
cordis mei, & da mihi veram puritatem
& munditiem conſcientiæ, vt idem con-
ſolator inueniens in ea gratam habita-
culum, adornet illud, & vberrimis gra-
tiarum ſuarum donis illud pulchrum &
formoſum faciat: ille me ſolus conſole-
tur, me confirmet, me regat, & ſit totus
mei poſſeſſor.

Gratias ago tibi, benigne Iefu, qui

51
Iefus in
cælum a-
ſcendit.

52
Iefus Spi-
ritum S.
mittit.

53

Iesus ad
iudicium
veniet.

quando veneris in nouissimo die ad iudicandum orbem terrarum, daturus es vniqueque secundum operum suorum merita, vel præmium, vel supplicium. Pie Domine mi, da mihi gratiam, vt anima mea innocenter huius miseræ vitæ curriculum peragens, secundum sanctam tuam voluntatem, tandem huius corporis ergastulo multis meritis & virtutibus ornata exeat, vt pro tua misericordia in gloriæ tuæ domicilium recipiatur, vbi sine fine te laudet, & in consortio Sanctorum omnium benedicat in secula seculorum. Amen. Pater noster. Ave Maria.

ORATIO DE NOMI- ne IESV.

Lodouicus Gra-
natensis lib.
4 de orat.
& Medi-
tat.

O Bone Iesu, ô dulcis Iesu, ô Iesu fili Virginitatis Mariæ, plene pietatis & misericordiæ : ô dulcis Iesu, miserere mei, secundum infinitam tuam bonitatem. O benigne Iesu, ego indignus peccator oro te per pretiosum illum tuum sanguinem, quem vberimè effudisti in ara Crucis, pro iniquis & peccatoribus, vt laues me ab omnibus peccatis meis, & non despicias seruum tuum, qui humiliter orat & inuocat sanctissimum hoc nomen Iesu.

Hoc nomen tuum Iesu nomen dulce est, imò quouis nectare & ambrosia dulcis : hoc nomen tuum Iesu nomen saluiferum est. Quid est Iesus, nisi Saluator?

Igitur

Igitur o bone Iesu, qui tua bonitate me creasti, & tuo pretioso sanguine me redemisti, ne patiarc, vt anima mea propter peccata mea magna & multa nimis ad Inferos rapiatur.

Iniquitates meæ, o bone Iesu, non condemnent animam meam ab infinita bonitate tua creatam. Agnosce in me bone Iesu quod tuum est; hoc est, animam meam: aufer à me quod alienum est, peccata scilicet atque iniquitates meas vniuersas. O bone Iesu miserere mei, quamdiu sum in hoc mundo, ne cum impijs in tremendo illo iudicii die condemner. O bone Iesu, si peruersus ego peccator meruero pro tua iustitia damnari, propter graua & enormia peccata mea, appello humiliter à seuera tua iustitia, ad piam tuam misericordiam; confidens omnino, quod tu, Domine mi Iesu, mihi pius eris, animæque meæ misereberis, tanquam pater pius & Deus misericors.

Quæ utilitas tibi, o bone Iesu, in carne mea, si anima mea descendat ad inferos? Certum enim est, quod in Inferno nemo constitebitur sancto nomini tuo Iesu. O misericordissime Iesu, pius esto in nos. O dulcissime Iesu, libera nos ab omni tribulatione & angustia nostra. O optime Iesu clemens esto nobis peccatoribus. O sacratissime Iesu fac animas nostras Electis tuis in caelo sociari. O Iesu maximè pie, salus omnium eorum

qui sperant in te, conforta nos. O Iesu fili sanctissimæ Virginis Mariæ, da nobis tuam misericordiam, gratiam, sapientiam, charitatem, castitatem, humilitatem, & patientiam in aduersitate nostra: vt possimus semper laudare, benedicere, & glorificare te Iesum Dominum nostrum, qui viuis & regnas Deus per omnia secula seculorum. Amen.

CAPVT DECIMVM, DIVERSAS CONTINENS GRATIARVM ACTIONES.

Lib. 3 de
benef. c. 1.



P RIME dictum est à Seneca: non expedire omnibus notum fieri, quàm multi ingrati sint: Pudor enim rei, inquit, tollit multitudinem peccantium, & desinit esse loco opprobrij commune maledictum. Et sanè expediret quidem id notum non esse, at vitium illud (pro dolor) hoc nostro tempore adeò vulgare est, vt celari amplius non possit. Si vel solum naturæ ductum sequeremur, amaremus hos, qui nos amant, & benefacta beneficiis compensaremus. Videmus enim animalia bruta, tigrides, leones, serpentes & dracones hanc naturæ legem obseruare, vt agnoscant benefactores, quique pro suis viribus gratitudinem referant. Quare nos homines, nec homines tantum, sed

& Christianos superant. Ferendum aliquo
 modo esset, si homo in hominem, cuius beneficia
 & pauca sunt, & vilia, ingratus esset: ceter-
 um ingratum esse Deo, cuius beneficia tot &
 tanta sunt, vt nec in nobis, nec extra nos; nec
 à natura, nec à gratia quicquam boni habeas-
 mus, quod non ab illo in nos derivatur, mini-
 mè ferendum est. Præsertim cum ex sacris li-
 teris didicerimus nihil ipsi gratius esse, quàm
 vt beneficiorum suorum memoria cum grati-
 tudine apud nos viuat in æternum. Nullum
 enim beneficium in Israelitas olim contulit, pro
 quo non statim gratitudinem postulauit, &
 cuius memoriam non voluit esse sempiternam.
 Patet hoc in exitu de Ægypto; in manna ce-
 litus demissa; in victoria contra Amalechi-
 tas &c. At qualia fuere hæc beneficia, si cum
 nostris conferamus? quanta inter animam
 & corpus, tanta est inter hæc & illa diffe-
 rentia.

Exod. 13.
 16. & 17.

Si itaque pro communibus sibi collatis be-
 neficijs tam studiosè gratias egerint benefa-
 ctori suo Iudei, omnino æquum est, vt & nos
 pro eximjs beneficijs, qualia sunt Creationis,
 Cōseruationis, Redēptionis, Vocationis, à ma-
 lis Præseruationis, diuinarum Inspirationum,
 Sacramentorum, promissæ Beatitudinis, alia-
 rumq; gratiarum, Deo gratias agamus, idq;
 non ore tantum, vt Phariseus ille, sed ore su-
 mul & mente. Adsit in gratiarum actionibus

nostris veritas & iustitia; hac, vt excludatur omnis superbia, & beneficiorum abusus; illa, vt absit omnis hypocrisis, & mendacium: ne Deo rerum turpium successum adscribamus. Agnoscamus vbique magnificentiam, benefacientis, & beneficium accipientis vilitatem: consueamur beneficij dignitatem, & affectum fide & predicatione bonitatis diuine ardentem Deo offeramus. Quæ omnia vt diuinus orator melius obseruet, sequentes gratiarum actiones ex diuersis nostri Granatensis opusculis studiosè collegimus.

I GRATIARVM ACTIO, pro beneficio Creationis.

Granatēf.
Ex adiun-
cto Me-
morialis
primo, &
lib. 1 Du-
cis. pec.

GRatias ago tibi omnipotens æterne Deus, rerum omnium Creator sapientissime & munificentissime, quòd cum nihil essem, creasti, vt essem: non lapis, non serpens, non auis, nō quadrupes, sed homo ad imaginem & similitudinem tuam factus: imò potius ipsa tui & imago & similitudo, substantia scilicet intellectu & arbitrij voluntate prædita, vt habens tecum similitudinem quandam, existendi, viuendi, & operandi, infinite pulchritudinis tuæ imago essem & ectypum.

Ne autem creatura tam nobilis statim iterum in nihilum recideret, & penitus mox periret, immortalem creasti me; vt cum animalia cetera modicum

appa-

appareant, & mox disparent, ego nunquam ad non esse redirem, sed perpetuò viuerem.

Sed parum id tibi Domine visum est, nisi etiam animam mihi tam pretiosam ac nobilem infunderes, vt vix Angelorum cedat dignitati. Boues & oues herbis ac gramine satiantur, porci glandibus ac siliquis vescuntur; nec pretiosiora sunt, quibus aliæ creaturæ nutriuntur, quæ si habeant contentæ sunt: meus verò cibus cælestis est, & appetitus meus satiari non potest, nisi immensa tua Maiestate. eius enim naturæ, eiusque capacitatis animam meam creasti, vt nec cæli, nec terra queant illam adimplere.

O infelix ego homo, quid mundum diligo? quid honores ambio? quid diuitijs inhio? quid voluptatibus immergor? quid quæro quæ hodie sunt, & cras non inueniuntur? non satiant hæc glandes, non sapiunt istæ glumæ, & legumina hæc non nutriunt. Cognosce, ô anima mea, quæ sis, quem in vsum creata, quid quærere, & quibus delicijs debeas saturari. Solus Deus satiare te potest: reliqua omnia occupare te possunt, satiare non possunt. Hunc quære, hic sponsus tuus, hic desideriorum tuorū quies, hic vltimus finis tuus. Agnosce, ô anima mea, dignitatem tuam; agnosce qualis creata sis. Rex cuius pulchritudinem sol & luna mirantur, cuius Maiestatem cæli reuerentur, & terrarum orbis adorat;

cuius sapientia Angelorum chori illuminantur, cuius bonitate societas superiorum ciuium pascitur, ille te creauit, vt sis eius habitaculum, sedes & sanctum templum eius : ille in sinum tuum semetipsum infundere vult : ille capacitatis tuæ immensæ angulos omnes potest implere. Exurge, exurge, ô anima mea, occurre hospiti tanto ; introduce eum cum gaudio in domum tuam, & dic ; Qui creauit me, requieuit in tabernaculo meo.

Quam animæ meæ dignitatem cum intueor, Domine, non miror quod tanto amore illius inebriatus filius tuus vnigenitus sinum tuum deserens, virginis vterum non horruit ; triginta tribus annis eam varijs laboribus & doloribus quæsiuit ; animam suam pro ea dedit, & pretiosissimo sanguinis sui lytro captiuam redemit : sed meam potius miror ingratitudinem, vecordiâ & stuporem, qui eandem animam redemptam, nunc denuo tam vili pretio teterrimis Demonibus prostituere, & cum tam immun-dis bestijs fornicari malo, quàm in brachijs Redemptoris mei, qui speciosus est forma præ filijs hominum, cuius vbera meliora sunt vino, cuius nomen oleum est effusum, requiescere.

Corporis quod dedisti mihi fabricam cum intueor, tot inuenio beneficia tua, quot membra, quot sensus, quot venæ, quot nerui, quot fibræ in illo reperi-

untur,

Eccli 24.

Psal. 44.

Cant. 1.

untur, quæ omnia incomparabilem tuam prædicant sapientiam & bonitatem: in cuius vnus corporis harmonia si semper philosopharer, nunquam mihi laudandi te materia esset defutura, nunquam dignas satis gratias tibi redderem, nunquam debita mea exoluerem pro tot, tantisque beneficijs; quæ quanta sunt norunt ii, qui aliquorum membrorum vsu destituuntur, aut alia vitiosi corporis affectione laborant.

Immenfas igitur bonitati tuæ, ô plastes hominū, ago gratias, quòd me non cæcum, non claudum, non mutum, non monstrosū, non maniacum, non epilepticum, aut quouis alio mentis vel corporis vitio deformem creasti: sed animum sanum in corpore sano dedisti: da etiam, ne vnquam membris, sensibus aut animæ meæ potentijs in nominis tui cōtemptum aut vituperium abutar.

Ceterū, ô Domine, multa adhuc desunt mihi: nihil enim statim à non esse ad perfectum esse deducitur: sed omnia quibusdam quasi gradibus ad suam perfectionem tendunt. Ea autem perfectio à quo petenda est, nisi ab eo, cuius est operis initium? Hinc omnes effectus ad suas causas conuertuntur, vt ab ijs vltimas suas accipiant perfectiones, à quibus principium suum acceperunt. Sic video, Domine, plantas laborare, & se in omnem partem torquere, vt Solem aspiciant, & radices in terram mittāt: pisces

aqua

aqua non exeunt, & pullus vix ouo exclusus, sub alis gallinæ sese abscondit, eamque sequitur quocunque ierit. Hoc cum faciant omnes creaturæ, in quibus non est intellectus, solus ego non facio, quem tamen ratione præditum creasti. Multa mihi deesse, multaq; obesse quotidianie sentio, & inordinata atque insatiabilis appetituum meorum fames edocet me. Sed ego tanquam columba non habens cor, non ad Creatorem meum, sed ad creaturas recurro: non aquam ex fonte peto, sed cisternas mihi fodio, terræ inhio, & eum qui terram fecit, contemno. Vitam quæro in regione mortis, & requiescere volo in rebus inquietis; à creaturis emendicare volo, quod à Creatore petere debeo.

Psal. 118.

Oro igitur bonitatem tuam, ô misericors Pater & Conditor mi, tolle hanc ignorantiam à me, conuerte me ad te, & conuertar: imperfectum meum vident oculi tui, tu me fecisti, tu perfice: tu opus hoc cœpisti, tu cœptum absolue. Manus tuæ fecerunt me, da mihi intellectum, ut discam mandata tua: aures dedisti mihi, sed ad audiendum fabulas, quàm ad verbum tuum sunt attentiores: oculos dedisti mihi, sed proniores sunt ad curiosa contemplanda, quàm ad consideranda mirabilia de lege tua: manus dedisti mihi, sed ad opera bona facienda debiles sunt: pedes dedisti, sed veloces ad malum, tardi sunt ad bonum. Quid multis?

non

non est sanitas in carne mea : perfice Domine quod in me coepisti, opus manuum tuarum ne despicias. Da quod deest mihi, quia Creator meus & Deus meus es : tu vita, tu salus, tu victus, tu copia, tu gloria, tu honor, tu pax, tu omnia bona mea es: sine te omnis copia mihi egestas est, qui viuis & regnas Deus per omnia secula &c. Amen.

II GRATIARVM ACTIO,

pro beneficio Conseruationis corporalis.

Gratias ago tibi summe, omnipotentissime, iustissime, & misericordissime Domine Deus; non tantum quia creasti me, & cum non essem ad esse me produxisti; sed etiam quia me ex nihilo factum, ne in nihilum reciderem, conseruasti, & quotidie conseruas: vtrumque enim opus tuum esse credo & confiteor. si enim manus tuæ clauderentur, & ab officio hoc ad ictum oculi cessarent, in nihilum (vnde me creasti) necessario mihi esset relabendum. Quotquot igitur momenta & temporis puncta habuit, habet, & in posterum habebit hæc vita mea, tot partes sunt huius beneficii.

Gratias ago tibi, ô pie Pater, quod à conceptione vsque ad natiuitatem me in utero matris, strictissimo clausum lectulo, inscrutabili quodam modo conseruasti: ne in visceribus maternis præfo-

Granatès.
ex libro 2.
Ducis peccat. & ex
Appendice 1.

catus,

catus, foetusque aut intempestiue ortus, aut in natiuitate strangulatus, sine baptismatis gratia in mundum prodierim. Gratias ago tibi, quod natus sum non inter barbaros, & idololatrias, qui ligna colunt, & lapides adorant: non inter hæreticos, qui nomen & sacrosancta tua Sacramenta blasphemant; sed inter Catholicos, qui te vera, sincera & pura fide venerantur atque inuocant.

Gratias ago tibi, quod natum me, uiuentemque in hoc mundo tot laqueis & periculis pleno, ab omni infortunio & improuisa morte cōseruasti. Cum enim me uiuente tot homines in mari suffocati, igne consumpti, in bello occisi, à latronibus iugulati, bestiarum dentibus laniati, hiatibus terræ absorpti, fame necati, siti extincti, calore exusti, frigore perempti, veneno corrupti, laqueo strangulati, ferro trucidati, aut alia repentina morte abrepti sint: cum interea tot cæci, claudi, rabidi, arquati, dysenterici, lienosi, maniaci, furiosi, lunatici, & caduci effecti sint, quorum vita morte miserior est; tua me Domine paterna prouidentia ab omnibus his malis defendit: cum tamen illis nihil acciderit, quod non & mihi, filio Adæ, ex eadem perditionis massa creato, in eodemque originali peccato concepto, & genito, accidere potuisset, nisi tu me cōseruasses. Tue hæc omnia gratiæ debeo, tibi hæc accepta fero. Si rex & dominus meus terre

nus ex decem captiuis, eidem crimini obnoxijis, nouem in crucem egisset, me autem ex pura gratia liberum dimitteret, quas illi gratiarum actiones referrem? id autem tu Domine fecisti mihi non semel, sed quotidie, & quidem singulis momentis.

Quid igitur pro his omnibus retribuam tibi Domine? quas laudes tibi canā? quas referam gratiarum actiones? Dicam cum Propheta; Misericordiæ Domini, quia non sumus consumpti, quia non defecerunt miserationes eius.

Thren. 3.

Sed corpus dedisti nobis multarum rerum indigum, quæ nisi adsint, facitè corrumpitur & perit: vt autem adessent, singulari tua prouidentia disposuisti. Vt enim nos propter temetipsum, sic omnia propter nos creasti: quicquid enim in terra, in aquis, in aëre, in igne, in sphaeris cælestibus, imò in ipso Empyreo cælo creatum est, id omne in obsequium nostrum creasti: omnes creaturæ ministri nostri sunt. Constituisti namque hominem super opera manuum tuarum, Subiecisti omnia sub pedibus eius &c. Mihi frondes & fructus producant arbores, mihi floret vinea, mihi pinguescit olea, mihi germinat hortus, & omnis agri plenitudo mea est: mihi terra mittit aurum, argentum, & varia vsibus humanis commoda mineralia. Mihi fluit & refluit mare, mihi pisces varios generat, mihi vela nauesque portat. Mihi scatu-

Psal. 8.

riunt

riunt fontes, mihi labuntur flumina; oues, boues & pecora campi pascuntur, pelles, lanasque, lac & butyrum proferrunt. mihi canis venaticus vngulas & dentes, mihi monoceros producit cornua. Mihi canit ficedula, mihi pavo versicolores pennas explicat. Quid multis? nihil in aqua, terra & aëre est, mouetur, aut viuit, quod non aut pascit me, aut recreat me, aut medetur mihi: ita vt totus hic mundus inferior, non sit aliud, quàm penituarium meum, viridarium meum, & pharmacopolium meum.

Si supra elementarem mundum ascendam, quot & quanta sunt illic Dominemagnalia, quæ fecisti mihi? Luna, Sol, stellæ cui lucent, nisi mihi? cuius in vsum suas in hæc inferiora mittunt influentias, nisi in meum? cui annorum, mensium & dierum tempora variant & dimetiuntur, nisi mihi? Ascendam altius, nobilissimos & purissimos illos Angelicos spiritus, qui tibi ministrant, & tibi assistunt, etiam meos esse ministros voluisti, vt me à visibilibus & inuisibilibus inimicorum insidijs defendant, suis suggestionibus ad omne bonum inducant, mihi in tribulationibus succurrant, orationes meas tibi offerant, & animam meam ex hac vita emigrantem, in conspectum tuum deferant.

Exurge nunc anima mea, exurge, numera si poteris singula hæc beneficia, quibus te quotidie peccantem prosequi

non

non cessat Deus. Omnia hæc & singula voces quædam sunt, ad laudandum munificum hunc benefactorem inuitantes: non audis, non cognoscis, quis ille sit, qui se tot argumentis tibi insinuat? tot testimonijs cognitum facit? tot muneribus ad se trahit? tãti te fecit, vt omnia tuum in vsum condiderit? qui gregis tui factus est pastor? familiæ tuæ dispensator? corporis & animæ tuæ medicus? Non amabis hunc? non seruiēs huic? non ages gratias? non laudabis?

Laudare te Domine, & ex totis precordijs tibi gratias agere cupio: sed in me vnde id possim non inuenio: non enim est laus pulchra in ore peccatoris. Ceterum quia omnia creasti in vsum & obsequium meum, omnes creaturas inuocabo, vt mecum communem Dominum collaudent, & dicam:

Benedicite mecum omnia opera Domini Domino, laudate & superexaltate eum in secula. Benedicite Angeli Domini Domino, benedicite cæli Domino. Benedicite aquæ omnes quæ super cælos sunt Domino, benedicite omnes virtutes Domini Domino. Benedicite sol & luna Domino, benedicite stellæ cæli Domino. Benedicite imber & ros Domino, benedicite omnes spiritus Dei Domino. Benedicite ignis & æstus Domino, benedicite frigus & æstas Domino. Benedicite ros & pruina Domino, benedicite gelu & frigus Domino. Be-

nedi-

Eccli 15.

Canticū
trium pu-
erorum,
Daniel. 3.
Integrum
est, si post
singulas
benedi-
ctiōes ad-
dideris,
Laudate
& superex-
altate eū
in secula.

nedicite glacies & niues Domino, benedicite noctes & dies Domino, laudate & superexaltate eum in secula. Benedicite lux & tenebræ Domino, benedicite fulgura & nubes Domino. Benedicat terra Dominum, benedicite montes & colles Domino. Benedicite vniuersa germinantia in terra Domino, benedicite fontes Domino. Benedicite maria & flumina Domino, benedicite cete & omnia quæ mouentur in aquis Domino. Benedicite omnes volucres cæli Domino, benedicite omnes bestiæ & pecora Domino. Benedicite filij hominum Domino, benedicat Israel Dominum. Benedicite sacerdotes Domini Domino, benedicite serui Domini Domino. Benedicite spiritus & animæ iustorum Domino, benedicite sancti & humiles corde Domino: laudate & superexaltate eum in secula. Benedicite omnes religiosi Domino Deo Deorum, laudate & confitemini ei, quia in omnia secula misericordia eius. Amen.

III GRATIARVM ACTIO,

pro beneficio Redemptionis.

Ex primo
Adiuncto
seu Appē-
dice Me-
morialis.

GRatias ago labijs, & corde, & omni qua valeo virtute, infinitæ misericordiæ tuæ, Domine Deus noster, quòd me ad imaginem atque similitudinem tuam creatum, & in primis parentibus lapsum, atque perditum, non in perpetuum, vt superbientem Angelum à facie

tua

tua exulare voluisti; sed pro ineffabili tua bonitate me redemisti. Quia me fecisti Domine, debeo tibi meipsum; quia verò me redemisti, deberem tibi plus quàm memetipsum, si haberem. Nihil enim prodesset nasci; nisi redimi profuisset.

Cùm autem nobis non moriendo succurrere potuisses, moriēdo tamen idipsum efficere voluisti, vt vim dilectionis tuæ nobis ostenderes; minùs enim amasses, nisi quod à nobis tolleres, ad tempus sustinuisses. Tanto autem digniùs à nobis honorandus es, quanto in digniora pro nobis suscepisti. Quis enim es tu qui pateris? quæ & qualia pateris? pro quo pateris? & cur pateris? Dic mihi Domine, vt mirabile opus hoc & incomparabile beneficiũ suo pondere quædam trutinare.

Quid igitur dicam, ô Deus meus, esse te? Dicā quod tu ipse dixisti olim Moyfi, Es qui es. Tu es ens infinitum, quod à nemine, præterquam à temetipso, procedit: & extra te non est ens, habens esse à semetipso; sed à te solo, qui es principium & fons omnis essentiæ. Tu tua omnipotentia fecisti omnia de nihilo: tu tua bonitate conseruas omnia sine cuius auxilio. Tu tua voluntate (si placeret) omnia redigeres in nihilum. Tu solus es, qui es, & omne quod esse videtur, nihil est, si tecum conferatur. Luna non splendet & stellæ non sunt mundæ

Exod. 3.

in

in tuo conspectu. Omnis pulchritudo tibi collata deformitas, omnis potentia infirmitas, omnis sapientia ignorantia, & omnis bonitas est malitia. Tu bonus es sine defectu; sapiens sine errore; liberalis sine acceptione personarum; iustus sine ira; munificus sine detrimento. Tu omnia operaris, & non distraheris; semper operaris, & non fatigaris: vbique es, & nihil tibi deest.

Psal. 103.

Iob 38.

Psal. 146.

Psal. 144.

Iob 38.

Psal. 18.

Quid igitur de Maiestatibus tuæ magnitudine dicam? Tu respicis terram, & facis eam tremere: tu tangis montes, & fumigant. Tu conclusisti ostijs mare, quando erumpebat quasi de vulua procedens. Tu numeras multitudinem stellarum, & omnibus eis nomina vocas: quem dominationes & Angelicæ potestates adorant; coram quo altissimi Seraphin contrahunt alas suas, & pennis se tegunt suis. Confitentur tibi omnia opera tua, & sancti tui benedicunt tibi. Te laudant astra matutina, & tibi iubilant omnes filij Dei. Cæli enarrant gloriam tuam, & splendorem tuum enunciat firmamentum. Flores agri testantur tuam pulchritudinem, terra prouidentiam tuam, mare & fluctus eius tuam maiestatem prædicant.

Talis ac tantus es tu Domine. Eia nunc liceat mihi dicere, imò sentire potius, quæ & quàm indigna tu tantæ Maiestatibus Dominus pro me tulisti: Et dum hæc enumero, chori omnes Angelici procident

dant ante te, & gratias agant tibi pro his
 quæ sustinisti, vt nos redimeres. Tu
 tam sublimis & admirabilis de summo
 fastigio tuæ gloriæ descendisti in hanc
 lachrymarum vallem, incarnatus & ha-
 bitu inuentus vt homo peccatis subdi-
 tus. Tu in hoc mundo pro me famem &
 sitim, tu ardores solis & frigora, tu per-
 secutiones & dolores, tu tantam pro me
 perpeffus es paupertatem, vt cum vulpes
 habeant foueas, & volucres cæli nidos
 suos, tu cæli Dominus non habueris vbi
 caput reclinares. Natus in stabulo inter
 ipsas bestias, ab ijs calorē halitus emen-
 dicasti, & laceris panniculis inuolutus
 es: octauo die tesseram hominis pecca-
 toris in carne tua suscepisti. Mox tibi
 mundus persecutionem mouit, ad terras
 exoticas & gentem idolorum cultricem
 fugisti, & ad hoc noctis silentia quæsi-
 sti; non te ætatis innocentia excusauit,
 nec tenero corpusculo data est quies, nec
 otiosa fuit delicata pueritia. Crescente
 corpore creuere dolores & labores. Quis
 enim poterit explicare Domine tuas o-
 rationes, vigilias, ieiunia, lassitudines,
 famem, sitim, persecutiones, & iniurias
 tibi ab inimicis irrogatas? Aduersum te
 loquebantur, qui sedebant in porta, & in
 te psallebant, qui bibebant vinum. Quid
 multis? tam indignis modis tua vita est
 exagitata, vt merito dicere potueris per
 Prophetam; Pauper sum ego, & in labo-
 ribus à iuuentute mea.

Luc. 9.

Psal. 68.

Psal. 87.

Et hæc quidem in vita sustinuisti, maiora verò sunt, quæ in morte & in cruce perpeffuses. Ibi capta est libertas, percussa innocentia, sputis coinquinata pulchritudo, dānata iustitia, illusa gloria, mortua & crucifixa vita. Papè, quid mirabilius? quid horribilius? quid magis inauditum? Vita moritur, Deus flagellatur, potentia Dei funibus ligatur, imago Patris conspuitur, Deus denique nudus in crucem agitur, & inter duos latrones toto inspectante mundo suspenditur? Vlteriùs anima mea progredi nō potest, vires eneruantur, & cor meum deficit in me. O altitudinem charitatis, ō profunditatem immensę humilitatis, ō magnitudinem misericordiæ, ō abyssum incomprehensibilis bonitatis. Si tanta tibi debeam, ō Domine, quia me redemisti, ecquid debebo tibi, quia modo tam admirabili, tibi que tam duro & arduo redemisti? O pijssime Pastor, ō fidelissime custos, qui animam tuam pro ouibus tuis, quas defendendas & custodiendas suscepas, posuisti; quibus ego muneribus tantum tuum beneficium remunerabo? quibus lachrymis plantum tuum prosequar? qua vita vitam puram & immaculatam tuam imitabor? Plus sanè Domine Iesu debeo iniurijs tuis, quibus redemptus sum, quàm operibus tuis, quibus creatus sum.

Quòd si hæc, Domine, pro Angelis & Archāgelis, pro Cherubin aut Seraphin
tole-

toleraſſes, mirandum minus eſſet. Nunc autem non pro his, ſed pro homine paſſus es. Et quid eſt homo, quòd memor es eius, & filius hominis, quòd hoc modo viſitaſcum? Si corpus conſideres, homo animalium omnium eſt miſerrimus; ſi mores, multò miſerior & peior eſt. Ergo ne tu Deus moreris pro filiis Satanæ, omnis honeſtatis & iuſtitie corruptoribus, parricidis, & legis diuinæ præuicatoribus? pro ingratis tibi tuiſque beneficijs, pro tuę voluntati immorigeris, tuę maięſtatis contemptoribus, tuę glorię blaſphemis? Ergo ne tu Deus moreris pro titione inferni, cuius cor beneficijs non capitur, minis non terretur, pro miſſionibus non flectitur, & pœnis non mouetur? Pro homine, qui contentus non eſt propria & domeſtica ſua malitia, etiam terram circuit, deteriora quærit, beſtiarum naturam induit, peior illis effectus: crudelior tigride, ſerocior leone, voracior lupo, venenofior regulo, callidior ſerpente? Quæ cum non ſufficiant ad inferos deſcendit, & à Dæmonibus deteſtabilia quæque mutuatur: blaſphemiam, ſuperbiam, inuidiam, & perpetuam cordis obdurationem? Cumque plura non inuenit, ipſe ſibi nefanda peccatorum monſtra excogitat, ſpecies quaſdam gulæ, luxuriæ, aliarumque turpitudinum, quæ nec inter beſtias, nec inter Dæmones reperiuntur. Tu huiusmodi portetum dignum ducis Domi

ne, vt aperiās super illud oculos tuos? tu pro sentina hac & cauerna serpentibus, viperis & scorpionibus plena moreris, vt sanctifices illam? Deficit anima mea in considerando salutari tuo Domine, & spiritus non est amplius in me?

Genes. 18.

Quia semel cœpi, loquar ad te Regem meum, & Deum meum, cum sim puluis & cinis: quid pium cor tuū commouit, quid vicit & expugnauit illud, vt tanta pro tam abominabili creatura patereris? Venabaris inde vtilitatem? expectabas gloriam aut beatitudinem maiorem, quam habebas? O mera gratia, o amor sine mercede, o pura & sincera bonitas, quæ tibi vtilitas ex vnius formicæ obsequio? quis fructus ex salute hominis tibi erat expectandus? Bonorum nostrorum non eges. Quis dedit tibi, vt reddas ei? omnia quæ sub cælo sunt, tua sunt.

Psal. 15.

Iob 41.

Luc. 1.

Quid tibi ergo cum doloribus & miserijs nostris? Per viscera misericordiæ Dei nostri, visitasti nos Oriens ex alto. O pia viscera, o dulcia viscera, o viscera facta nobis pelagus amoris & misericordiæ. His visceribus, & non aut vtilitate, aut necessitate motus, nostris doloribus condoluisti, nostri misertus es: vidisti afflictionem populi tui, & apparuisti in rubo inter spinas & tribulos, de cælo descendens, & nostram naturam assumens.

Ne quæso indigneris, Domine, si loquar.

quar. Si tanta vis amoris fuerit ô fons
charitatis, vt te coëgerit ad cōnubia tua
Maieſtate indigna, vt accipere volue-
ris tibi ſponſam ex creaturis tuis, an
non erat ſponſa in terra tua nobilior,
& tibi cū gratia, tum natura propin-
quior? cur deſcendere voluiſti in terram
Philithijm, qui incircuncifi ſunt, at-
que ex ijs tibi ſponſam petere? Cur non
potius Angelicam naturam apprehendi-
ſti? cur deperibas ſponſam de gente in-
circuncifa, quæ te poſtea tradet inimi-
ciſ tuis, & occidet te? Quid reſpon-
des Domine mi? quid reſpon-
des, niſi; Hanc volui, hæc placuit oculis meis, vt ille
quondam reſpondit, qui te præfigurabat
Samſon?

Iudic. 14.

Quas igitur gratias agam tibi Domi-
ne pro beneficio hoc incōparabili? quo
amore diligam te, qui mihi tam mani-
feſtum ſpecimen incōprehenſibilis tuæ
bonitatis exhibuiſti? Quī fieri poteſt, vt
aliquis in mundo reperiatur, qui non di-
ligat te? qui tanti beneficij eſſe poteſt
inmemor? Prius obliuiſcar mei, ô Do-
mine, quàm memoria tanti beneficij
mihi excidat. Clauī iſti, qui manus tuas
innocentiſſimas tranſierunt, etiam cor
meum tranſigant; & admirabilis illa
permutatio, qua tu mala mea ſuſcepīſti
in te, & bona tua liberaliter effudiſti in
me, nunquam de mente mea recedat.
Cumque tu toto vitæ tuæ curriculo de-
ſiderio magno deſideraueris crucem, in

Apoc. 21.
22.

qua moriturus eras, pro me, da ut & ego quamdiu vixero à cruce non abhorream : sed eam cum patientia feram ; donec me transferas ad locum illum, ubi mors ultra non erit, neque luctus, neque clamor, neque dolor : ubi tecum regnabimus in secula seculorum. Amen.

IIII GRATIARVM ACTIO

*pro beneficio Vocationis & Iustific-
cationis.*

Ex Appē-
dice pri-
ma.

1 Pet. 2.

Osee 1.

GRatias ago tibi Domine Deus, adiutor meus, & redemptor meus, qui me de tenebris vocasti in admirabile lumen tuū, ut qui eram nō misericordiam consecutus, nunc misericordiam consecutus sim. Quo enim tempore debebam in terra oblivionis, & in regione umbræ mortis ; cū via mea esset peruersissima, tibi quæ contraria, tunc tua pietas vocavit me, non solum fugientem, sed etiam repugnantem ; tunc Spiritum sanctum dedisti mihi, & in filium tuum me adoptasti.

Gratiam, quam in baptismo accepi, nequiter abieci, stolam primam laceraui, & quasi filius prodigus omnem substantiam meam dissipavi : templū sanctum tuum, quod sanctificasti in me tibi, prophanavi, erigens in illo turpissimarum voluptatum idola, & varijs peccatis polluens illud. Fuit aliquādo tempus, o Saluator mi, in quo tam cæcus fui, tam perditè vixi, quàm si legem non habuissem,

buissem, & Deum esse nullum credidissem : non eram memor mortis ; iudicij & futuræ vitæ non recordabar : lex, iuxta cuius præscriptum vivebam, erant appetitus mei : ibam in adinventionibus meis, & secundum desideria mea ambulabam.

Sic anni vitæ meæ plurimi transferunt, quibus in tam densis tenebris vixi, vt manibus instar Ægyptiacarum palpari potuerint. O quàm serò te cognoui æterna lux ; quàm tardè oculos meos aperui, vt aspicerem antiquam pulchritudinem tuam ?

Toto hoc tempore obseruasti me, sustinuisti me, expectasti me, nolens quòd mors repentina me inuaderet. O altitudo iudiciorum tuorum, & magnitudo miserationum tuarum. Quot homines interea in medio peccatorum suorum cursu subita morte abrepti sunt, qui nunc miserè torquentur in inferno : & ego, qui vnus ex illis eram, tua misericordia protectus, & in hanc vsque horam seruatus sum. Atat, quid actum fuisset de me, si illo tempore & me ad districtum tribunal tuum euocasses ? quàm ego rationem reddere potuissem in statum tam periculoso ? O misericordia mea, & redemption mea, non minores pro hoc beneficio tibi ago gratias, quàm si me inter illos damnatos constitutum inde extraxisses, atque à tormentis perpetuis liberasses. Benedicta sit patiëntia tua, cuius

beneficio viuo, & benediſta ſit miſericordia tua, quæ me tanto tempore defendit & cuſtodiuit.

Neque ſolum, cùm ego peccabam, me cuſtodiuiſti, ſed non raro etiam me tanquam amicum tuum viſitaſti, dulciſque & ſecretis inſpirationibus tuis me ad te vocaſti; obijciens mihi meorũ peccatorum magnitudinem, huius vitæ breuitatem, alterius æternitatem; tuæ iuſtitie ſeueritatem, & miſericordie benignitatem. In medio mearum iniquitatum illuxit mihi ſubinde præſentia tua tam efficaciter, vt perſeueranri mihi in delicijs meis, & quærenti porrum, cepe & allia Ægyptiorum, vberriſas lacrymas excuſſeris. Ego peccabam, tu me à peccato reuocabas: ego fugiebam à te, tanquam parum eſſet mihi perdidiffe te; & tu quærebas me, quaſi plurimum tua intereſſet, inueniſſe me. Sic multis annis luſtando & reluſtando viximus, tu benefaciendo, ego malefaciendo & beneficia tua contemnendo. His vocibus vocabas me, his funiculis fruſtra me trahebas.

Tandem cùm placuit tibi ſegregare me, & vocare per gratiam tuam, clamorem magnum in aures animæ meæ immiſiſti, quo veluti leonis rugitu à ſomno excitaſti me, & à morte ad vitam reuocaſti. Hæc eſt illa vox, quam tanto pere prædicat amicus tuus Dauid, in virtute confringens cedros, intercідens

flammam ignis, & concutiens commouensque desertum Cades: nō enim minor est potentia, quā misericordia, qua vti in hoc opere consueuisti. maxima namque misericordia est peccata remittere, & potentia maxima peccatores iustos facere.

O quot & quanta sunt beneficia, quæ pariter cum hoc vno in nos effunduntur? hīc datur peccatorū venia, datur gratia, datur charitas cum ceteris virtutibus affeclis: dantur denique sancti Spiritus dona atque charismata. Hīc peccator tibi reconciliatur, ex inimico amicus, ex mancipio Diaboli filius tuus, & hæres fit regni tui. Hīc filius prodigus in domum patris recipitur; stola prima, annulus, calceamenta, ceteraque filij ornamenta hīc redduntur.

Luc. 15.

Eccles. 9.

Et si certus esse nequeam Domine, oratione an amore dignus sim, spero tamē id, & omnino de bonitate tua cōfido: sed & conscientia mea mihi testatur, quod iustificationis gratiæ particeps sum: quare me tibi debitorem, & quidem maximum agnosco. Benedictus itaque sis Domine liberalissime, dator omnis boni, imò tui ipsius: quia viuenti mihi perditissime dedisti Spiritum sanctum tuum, nutricium, magistrum, tutorem, gubernatorem, consolatorem, & omne bonum meum: ille mihi est diploma adoptionis, arrha matrimonij, & pignus vitæ sempiternæ. Benedictus sit dies il-

le, in quo talis hospes animam meam ingressus est, & benedicta hora, in qua ad recipiendum illū portæ voluntatis meæ apertæ sunt. Ille dies mihi sollemnis fuit, illo die ex Ægypto profectus sum. Ille dies mihi natalis fuit, in quo filius Dei regeneratus sum. Ille Paschalis, in quo à morte ad vitam resuscitatus, Ille Pentecostalis, in quo Spiritum sanctum accepi.

Iob 3.

Luc. 15.

Maledicat Iob diei natiuitatis suæ, ego huic benedicam. Hic est ille dies, in quo lætati sunt Angeli de conuerfione peccatoris, in quo exultauit mulier ob inuentum drachma, in quo vicinos conuocauit gaudens pastor ob ouem inuentam; in quo vlulant Dæmones ob prædam amiffam. Hic est ille dies, in quo tu Pater me filium agnouisti, Filius verò tuus me fratrem suum; & Spiritus sanctus tuus me sibi templum consecrauit, & Angelorum chori me socium & conciuem suum salutârunt. Si hoc die exultauerint Angeli, & tibi Domine cantauerint, quâ poterunt tacere labia mea? quomodo obmutescet lingua mea? quomodo os meum tua laude non replebitur? Quidquid Psalmi & Prophetæ cecinerunt de aduentu Redemptoris mei, id omne tibi cantabo Domine.

Magnum fuit beneficium tuum Domine, quòd me creasti, in eo enim me à nō esse ad esse produxisti: sed multo maius est, quòd me iustificasti, in hoc enim

me

me eripis ab esse culpæ, & adducis ad esse gratiæ. in illo factus sum filius hominis, in hoc filius Dei sum constitutus. Magnum est beneficium, quod expecto gloriæ: sed non minus est in suo genere hoc iustificationis. siquidem non minus est ex peccatore facere iustum, quàm ex iusto beatum, cum inter peccatum & gratiam maior, quàm inter gratiam & gloriam sit distantia. Magnū quoque, imò maximum est beneficium redemptionis: sed quid profuisset mihi redemptio, si non subsecuta fuisset vocatio & iustificatio? Agnosco igitur, ô Domine, beneficium iustificationis cardinē & clauem esse omnium aliorum, sine quo alia non modò non prosunt, sed maioris præbent damnationis materiam.

Sed, ô Domine, quid feceram tibi, vt hæc mihi retribueres? quid obsequij præstiti tibi, vt hanc mercedem mihi redderes? quid in me inuenisti tanto dignum honore & præmio? Nihil in me erat à peccato immune: non te cognoscebam, non te amabam, non tibi seruiebam, nec tui memineram: factus eram abyssus tenebrarum & iniquitatum. Non possum, Domine, non horrore concuti, quoties hæc recolo, nec aliā huius beneficiij causam inuenio, quàm tuam bonitatem. Quot fuere sodales mei eiusdem ætatis, naturæ, & impietatis, quorum ego eram peruersissimus, me tamen assumpsisti, & illos repudiasti. in eadem captiuitate

Ægyptiaca detinebamur, & me ad regalem mensam tuam admisisti, illos autem damnaſti, & inferni vulturibus carnes eorum vorandas obieciſti.

Hæc cum recordor, Domine, ſpiritus amplius in me non eſt, & nescio quomodo laudabo te, aut quas tibi referam gratiarum actiones, pro bono tam incomparabili. Tota vitæ meæ tēpore dicam, Domine, quid vidisti in me? Domine quid vidisti in in me? Domine quid viſiſti in me amplius, quàm in alijs, quos reprobaſti? Vt quid me ſic vocaſti? ſic me liberaſti? ſic me aſpexiſti? ſic me ſuſcepisti (ſi modò ſuſceperis) relinquēs tot in peccatis, qui minùs erant mali, quàm ego? Nescio quid dicam, nescio quid faciam, nescio quid retribuam tibi Domine pro omnibus quæ retribuisti mihi? Benedicam, cum Propheta, Domino in omni tempore: ſemper laus eius in ore meo. dicam cum eodem Propheta; Dirupisti Domine vincula mea, tibi ſacrificabo hoſtiam laudis, & nomen Domini inuocabo. Sedit in throno, & Agnoſcitur benedictio, & honor, & gloria, & potestas in ſecula ſeculorum. Amen.

V GRATIARVM ACTIO,

pro beneficio Sacramentorum.

Aterne Pater dilecti filij tui Domini nostri Iesu Christi, qui es conditor & Rex vniuerſæ creaturæ tuæ, tibi gratias ago toto pectore, & omni qua-

valeo

ſal. 33.

Apoc. 5.

x lib. 7
Memorialis.

valeo virtute, quod sine vlllo meo merito precedente, sola motus tua misericordia dignatus es lauare me aqua illa, quæ de sanctissimo filij tui latere profluxit, eluens in baptismo omnes sordes anime meæ, meque ab omnium inimicorum meorum, peccati, inferni, Dæmonis, & mortis tyrannide liberans: faciens me templum viuum & S. Trinitatis habitaculum; donans mihi spiritum adoptionis, per quem in numerum filiorum tuorum assumptus sum: dans insuper omnia ornamenta, quæ ad hanc dignitatem requiruntur, vt sunt gratiæ, virtutes infusæ, & dona Spiritus sancti, quibus anima mea vt sponsa exornata pulchra in conspectu tuo appareret, munitaque fortitudinem nouam acciperet, qua deuicto generis humani antiquo hoste triumpharet, & finem ad quem creata est, celestis scilicet regni beatitudinem, consequeretur.

Quid tibi, Domine, pro hoc beneficio retribuam? Quid dabo tibi pro eo, quod in tanta multitudine Barbarorum, Infidelium, Turcarum, Maurorum & Ethnicorum, qui lapides, ligna & serpentes adorant, me Christianum esse voluisti? quodque me recepisti in gremium Ecclesiæ, in hæreditatem domus tuæ, & in arcam veri Noë, ne cum cæteris in diluuiio infidelitatis perirem. Quot animas creasti Domine eo ipso die & momento, quo mea creata est, quarum quædam in Tur-

ciam, quædam in Indiam, nonnullæ in Barbariam, & aliæ in alias Infidelium terras missæ sunt? eadem profecto fors etiam animæ meæ obtingere potuisset: sed gratia tibi, & gloria, & laus, ô misericordissime Domine, qui non alibi voluisti funiculum meum cadere, quàm in Paradiso, in gremio Ecclesiæ, quæ est domus filiorum tuorum. Da mihi clementissime Pater, dignè in hac domo conuersari, ne tantum beneficium malè in me collocatum inueniatur, & in futuro seculo fors mea infidelium sorte fiat deterior.

Pater sancte, benedico ineffabile nomen tuum in æternum, & glorifico te labijs & toto corde meo, quod non semel tantum me in sanguine dilecti filij tui abluisti; sed quod lateris illius sanctissimi fontē mihi semper offers apertum & scaturientem, vt immergar in illo, & animam meam, quotiescunque peccauero, in eo lotam emaculem. Quid enim aliud est Sacramentum Confessionis, nisi fons limpidissimus, ad eluendas nostras maculas indefinenter fluens? medicina præsentissima, ad sanandas nostras infirmitates instituta? mediumque efficacissimum, per quod tibi eterno Patri sanguine filij tui intercedente reconciliamur? Ego peccauerā, & damnatio mihi erat proxima: filius verò tuus misertus mei peccata mea in se recepit, flagellaque & sententiam, quæ me manebat,

nebat, sustinuit, & in virtute illius satisfactionis Sacerdoti mandauit, vt me ab æterna pœna absoluat. Quo igitur corde, quò amore, quibus oculis Vnigenitum filium tuum intuebor, qui tanta fecit, tanta & talia passus est pro me? & quid non æquum est vt sustineam vicissim pro illò? Si quotidie oporteret me tormenta perferre, si ipsam gehennam longo tempore tolerare, nil dignum tanto beneficio rependerem.

Non minores tibi gratias ago dulcissime Domine Iesu Christe, amator hominum ardentissime, pro Communionis Sacramenti institutione: est enim hoc Sacramentum Sacramentorum, mysterium mysteriorum, beneficium beneficiorum, & mirabilium tuorum memoria. Hoc est Sacramentum gratiæ, charitatis, amoris, vnionis, deuotionis, remissionis, & omnium bonorum. hîc homo visitatur à Deo; hîc honoratur diuina præsentia; hîc templum viuum corporis Christi efficitur; hîc gratia datur in maxima abundantia; hîc suauitas diuina in proprio fonte gustatur; hîc diuini amoris ardor acceditur; hîc anima verum & legitimum Sponsum suum amplectitur, ex quo mirabili delectatione perfunditur. O quod gaudium, quæ voluptas, quæ dulcedo, quæ vitæ suauitas in anima iusti reperitur in illa hora, qua tremendum hoc & adorandum Corporis tui, ô melliflue Iesu, Sacramen-

cramentum sumitur? Nihil auditur in ea tunc aliud, quàm dulce melos hominis interioris, piorum desideriorum suspiria, suauissima gratiarum actionum cantica, & amantissimi sponsi epicedia, amatoriaque carmina.

Hoc Sacramentum reliquisti nobis Domine, vt sit viaticum, quo cum ad cælum est proficiscendum: vt panis sit, qui confortet cor eorum, qui laborant in vinea Domini: vt sit tuæ charitatis testimonium, miseriarum nostrarum refocillatio, gratiæ diuinæ canalis, pignus æternæ salutis, & thesaurus omnium Christianorum incomparabilis. Hic renouantur bona proposita; hic reuirescunt bona desideria; hic crescit deuotio; hic lachrymarum fontes aperiuntur; hic anima mea te, Christe, pascitur, qui proprium meum es alimētum, summumque bonum, quo frui possum in hoc seculo.

Talia sunt Domine dona tua, talia sunt charismata & beneficia tua, quæ in his tribus Sacramentis nobis conferre soles: pro quibus, vti & pro alijs quatuor, si tibi gratias dignas acturus essem, tota esset in eo vna vita hæc consumenda, vt nulla de alia reconueniret me cogitare. Da igitur Domine non tam agere gratias tibi, quàm habere; hoc est, benignitatis ac munificentiae tuæ erga me continenter recordari, vt cum me non experiaris ingratum, pergas dona tua in
me

me augere, quousque per hæc veniam ad te fontem bonorum omniũ perennem, & totius beatitudinis. Amen.

VI GRATIARVM ACTIO,

pro beneficio Conseruationis spiritualis

in vita gratiæ.

TE adoro, te laudo, te glorifico, tibi gratias ago, clementissime Pater, æterne Deus, ex toto corde meo, pro vniuersis beneficijs tuis. Imprimis verò quòd me, quem nullis præcedētibus meritis meis vulneratum curasti, & inimicum tibi reconciliasti, de captiuitate redemisti, de morte ad vitam reuocasti, pro paterna tua cura in hoc felicissimo statu hætenus conseruasti, & adhuc tua gratia conseruas.

Tu solus es Domine, qui creasti me, & ex nihilo fecisti; & tu solus es, qui, quod creasti, conseruas: tu essentiam naturæ quam dedisti, ne pereat, benignè protegis. Tu, solus qui me per spiritum tuum in vitam gratiæ regenerasti; & tu solus, qui conseruas gratiam, quam contulisti. Per te è peccatis emergimus, per te cōseruamur, ne in peccata recidamus. Si aliquando surrexerim, tu manũ porrigebas; si nunc stetero, tu me tenes, ne cadam. Quotquot bona proposita concepi, quotquot pias inspirationes sensi, omnia sunt ex tuo beneficio. Quoties inimicum vici, quoties malas inclinationes & peruersos meos appetitus refrig-

naui.

1 C or. 12.

naui, tuum fuit beneficium. Si enim nemo possit dicere, Domine Iesu, nisi in Spiritu sancto, nec aliquod opus bonum facere, sine te, vti nec palmes fructum facere potest à vite resectus; certum est, si quis fructus ab hoc palmite productus sit, id beneficium esse vitis cui inhæret.

Si quando ieiunauerim, id à te est: si quid aduersi patienter tolerauerim, tu mihi opem tulisti: si quando propriam voluntatem abnegauerim, tibi id acceptum fero. Si pias subinde lachrymas fuderim, si orationem tibi acceptam fecerim, fateor Domine tuo feci adiutus subsidio. Fateor te omnia opera bona in me operatum esse. Pro omnibus his gratias ago: omnia hæc beneficia ad eum, à quo prodierunt, cum gratiarum actione refero, vt postea fluant vberius: tot beneficiorum debitorē me agnosco, quot tibi, Domine, obsequia præstiti in hac vita, si quæ tamen præstiterim.

Quid dicam de occasionibus & opportunitatibus à te mihi ad bene viuendum oblati? quot concionatores missisti, qui me docerent? quot bonos confessorios mihi dedisti, qui me lapsum erigerent, à peccatis absoluerent, pijs monitis ad meliorem vitæ frugem adducerēt? Quot bonos amicos, quot pios socios, quot bona exempla, quot deuotos libros mihi comparasti, quorum omnium ope ad bonum excitarer, & stimulus ad iustiores vitam adderetur? Magna hæc
tua

tua sunt beneficia, sed maiora tibi debet, qui etiam sine his profecit: beatus ille, quem tu erudieris Domine, & de lege tua docueris eum: tanto enim plus ille profecit, quanto tu melior es doctor, & magister alijs sapientior.

Sed quis poterit enumerare pericula & mala à quibus me liberaſti, ô benigniſſime cuſtos hominum, in quæ ſine te incidere potuiſſem? non eſt peccatum tam grande, quod vnquam fecit homo, quod non poſſit facere alter homo; ſi Creator deſit, à quo factus eſt. Quapropter omnium hominum peccata non immerito mea appellabo beneficia, in omnia namque illa impingere potuiſſem, niſi infinita miſericordia tua me conſeruafſet. Quot itaque peccandi occaſiones me ad lapſum impellere potuiſſent (impellere namque Dauidem potuerunt) niſi tu Domine abſtuliffes eas, meam non ignorans infirmitatem? Non omnes hæc beneficia tua agnoſcunt, ego verò per tuam gratiam agnoſco atque exoſculor. Quoties, ô pie pater, hac mecum uſus es miſericordia? Quoties inimici manus ligafſti, ne me tentare poſſet: aut ſi tentaret, tamen non ſuperaret? Quoties antiquum illum ſerpentem incantaſti, vt licet inter viperas & baſiliſcos ambulare, mihi tamen nocere non poſſent? Quoties mecum per aquam & ignem tranſiſti, ne aut flamma me combureret, aut aqua ſuffocaret? Quoties in me-

dio

Psal. 117.

dio feruorum mundi huius flammam
fornacis Babylonicæ Spiritus sancti ro-
re temperasti, & refrigeraſti, ne me con-
sumeret? Quoties æquiſſima cum ratio-
ne dicere potui illud Propheticum; Im-
pulsus ſum, euerſus ſum, vt caderem, &
Dominus ſuſcepit me? Si quando ſtete-
rim, per te ſteti: ſi ceciderim, per me ce-
cidi, & tu manum tuam ſupponebas, ne
colliderer: ſed & ſemper in luto iacuiſ-
ſem, niſi tu me erexiſſes: ſemper cæcus
fuſſem, niſi tu me illuminaiſſes. Secun-
dum igitur multitudinem dolorū meo-
rum in corde meo, conſolationes tuæ
lætificauerunt animam meam.

Psal. 93.

Quoties ô Domine peccata mea me-
ruerunt iram tuam? quoties meritò po-
tuiſſes à me manum tuam auferre, ſicut
ab alijs minùs me ingratis abſtulisti, mi-
ſertus tamen es mei, & non ſecundum
iniquitates meas ſeciſti mihi? Superbus
fui, inani gloria tumidus, mihi gloriam
quæ tibi debebatur tribui, ideoq; dignus
qui gratia tua exciderem. Ingratus fui,
tua beneficia non agnoui, naturæ tribui,
quod naturæ debebatur auctori, nec de-
bitas tibi gratiarum actiones retuli. Ne-
gligens & ignauus fui in his, quæ ad ſa-
lutem meam pertinent: ideoque merui,
vt talentum meum à me iamdudum ab-
latum fuiſſet. In amandis periculis fui
temerarius, dignus igitur qui in illa in-
cidiffem. Dignus, inquā, Domine ſum,
qui ob hæc & ſimilia multa iamdudum

à te

à te desertus & repudiatus essem, vt culpa posterioris peccati pœna fuisset prioris: sed tua patientia tanta fuit, vt dissolutæ vitæ meæ turpitudinem dissimulareris, & ad meas infirmitates oculos tuos occluseris. Vsque huc tãta me cum pietate sustinuisti, & noluisti, vt tuum mihi vsquam deesset auxilium. Oro te Domine, quod incepisti in me perfice; dignare in me non solum custodire, sed etiam augere munera & beneficia tua, quæ ipse mihi dare dignatus es: perge Domine in hac vita spiritali me innocentem custodire, & ne deseras me, sicut nec haftenus deseruisti.

Dolores conscientiae meæ, Domine, quibus exagitarer, si me repudiasses, nunc lætus mente, lætus & spiritu in gratiarum actiones & laudum voces conuerto, dicens cum amico tuo; Conuertere anima mea in requiem tuam, quia Dominus benefecit tibi. Quia eripuit animam meam de morte, oculos meos à lachrymis, pedes meos à lapsu. Pro his omnibus beneficijs tuis gratias agimus tibi Domine Deus noster omnipotens, qui es, & qui eras, & qui venturus es, quia magna & mirabilia sunt opera tua, iustæ & veræ sunt viæ tuæ, Domine Rex seculorum. Amen.

Psal. 114.

Apoc. 11.
& 15.

VII GENERALIS GRATI-
arum actio, ad Iesum filium
Mariæ.

Ago

Granatēf.
lib.5 Me-
morialis.

AGO tibi gratias, dulcissime Iesu, quia me creasti ad tuam imaginem & similitudinem, quia mihi corpus hoc dedisti cum omnibus suis sensibus, & quia hanc illi animam infudisti, cum omnibus suis potentiss, vt cum ijs, & per eas te cognoscā & diligam. Da mihi gratiam Domine, ita tibi Creatori & patri meo cælesti seruiendi, vt mortificatis omnibus passionibus & affectionibus meis vitiosis, reformetur in me imago tua, quam tu creasti, & ego tibi in vitæ meæ innocentia similis efficiar.

Ago tibi gratias benignissime Iesu, pro beneficio conseruationis: quia idem ipse tu, qui me creasti, in ista essentia, quam dedisti, me conseruas: sed & gratias insuper ago, quia ad eandem conseruationem creasti omnia, quæ in mundo reperiuntur; cælum, terram, mare, Solem, Lunam, stellas, animalia, pisces, aues, arbores; denique & omnes alias creaturas, quarum quasdam creasti ad me conseruandum, quasdam ad me satiandum, aliquas ad me recreandū, nonnullas ad me docendum, reliquas ad me castigandum. Oro te Domine, da mihi gratiam, vt sic omnibus vtar creaturis in hoc mundo, quemadmodum oportet, & in eum finem, in quem tu eas condisti; hoc est, vt per illas veniam in cognitionem veri mei Dei ac Domini, vt ex ijs admiratio quædam in corde meo

exci-

excitetur, & amor sancti nominis tui accendatur.

Ago tibi gratias Domine Iesu, pro beneficio redemptionis; hoc est, pro incomprehensibili illa bonitate, & pro summa illa misericordia, qua in me perditum vsus es: pro ardentissima quoque illa charitate, qua me redemisti, descendens in terram, vt ego ascenderem in celum: factus homo, vt me faceres Deum: passus mortem acerbissimam, vt ego vitam haberem beatissimam. Ago tibi gratias, pro incarnationis tuæ humilitate, pro natiuitatis tuæ paupertate, pro sanguine circumcisionis, pro fuga in Ægyptum, pro ieiunio in deserto, pro vigilijs in orationibus, pro sapientia in doctrina, pro integritate in exemplis, pro egestate denique & humilitate totius vitæ tuæ sanctissimæ. Ago tibi gratias pro oratione in horto, pro sudore sanguineo, pro tua captiuitate, pro alapis, pro sputis, pro blasphemijs, pro flagellis, pro corona spinea, pro veste purpurea, pro conuijs, pro felle, pro aceto, pro clauis, pro lancea, pro cruce, & pro morte, quam, vt me redimeres & saluum faceres, sustinui.

Ago tibi gratias, ô clementissime Iesu, quod iam inde ab incunabulis in gremium Ecclesiæ tuæ me recepisti, in fide Catholica me educaisti, Christianum me fecisti, animam & corpus meum pretiosissimo corporis & sanguinis tui cibo &

potu

potu sustentasti, atque conseruasti. Oro pietatem tuam, concede mihi, vt tu solus sis suauissimus cordis mei cibus, & anima mea semper te sitiāt fontem aquæ viuæ, vt peracto huius peregrinationis cursu, in tua beatitudine liceat mihi gaudere, & gustare de exundanti flumine deliciarum tuarum, quod procedit de te, qui fons es vitæ & bonorum omnium.

Ago tibi gratias amantissime Iesu, qui vsque in præsentem diem sine mea prudentia me liberaſti à multis & maximis periculis, tam animæ, quam corporis, cum interim dignus essem à te negligi, & omnino reprobari.

Ago tibi gratias, quòd cum sopitus, sepultusque in peccatorū meorum stercorebus iacebam, me tanta cum patientia expectasti ad pœnitentiam, non obstante, quòd toties te offendi, & sanctis tuis inspirationibus restiti. Largire mihi Domine, vt in posterum te sequar humili cum affectione, cumq; omni promptitudine & obedientia diuinas tuas inspirationes obseruem, ijsque morem geram, & omnium visibilium amorem ex corde meo expellam, vt totus tuæ seruituti emancipatus in posterum nunquam à te diuellar.

Ago tibi gratias, ô bone Iesu, quòd præter omnia beneficia hæc pro salute mea, & in remedium omnium vulnorum meorum tot & tam admiranda in-

stitui-

stituisti Sacramenta, & tot sanctis inspirationibus me visitaſti. Denique gratias ago tibi pro beatitudine gloriæ, quam mihi præparaſti, & qua tuo beneficio fruor in æternum, ſi me meis criminibus indignum illa non fecero.

Hæc ſunt Domine beneficia communia, quorum ego haſtenus memini, plurima ſunt alia, quorum memoriam non habeo, & quæ mihi incognita ſunt & occulta; pro quibus non minores tibi debeo gratias, quàm pro nunc commemoratis. Imò tâto maiores, quanto manifestius in ijs tuæ cognoscitur bonitatis magnitudo: quia quo tempore ego dormiebam, tu vigilabas ad defendendum me à mille periculis, & infinitis me gratijs onerandum. Quemadmodum igitur æquum, imò neceſſarium eſt, vt à te petam remiſſionem non tantum peccatorum eorum, quæ mihi nota ſunt; ſed & eorum quæ ſunt incognita: ſic etiam æquum & neceſſarium eſt, vt tibi gratias agam, quas poſſum maximas, nō tantum pro beneficijs manifestis & cognitis; ſed & pro ijs, quæ mihi occulta ſunt & ignota: ideoque te, ô beneficentiſſime Ieſu, adoro, te laudo, tibi pro omnibus, & in omnibus benedico. Da mihi Redemptor mi, vt ſic omnibus his beneficijs imposterum vti & frui aſueſcam, ne ſint mihi occaſiones vel ſuperbiæ, vel ignauiæ; ſed maioris humilitatis & gratitudinis: vtque maius in me cultus tui

desiderium accendant, qui viuus & regnas cum Deo Patre in vnitae Spiritus sancti Deus per omnia secula seculorum. Amen.

CAPVT VNDECIMVM,
CONTINENS PRECA-
TIONES CATHOLICAS ET
Christianas, ad sanctissimam Dei-
param & Virginem Mariam,
aliósque cælestis patriæ
ciues.

ROSARIVM B. MARIAE
VIRGINIS.

PRAEFATIO IN SE-
quens Rosarium.

LVDOVICVS Granatēsis, cano-
dide Lector, postquam in quinto
suo Memorialis vite Christianae
libro modum orandi tradidisset,
duerforum argumentorū orationes subiūxit:
inter alias quoque septem deuotissimas ad B.
Mariam Virginem, quæ cū propemodū Ro-
sarj formam referebant, & homines pleris-
que B. Mariae deuotiores eam saepe Rosario sa-
lutare consueuerint, nos eas orationes resolu-
mus, & paucis interiectis, absolutum ex ijs
Rosarium confecimus.

Salue

Salue sanctissima Virgo Maria, quæ à Deo in matrē electa es ante omnia secula. Tu es illa beata mulier, de qua Rex cæli & terræ, vt genus humanum redimeret, carnem assumere voluit. Tu es illa pia Mediatrix inter Deum & hominem, cuius intercessione cælum terræ iungitur; quæque alta sunt & sublimia, humilibus conglutinantur. Tu es dux vitæ nostræ, tu porta diuinæ gratiæ, tu maris mundi huius procellosi portus es securissimus. Obsecro te mea Domina, vt peccatorum meorū remissionem, gratiamque impetres, vt ex toto corde meo diligam in posterum, & honorem filium tuum, Dominum nostrum, vnā cum te misericordiarum genitrice. Aue Maria.

Salue Maria, quæ cum intimo cordis desiderio tot seculis ab antiquis illis patribus es expectata; diuersis typis & figuris adumbrata, necnon & manifestis prophetijs, oraculis, & reuelationibus promissa. Recipe me gloriosa Virgo in famulum tuum: da vt & ego sim in numero eorum, quos tu amas, & in tuo castissimo pectore adscriptos habes, quos tu doces, dirigis & defendis in omni eorum necessitate. Aue Maria.

Salue Maria, quæ in vtero matris tuæ ad stuporē vsque speciosa facta es à summo illo Deo, qui te omni perfectionum & gratiarum genere adornauit. O Virgo generosa, Virgo candida, electa ex milli-

bus, ne me repellas Domina, nè reprobis
inueniar; sed potiùs audi me miserum
ad te clamantem, & pauperem te queren-
tem adiuua, qui spem meam in te collo-
caui. Aue Maria.

Salue Maria, cuius natiuitas tanto pe-
re desiderata, & tam diu ab omnibus gē-
tibus expectata, noua luce, nouoque gau-
dio mundum vniuersum exhilarauit. O
innocentissima Virgo, fac me innocen-
tem, & tolle à me quidquid purissimis
oculis tuis in me displicet. Esto mihi
misericors, quia ab ipsis incunabulis cre-
uit tecum misericordia. Aue Maria.

Salue Maria, in quam Deus omnem
pulchritudinem corporalem, omnem-
que gratiam spirituales copiose infu-
dit, qua cum te gratam fecit omni popu-
lo Christiano. O Virgo gratiosissima
pariter & formosissima, oro te, vt inter-
cessione tua anima mea donis spiritua-
libus ornetur: infere in cor meum vi-
uum castitatis & puritatis affectum, vt
in omni re tibi placeam, tuusque sim fa-
mulus, atque viarum tuarum imitator.
Aue Maria.

Salue Maria, quæ à sanctissimis parē-
tibus tuis in templum deducta, Domino
es præsentata, eiusque cultui atque mi-
nisterio consecrata; vbi vitam vixisti
angelicam, in omnibus pia, beneplacēs,
grata & accepta Domino. Da mihi, vt
sentiam in me sanctissimæ conuersatio-
nis tuæ odorē, vt ita per omnia viuam,

ne (quantum fieri potest) aliquo modo displiceam, aut molestus sim alicui hominum: nullum offendam, nulli sim scandalo; sed omnes in me consolationem inueniāt, & ad amorem Dei, mundi que contemptum per me prouocentur. *Aue Maria.*

Salue Maria Virgo, & omnium virginum antesignana, quæ te totam Deo consecrans inusitato exemplo, hilari animo, & deliberata voluntate virginitatem vovisti. Tu vera imago es castitatis & puritatis, cuius castissima & sanctissima conuersatio cælesti quodam lumine videntium te corda penetrabat, in ijsque viuum amorem puritatis & castitatis generabat. Oro te, vt à filio tuo mihi impetres veram animæ & corporis puritatem, vt me nulla turpitudine libidinis inquinet; nullum me vitium possideat; nulli delectationi sensuali assensum præbeam: sed spretis omnibus blanditijs & cupiditatibus carnis, omnis mea voluptas in vnico tuo filio semper benedicto conquiescat. *Aue Maria.*

Salue Maria, quæ in sacris tuis studijs & contemplationum exercitijs à Deo sic inflammari meruisti, vt frequentissimas consolationes Angelorum ministerio perceperis, gaudioque admirabili conscientie puritatis perfusa sis. Intercede pro me, vt detur mihi amor silentij & quietis, cum iugi desiderio incumbendi meditationibus, orationibus, lectioni-

bus, alijsque exercitijs spiritualibus; idque cum animæ meæ sinceritate & tranquillitate. hæc mea cura, hoc meum sit studiū, quamdiu habitabo miser in hoc carnis ergastulo. Aue Maria.

Salue Maria, quæ cum esses virgo, consilio & dispensatione diuina virginis sponso Iosepho desponsata es; ne patiare quæso beatissima Virgo & mater, vt vnquam à te discedam: sed oculis tuis benignissimis me semper obserua. Quæ admodum enim quem tu iratis oculis intueris, non potest semper viuere: sic ille quem tu benigno vultu aspicias, non potest perpetuò perire. Accipe quæso animam tui amantem, & serua in te sperantem. Esto mihi semper pia, vt te mediatrice gratiam inueniam apud eundem Dominum, qui te matrem elegit. Aue Maria.

Salue Maria, quæ in medio profundissimarum tuarum contemplationum à Angelo Gabriele humiliter es salutata, dum in cubiculo sedes diuinis meditationibus intentata, vbi ab eodem edocta diuinorum mysteriorum facta es particeps. Vtinam omne gaudium meum in te sæpe salutando, tibi que continuum obsequium deferendo consisteret. Vtinam tribuat mihi Dominus, ne quid inueniatur in me, quod oculos tuos offendant, oculos, inquam, tuos Angelorum oculis puriores. Pater noster. Aue Maria.

Sal-

Salue Maria, quę in castissimis tuis visceribus filium Dei concepisti; o beata & felix super omnes fœminas; dic mihi, quod gaudium, quam consolationem in cordis tui penetralibus sensisti, quanta dulcedine liquefacta est anima tua in illa hora, qua viuētis aquę vena, & principium omnis dulcedinis in sanctissimum thalamum tuum intrauit, & purissimam carnem tuam induit? Laudo te, & glorifico te Virgo gloriosa; colo & veneror humillimè intemerata illa & intacta tua viscera, atque obsecro, vt donum puritatis in anima mea crescat & augeatur. Aue Maria.

Salue Maria, quę Regem glorię tuoclausum gerens vtero abiisti in montana Iudęe cum festinatione, & cognatam tuam Elizabetham visitasti. Veniquaeso & visita quoque animam meam: concede propitia, vt cunctis diebus vitę meę fideliter tibi seruiam, teque ex toto corde diligam. Aue Maria.

Salue Maria, purissima & delicatissima Domina, quę grauida cum Ioseph sponso tuo à Galilęe ciuitate Nazareth, in Iudęam ciuitatem Dauid profectacensum soluisti, quem omnes pendere iubebantur. Da mihi gratiam, vt patienter ferā miserias huius exilij, semperque cogitationes meas ad celeste illud domicilium Bethleemiticū habeam eleuatas; vbi verus ille panis vitę Iesus Christus, nostra salus, inuenitur. Aue Maria.

Salve Maria, quæ ex itinere fatigata, cum pariendi tempus venisset, locum in diuersorio, vbi quiesceres, non inuenisti: sed pro puerperij molli lectulo ad stabulum, omnibus ventis, aërisque procellis peruium diuertisti, in eoque Regem cæli, terræque Dominum peperisti. Oro te, vt in memoriam illius gaudij, quo in illa hora viscera tua exultarunt, animæ meæ inordinatos affectus modereris, nihil vt vitiosè diligam, nullū peccatum mihi dominetur; imò fac, vt tanquam hospes & peregrinus semper ad æternam illam ciuitatem anhelem, & in solo Deo requiem quæram atque inueniam. Aue Maria.

Salve Maria, quæ sine dolore, aut sine virginitatis tuæ lēsiōe Saluatorē mundi, & gaudium cæli peperisti. Tu simul es Virgo & Mater, tu templum veri Salomonis, tu es arca & sanctuarium Dei; tu porta clausa, quam vidit Ezechiel: tu es hortus conclusus, & cælestis sponsi fons signatus. Impleantur Domina cor meū, omnesque sensus mei diuina gratia, vt ope illius renouatus, in posterum vitam viuam & tibi, & filio tuo gratissimam. Aue Maria.

Salve Maria, quæ filiolum tuum, pusionem dulcissimum, & fructum ventris tui delicatissimum, laceris fascijs & vilibus panniculis inuoluisti, atque in præsepio reclinasti. Da mihi Domina mea, vt amor tui cor meū sic occupet, & pul-

chritu-

chritudo tua sic animam meam exor-
net, ne qua in me labes inueniatur: sed
tanquam infans modò genitus efficiar,
atque in quacunque tribulatione à te iu-
uari, tuisque beneficijs refici merear. Ô
Domina cum infantulo tuo ad me di-
uertere, ei que in corde meo præsepe ad qui-
etem sterne. Aue Maria.

Salue Maria, quæ purissimum virgi-
nei tui pectoris lac infantulo Iesu Chri-
sto propinasti, eumque niueis tuis bra-
chijs amplexa dulciter osculatum adora-
sti. Concede mihi Domina, vt tribulati-
onibus & miserijs huius vitæ oppressus,
ad maternæ pietatis tuæ sinû recurram,
& spiritualis consolationis lacte tuo be-
neficio refocillatus, omnes vani & fal-
lacijs mundi huius consolationes despi-
ciam. Aue Maria.

Salue Maria, quæ post quadraginta
dies Iesum in templo præsentasti, vbi
sanctus ille senex Simeon cum in bra-
chijs excepit, & dulce illud canticum la-
chrymis permixtum cecinit, exponens
tibi dolores, tribulationes, & persecutio-
nes filio tuo præparatas, tibi que prædi-
cens, quòd gladius doloris tuâ pertransi-
ret animam. Obsecro te mater sanctissi-
ma, vt intercedas pro me apud filium tu-
um, vt me faciat diuturnæ crucis & pa-
tientiae suæ imitorem, vt omnes tribu-
lationes, quas mihi immittit, feram pa-
tienter, & hoc argumento magnâ quam
mihi dabit gratiâ agnoscam. Aue Maria.

Salve Maria, quæ ab Angelo admonita, quomodo Rex Herodes instar canis rabidi circumibat, quærens filiolum tuum Iesum, vt occideret eum, patriam deserere & in Ægyptum fugere iussa es. Vt autem isti furori locum dares, media nocte surrexisti, patriam & domum tuam cum paupercula, quam habebas, suppellectili reliquisti, & in Ægyptum fugisti: vbi toto septennio inter Barbaros & infideles peregrina & paupercula cum incredibili patientia vixisti. Tribue mihi gratiam, ô Regina cæli, vt in itinere pio tibi indiuiduus sim socius, tuam patientiam, humilitatem & paupertatem imitando, atque in hoc mûdo non secus atque peregrinus viuendo. Aue Maria.

Salve Maria, quæ cum Iesu annos nato duodecim ad templum ascendisti, eumque sine tua culpa perdidisti, & cum maximo dolore atque diligentia quæsiuisti: tandem verò in templo inter medios Doctores sedentem, disputantemque cum summo gaudio inuenisti. Cōcedemihî Virgo benedicta, vt quotiescunque gratiam deuotionis mea culpa perdidero, eadem qua tu diligentia quæram, quærens inueniam, inuentamque maiori cum cura & solitudine custodiam, vt eiusdem deuotionis ope adiutus ad obsequiû mei Creatoris sim alacrior. Pater noster. Aue Maria.

Salve Maria, quæ summa cum diligentia nutriuisti & educaisti Seruato-
rem.

tem nostrum in infantia, teneraque sua
ætate: adolescentem verò, & in ætate
virili eundem deuotè secuta es, cum Re-
gnum Dei populo vbique annuncia-
ret. Da mihi gratiam, vt spretis omnibus re-
bus transitorijs, te diligam, te sequar, &
semper ad tuam præsentiam aspirem.
Aue Maria.

Salue Maria, quæ ex ærumnis & per-
secutionibus filij tui incredibiles dolo-
res concepisti, maximamque de ignomi-
niosa illius morte compassionem habu-
isti. Tribue vt eundem Dominum pro
omnibus, quæ amore mei fecit & susti-
nuit, semper laudem & glorificem, amo-
reque illius accensus omnibus afflictis
& dolentibus condoleam. Aue Maria.

Salue Maria, cuius animam doloris
gladius pertransiuit, quando iuxta cru-
cē stabas lachrymis tota perfusa, & pijs,
mœstisque oculis tuis crudelissima vul-
nera, copiosissimumque sanguinem filij
tui toto corpore profluentem conspicie-
bas. Patere, ô Domina mea, vt iuxta cru-
cem tecum semper maneam, deuotaque
mente passionem filij tui, Redemptoris
nostri colam & adorem. Aue Maria.

Salue Maria dulcissima, quæ eodem
tempore stans sub cruce tristissimum il-
lud verbum; Mulier ecce filius tuus, au-
diuisti; quo dicto filius tuus te dilecto
suo discipulo Ioanni commendabat, ti-
bi filium, illi matrem constituens. Au-
disti & in eodem loco, quòd sitiebat, nec

tibi datum fuit, vt ei modicū aquæ pos-
 ses, ne in ipso mortis articulo propinare;
 imò aceto & felle amarissimo illum vi-
 disti potari. Vidisti insuper & summo
 cum dolore filium tuum suo Patri spiri-
 tum reddere; filium dico tuum, quem
 tutanto amore complectebaris. Denique
 & sanctissimum eius latus lancea aperi-
 ri conspexisti; quod vulnus nō ille qui-
 dem sentiebat, qui mortuus erat; sed pu-
 rissimum, maternumque pectus & cor
 tuum excipiebat. quod licet mortuum
 erat in rebus huius seculi, in dolore ta-
 men & pœnis filij tui charissimi plus
 quàm viuebat. Per omnes illos acerbissi-
 mos dolores oro te, ô Virgo sacratissi-
 ma, vt vulneres cor meum compassione
 atque memoria omnium dolorum, quos
 Redemptor meus pro me sustinuit, me-
 que participem ille faciat omnium fru-
 ctuum ex illis promanantium, ne vn-
 quam amittam remedium mea culpa,
 quod ille mihi comparauit sua gratia.
 Ave Maria.

Salve Maria, quæ depositum à cruce
 filij tui corpus in gremium tuum mœ-
 sta nimis excepisti, summoque dolore
 singula eius vulnera cōspexisti, liuores,
 vibices, tunsiones, pūcturas notasti: for-
 des, sputa, & sanguinis grumas admira-
 ta es: præcipuè verò illud vulnus late-
 ris, quo interiora viscera patebant, &
 ipsum cor apertum videbatur, inspexisti;
 filij mortem, & tuam deplorans orbita-

tem.

tem. Oro te, ô clementissima Domina, fit mihi vulnus illud lateris vnigeniti filij tui semper apertum, vt per illud in arcam admitti, & in corde Domini mei quiescere mihi liceat. Da vt nihil aliud velim, nihil sapiam, nihil cogitem, nihil desiderem, nisi Iesum, & hunc crucifixum. Aue Maria.

Salue Maria, quæ corpus filij tui aromatibus conditum, & in sindone munda inuolutum, ad sepulchrum multis lachrymis & suspirijs comitata es. Ibi thesaurus tuus depositus est, ibi sepulchrum lapide tectum, ibi facies tua obscurissima tristitiæ nube cooperta est; ibi filio tuo valedixisti, occidente iam sole, domum tuam repetens, noctes, diesque insomnes apud sepulchrum libenter traductura, nisi religio prohiberet. tunc orbitatem experiri, tunc solitudinem sentire cœpisti. Oro te, ô mater gratiosa, da mihi vt filio tuo consepeliar, alienus à mundo soli Christo viuam, meaque peccata defleam, quibus & mortem filio, & matri lachrymas procreau. Aue Maria.

Salue Maria, quæ incredibili gaudio & consolatione perfusa, nouaque mentis dulcedine in triumphali illa filij tui resurrectione refocillata es: cum summo diluculo insigne lumen in conclauui tuo resplenduit, cum filius tuus incredibili gloria tibi astitit, teque & illustri sua præsentia, & dulcissimis verbis con-

Rom. 6.

Apoc. 20.

solatus est. Eia pijsissima Virgo, tuis precibus mihi tribuat omnipotens, vt quomodo Christus surrexit à mortuis per gloriam Patris, ita & ego per vitæ sanctitatem resurgam, & in nouitate vitæ ambulem: partem inueniam in resurrectione prima, ne secunda mors habeat in me potestatem. Aue Maria.

Salue Maria, quæ quadragesimo post filij resurrectionem die, cum ceteris fidelibus ad montem Oliueti conuenisti, ibique filium tuum, postquam eleuatis manibus tibi benedixisset, omniaque bona precatus esset, in cælum euntem vidisti, eumque multis lachrymis profecuta es; & si fas credere sit, spiritualibus oculis etiam sanctos Patres & iustos cum filio in triumpho procedentes, Angelorumque choros de cælis ei occurrētes, & cum gloria in cælos deducentes conspexisti. O mater gratiæ, per immensum illud gaudium te precor, concedemihī, vt spiritus meus filium tuum in cælos sequatur, vt posthac quæ sursum sunt quæram, vbi Christus est in dextera Patris, non quæ super terram, & vbi thesaurus meus est, ibi cor etiam meum conquiescat. Aue Maria.

Salue Maria, quæ in die Pentecostes Spiritum sanctum visibiliter accepisti, qui ad singulas animæ tuę potentias sua dona diffudit, tam copiose, vt nihil præter hunc Spiritum mente & cogitatione à te perciperetur: tantum enim tu sola

ex

ex his charismatibus accepisti, quantum simul omnes. hoc namque filius tuus matri debebat, hoc capacitas tua 33 annis præparata merebatur. O Maria, per illud gaudium, quo perfusa es, visis Apostolis, alijsque fidelibus, qui Spiritus sancti participes erant, in alios planè viros mutatis (vt qui iam non ancillæ vocem, imò ne carceres & mortem metuebant; sed se totos in Dei gloriam & proximorum salutem effundebant) tribue mihi, vt tuis precibus & fauore Spiritus sancti repletus, in Dei, proximique amorem inardescam, & pace atque lætitia interna persuar. Aue Maria.

Salue Maria, quæ post ascensionem filij quindecim adhuc annis in hoc mūdo vixisti, Christianis solatio, auxilio & exemplo fuisti, nec nō & aliquem Ecclesiæ progressum vidisti: tandem sexaginta tres annos nata moriens in cælum super omnes Angelorum choros es exaltata, & in regali folio tanquam Regina & Domina omnium creaturarū nunc sedes: te nos Aduocatam & matrem nostram humiliter deprecamur, vt fidelem nostrī curam habeas, atque ante filij tui tribunal sic causam nostram agas, vt, cum ille venerit viuos & mortuos iudicare, per tuam intercessionem à morte sempiterna liberemur, & à dextris inter eos, qui perpetuò regnabunt, connumeremur. Pater noster. Aue Maria.

Salue

Salue Domina excellentissima, post Deum inter omnes Sanctos sanctissima Maria, quæ cum virginitate matris, & maternitate virginis, admirabili quodam modo Iesum Christum mundi Seruatorem peperisti. Tu es templum Dei gratiosissimum, tu sacrarium sancti Spiritus, tu secretum sanctissime Trinitatis cubile. Tui filij palma, ô beata Virgo, terræ ambitus continetur: per te viui recreantur, & dulcissimi tui nominis memoria defunctorum animæ refocillantur. Inclina, ô pia Mater, aures tuæ misericordiæ ad orationem vilissimi tui famuli, & sanctitatis tuæ radijs omnem vitiorum meorum obscuritatem discute, vt sic reformatus tibi gratus sim, tuisque oculis benignissimis placeam. Aue Maria.

Salue Maria, reparatrix gratiæ: quis te non amaret? quis te nō honoraret? quis se tibi non commendaret? Tu es lux nostra in rebus dubijs, tu in mœstis consolatio, in angustijs recreatio, in periculis & tentationibus fidele auxiliū. Tu post vnigenitum filium tuum certa salus es & spes nostra. Beati qui te amant, & per sanctitatem vitæ tibi familiares efficiuntur, & deuoti famuli. Commendo animam & corpus meum tuæ pietati; rege, doce, dirige & defende me, secundum tuam voluntatem, ô vitæ meæ refugium. Aue Maria.

Salue magnificum atrium & nobile

Impe-

Imperatoris æterni palatium, tu es illa mulier amabilis, pia, prudens, elegans, generosa, & digna super omnes creaturas honorari. Tu es illa Regina cæli, rutilās vt aurora, pulchra vt luna, electa vt sol, terribilis Dæmonibus vt castrorum acies ordinata. Da mihi quæso gratiam, vt in omnibus huius vitæ fortunis ad te semper respiciam, omnia visibilia contemnam, pulcherrimasque delicias, & delicatas pulchritudines cælestis illius curiæ sine intermissione contempler. Aue Maria.

Salue splendidissima stella, & clarissima lux Maria, de qua natus est Sol iustitiæ Christus Seruator noster. Tu es Virgo super omnem formam formosa; tu mater super omnem honestatem gratiosa; quæ benignissimis oculis tuis Ecclesiam filij tui toto orbe diffusam intueris. Dulce tuum nomen reficit laborantes; serena lux tua illuminat cecos; suavis odor virtutum tuarum exhilarat iustos, & benedictus fructus ventris tui satiat beatos. Tu post Deum prima laudem omnem cum hominū, tum Angelorum mereris. Ora pro me Domina, vt tuis precibus adiuta Deum Deorū, & te Dominam Dominarum in Sion videre merear. Aue Maria.

Salue beata Mater, plena superna clementia & consolatione, qua mediante venit in mundum cælestis illa benedictio, æternæque felicitatis gratia in te, &

de te

de te carnem assumpsit; de que tuo ventre, tanquam de thalamo, progressus est Iesus dulcis ille puer, vnicus ille nostræ salutis auctor suauissimus, pulcherri-
mus, nobilissimus inter omnes filios ho-
minum. Tu religiosa memoria conso-
laris afflictos, tu casta contemplatione
lætificas sanctos: tu perfecta innocentia
adiuuas peccatores. Impetra mihi perfe-
ctam cordis puritatem, vt me etiam in
album referas eorum, qui digni sunt à te
adamari, & ab vnigenito filio tuo diligi.
Aue Maria.

Salue Maria Virgo formosissima, sal-
ue melle dulcior, balsamo suauior, rosa
pulchrior, lilio candidior, & viola sua-
ueolentior: tu es fons Paradisi, puteus
aquæ viuæ, thronus veri Salomonis, vas
purissimum omni amaritudine carens,
& omni dulcedine atque consolatione
plenum. Dominus te creauit Virginem
sine macula, te elegit ancillam humi-
lem: Dominus te amauit sponsam no-
bilissimam. Tu es generis humani glo-
ria, tu pulchritudo & ornamentum to-
tius Vniuersi. Ne auertas faciem tuam à
me peccatore, imò te precor, ex sordido
fac me mundum; ex peccatore iustum,
ex ignauo diligentem, ex tepido fer-
uentem, ex arido deuotum. Aue Ma-
ria.

Salue sanctissima sponsa almi Para-
cleti, salue rosa sine spinis, de qua nasci,
& cuius lacte pasci, Rex cælorum voluit.

Salue

Salve mater Dei speciosa, fauo mellis dulcior, martyr ex cōpassione, lilio candidior. Tu es laus Confessorum, tu lux iustorum, tu gloria Virginum, & decus Sanctorum omniū; quæ ceteris omnibus es vita purior, gradu dignior, aspectu pulchrior, & Deo vicinior. Hanc vnam, ô sancta Virgo, mihi gratiam impetra, vt te præ cunctis celebrem, cælici fulgoris lampadem, sanctorum principē, prece efficacissimam, munere largissimam, & almæ Trinitati proximam, in sempiternis gaudijs videre, teque frui sine fine merear. Aue Maria.

Salve secunda spes de seipsis diffidentium, omnium derelictorum adiutrix potentissima, quam tuus filius tanto prosequitur honore, vt nihil eorum quæ petis deneget: sed omnia præstet, quæ postulas. Tu clauem habes thesauri cælestis: tu Cherubin honoratior, tu Seraphin sublimior. Tu honor & generis humani gloria. Omnes generationes beatam te dicunt, omnes creaturæ tui nominis gloriam prædicant. Tu super omnes Angelorum choros es exaltata. Aue Maria.

Salve Maria lætitia cæli, & exultatio terræ: tu es illa serenissimi luminis mater, quæ amabiliter animas omnium amantium te illuminas. Tu es illa dulcissima pietatis mater, quæ fideles tuos famulos ad gloriosum cæli feliciter deducis habitaculum: tu es illa columba formosa, quæ iuxta aquarum fluentia sedes,

cuius

cuius vestimenta incredibilem spirant
 odoris suauitatem. Ad te faciem meam
 leuo cæli Reginam: ad te oculi cordis
 mei suspiciunt, in te confidit anima mea;
 miserere mei, quia post vnigenitum fili-
 um tuum, in te omnis mea salus est re-
 posita. Ave Maria.

Salve certissimum præsidium omni-
 um te inuocantium: tu es arx fortissima,
 in cuius meditullio securi sunt omnes
 ad te confugientes: tu es fidelissima pro-
 pugnatrice omnium te laudantium: tu
 es lucida nubes appetituum nostrorum
 ardores temperans: tu es ros delectabilis
 nostræ cupiditatis æstus refrigerans. Tu
 es clavis ex gemmis & margaritis con-
 flata, quæ portas paradisi reseat. Tu es
 flos inter spinas; tu lilium conuallium;
 tu lætitia oculorum ad te respicientium:
 tu tota es amabilis, tota delectabilis, to-
 ta candida, & tota benigna. Succurre mi-
 hi dulcissima Aduocata mea, & post flu-
 ctus huius seculi perduc me ad portum
 beatitudinis æternæ. Pater noster. Ave
 Maria.

Salue laus Prophetarum, honor Apo-
 stolorum, fortitudo Martyrū, Con-
 fessorum, & Virginum: tu es palma iu-
 stitiæ pulcherrima, lilium castitatis iu-
 cundissimum: tu hortus cælestium de-
 liciarum amœnissimus: tu es arca testa-
 menti, in qua manna latet absconditum:
 tu es terra benedicta, quæ produxisti fru-
 ctum arboris vite: tu es petra, de qua flu-
 xerunt

xerunt aquæ viuæ riuuli. O Virgo beata, purifica cor meum, & munda illud ab omnibus peccatorum fordibus. Expelle à me quidquid tibi displicet in me, animam meā ab omnibus terrenis affectibus munda, rerumque cælestium amore inflamma, ad gloriam tuam, & vnigeniti filij tui honorem perpetuum. Aue Maria.

Salue gemma pretiosissima, humani generis margarita singularis : tota pulchra es Virgo sanctissima, & macula non est in te : tu es vas electionis, tu gratiarum omnium armarium. Tu fidem Patriarcharum superas, tu scientiam Prophetarum : tu zelum Apostolorum vincis, tu in patientia Martyribus sublimior, tu in temperantia Confessoribus præstantior, tu in humilitate & innocentia Virginibus excellentior : te totam pretiosissimis gemmis exornatam admiratur & suspicit cælestis curia. Tu es sol clarissimus, qui defectum nullum patitur : in terra viuens illuminasti cælum, & nunc in cælo sedens illuminas terram, mundi que tenebras & nubila dissipas. Noli me spernere, ô spes mea ; auxiliare, & fer opem huic misero peccatori in sua tribulatione. Aue Maria.

Salue Virgo sacratissima, & inter cūctas mulieres omnis benedictionis genere benedicta : tu es pratum iucundissimum æternis vernans floribus : tu es rosa nitidissima suauitatis odorē reddens

inæsti-

inæstimabilem: tu es rutilans stella Iacob, quæ cælum & terram illustras: tu es virga Iesse, quæ mundum lætificas: omnes Angeli tuam mirantur pulchritudinem, omnes faciem tuam videre gestiunt. Aspice Domina lachrymas meas, meaqué suspiria exaudi: visita & consolare seruum tuum inutilem, veniamque illi suorum peccatorum exora. Aue Maria.

Salve singulare cæli ornamentū, salve terrarum optata reparatio. Salve Regis æterni mater, millies felix & beata, tibi omnes ætates, tibi omnes generationes caput inclinant: tuis pedibus se terrarum substernit ambitus; post ineffabilem enim & summam Trinitatem, nil dignius te, nil pulchrius habet cæleste palatium. Dæmones cū nomen tuum audiunt contremiscunt, & vlulantes tenebrarum quærunt latibula: quia tu caput antiqui serpentis contriuiisti. O Maria, insidiatur ille mihi quotidie, & quasi leo rugiens circumit, quærens me, vt deuoret. eia tu me ab illo protege, tu hostem liga, tu enerva, ne vnquam illius obfit mihi ira, ledátve me eius potentia. Aue Maria.

Salve secretum Spiritus sancti cōclauē, diuini Verbi sacrū tabernaculum: salve mater sanctissima, quæ Angelorū gaudium, salutemque hominum Iesum Christum peperisti, & in brachijs tuis lacte pectoris tui purissimo nutriuiisti,

oscu-

osculisque, amplexibus & maternis blanditijs fouisti. Oro te Virgo gloriosa, per misericordem illum tuum animum, & per sollicitam curam, qua filiolum tuum vnigenitum educasti, vt causam meam coram illo perores, atque impetres mihi, vt omnia peccata mea deleantur, & nomen meū in libro vitæ scribatur. Adiua me quamdiu in hoc procelloso mari fluctuo, & ad finem vitæ meæ ad tranquillum cælestis Hierusalem portū me fac peruenire. Aue Maria.

Salue serenissima ac suauissima Virgo Maria, Tu es illa turtur castissima, cuius pium murmur & gemitus mirum in modū sancto placuit Spiritui. O Virgo gratiosa, Virgo admirabilis, Virgo speciosa, illumina tenebras interiores animæ meæ lucis tuæ radio, vt vitiorum meorum obscuritate sublata, magnitudinem pulchritudinis tuæ dignus sim contemplari. Aue Maria.

Salue porta Orientis semper clausa, per quam intrauit ad nos omnium filiorum hominum speciosissimus; tu es clavis David, quæ cælum aperis, tu es lex iustorum, & norma credentium. Conuertere ad me beneuolos virginei tui vultus oculos, affectus meos amore pietatis accende, memoriam meam illustra, cor meum purifica, & voluntatem meam in viam diuinorum mandatorum dirige, vt in tremendo Dei iudicio mihi etiam cum ceteris Sanctis aliqua sit portio.

tio. Aue Maria.

Salve solitudinis amatrix, & quietis interioris custos. Salve Virgo honestate admirabili decora, & ineffabili sapiētia celebris. ô Virgo electa, Virgo inter omnes filias Hierusalem formosa. Tu es sacratissimū diuinitatis tabernaculum: tu es deliciarum hortus, ex quo prodijt flos ille pulcherrimus, Iesus Christus, animarum nostrarum Redemptor & Seruator vnicus. Animam meam aduentūs tui claritate illustra, vt fallacias huius mundi agnoscere discat, & fugere; spiritum meum in pura sanctitatis tuæ contemplatione suspende, vt æternæ felicitatis dulcedinē aliquam percipiat. Aue Maria.

Salve ô generosa mater summi Creatoris, Virgo delicata & suauis, da vt vnguentorum & aromatum tuorū iucundissimus odor in nares meas ascendat: spiritus meus te nocte sentiat, & viscera mea tecum lætentur interdium. Da vt cor meum erga te dulciter afficiatur, anima mea te amore diligat intimo, & lingua mea in laudibus tuis occupetur sine villo fastidio. Aue Maria.

Salve nobilissimum sanctæ Trinitatis triclinium, filia Dei Patris, genitrix Filij, & nymphea Spiritus sancti: ô Regina celi, porta Paradisi, Domina mundi: ô refugium peccatorum, aduocata pauperum, laus iustorum. Tu facta es omnibus omnia; sapientibus & insipientibus

Bernard.
in Ser. de
B. Maria

copi-

copiosissima charitate debitricem te facis : omnibus misericordiæ finū aperis, vt de plenitudine tua accipiāt vniuersi : captiuus redemptionē, æger curationē, tristis cōsolationem, peccator veniam, iustus gratiam, Angelus lætitiā ; deniq; tota Trinitas gloriā, filijq; persona carnis humanæ substantiam : nec est qui se abscondat à calore tuo. Accipe quæso, ô clemens, ô pia, hanc tepidā meam doxologiam, has laudes tuas misericorditer admitte, nec repelle, quas ore, licet impolluto, coram te effudimus preces : sed nos clientes in seruos tuos suscipe : clementia tua nos protege, pietate nos guberna, dulcedine nos solare ; largire nobis beneficia, confer remedia, medere contritis corde, pone fortitudinem lugentibus Sion, da coronam pro cinere, oleum pro luctu, pallium laudis pro spiritu mœroris. Sonet vox nostra in auribus tuis, ostende nobis hîc faciem miserationum tuarum, & ora pro nobis vni-
genitum filium tuum, vt post hanc vitam te stola immortalitatis indutā videamus, regnantem cum Patre, Filio, & Spiritu sancto per omnia secula seculorum. Amen. Pater noster. Aue Maria.

cuius ini-
tiū Signū
magnum.

ORATIO AD DEIPARA-
ram Virginem.

O Gloriosa semperq; benedicta Virgo, qua fronte oratio mea in tūum veniet conspectum, qui gratiā omnem,

V

quam

quam sacratissima filij tui passio mihi comparauerat, mea negligentia, mea sollicitudo, mea ingratitude tam turpiter amisi: Quia tamen æqua est mea petitio, audebo, licet peccator maximus, te vt me audias interpellare.

Quid enim peto à te, ô Regina cæli, quàm vt filium tuum preceris, vt pro infinita sua misericordia cuncta crimina mea mihi ignoscat: Scio quidem hac me indignum gratia, sed tuis id mihi precibus indulgeat, ne mea culpa pereat, quod ille ad suam imaginē creauit. Tu es lux in tenebris, tu speculum Sanctorum, tu spes peccatorum. Omnes generationes benedicunt tibi, omnes desolati inuocant te, omnes iusti oculos suos ad te leuauerunt, omnes creaturæ in te exultant, Angeli in cælo tua præsentia gaudent, animæ defunctorum in Purgatorio tua intercessione refocillantur, & homines in terris adhuc exulantes spe de te concepta corroborantur.

Omnes ad te clamant, omnibus respondes, pro omnibus intercedis. At ego infelix quid agam, vt in tuam me gratiam insinuem? Peccatum meum me arguit, meritum meū aut nullum aut exiguum timidum me reddit, malitia mea os mihi obstruit. Nilominus oro te, ô Virgo nobilissima, per immensum illū & lethalem dolorem, quo tuus affligebatur animus, cū dilectissimum filium tuum maledicta Crucis trabe oneratum,

tum, ad locum supplicij prorepere videres, vt omnes inordinatos appetitus, tentationesq; carnis in me occidas: ne ego iniquitate mea perdam, quod ille mihi suo sanguine acquisiuit. Pie istæ lachrymæ, quas vberimè cruentata legens filij vestigia profudisti, semper in animo versentur meo: vt eas meditati lachrymarum fluentia oculis meis erumpant, tam copiosa, vt ad eluendas omniū meorum peccatorum maculas abundè sufficiant. Quis enim peccator sine tuo patrocinio audebit coram æterno iudice comparere? qui etsi placabilis sit & patiens in sustinendo & expectando, iustus tamen etiam est, & seuerus in puniendo. Quis iustus adeo, vt in districto illo iudicio tuo non egeat auxilio? Quid igitur fiet de me Virgo sacratissima, si tua intercessione non recuperauero, quod meo peccato perdidi? Magnum quid peto, si mea intuearis crimina; sed exiguum est, si tuam inspexeris potentiā. Nihil est quod ego peto, si conferatur cum illo, quod tu potes dare vel impetrare.

Emenda vitam meam, ô Regina Angelorum, omnia opera mea sic dirige, vt licet indignus, merear à te exaudiri. In me tuam ostende misericordiam, vt omnes boni te laudent, omnes mali in te sperent. Dolores & cruciatus illi, quos tu in amarissima filij tui Redemptoris nostri passione sustinuisti, semper in conspectu meo sint, mecum vigilēt, mecum

dormiant, mei cordis sint solatia. Auxilium tuū non auferatur à me, pietas tua non deferat me, memoria tui nunquam àn me moriatur. Si tu me Domina derelinquas, quis me suscipiet? si tu oblita fueris mei, quis recordabitur? si tu, quæ stella maris es, & peccatorū ductrix, me non illumines, quò tādē vadam? quid de me fiet?

Ne ab inimico tentari me patiari: si tentatus fuero, ne cadam: si cecidero, porrige manū, & me rursus eleua. Quis vnquam te inuocauit, & exauditus non est? quis vnquam rem æquam à te petijt, & non impetrauit? Quis vnquam seruiuit tibi, cui mercedem amplissimā non reddidisti? Da mihi, ô benedicta Virgo, vt cor meum sentiat horrorem illū, qui te inuasit, quando pretiosissimum filij tui corpus de cruce sublatū tuis brachijs excipiebas, intuens sanctissimam illam faciem, quam adorāt Angeli, liuoribus, puncturis, tusionibus, sputis, sordibus & sanguinis eius grumis tam misere cōmaculatam, vidensque barbaram illam crudelitatem, quam passa erat iusti innocentia, vt satisfaceret pro peccatoris inobedientia. Verè tunc gladius doloris animam tuam pertransiuit.

O Regina cæli, videor mihi videre te sub cruce expansis brachijs, oculis prælachrymarum multitudine caligantibus, capite in terram demisso, vultu pallido, & tanto animi dolore obrutam, quan-

tum

Luc. 2.

tum nemo vnquam hominum sensit, aut sentiet in posterum. Hæreant semper in mēte mea verba illa mœstissima, quæ forsitan ad eos dixisti, qui te intuebantur. O vos omnes qui transiis, attendite & videte, si est dolor, sicut dolor meus: vt virtute verborum illorū, merear à te exaudiri. Transfige animā meā illo doloris gladio, qui tuam ipsius animam pertransiuit, quando lacerum & dilaniatum corpus filij tui in sepulchrum intulisti, vt semper & vbique memor sim, me terram esse, & in terram reuersurum: ne me decipiat perituri huius mundi gloria. Da vt semper meminerim, quoties in monumentum, in quo pretiosissimus ille thesaurus erat reconditus, inspexisti, vt ad meas etiam preces respicere non dedigneris.

Memoria tuæ solitudinis, ô beata Virgo, mea sit indiuidua comes: illam solitudinem dico, in qua mœrens illo tempore sedebas, quo filius in sepulchro quieuit: quo nihil apud te, aut in te vivebat, præter dolores, cruciatus, afflictionesque ineffabiles: quando aquas amarissimarum tuarum lachrymarum bibebas, & cibum tristissimarum rerum recordationis māducabas: vt & ego plangendo peccata mea per tuas istas angustias, quas in his terris sustinuisti, merear aliquando tuā illam videre gloriam, qua nunc in cælesti frueris consortio, & in secula secula seculorū frueris. Amen.

Thren. i.

ORATIO AD QVEM-

*uis Apostolum.**Collector**Iudic. 15.**Iudic. 3.*

Salue sancte N. magnæ Dei Ecclesiæ Princeps maxime : Salue belli triumphalis dux : Salue cælestis aulæ heros inclyte, quem Christus Seruator noster de hoc mundo elegit, vt per te mundi infirmum & infirmum, ea quæ erant potentissima deiiceret. Tu es asini mandibula, in qua verus Samson Christus Iesus Philisteorum fudit agmina : tu vomer, quo Sangarus viros fortissimos interfecit : tu baculus & funda, quibus mysticus noster Dauid gigantem deiecit. per te rudem, indoctum, & simplicem Deus nomen suum per cunctas nationes fama celebrauit, & asperrimam Diaboli tyrannidem euertit. Cùm enim sonus tuus in omnem terram exiret, & verba tua in fines orbis terræ, mundus fuit ædificatus in sinceritate fidei, in bonitate operum fœcundatus, à negligentijs excitatus, ad cælestium cōtemplationem incitatus, & à Dæmonum potestate liberatus.

Tu viuens itaque in carne Ecclesiam Dei tua prædicatione plantasti, & tuo sanguine irrigasti : ideoque coronam triumphalem meritus es ; cælum verbo claudis, & seras eius soluis : singularique prærogatiua tibi datum est, quòd in consummatione seculi sedebis cum viuorum ac mortuorū iudice, super sedem tuā, iudicaturus duodecim tribus Israël.

O igitur.

Bernard.
Ser. 3. de
SS. Petro
& Paulo.

O igitur maxime ac fidelissime Dei nuncie, qui non tibi soli vixisti, non tibi soli mortuus es: sed ei, qui pro te mortuus est, & maximè nobis miseris peccatoribus propter illum: Pro nobis enim facit tua doctrina, tua vita, tua mors: Tu enim nobis in conuersatione continentiam, in prædicatione sapientiam, in passionem tua patientiam contulisti, & quartum vsque hodie conferre nō cessas, misericordia plenus: quod est sanctarum fructus orationum. Scio enim quod qui potens fuisti in terra, potentior es in cælis, ante faciem Domini tui. Qui enim, dum hîc adhuc viueres, misertus es peccatoribus, & orasti pro illis, nunc cum multo veriùs agnoscas miseras nostras, pro nobis non orabis? Beata illa patria tuam charitatem non mutauit, sed augmentauit, imò tibi viscera misericordiæ mouit, qui iugiter ante fontem misericordiæ versaris.

Cur igitur non sperabo? cur in tuo patrocinio non confidam? cur precibus preces tuas, & cur deuotis suspirijs tuā intercessionem non implorabo? Eia igitur sancte Dei Apostole N. legationem pro me ad thronū misericordiæ suscipe; impetra mihi veram fidem, quæ in persecutionibus non frangitur; solidā spem, quæ in tribulationibus non deiicitur; ardentem charitatem, quæ in multifarijs huius seculi negotijs non extinguitur; & perseuerantiam in bonis operi-

bus, ne ad sinistram vel ad dexteram declinem, sed viam regiam ambulem, donec perueniam ad eum, qui est via, veritas, & vita, Iesum Christum Dominum nostrum. Amen.

AD QVEMVIS MARTYREM.

Collector.

O Glorioso Martyr Dei, ô fortissime Athleta, ô miles inuictissime sancte N. qui constanti & intrepido animo nomen veri Dei confessus, ex atrocissimis pugnis per patientiam & tolerantiam victor euasisti: fractum quidem & dilaceratum est corpus tuum, & concidit: animus autem triumphans ad originem suam lætus euolauit. Quātus in te tuimetipsum neglectus, imò aspernatio? minas iudicum non timuisti, tortorum carnisficinam non horruisti, rimante ferro latera sacrum è carne tua ebullire sanguinem lætus aspexisti, non aliter corpus, quàm lapidem aut lignū respiciens. Testis veritatis factus es, non asseueratione sola, vel iureiurando: sed sanguine, vita & asperitate cruciatuum intolerabili. O beata lingua, quæ sacram illā vocem emisit, quam aer excipiens sacer factus est: Angeli audientes plausuerunt: Diabolus cum suis dæmonibus magnam accepit plagam, Dominus in cælo descripsit.

Quid fiet de nobis miserrimis peccatoribus, qui vitam in omni mollicie ducimus.

cimus, in delicijs & voluptatibus desides ac securi? qui intolerabile censemus, si quid duriusculum acciderit, aut contra animi sententiam, corpora & animos gestamus delicatissima: nec est tam leue quid, à quo non impatientissimè percellimur. Qua tandem freti fiducia Christi nomen audebimus ferre? illum appellare patrem, & tribunalis illius expectare censuram? Si non coronetur nisi qui legitime certarit, ecquam nos coronam vel petimus, vel speramus, qui nunquam certamus? qui omne certamen non aliter, quàm rem omnium longè miserrimam exhorremus?

2 Tim. 2.

Te nobis, ô sanctissime Christi martyr, Deus proposuit exemplum, vt in te semper, tanquam oculus iaculantis in album animo & cogitatione essemus intenti: teque imitemur laborantem & pugnantem in mundo, quem sequi cupimus triumphantem in cælo. Quod cum viribus nostris præstare nequeamus, eia intercede pro nobis apud Deum pro gratia, vt discamus ex te fidem quærendo acquirere, viuendo excolere, moriendo seruare: discamus plus peccatum timere, quàm gladium: discamus propter vitam magis iustitiam amare, quàm vitam: fidemque & timorem Dei plus, quàm mundi gloriam. Quem tu in media belli tribulatione seruasti, ne nos in securitate pacis perdamus. Anchorā spei & religionis, quam tu custodisti in flu-

ctu, ne nos amittamus in portu:

Nunc veritatē, quam vita & sanguine testificatus es, perspicias, exutus tenebris lucem intraſti ſempiternam, tantæque victorię præmio perſuueris: vtinam nobis etiam aliquantulum conſtantiæ & patientiæ, pauxillumque promptę voluntatis à chariſſimo tibi Chriſto impetres, vt tum crucem iſtam tuam magnam atque excellentem cuperemus tecum portare, tum minutas has, quæ in hac vitæ noſtræ quietudine ac ſecuritate incidunt, auidè complectamur, libenter & ſine detrectatione geſtemus. vt quatenus nobis conceditur, laborum atque ærumnarum Chriſti temporarium quoddam ſumamus experimentum, vt regni illius, quod ipſe per crucem ſuam aſſecutus eſt, conſortes ſimus in æternitate. Amen.

AD QVEMVIS CONFES- ſorem Oratio.

Salue cęleſtis curię triumphale decus, Œo ſanctiſſime Dei Confefſor beate N. ſingularis amice Dei, & lumen Eccleſię: viuum templum Spiritus ſancti, curruſ Iſraël & auriga eius: ſerua populū tuum in ſanctitate & iuſtitia miſertus noſtri, qui inter tot & tantas miſerias memoriā abundantię tuę eructamus. Magna eſt ſuper te diuinæ diſpenſatio pietatis, quæ te paruum fecit in oculis tuis, magnum in ſuis. Feſtiuiſas tua, quæ merito

Bernard.
in vita Ma-
lachiæ.

tuis

tuis virtutibus votiua impenditur, tuis nobis efficiatur meritis & precibus salutaris. Gloria sanctitatis tuæ, quæ à nobis frequentatur, continuatur ab Angelis, sic erit nobis dignè iucunda, si fuerit & fructuosa. Liceat nobis aliquas te migrante retinere reliquias de fructibus spiritus, quibus onustus ascendisti, qui in tuo hodie tam delicioso conuiuio congregamur.

Vita tua lex vitæ & disciplinæ; mors tua mortis portus, & porta vitæ: memoria tua dulcedo suauitatis, & gratiæ: præsentia tua corona gloriæ in manu Domini Dei tui. O oliua fructifera in domo Dei, ô oleum lætitiæ vngens & lucens, fouens beneficijs, coruscans miraculis; fac nos eius, qua frueris, lucis, suauitatisque participes.

O odoriferum lilium in æternū ante Dominum germinans, florens & spargens vbique viuificum suauitatis odorem: cuius apud nos memoria in benedictione est, apud superos præsentia in honore: da salutantibus te & invocantibus tuam intercessionem, tantæ plenitudinis participio non fraudari. O luminare magnum, & lux in tenebris lucens, signorum radijs & meritorum, illuminans carcerem, & lætificans ciuitatem, fuga de cordibus nostris virtutum splendoribus tenebras vitiorum. O stella matutina, cō ceteris clarior, quò diei vicinior, similior soli: dignare præire

nobis, vt & nos in lumine ambulemus, quasi filij lucis, & non filij tenebrarum.

Ex Lodo-
uico Viue

O aurora diescēs super terram, quā multos exemplo vitę, quā multos verbis & oratione, quā multos precibus adduxisti ad meliorem frugem, & lucrificasti Christo? Quantum erat solatium hominibus in rebus suis aduersis, vel exsola tua (cū viueres in terris) pręsentia? quum se innixos tibi populi existimarent, quasi columnę firmissimę, & habere se quodammodo Christum ante oculos corporis pręsentem? Nunc solutus hoc carcere miserrimo, lætus, securusque reuolasti in patriam: non iam malis vrgeris amplius vitę huius, nec infestaris à Satana, nec sollicitaris varijs artibus, vt desciskas à Christo: nos hęc iactamur tot casibus, fluctuamus inter vndas pręsentissimi periculi; ora Patrē cęlestem, cui nunc inseparabiliter coniunctissimus es, vt nos istuc quoque vocet: imò siue vltro, siue renitentes pertrahat. vt vnum & tecum simus, & cum illo, pręstante Domino nostro Iesu Christo, cui laus in secula seculorum. Amen.

AD QVAMVIS VIRGIL-
nem Martyrem.

Collector.

GAude, ô Christi martyr inuictissima, & virgo sanctissima N. duplici nobis veneranda titulo, quæ non cōtenta vir-

ta virginittatis puritate, huic addere voluisti martyrij constantiam. Quare te mater Ecclesia meritò vniuersum per orbem terrarum veneratur, festum diem tibi cum canticis agens, & corollas purpureis ex rosis, candidisque lilijs contextas offerens. In te licet vasculo fragiliori potentiam suam Deus ostendit: per te Reges & Principes cum omni inferorum atque huius seculi tyrannide conterens. Tu tenerrima Virgo iudicem non timuisti, sententiam eius spreuisti, minas & verbera irrisisti.

Simul vt tuba tyranni insonuit, ad prælium, agonemque te quàm ocysimè præparasti: verbera tibi amœnissimæ rosæ fuerunt, tormenta coronæ, carcer obscurus ridētibus plenus floribus ager. Torpebant cruciādo lictores, manus eorum vt cera defluebāt; tu verò adamantē durior, robustior leone, & immota rupē constantior permanebas. Luxata cuncta membra & contrita erant, sanguis toto corpore copiosus erumpebat, corpore quidem stabas exanguis, sed animus stabilis omnino perseuerabat, & inuictus. Non enim posuisti oculos tuos in tormētis, sed in paratas tibi à sponso tuo coronas defixisti. Totius mundi tempestas, & omnium tormentorū genera fidem Christo semel datam labefactare non potuerunt. Fortis enim vt mors erat tua dilectio, imò morte fortior; quæ mortem, omniaque mortis ar-

ma atque instrumenta fortiter prostravit, & inuicta deuicit.

Ideo meruisti in summi Regis aulam manibus Angelorum deportari, vbi nunc fulges coronata, vbi ludis inter virgines & puellas, quæ annos suos sanctis moribus transcendunt, palmamque martyrij per fidei constantiam rapuerunt: vbi dispar est gloria singulorum, sed communis est lætitia omnium.

Nos miseri, qui adhuc in hoc procelloso mundi pelago fluctuamus, adeo debiles sumus, adeo infirmi & molles, ut vel leuis aura, vel exigua commoditas, turpis cupiditas, aut brevis voluptas à Christi sponsi tui charitate abstrahat; propter res penè pueriles & ludicras pietatem & iustitiam prodimus. Quare, ô Virgo sanctissima N. per inuictum illud robur tuum, per ipsum te rogo, qui te elegit, qui te talem fecit, de cuius pulchritudine iam satiaris, de cuius immortalitate iam immortalis facta es, esto memor nostri, & deprecare pro nobis communem Dominum nostrum Iesum Christum, ut immotam nobis tribuat fidei constantiam, & charitatem, à qua nec bonorum temporalium iactura, nec popularis auræ metus, nec voluptatis titillatio, nec cupiditas aut animi vlla perturbatio separet: sed quæ inter omnes terrores & minas huius seculi, inter omnes tentationes Diaboli, inter omnes illecebras carnis maneat illæsa & inte-

gra; donec perueniamus ad illam patriam, quæ tranquilla est, quæ nec hostem timet, nec vllō metu mortis afficitur: sed de perpetuæ gloriæ incorruptione lætatur, vbi tu cum Christo viuīs & regnas per omnia secula seculorum. Amen.

ORATIO AD QVAMVIS

Virginem non Martyrem.

Salue castissima Virgo, beatissima N. Squæ ab ipsis incunabulis corpus tuum Christo consecrasti, & in hoc mundo inter homines non humanam, sed Angelicam vitam duxisti; in carne viuens, sed nullum carnis habens consortium: Ideo sibi sponsam elegit Dominus. Nobilitatem huius seculi, pulchritudinemque humanam contempsisti; sed genere & dignitate nobilior quouis homine Christus te annulo fidei suæ subarrauit. Diuitias & pompā huius seculi aspernata es, sed gemmis & auro ornauit te altissimus. Dexteram tuam & collum tuum cinxit lapidibus pretiosis, tradidit auribus tuis inæstimabiles margaritas, vernantibus & coruscantibus gemmis circundedit te.

Ipsi soli fidem seruasti, ipsi te tota deuotione tradidisti. Audisti & vidisti, & inclinasti aurem tuam: oblita es populum tuum, & domum patris tui, quia nec alium amatorem aspicere, nec eum derelinquere voluisti, cui te æterna charitatis copula deuinxeras. Ideo concupiuit

Psal. 44.

Rex

Matt. 25.
Apoc. 14.

Rex speciem tuam : præparauit tibi Dominus coronam in æternū, & thronum suum in te collocauit : cum lampade & oleo Sponso occurristi, & cum Angelis in Paradisum ad nuptias Agni admiffa, sequeris illum quocunque ierit, & canticum cantabis, quod nemo cantare poterit, nisi quæ se ab omni carnis pollutione mundam seruauerit.

Magna fuit, ô sanctissima Virgo N. fides tua, magna dilectio : sed maior merces, quam cum mundo decertando tandem consecuta es. Eia Virgo impetra nobis gratiam ab eo, cui seruiuisti, quem super omnia dilexisti, in cuius amplexibus nunc molliter quiescis, vt templum Spiritûs sancti, quod nos sumus, omni diligentia custodiamus, ne immundis actibus, obscœnis cogitationibus, aut impuris verbis polluamus. Ne in nobis caro dominetur, aut corde luxuriemur, si opere, quod volumus, implere non liceat. Impetra mihi gratiam, vt purū me seruem atque immunem ab omni opere carnali, vt si supremū virginitatis gradum attingere nequeam, saltem vt proximum consequar, & in impuritate mea me purum contineam, nec vnquam cōperueniam, vt vita mea bestijs, quā homini sit similior. Ora pro me Christum Sponsum tuum, vt fortitudinem mihi conferat, qua carnem spiritui subijciam, eius desideria in me occidā, & iam non secundum carnem, sed secundum spiritum

tum ambularem : tollat à me omnes peccandi occasiones, & det, ne cum voluntas prompta sit, caro per infirmitatem labatur.

Scio quidem ardua esse quæ peto, & supra hominem posita : nihilominus cum considero diuitias, nobilitatē, pulchritudinem, ætatis florem, ceterasque, quas habuisti, peccandi occasiones ; & cum considero summam in te animi, corporisque puritatem, Virginitatisque immobilem constantiam, non diffido, imò potius confido, quod tu, quæ eiusdem mecū naturæ, id tibi à summo Deo impetrare potuisti, etiam mihi impetrabis nunc ad orationum tuarum præsidium recurrenti ; quatenus mihi detur in hoc seculo puritas mentis & carnis, post hanc verò vitam æterna illa beatitudo, qua tu nūc fruëris cum Sponso tuo, Domino nostro Iesu Christo, per omnia secula seculorum. Amen.

ORATIO AD QVAMVIS

S. Viduam aut Coniugatam.

Pulchra facie, sed pulchrior fide es, o beata N. quæ in sexu fragili manum ad fortia quæque mittēs, sic in hoc mundo vixisti, vt cælestis patriæ desiderium nunquam amiseris : sic carnis voluptates tēperasti, vt virtutis asperitates nunquam subterfugeris : sic virum habuisti, quasi non habueris, sciens quia præterit figura mundi huius. Tu licet viro subdi-

Collector.

Prou. vlt.

I Cor. 7.

ta ser-

ta seruiebas, non carnaliter, sed spiritua-
liter alium amatorē habebas, cui Eccle-
sia ipsa (cuius tu membrum eras) con-
iunx est, quæ fidei, spei & charitatis in-
tegritate non in solis virginibus sanctis,
sed & in coniugatis & viduis tota virgo
est. Nulla tibi maior cura, nulla solici-
tudo familiarior, quàm vt huic Spon-
so placeres, corporeque & spiritu sancta
esses.

Tu gloria Ecclesiæ, tu lætitia Ange-
lorum, tu magnificentia cælorum, quia
fecisti viriliter, & confortatum est cor
tuum. Manum tuam aperuisti inopi, &
palmas tuas extēdisti ad pauperem : ocu-
lus fuisti cæco, & pes claudō : mater or-
phanorum, & consolatrix viduarū. con-
fidebat in te cor viri tui, & filij tui te præ-
dicabant : os aperiebas sapientiæ, & lex
clementiæ semper erat in lingua tua. Se-
mitas domus tuæ cōsiderabas, & panem
otiosa non comedisti. Ideo auris audi-
ens beatificabat te, & oculus videns te-
stimonium reddebat tibi. Dedit tibi Do-
minus de fructu manuum tuarū, & lau-
dant te in cælis opera tua : Dominus
confortauit te, & eris benedicta in se-
cula.

Obsecro te per tuam charitatem, quæ
secura es de te, esto sollicita de me : secura
es de tua immarcescibiliglōria, esto soli-
cita de mea multiplici miseria. Ora pro
me Deum & tuum & meum, vt refecet
in me temeritatem iniquam, infruitos

carnis

carnis motus, omnemque voluptatis cupiditatem : auferat desidia & pigritiam, mentis hebetudinem, cordis obstinati cæcitatem, inobedientiam bonis consilijs repugnantem. Det mihi misericordiæ opera, pietatis studia, vt compatiar afflictis, neminem despiciam, bonos sequar, à malis recedam; largiatur mihi in aduersis patientiam, in prosperis continetiam. Det denique vt magno animo terrena hæc contemnam, & toto pectore cælestia quæram, ad eaque tuis precibus tandem perueniam, per Christum Dominum nostrum. Amen.

CAPVT XII.

PRECATIONES DE-
 PRECATORIÆ, QVIBVS PRO
 euitandis malis spiritualibus
 & internis diuinam or-
 pem implora-
 mus.

*Quot tentationibus exposita sit vita nostra
 & quàm necessarium nobis sit diuinum
 auxilium.*



Nunc fac mihi Domine finem meum, & numerum dierum meorum indica mihi: Nunquid non paruitas dierum meorum finietur breuitate det enim animam meam vitæ meæ.

Collector.
 Ex medit.
 tat. B. Bernardi.
 Psal. 38.
 Iob 10.

Quæ

Quæ namque hæc vita est, vbi non de-
 sunt continuæ tribulationes? vbi plena
 laqueis & hostibus sunt omnia? Vix vna
 tentatio recedit, & alia mox succedit: sed
 adhuc priore durante conflictu, alij plu-
 res superueniunt & insperati. Adiuua me
 igitur Domine Deus meus, quoniã ini-
 mici mei circundederunt animam me-
 am: hinc corpus, illinc Diabolus, istinc
 mundus instant, & vim faciunt, queren-
 tes animam meã. A corpore fugere non
 possum, nec ipsum fugare: circumferre
 illud necesse est; quoniam alligatum est
 mihi: perimere non licet; sustentare co-
 gor; & cum illud impinguo, hostem me-
 um aduersum me nutrio. Mundus cir-
 cumcingit & obsidet me vndique, & per
 quinque corporis fenestras, visum, audi-
 tum, gustum, odoratũ & tactum, sagittis
 suis me vulnerat, & mors intrat per fe-
 nestras meas in animã meã. Diabolum
 videre non possum, & ideo minùs mihi
 ab eo cauere: tetendit arcum suum, & in
 eo parauit sagittas suas, vt vulneret me
 repente: narrauit vt absconderet laque-
 os suos, & dixit; Quis videbit eos? Quo-
 cunque me verto, nulla securitas est. Ca-
 ro suggerit mihi mollia, mundus vana,
 Diabolus amara. De somno, de potu, de
 cibo, ceterisque ad carnis curam perti-
 nentibus loquitur mihi caro: De ambi-
 tione seculi, de iactantia, de arrogantia,
 de superbia mundus mihi fabulatur: ad
 iram verò, malitiam & amaritudinem
 animi

animi Diabolus me prouocat.

Ecce infideles & subuersores mecum sunt Domine, & cum scorpionibus habitato. Heu mihi quia incolatus meus prolongatus est, habitauim cum habitantibus Cedar: multum incola fuit anima mea. Et in hoc tam fauo discrimine nihil in me, quò confugiam, inuenio. Cor enim meum vanum est, vagum & instabile: omni mobili mobilius, per infinita distrahitur, hac atque illac per innumera discurret; & dum per diuersa currit, requiem non inuenit. Sicut enim molidinum velociter currit, & nihil respuit, sed quicquid imponitur molit; si autem nihil apponitur, seipsum consumit: sic cor meum semper est in motu, & nunquam requiescit. cogitatio amara turbat, immunda maculat, vana inquietat & fatigat illud. Dum futurum non curat gaudium, nec tuum quærit auxilium, ab amore cælestium elongatur, & amore terrestrium occupatur. Cumque elabatur ab illis, & inuoluitur istis, vanitas illud recipit, curiositas deducit, cupiditas allicit, voluptas seducit, luxuria polluit, torquet inuidia, turbat iracundia, cruciat tristitia: sicque miseris casibus submergitur omnibus vitijs, & vilis quandoque res est, vnde grauis tentatio prouenit. Infelix ego homo, quis me liberabit de corpore mortis huius? In his omnibus succumbo Domine, nisi tu me adiuues.

Ezech. 2.

Psal. 119.

Rom. 7.

Misc-

Psal. 58.

Miserere igitur, miserere mei Domine, & eripe me de luto, vt non infingar. ne permaneā deiectus vsquequaque.

Psal. 123.

Eripe me de inimicis meis Deus meus, & ab his qui oderunt me, quoniam confortati sunt super me. Sed tu Domine libera nos de laqueo venantium, & à verbo aspero, vt confiteamur tibi dicentes; Benedictus Deus qui non dedit nos in captionem dentibus eorum. Anima nostra sicut passer erepta est de laqueo venantium. Laqueus contritus est, & nos liberati sumus.

2

Ex Belgi
co manu
scripto.

Contra quamlibet tentationem.

Vides, ô benignissime Pater, summum in quo versor periculum: vides insidias quas mihi struunt inimici mei, & violentiam quam exercent in me, vt me, ô pie Pater, è numero tuorum rapiant filiorum, & me ouiculam tuam ferocissimorum tradant dentibus luporum. Supplex igitur te oro, pro paterna tua charitate, adiuua me, & corrobora me, quoties videris me periclitari: vt videant inimici mei, quia Deus meus es, & quod frustra persequuntur me, fortiores se: quodque nil aliud proficiunt his suis machinationibus, quam vt me tibi reddant chariorem, suasque insidias mihi faciant manifestiores, consiliaque magis execranda.

Infirmas quidem mea pacē & tranquillitatē optaret, (quomodo enim ho-

mo

mo imbecillis & fragilis hostes tam potentes, mundum scilicet, Diabolum, & omnium periculosissimum corpus meum non metuā ?) tamen, cum non ignorem, Pater, tentationes nobis adeò viles esse, & salutare, vt in ijs exultare debeamus: nil aliud te peto, quàm vt ante omnia multitudinem peccatorum meorum auferas, quæ immenso pondere suo non tantum nauiculam meam depri-merent, sed opem etiam & auxilium tuum à me auerterent. Audiam in meis tentationibus, quod olim audiuit Paulus tentatione circumuentus; Sufficit tibi gratia mea. O Domine, si istud non denegaueris mihi, dicam cum Propheta: Dominus illuminatio mea & salus mea, quem timebo? Dominus protector vitæ meæ, à quo trepidabo? Si consistent aduersum me castra, non timebit cor meum. Si exurgat aduersum me prælium, in hoc ego sperabo.

2 Cor. 12.

Psal. 16.

Ecce Pater mi, quàm imperterritos faciat nos tui fiducia, & quàm timidos reddat nos peccatum: scriptum est enim; quòd fugit impius nemine persequente: vidensque orientem Luciferum, mortis esse vmbra arbitrat. Tolle igitur à me peccata, quæ timidum & pavidum me efficiunt; & largire mihi gratiā tuam, si omnino non expediat mihi vita, quæ ab omni tentatione immunis est; vt impugnationibus quibuscunque fortiter resistam, maioriq; cum desiderio ad cælestem

Prou. 28.

stem

stem illam patriā anhelem; vbi nec tentatio sollicitat, nec dolor cruciat, nec tribulatio affligit: vbi tu cælestis Pater cum Filio & Spiritu sancto viuis & regnas Deus per omnia secula seculorum. Amen.

3

Contra tentationes Diaboli.

Ex cap. 16
Soliloq.
D. Augustini.

Apoc. 12.

Domine Deus, creator & conseruator generis humani, en iterum instat funestus ille Draco, serpens antiquus, qui ortus est in Paradiso voluptatis, qui cauda sua trahit tertiam partem stellarum cæli, & eas mittit in terram: qui veneno suo corrumpit aquas terræ, vt bibentes homines moriantur. Et quis defendet me à morsibus eius? quis eruet me ab ore eius, nisi tu Domine, qui confregisti capitā Draconis magni? Adiuua me, prætende Domine super me alas tuas, vt fugiamus sub eis à facie Draconis huius, qui me persequitur, & scuto tuo libera me à cornibus eius. Hoc enim est continuum studium eius, hoc vnicum desiderium eius, vt animas quas creasti deuoret. Et ideo Deus meus clamo ad te, libera me ab aduersario meo, quotidiano: qui siue dormiam, siue vigilem, siue comedam, siue bibam, siue quid aliud agam, omnibus modis instat die ac nocte fraudibus & artibus, nunc palàm, nunc occultè sagittas venenatas contra me dirigens, vt animam meam interficiat.

Sed

Sed tu Leo inuictissime de tribu Iuda, adde militi tuo robur aduersus Leonem rugientē, qui oberrat semper, quærens quem deuoret. Tu Serpens illē salutarifer, in sublimi fixus stipite, adde paruulo astutiam, aduersus callidissimi Serpentis insidias. Tu Agnus ille niueus, Satanicę tyrannidis expugnator, da ouiculę tuę vires spiritūs tui, vt in se fragilis, in te fortis, superet omnes Diaboli affulsus, ne de me gloriatur hostis meus: sed per te victor gratias agam tuę misericordię, quę tibi fidentes nunquam destituit. Amen.

Contra tentationes mundi.

VIm patior Domine Iesu Christe, vim patior: veni, vindica me ab aduersario meo, & libera me. Nonne tu dixisti; Confidite, ego vici mundum? Vnde igitur mundo vires hæ, vt in Electos tuos sic sequiat? ferro & flamma persequatur omnes, qui non relicto te, venerantur & adorant ipsum? Vt quid tam latē dominatur inter eos, quos tu de mūdo elegisti, vt essent tui? præsertim in hac delira senescentis ætate, in qua potentiam ipsius decrescere, non crescere oportebat? Vbique regnat diuini verbi contemptus, ingratitude, luxus, crapula, illicitę voluptates, & omnium rerum abusus maximus: & qui hæc sectari noluerit, in derisum habetur, & similitudinem improperij: vita eius æstimatur,

4
Collector.

Joan. 16.

Sap. 5.

infantia, & finis eius sine honore. Grauis est mundo ad videndum, quia dissimilis est alijs vita illius.

Hæc sæpe pulsant animos nostros Domine, & penè mouent pedes nostros, vt relictis vijs tuis duris, in partes mundi transeamus, qui nobis omnia felicia, iucunda, dulcia & amœna pollicetur: placido nobis arridens vultu, & huius seculi diuitias, honores & voluptates plenis manibus offerens. Sed tu Domine segrega me de caligine, dolis & turpitudine mundi huius. Illumina oculos meos, vt videam & intelligam, quàm breuis, quàm incerta, quàm fallax, quàm cæca, quàm periculosa sit huius domini felicitas. Conserua me in agnitione nominis tui, ne in hac auara & ebria mundi ætate inuoluar curis secularibus, quæ animos ab exercitijs pietatis abducunt, & motus à Spiritu sancto excitatos suffocant.

Da mihi Domine, vt mundus mihi sit crucifixus, & ego mundo: nequaquam illi placere studeam, ne dum amicus mundi factus fuero, meipsum inimicum tuum constituam: eius odia & conuicia nihili faciam, eius iudicium peruersissimum facile contemnam, sciens quia in nullo gloriari oportet, quàm in cruce tua Domine, qui viuis & regnas cum Patre & Spiritu sancto in secula seculorum. Amen.

VBi es, o bone Iesu, vbi es? iterum se-
uit Iezabel, iterum furit caro, do-
mestica, sed tamē inimica insensibilissima.
Adesto Iesu, adesto; veni, fer opem peri-
clitanti: quoniam intrauerunt aque vs-
que ad animam meam, & desideria car-
nis opprimunt me.

Caro mea de luto facta, nil nisi luto-
sas & sordidas profert cogitationes, à
mūdo vanas, & curiosas; à Diabolo ma-
las & amaras accipit, quibus concupiscit
aduersus spiritū: nata de peccato, nutri-
ta in peccato, vitijs corrupta ab ipsa ori-
ne, sed multo amplius vitiata praua con-
suetudine. Quis aduersus hostē tam po-
tentē stabit Dñe? vim illius quis sustine-
bit? Illicitos motus excitat, venenatas
cogitationes inflāmat, mouet bella, nu-
trit odia, incitat gulā, mouet libidinem,
peccati occasiones parat, & mille nocēdi
artibus pulsare spiritū nō cessat. Grauis
lucta est, & graue periculū aduers⁹ dome-
sticū hostē pugnare: maximē cū nos ad-
uenimus, & ille ciuis: Ille suā inhabitat
regionē, nos exules sumus & peregrini.

Non ignoras infirmitatem meam, o
dulcissime Iesu, scis quā imbecilla arx
& caduca hæc est: scis quòd necessariò
ruere debet tot impetita machinis, nisi
tuo Christe robore muniatur. Ad te igi-
tur clamo ex toto corde meo, da mihi
gratiam tuam, ne sequar concupiscenti-
as carnis meæ, & ne prouocē sensus me-
os effreni licentia, sed fortiter illis resi-

stam. Adiuvā me, vt domem corpus me-
um & in seruitutem redigā, ne caro mea
luxuriāns prauaricetur, & iustas metas
transiliat, ne cor & corpus meum vitijs
carnalibus, luxu, crapula & illicitis vo-
luptatibus contaminetur. Sanctifica me,
& rege me, vt custodiantur oculi mei,
claudantur aures, nil tangam illicitum,
fugiam quod noxium est. etsi aculeum
sentiam, consensum tamen non adhibe-
am, carnem sic nutriam, ne recalcitret,
& sic reprimam ne insolescat. Largire
mihi, vt in omnibus, & per omnia sic
carnem spiritui subiiciam, vt tādē vl-
trō ei obtemperet, eiūque non iam ampli-
us imperet, vt Domina; sed seruiat vt
Ancilla: vt inter vtrumque sit summus
consensus, optata pax, perpetua concor-
dia. Amen.

6

*Deuicta tentatione.*ioan. Fe-
rus.

GRatia tibi Domine Deus, cuius be-
nignitate factum est, vt sedata tem-
pestate hac, optata appareat serenitas. Ti-
bi triumphus ille decantatur: à te, non
per me superbus prostratus est Goliath;
tibi assignandum est, quidquid boni ef-
fectum est. Quantum enim in me fuit,
cadere necesse fuisset: nunc verò victor
persto, quòd in te auxiliatorem fortem
certam posuerim victoriæ spem: semper
ante oculos veluti appensum quid habēs;
si Deus pro nobis, quis cōtra nos? &, O-
mnia possum in eo qui me corroboret.

Rom 8.
Philip. 4.

Licet

Licet autē de parta hac victoriā trophæa tibi canam Domine, quia tamen edocti sumus, cū omnia quæ fortem athletam decent peregerimus, non ad luxum & voluptates redire, sed in Spiritu sancto fortes stare in acie contra assiduas Diaboli velitationes: ideo ad te omnium in te sperantium conseruatorē confugio. adauge meam in te fiduciam, vt indies magis magisque fide crescens, hostium nostrorum deficiat virtus: quousque extra custodiā posueris eō, vbi nullius pugnæ, nullius periculi, nullius formido angustia, sed sempiterna per te parta securitas est; quando regnum Patri tuo trades, cum quo viuis & regnas Deus in æuum. Amen.

Contra conflictum vitiorum.

7

Plissime Domine Iesu Christe, en miserum & mendicum & vilissimum me peccatorem, ad misericordiæ tuæ pedes prouolutum; en vulnera, plagas, liuores & vitia animæ meæ, quæ ipse mihi (heu) peccando intuli, & nunc oculis misericordiæ tuæ sananda exhibeo. Clementissime Iesu, miserere infirmitatis, captiuitatis & infelicitatis meæ, quibus misera anima mea ad terrena deprimatur, & in varia desideria distrahitur. Amantissime Iesu, per charitatē illam, quæ te in manus peccatorum ligandum tradidit, & crucifigendum; quæque te tribus horis in cruce magis, quam clau

Ioannes
Lansper-
gius in
Pharetra,
&c.

illi manibus ac pedibus tuis infixi, continuit, obsecro te; solue iugum captiuitatis meæ, & à cunctis vitijs, concupiscentijs & prauis inclinationibus libera me. Ab omnibus verò insidijs hostium, & in omni tribulatione protege me.

Extingue & occide in me radicitus omnem priuatum amorem, omnes inordinatos motus, passionēs & affectus: omnem fomitem, omnemque pronitatem & inclinationem ad superbiam, iram, inuidiam, vanam gloriam &c. Ab his enim solus tu me potes liberare.

Dulcis Iesu, reple me gratia tua, & perfectissima charitate tua; conserua me in omni bono, vt omnes peccandi occasiones fugiam; tētationes fortiter vincam, carnem spiritui subdam, vitia persequar & exterminē; inspirationibus tuis obediā, Diaboli insidias & fraudes euadam, nulli peccato vnquam consentiam, nihil quod tibi displicet foueam: sed honorem, laudem & gloriam tuam ardentissimè sitiam, fidelissimè promoueam, & me totum in beneplacitum tuum expendam. Amen.

8

Thomas
Campes.
lib. 2 de
Imitat.
Christi.

Contra malas cogitationes.

Domine Deus meus, ne elongeris à me; Deus meus in auxilium meum respice: quoniam insurrexerunt in me variæ cogitationes, & timores magni affligētes animam meam. Quomodo pertransibo illæsus? quomodo perfringam eas?

eas? Ego, inquis, ante te ibo, & gloriosos
 terræ humiliabo. Fac Domine vt loque-
 ris, & fugiant à facie tua omnes iniquæ
 cogitationes. Hæc spes & vnica consola-
 tio mea, ad te in omni tribulatione con-
 fugere, tibi confidere, te ex intimo corde
 inuocare, & patienter consolationem
 tuam expectare. Amen.

Esa. 45.

Contra varia peccatorum genera.

9

Deus Pater Domini & Dei ac Serua-
 toris nostri Iesu Christi, magni no-
 minis Dominus, natura beata, bonitas
 effusa, Deus omnium ac Dominus, qui
 es benedictus in secula, qui à Seraphin
 glorificaris, cui assistunt mille millia, &
 decies millies decies millenā millia san-
 ctorum Angelorum & Archangelorum
 militiae: gratia Christi tui, & aduentu
 sanctissimi Spiritus tui sanctifica quæsu-
 mus animas nostras, corpora & spiritus
 nostros; nostras quoque mentes tange,
 explora consciētias, omnemque malam
 cogitationem à nobis aufer: omnē im-
 pudicam ratiocinationem, omnem tur-
 pem cupiditatem, indecentem omnem
 cogitationem, omnem inuidiam, super-
 biam & hypocrisin: omne mendacium,
 omnem dolum, omnem huius vitæ dis-
 tractionem, omnem auaritiam, omnem
 vanam gloriam, desidiā omnē, omne
 vitium, omnem iram, omnem iracun-
 diam, omnem iniuriarum recordatio-
 nem, omnem blāspemiā, commotio-

S. Iacob.
 frater Dñi
 in Litu-
 gia.

nem omnem carnis & spiritus alienam
à sanctitatis tuæ voluntate. Amen.

IO

Ludouic.
Viues.

Contra auaritiam.

Quotidiana corporis necessitas animum ad se trahit ac detrudit. Mitte nobis, Pater, cui scimus de nobis esse curam, panem illum quotidianum, quem nos abs te iussit & petere & sperare vnicus tuus Christus. Da necessarijs contentos viuere, superuacanea aspernari; vt nos neq; inuitabilis necessitas vincat, neque obruat affluētia. Atque ea ipsa necessaria ita mitte, ne per offensam tui paremus. Ita omni alia cura explicati & soluti, id solum curabimus, vt amicitiam tuam, quantum erit virium nostrarum, conseruemus, eamque curam tu iuuabis: qui si desis, nihil poterit consistere. Transfer cor meum à seruitute Idolorum ad seruitutem tui, cui seruire regnare est. Immitte pro cupidine harum diuitiarum, quæ & tempori, & iniuriæ hominum, & casibus sunt obnoxia, cupiditatem tuarum, quæ sempiternæ & inuiolabiles, semel acceptæ, possidentur. Amen.

II

Idem.

Contra superbiam.

O Pater sapientissime atque optime, qui semper excogitas quemadmodum nobis prosis, cum nos semper cogitemus, quemadmodum te offendamus: dedisti humano generi superbissimo, in-

domi-

domito, rebelli cæleste filij tui exemplū moderationis, atque obedientiæ. Conuertere mentes nostras ad te, atque illud tuum exemplū, vt nos tam demissè nos geramus, mali atque imbecilles, quàm ille optimus & potentissimus. Amen.

Contra ebrietatem.

12

B. Augu-
stinus.

Omnipotens misericors Deus, ita nos inaspicere dignare, vt tam lugèdum atque etiā erubescendum ebrietatis malum ita nobis in horrorē veniat, vt nunquam illud fieri permittamus: sed quod in ebrietate perituum erat, in pauperum refectiōem proficiat. Per Christū Dominum nostrum.

Contra iniuriarum recordationem.

13

Ex Missa
Æthiopū.

O Domine, ex beneplacito tuo imple corda nostra pace tua, & munda nos ab omni mala cogitatione, & immunditia; & ab omni memoria iniuriarum, & ab omni inuidia, & recordatione malorum, quæ mortem inferunt. O Domine, fac nos omnes dignos, vt salutemur ad inuicem salutatione sancta, & immaculata: & recipiamus sine iudicio, & sine morte donum tuum cæleste, hoc est, gratiam tuā cum Spiritu sancto. Amen.

Contra iram.

14

Ludouic.
Viues.

Cæca hæc nostri indulgentia quantum in animos nostros errorū importat, vt iniuria existimemus fieri, quod

fit iustissimè: vt in eo alijs denegemus veniam, in quo nos singulis momentis labimur & venia indigemus: vt nobis vltionem sumamus pueri, dementes, furiosi, iniusti: & præripiamus illi, qui solus sapiens est, & iustus: quem & propter sapientiam nulla res fallit, & propter æquitatem nihil abducit à recto.

O Christe mitissime, exemplar moderationis, fons mansuetudinis, aliquid in nos asperge de lenitate ista tua, quò nos imitatione tui conuicijs impetiti, iniurijs affecti, calumnijs & contumelijs oppressi atque afflicti, beneficiū tamen pro malo rependamus. Amen.

15

Idem.

Contra inuidiam.

TV Domine repertor & conditor es omnium, tu munerum tuorum distributor, quæ pro immensa tua liberalitate elargiris; nemini non tribuēs plus, quàm meretur; nemini non, quantum sufficit. Quæ ergo inuidendi causa nobis relinquitur, quando tu omnibus das de tuo, & immerentibus das, & unicuique quod est ad beatitudinem suam fatis?

Adde Pater hoc quoque ad cetera, beneficiorum tuo rum iudicio & distributioni acquiescere, vt pro ijs quæ accepimus agamus gratias. Pro ijs quæ in alios contulisti, ne tacitè apud nosmetipsos & sacram tuam voluntatē damnemus, & consilium non inuestigabile. Sed amemus.

mus potius & in bonis aliorum tuā munificentiam, qui tam es in omnes benignus, nullius rei egens, à nullo nec accipiens quicquam, nec sperans. Amen.

*Contra mentis euagationem in precibus
& deuotione.*

16

OMnipotens æterne Deus, cordium cognitor & scrutator renū, cui manifestum, quā instabiles sint in hac vitamētes hominum, quāque facile à contemplatione summi boni, & inuocatione sanctissimi tui nominis, per varias distractiones, & intempestiuas curas abduci, & gustu dulcedinis tuę tanquam fructu deuotionis nos priuari, & veluti procellosis fluctibus huc illucque disijci patiamur: nouisti Domine in his imperfectum meum, imò summam meam negligentiam, quæ sanè mihi in conspectu tuo displicet ex toto corde. Sed quis cordis mei imperium melius regat teipso, Deus cordis mei?

Exurge igitur & impera ventis multiplicis distractionis mentis meę, vt quiescant, & cor meum sinant ad te ardenti deuotione erigi, tibi que absque impedimento (quoad in hac vita possibile est) perfecte vniri. Effice in me Domine Deus, quod deuotæ tibi animæ spondidisti, meque duc in solitudinem in te solū collecti cordis, vt ibi loquaris ad me, & ego exaudiam: hñc sedeam solitarius in te vnum intentus, & leuem me supra

Petrus Michaelis in
Sertis suis.

Osee 2.

Thren. 3.

Genes. 32. me, teque intimè complectar, teneā, nec dimittam donec benedixeris mihi.

O quàm bonus es Domine illis qui recto sunt corde, qui te toto corde suo querunt, & coram te effundunt animas suas, purasque ad te leuant cum cordibus manus; atque omnem adhibent diligentiam, ne in oratione sint, sicuti homotentans Deum, cuius labia illum honorent, dum cor procū est ab eo.

Esa. 29.

Ierem. 33.

Largire mihi amātissime Deus, quod populo tuo per Ieremiam promisti, atque spiritum tuum nouum renoua in visceribus meis: Aufer à me cor lapideum, & da mihi cor carneum, vt sensu tui amoris fretus, in mandatis tuis ambulem; iudicia & iustificationes tuas ita custodiam, vt de populo tuo censear, tuque sis & perman eas Deus meus; qui sicut me doces rectè à te petere, ita per Iesum Christum filium tuum, Dominum nostrum, quod postulo, concedere mihi & omnibus fidelibus hodie digneris. Amen.

17

Contra Sectas & schismata Religionis.

Idem ibidem.

O Pax vera, atque fidelis Pastor ouilis Ecclesie tue, Domine Iesu Christe, in cuius cōspectu omnes tanquā vnus panis esse oportet, qui de vno pane participamus: id est, inter nos tanquā membra tecum, ceu cum capite, verè fidei, spei & charitatis vinculo colligatos semper existere:

existere: Exaudi preces nostras, & misere-
rere ærumnarum & vastationis populi
tui. Et cum non ignoremus peccatis no-
stris meritò acceptum referri, quòd tot
Hæreses atque perditionis Sectas in nos,
tanquam efferatas belluas grassari per-
miseris: oramus te per acerbissimā passi-
onem & mortem tuam, vt populo tuo
cor contritū & humiliatum, quod nun-
quam despicere soles, largiaris.

Obliga & sana, obsecro, omnia vul-
nera nostra. Redeat, pulsus altercationi-
bus, & corruptelis verbi tui, alma veri-
tas; & pax quæ exuperat omnem sensum,
custodiat corda & intelligētias nostras,
sub legitimis pastoribus nostris in te su-
premo omnium Capite nostro, à quo
omnis influxus lucis & gratiæ, in tibi
coniuncta sacrae pacis nexu membra, de-
riuiatur. Amen.

CAPVT XIII.

PRECATIONES QUI-
BUS DOMINO SUPPLICAMVS,
vt nos à diuersis malis corpo-
ralibus & externis
liberet.

In quacunque tribulatione.



Miserere mei Domine, misere-
re mei, quia peccaui, iniqui-
tatem feci, & te ad iracundi-
am prouocaui: ideoque me-

I
Collector.

ritò castigor, & dignus sum, qui has pœnas sustineam. Si peccata mea cum tuis flagellis conferam, multò maiora sunt, quæ merui, quàm quæ patior: misericordia est, non ira; blanditiæ sunt, non supplicia, oscula non flagella, quibus me excipis. Si enim intraueris cum seruo in iudicium, sulphur, & pix, & omnia tormenta inferni minora sunt, quàm vt pro merito meam punire queant iniquitatem. Vt vt Domine me tractaueris, iustus es, & iusta sunt iudicia tua: ego verò iniustus, & qui grauiora promerui.

Iob 13.

At tu Domine, qui es solatium afflictorum, gaudium mœrentium, & refugium nostrum in tempore tribulationis, noli potentiam tuam ostendere contra folium quod vento rapitur, & stipulam siccam noli persequi. Noli scribere contra me amaritudines, & peccatis adolescentiæ meæ ne consumas me. Ne secundum peccata mea facias mihi, quibus indignationem tuam commerui; sed secundum misericordiã tuam, quæ omnia, non tantum mea, sed & totius mundi peccata superat.

Tibi Domine nota est carnis meæ imbecillitas, quòd pauidus sum & formidolosus, qui in cruce & varijs periculorum casibus subsistere ex viribus meis non possum: ideo de profundis tribulationum ad te clamo, ô Pater misericordiarum, & Deus totius consolationis; Conferua me sub cruce & calamitatibus

soli-

solidum in fide, firmum in spe, constantem in patientia: vt tribulationes, & res quasque aduersas equo ac magno animo perferam: ne fractus dolore aliquid contra mandatum tuum faciam, quo ira tua magis in me exardescat; sed da vt hunc calicem, velut abs te porrectum, patienter & obedienter ebibam.

Domine ne in furore tuo arguas me; neque in ira tua corripas me: miserere mei, quia infirmus sum. Adiuua me secundum beneplacitū tuum: potes enim, si velis, hunc calicē à me tollere. Spiritus quidem promptus est, caro autem infirma. Si tamen visum est adde doloribus; fiat voluntas tua, non mea: sed adde obsecro & patientiē dono, velisque has corporis afflictiones mihi cedere in remissionem peccatorum meorum. Psal. 6.

Quòd si paterna tua pietas hac miri castigatione contenta sit, tempestatem hanc excipiat serenitas: vt tibi vtroque nomine gratias agam, & quòd inutilem famulū clementer emendaueris, & quòd afflictionis amaritudinem consolationis dulcedine fustuleris: Illic rationem habens necessitatis, hīc non immemor infirmitatis. Tibi laus & gratiarū actio in omne æuum. Amen. Mar. 14.

In angustijs & extremis periculis.

Domine Deus, qui Susannam matronam honestam calumniosè circumuentam à falso iudicio liberam fecisti;

qui

13

Ioannes
Fabri.
Daniel. 13.

Dan. i. 4.
& 3.

Matth. 14

qui Danielelem vatem tuum in spelunca leonum, & tres pueros in ardente camino ignis conseruasti incolumes; qui Petrum, quem iam marini fluctus obruere, & submergere coeperant, dextera tua ad auxilium porrecta, subleuasti, te oro, o Deus clementissime, vt me indignum, & simul vniuersum populū Christianum, ex his miserijs & angustijs, quibus circumsepti sumus, extrahas & liberes.

Parce quæso genti tuæ, quam pretioso sanguine tuo mercatus es. Hanc gentem, hunc populum tanto pretio per te redemptum, in pace & mutua concordia atque coniunctione, ad laudem tui nominis perpetuam, conserua. Amen.

3

Tempore belli inter Christianos.

Petrus Michaelis in
Sertis suis.

Domine Pater misericordiarum, pacis & dilectionis Deus, quādiu quæso irasceris super populum tuum Christianum, non auferens execranda bella, & euerfiones eius atrocissimas? Respice in afflictionem & exitium extremū populorum atque nationum, Exaudi gemitus pauperum, commoueat te ad miserandum effusus Christianus sanguis.

Heu Domine, sunt quidē hæc omnia peccatorum nostrorum iustissima supplicia: peccauimus, iniquitatē fecimus, te fontem vitæ & felicitatem nostram dereliquimus, contempsimus, irrisimus, contra te, tuaque mādāta perfrieta fronte peccatis nostris bellū gessimus. Man-

data

data tua nulla seruauimus, de quibus dixisti; Si seruaueritis, seruabunt vos: si nolueritis, gladius deuorabit vos. At tu Domine, cum irasceris iuste, misericordiae tuae recordare, & ut illius capaces reddamur, da populo tuo quaeso cognitionem & confessionem impiae vitae suae. Mitte in eum spiritum gratiae & precum, ut ubique corde contrito & humiliato, quod non despicias, ad te clament, dicentes: Domine miserere, Domine miserere populi tui, quem pretioso sanguine redemisti: peccauimus, iniquitatem fecimus. Iustasunt in nos iudicia tua, supplices ruentes, gratiam & misericordiam tuam implorabimus, ut desinat vindex manus tua.

Conuerte, ô Domine, cruentum & voracem gladium tuum in vaginam suam. Impera malis bestiis, id est, omnibus qui ad bellum causam praebent, ut reuertantur ad locum suum, atque saluferam pacem, diu desideratam, inter nos Christianos tutò regnare permittât, ad laudem & gloriam sanctissimi nominis tui; qui percutis & sanas, occidis & viuificas. Amen.

Tempore belli Turcici.

4

CAlestis Pater, commeruimus peccatis nostris poenas, verum tu ipse castiga secundum misericordiam tuam, & non in furore tuo. Melius & tolerabilius nobis est, tradere nos castigandos manibus

Borké sis
in Enchiridio.

nibus tuis, quàm in hominum, aut hostis manus incidere: sicut & Dauid precabatur. Magna est enim misericordia tua. Tibi soli peccauimus, & mandata tua transgressi sumus.

Sed omnipotens Deus Pater, probè tu quidem nosti, nihil nos contra Diabolum, mundum & Turcā deliquisse, nec ipsi aliquid iuris, aut potestatis plectendi nos habent. Verùm tu opera eorum, tanquam sæua virga, contra nos vti potes. Atqui bone Deus, cælestis Pater, nihil aduersus ipsos deliquimus, vt merito ac iure plectere nos videātur. Quin malent ipsi nos vnà secum contra te horribiliter peccare.

Non enim curant hoc, vt tibi obediētes simus: sed omni genere idololatriæ (quemadmodum ipsi faciunt) contaminemur, falsam doctrinam, falsam fidem, & mendacia amplectamur: coinquinemur adulterijs, libidinibus, cædibus, latrocinijs, veneficijs, & omne genus flagitiorum contra te perpetremus. Verùm hoc est aduersus eos peccatum nostrum, quòd te Deum Patrem verum, ac vnicum Deum, & dilectum filium tuum Dominum nostrum Iesum Christum, & Spiritum sanctum vnicum Deum prædicamus, credimus, & confitemur: hoc est peccatum nostrum aduersus eos.

Cuterùm si abnegaremus te, pacem & trāquillitatem nobis Diabolus, mundus,

duſ, & Turca conſeſſuri eſſent: ſicut in-
quit dilectus filius tuus; Si de mundo ef-
ſetis, mundus quod ſuū eſt diligeret. Hic
iam reſpice miſericors Pater ſuper nos,
& ſeuere iudex ſuper inimicos noſtros.
Non enim magis ſunt noſtri, quā tui
hoſtes. Quare cū perſequuntur & affli-
gunt nos, perſequuntur & affligunt te.
Nam verbū hoc quod prædicamus, cre-
dimus, & conſitemur, non noſtrum, ſed
tuum verbum eſt: & quicquid eſt in no-
bis, eſt Spiritūs ſancti tui opus. Id Dia-
bolus ferre non poteſt, ſed tuo loco vult
nobis eſſe Deus: Mundus vult pro verbo
tuo nobis obtrudere ſua mendacia; &
Turca vult Mahometum ſuū in locum
dilecti filij tui Ieſu Chriſti collocare:
quem quidem blaſphematur ille, negans
eum verum eſſe Deum, & affirmans Ma-
hometem ſuum longè illo eſſe ſuperio-
rem.

Si hoc peccatum ſit, quòd te æternum
Patrem, & dilectum filium tuum, & Spi-
ritum ſanctum vt verum & vnicum De-
um colimus, conſitemur & celebramus,
ipſe tu peccator ille es, qui iſta in nobis
operaris, præcipis, ac requiris. Quapro-
pter illi quidem teipſum oderunt, affli-
gunt, & plectunt; ſi ob eam cauſam nos
oderint, affligant, & plectant. Quare ex-
pergiſcere, Domine Deus, & ſanctifica
nomen tuū, quod illi blaſphemant hor-
ribiliter. Stabilito regnum tuum, quod
illi in nobis conturbant, & perſice vo-

luntatem tuam, quam impedire illi in nobis conantur : nec patiaris te propter peccata nostra ita conculcari ab ijs, qui non peccata nostra in nobis plectunt, sed sanctum nomen tuum. Nomen & opus tuum in nobis opprimere, & delere cōnātur, ne tu pro Deo colaris, nec aliquem habeas, qui te prædicet, in te credat, & te profiteatur.

Has preces clementer ac benignè recipere & exaudire, & quemadmodum credimus ac speramus, ex omnibus his malis nos liberare digneris, propter dilectū filium tuum Dominum nostrum Iesum Christum, qui tecum & cum Spiritu sancto viuit & regnat in sempiterna secula. Amen.

5

Tempore pestis.

Ioan. Ferus.

Non sunt nobis remotæ causæ, Domine Deus, Pater iustissime, tantam esse rebellionem omnium ferè creaturarum in vnum hominem, cui (si omnia creationis modo constarent) obedire, & subesse debebant : nūc terremotus, nunc tonitru, nunc eluuiēs, nunc coniunctiones syderum nocentissimæ, nunc infectio aëris, quotidie noua atque alia audiuntur mala. Sed hæc pœna, quòd munificentia tuæ donis abutimur, mandata tua transgredimur, quòd minis non deterremur, promissis non allicimur.

Agnoscamus his te castigationibus à terrenis hisce nos abducere, ad cœlestium
deside-

desideria attrahere; & in hoc creaturas tuas tibi obsequi. Memor esto in magna hac ira tua misericordiarum tuarum, & contagij malum, quod tua ira in nos effusum est, tolle propitius. Nullum enim malū pestilens aër importabit, si omni-genis peccatis bellū indixerimus. Omnia tamen abs te Patre pijsimo sunt, & quod corpore à contagio hoc securi, & quod anima à peccati malo tuti sumus.

Et si autem alij huius vitæ amore detenti in mortalitatis eiusmodi periculis huc illucque opem implorantes discurrunt; tamen à nemine rectius, tutiusque petitur auxiliū, quàm abs te vno: cuius potentiam nemo potest effugere, qui nos in gratiam recipies, cum neminem non suscipis in tua bonitate sperantem. Ad te igitur clamamus Domine, exaudi preces & orationes nostras, vt liberes nos ab hac plaga pestifera & funesta. Præcipe Angelo tuo percutienti nos, vt recondat gladium suum in vaginam, ne nos feriat vsque ad consummationem: ne facias progressionē iræ tuæ, parce animabus nostris, & ne concludas nos peste.

Additio.

Reuertere, reuertere Domine, & deprecabilis esto super seruos tuos: aufer à nobis hanc inclementiam cæli, & insalubritatem loci, ne aër infectus noxam, qua afficitur, in nostram perniciem effundat. O Domine, vertatur quæso manus tua, sufficit iam, cesset nunc manus

2 Reg. 24.

tua,

tua, vt sciat omnis terra, quia tu es Domine Deus noster, & quia nomen tuum inuocatum est super nos. Amen.

6

Petrus Michael in
Sertis suis.

Tempore famis & annonæ caritatis.

Iustissime Domine Deus, qui pro meritis populi tui benedictionem tuam impartiris, & retrahis; respice in egestatem nostram, qui agnoscimus presentem annonæ caritatem & famem, quæ tabescimus, tãquam virgã in manu, quæ castigas & punis multiplicem abusum bonorum tuorum apud nos in crapula & ebrietate creberrima, alijsque desiderijs carnis, & dissipatione donorum tuorum; quæ largitus es, non vt contra te impinguati & dilatati recalcitremus, sed potius vt datori muneris ex animo seruiamus. Quid de profanatione nominis tui per iuramenta & imprecationes horrendas, de violatione Festorum & cultus tui, non conqueramur?

Sed quidnam miseri, & in iniquitatibus nostris à te iustissime flagellati, aliud faciamus, quàm vt in conspectu & vultu tuo irato procidentes, accusemus atq; deploremus peccata nostra, tum gratiam & misericordiã imploremus, vt respicere de cælo digneris, quò citius terra nostra largiatur fructũ suum benedictione tua, atque adeò necessarijs alimentis refecti, te pro accepta benedictione tua laudemus, & ad seruiendum tibi nos magis deuinctos profiteamur. Amen.

Con.

Contra tempestates aeris & tonitrua.

Rex æterni imperij omnipotens Deus, qui das escam omni carni, qui operis cælum nubibus, & paras terræ pluuiam: qui transfers Austrum de cælo, & inducis in virtute tua Africum: qui rigas mōtes de superioribus suis, & de fructu operum tuorum satiabitur terra: qui Angelo præcepisti, vt terræ, mari, arboribus non noceret: parce metuentibus, propitiare supplicantibus.

Te enim Domine supplices exoramus, vt procūl abscedat incurio turbinum, calamitas tempestatū, fragor grandinum, percussus fulminum, & quælibet insidiæ inimici temperentur. Infeſta tonitrua, noxiæ pluuiæ, ventorum flamina fiant moderatè suspensa: omnis quoque spiritus procellarum, & aëreæ tempestates dextera tuæ virtutis prosterantur.

Domine qui intonas de cælo, & das vocem tuam: qui mittis sagittas tuas, & fulgura tua multiplicas, auerte quæsumus sæuissimam hanc tempeſtatem, ne nobis adferat exitium. Cohibe fulmina, & sagittas tuas, ne nos lædant. Custodi nos & nidulos nostros, ne contactu fulgurationum & ictibus fulminum pereamus. Protege ædes nostras, ne aduſtionibus cælitus succenſe conflagrent & consumantur.

Misericordissime Domine, ne quæſo
pluas

7

Albertus
Castalio
Venetus
in Sacer.
dotali Rō
part. 3.

Apoc 9.

Additio.
Psal. 17.

Psal. 77.

pluas grandinem super faciem terræ, neque percutias quæ sunt in agris nostris, herbam & arborem regionis nostræ ne confringas: segetem nostrā ne perimas, neque tradas iumenta nostrā grandini, vt intereant: sed iram furoris tui in misericordia tua contine, vt qui pro peccatis nostris iuste affligimur, misericordia tua praueniēte gratiam & indulgentiam tuam sentiamus. Amen.

8

Collector.

3 Reg. 17.
& 18.*Tempore nimie pluuiæ.*

Potentissime & sapientissime Deus, qui ad vocem vnius Helix Prophe-
tæ tui cælum & clausisti, & aperuisti, ita
vt toto triennio nec ros nec pluuiæ terre
superficiē humectauerit, iterumque vt
nubes copiosos imbres dederint, hoc in
beneficium, illud in ultionē populi tui:
te credimus, & confitemur cum, qui om-
nia quæcumque vis facis in cælo, in
terra, in mari, & in omnibus abyssis:
producens & leuans nubes ab extremo
terræ; qui cælum nubibus operis, & ter-
ræ paras pluuiam, ad educendū in mon-
tibus fœnum, & herbam seruituti ho-
minum.

Nos quidem recessimus à te, & non
audiuimus vocem tuam, vt ambulare-
mus in præceptis tuis: verbum tuū hac-
tenus cū nausea & fastidio magno asper-
nati sumus, dies festos in otio & luxu
transegimus, cultum tuum negleximus,
& carnis nostræ cupiditatibus frēna la-
xauimus.

xauimus. Ideo stillauit super nos maledictio & detestatio, quam in lege tua minatus es nobis inferre, vt maledicti essemus in ciuitate, & in agro: maledictum esset horreum nostrum, & maledictus fructus terræ nostræ, armenta bouum nostrorum, & greges ouium nostrarum.

Deut. 12.

Ostendisti nobis Domine anni huius initia læta, prospera, & spe plena: fruges in agris nostris copiosam nobis messem pollicebatur; herba in pascuis luxurians gratum præbebat iumentis & pecoribus pabulum.

At tu Domine vt visitares iniquitates nostras super nos, rupisti fontes abyssi magnæ, cataractas cæli aperuisti, & facta est pluuia super terram multa nimis. Inundarunt aquæ, & nisi tu Domine clemens & propitius nostri misereris, auferent labores manuum nostrarum: & spes nostra erit tanquam lanugo, quæ à vento tollitur; tanquam spuma gracilis, quæ à procella dispergitur.

Sap. 5.

Supplices igitur, & ad genua tuæ Maiestatis prouoluti te deprecamur, ne infinitum procedat ira tua: dic cælis; Sufficit; & nubibus cæli, vt moderatius pluant super terram. Custodi nos ab imbribus immodicis, qui frugibus sunt perniciosi, & accersunt æruginem: aut qui nimia illauione omnia fata conuertunt, & perdunt. Obicem pone fluminibus, ne cooperiant terram, & maridic; Vsq; huc venies, & non procedes am-

Iob 38.

Y

plus:

plius : & hîc confringes tumentes fluctus tuos. Da moderatas pluuias ad fecundandam terram, & benedictionem tuam effunde super nos, vt habentes vitæ necessaria tibi gratias agamus, & te in pauperibus tuis honorificemus, cui laus, honor & gloria est in secula seculorum. Amen.

CAPVT XIII.

PRECATIONES PETITORIAE, QVIBVS PRO EXPETENDIS bonis spiritualibus Deum obsecramus.

Pro diuina gratia impetranda.

Thomas
Campes.
de imitat.
Christi
lib. 2. cap.
52.

Domine Deus meus, qui me creasti ad imaginem & similitudinem tuā, concede mihi gratiam tuā, quam ostendisti mihi tam magnam & necessariam ad salutem, vt vincam peccatam naturam meam, trahentē me ad peccata & perditionem. Sentio enim in carne mea legem peccati, contradicentem legi mentis meae, & captiuum me ducentem, ad obediendum sensualitati in multis: nec possum resistere passionibus eius, nisi assistat sanctissima gratia tua, cordi meo ardenter infusa.

Opus est gratia tua, & magna gratia, vt vincatur natura ad malum semper pro-

prona, etiam ab adolescentia sua. Nam per primum hominem lapsa, & vitata per peccatum, in omnes homines poena huius maculae descendit, ut ipsa natura quae bona & recta condita fuit, pro vitio nunc & infirmitate corruptae naturae ponatur: eò quod motus eius sibi relictus ad malum & inferiora trahat. Nam modica vis quae remansit, est quasi scintilla quaedam latens in cinere. Hæc est ipsa ratio naturalis, circumfusa magna caligine, adhuc iudicium habens boni & mali, veri falsique distantiam: licet impotens sit implere omne quod approbat, nec pleno iam lumine veritatis, nec suauitate affectionum suarum potiatur.

Hinc est Deus meus quod cōdelector legi tuæ, secundum interiorem hominem, sciens mandatum tuum fore bonum, iustum, & sanctum: arguens etiā omne malum, & peccatum fugiendum: carne autē seruo legi peccati, dum magis sensualitati obedio, quam rationi. Hinc est quod velle bonum mihi adiacet, perficere autem non inuenio. Hinc sæpe multa bona propono, sed quia gratia deest, ad adiuuandam infirmitatem meam, ex leui resistentia resilio, & deficio.

O quàm maximè est mihi necessaria gratia tua Domine, ad inchoandum bonum, ad perseuerandum, & ad perficiendum? Nam sine ea nihil possum facere: omnia autem possum in te, confortante me gratia. O verè celestis gratia, sine qua

nulla sunt propria merita, nulla quoque naturæ dona ponderanda. Nihil artes, nihil diuitiæ, nihil pulchritudo, vel fortitudo; nihil ingenium, vel eloquentia valent apud te Domine, sine gratia. Nam dona naturæ bonis & malis sunt communia, electorum autem proprium donum est gratia: qua insigniti digni habentur vita æterna. Tantū eminet hæc gratia, vt nec donum prophetiæ, nec signorum operatio, nec quantalibet alta speculatio aliquid æstimeretur, sine illa: Sed neque fides, neque spes, neque aliæ virtutes tibi acceptæ sint, sine charitate & gratia.

O beatissima gratia, quæ pauperem spiritu virtutibus diuitem facis, & diuitem multis bonis humilem corde reddis. Veni, descende ad me, reple me manè consolatione tua, ne deficiat præ lassitudine & ariditate mentis anima mea. Obsecro Domine, vt inueniam gratiam in oculis tuis. Sufficit enim mihi gratia tua, ceteris non obtentis, quæ natura desiderat. Si fuero tentatus & vexatus tribulationibus multis, non timebo mala, dum mecum fuerit gratia tua.

Ipsa fortitudo mea, ipsa consiliū confert & auxilium. Cunctis hostibus potentior est, & sapientior vniuersis sapientibus. Magistra est veritatis, doctrinæ disciplinæ, lumen cordis, solamen prefuræ, fugatrix tristiæ, ablatrix timoris, nutrix deuotionis, productrix lachry-

ma-

marum. Quid sum sine illa, nisi aridum lignum & stirps inutilis ad eiiciendum?

Tua ergo me Domine gratia semper praeueniat & sequatur, ac bonis operibus iugiter praestet esse intentum, per Iesum Christum dilectum filium tuum, in quo tibi complacuit. Amen.

Oratio pia qua à Deo iustificationem expetimus.

Qui in æternum dominaris & solus potes omnia, Deus cæli & terre moderator, ad cuius nutum omnes creaturæ contremiscunt, & cæli cardines nutant. O Domine cælestis, perfecte opifex & figule, ego miser de limo effectus, vel potius limus sordidus, cum timore & trepidatione ad thronum tuæ Maiestatis venio: agnosco & confiteor meam imbecillitatem. Scio quòd nihil sum, imò quòd abominatio mera, & horror existam coram tuo aspectu, si tua gratia & misericordia destituar. Sine te nihil boni cogito, sine te nihil boni facio, sine te sum reptile quoddam deperditum. Non possum saluari sine te; in tua manu est omnis mea salus.

Ioannes
Fabri.

Ago tibi gratias, ô Deus, vel propter hoc, quòd eam cognitionem mihi dederis, vt videam & cognoscam me nihil esse, vel posse absque te. Tu es figulus, & ego limus: qualem me esse vis, talem potes effingere & formare. Si beatū me reddis, ostendis misericordiam tuam, &

gratiam : si conijcis in perditionem, demonstras iustitiam, & tuum exequeris iudicium. Nec meum est contradicere, cur hoc, aut qua ratione facis? Etenim cui tu bene vis, misereris. Hæc ego mecum reputo, ô Domine, & iudicia tua extimesco.

Cùm igitur omnis mea incolumitas & salus ex te pendeat, & in manu tua atque potestate sita sit; cumque vniuerso mundo maximè placabilem & misericordem Deum te exhibueris, per hoc, quòd filium tuum charissimum Iesum Christum innocentem pro nobis noxijs mori, & nostra peccata illius sanguine in cruce voluisti expiare: Cùm denique docueris nos, in omni nostra perturbatione te inuocare, tuam gratiam & misericordiam efflagitare, promittēs quòd daturus es nobis omnia, quæ in nomine filij tui simus petaturi: Venio ad te limus & massa lutea, ô clemens & celestis figule, à te peto suppliciter, vt misericordia tua vtaris: ex hac licet indigna materia facias vasculum ad æternam gloriam.

Digneris etiam ex mera tua gratia ad fidem veram, spem solidam, castum & sanctum amorem voluntatem meam permouere: vt per hæc dona iustificatus, integer, perfectus, bonus, sanctus, secundum tuum beneplacitum in medio vitæ meæ, & in fine, atque adeò in extremo die iudicij inueniar. O mitis Pa-

ter,

ter, concede mihi veniam omnium peccatorum meorum, per mortem filij tui amantissimi Iesu Christi. Fac vt tibi vni placeam, tibi gratus sim filius & heres: adauge in me clementer iustitiam qualemcunque mihi diuinitus datam, vt in ea pergam viuere. Auge in me fidem acceptam, confirma spem meam, accende & illustriorem redde in me tui amorem: vt auxilio tuo, tuæque gratiæ præsentia, & ex operatione tuæ sanctissimæ voluntatis vitam æternam, quam tu solus meruisti, & nobis promissisti, impetrare queam, vt te laudem, tibi gratias agam in regno tuo, per æterna secula. Amen.

Pro fide firma & sincera.

EXcæcatus est homo à peccato, sed miseratione patris tui appositus es tu Christe, dux cæco, magister rudi. Illud tamen atrocissimum in cæcitate hac & ruditate malum, quòd subinde trepidamus & nutamus, aliàs optima præceptoris monita non capimus, aliàs hæremus & ambigimus de veritate. O miserum & cæcum, quomodo paratam perniciem euades, si te subtrahis? si nec ipse nosti viā, nec fidem habes monstranti?

Lodouicus Viues.

Christe veritas pura & sempiterna, dignare ita pectoribus nostris illabi, vt te ac tua omnia sicuti veriora sunt, ita pro certioribus habeamus, quàm quæ vel oculis nostris cernimus, vel digitis

contrectamus, fallacibus corporis sensibus, quibus stolidæ & bruta caro tantopere confidit. Seda & compone motus istos carnis, detrudentes nos subinde ad mutationem eius, quod firmissimum atque stabilissimum oportet esse apud animos nostros. Donum est luminis tui fides; hoc tu Christe benignissime ita cordibus nostris instilla, ut vitiosi isti oculi vel reluctantes & inuiti cogantur illud aspicere.

Credo Domine, sed tu adiuua incredulitatem meam: succurre imbecilli & languidæ fidei meæ, quæ in me est exigua, instar grani sinapis: ut illa indies succrescens, in te radices agat: firma & immobilis maneat semper, ne inter tot sectas & schismata huius mundi labascatur aut deficiat.

Da quoque ô pie Iesu, ne fides mea sit nuda, inanis, seu mortua, sine operibus & fructibus bonis: sed efficax, & per charitatem operans, ut finem fidei reportem, salutem scilicet animæ meæ: ut te, quem nunc fide cognosco, tanquam per speculum & ænigma, facie ad faciem contempnam in altero seculo, ubi viuis & regnas, cum Patre & Spiritu sancto Deus per omnia secula seculorum. Amen.

Pro solida spe & fiducia.

Collector.

Psal. 41.

Psal. 42.

Quare tristis es anima mea, & quare conturbas me? Spera in Deo, quoniam adhuc confitebor illi, salutare vul-

tus

tus mei, & Deus meus. Credo enim visurum me bona Domini in terra viuentium. Expecta igitur, ô anima mea Dominum, viriliter age & sustine Dominum, quia bonus est omnibus sperantibus eum. Cur dubitas quod dabit tibi bona sua, qui non dedignatus est suscipere mala tua?

Adesto igitur, ô dulcissime Iesu, auctor spei & consolationis: Plasma tuum sum; manus tuæ Domine fecerunt me, & plasmauerunt me. manus, inquam illæ, quæ affixæ clauis sunt pro me. Opus manuum tuarum, Domine, ne despicias: vulnera manuum tuarum precor vt aspicias. Ecce in manibus tuis Domine Deus descripsisti me: lege ipsam scripturam, & salua me.

Da mihi gratiam, ô æterne Pater, vt in omnibus necessitatibus, periculis & tribulationibus, quæ in hac vita occurrunt, in te sperem. Misericordia tua namque est infinita, promissiones tuæ sunt vt plurimæ, ita verissimæ: & merita vni-
geniti filij tui pretium aut numerum non habent, quæ omnia pro me clamant & vociferantur.

Tu igitur es Domine spes mea; quidquid agendum, quidquid declinandum, quidquid tolerandum, quidquid optandum, tu es Domine spes mea. Hæc vna mihi omnium promissionum causa, hæc tota ratio meæ expectationis. In te Domine sperauerunt patres nostri, & libe-

Psal. 21.

raſti eos : ad te clamauerunt, & ſalui facti ſunt : in te ſperauerunt, & non ſunt confuſi. Adeſto igitur & mihi ſæpe in tribulationibus de tuis promiſſionibus dubitanti : Eſto mihi turris fortitudinis, vt ſiue inſurgant aduerſum me prælia, ſiue ſæuiat mundus, ſiue fremat malignus, ſiue caro aduerſus ſpiritum concupiſcat, ad te confugiam ; non timeam, ſed in te ſperem Domine. Et ſi liberatio iuxta tuam voluntatem ſubinde differatur, & intercapedine tēporis prolongetur, ne ambigam de ope & auxilio tuo ; ſed ſperem quia veniens venies, & non tardabis : quia fidelis es, & non defraudabis deſiderium noſtrum.

Hab. 1.

1 Pet. 1.

2 Theſ. 3.

Rom. 8.

Benedictus eſto Deus & Pater Domini noſtri Ieſu Chriſti, qui ſecundum miſericordiam tuam magnam regeneraſti nos in ſpem viuam ; & benedictus vni-genitus filius tuus, qui dilexit nos, & dedit nobis conſolationem & ſpē bonam, per gratiam quæ diſfuſa eſt in cordibus noſtris, per Spiritum ſanctum nunc & ſemper & in ſecula ſeculorum. Amen.

Pro charitate erga Deum.

Orationes huc ſpectantes inuenies, lector, Capite ſeptimo huius libelli.

Pro charitate erga proximum.

Collector.

Domine Ieſu Chriſte, qui ex ſola tua erga nos charitate, e ſinu Patris in hanc vallem lachrymarum deſcendiſti,

pro

pro nobis in stabulo natus, triginta tribus annis varijs miserijs exagitatus, & tandem in cruce mortem amarissimam passus es, etiā tunc, cū nos omnes inimici tui eramus; non tantū tua, sed & temetipsum nobis impendens; vt & nos vestigia tua sequeremur, & proximos nostros diligeremus: qua sola nota dixisti tuos discipulos à filijs huius seculi fore dignoscendos. Oro te per hanc flagrantissimam, abundantemque charitatem tuam, accende corda nostra frigida affectu veri amoris, vt sermonem tuum seruemus, mandatum scilicet illud nouum, quod peculiariter nobis commendasti, inquit; Mandatum nouum do vobis, vt diligatis inuicem, sicut ego dilexi vos.

Ioan. 13.

Ioan. 13.

O ardentissime amator hominum, excita in nobis fraternæ & seruidæ dilectionis studium, vt quilibet curam proximi habeat, eumque pro viribus iuuet, non secus ac membra, quæ in vno corpore compacta alia pro alijs mutuam sollicitudinem gerūt. Sit dilectio nostra perfecta, non simulata, non ficta, non morosa, non tædiosa, non fastuosa, nec quaestiuosa: sed simus erga proximum patientes & benigni; eius defectus & infirmitates toleremus, eius onera portemus, consilio & auxilio iuuemus, peccantem corrigamus, errantem in viam rectam reducamus, pijs admonitionibus & bonis exemplis eum ad iter salutis pertra-

1 Ioan. 3.

hamus, vt sic verè diligamus nos mutuò, non verbo, neque lingua, sed opere & veritate.

O charitas æterna, ô amor increate, ô Agne Dei qui tollis peccata mundi, tolle à nobis omnem amarulentiã, iram, vociferationem, maledicentiam, æmulationem & contentionem. Inflamma pectora nostra, vt exemplo tuo informati, complectamur etiã inimicos nostros vero amore: bene precemur deuouentibus nos: beneficiamus ijs, qui nos lædunt, & insectantur: tibi relinquentes vindictã & ultionem in omnibus, quam retribues illis, & nos ad æternam illam vitam perduces, qua tu cum Patre & Spiritu sancto viuis sine fine. Amen.

Pro corde recto & pura intentione.

Ioannes
Faber pau-
cis tamen
interie-
ctis.

DEus æterne & misericors, ad te venio peccator miser, corde saucio, ægro & impuro, quod tantum vanitatem huius mundi quærir, desiderat & amat, quam tu odisti: Non cogitat de salute sua, expetit quæ sunt caduca & omnibus casibus obnoxia; & sic cogitationes habet in varias res dispersas.

Quid faciã, ô Domine? ad te clamo, ô mitis Saluator, crea in me cor mûdum, mansuetum, pacificum, pium, humile, deuotum. Da mihi cor quod nulli noceat, nulli damnum vel iniuriam inferat, non malum malo compeset, sed malum bono superare assuescat. Largire cor
quod

quod amet quod amandum est; oderit quod odio habendum est; timeat quod verè timendum est; desideret quod verè desiderandum est. Ingere mihi cor, quod te super omnia amet, de te perpetuo cogitet, de te loquatur assidue, tibi que gratias agat; quod à terrenis se auocet, & in cælo versetur, seque in illa æternorum bonorum contemplatione delectet.

Et hoc in me effice ex tua gratia, quod mea non potest natura: tu enim solus tale cor, talem mentem largiri potes, quæ virtutes omnes secum ferat, vitia auersetur. Munda me, ô Deus, ab omnibus terrenis cupiditatibus: extolle cor meum ad te, qui in cælis habitas: illumina pectus meum vera & viuâ fide, & legem tuam digitis tuis cordi meo inscribe. da vt in omnibus operibus meis ad te vnum intentionis meæ oculum dirigam, te solum attēdam, tibi soli placere cupiam, neque ad rectè agendum vllò humano respectu, atque intuitu, neque vlla aut necessitate aut vtilitate, aut hominum metu aut simili aliqua ratione, sed solo amore tui impellar.

Custodi, ô Domine, cor & voluntatem, animum & intellectum meum ab omni errore & malo, vt in omni patientia fructus verbi cælestis ex me proueniant vberes, & sic in bono perseuerem, vsque in finem ad vitam æternam. Amen.

Pro bono proposito.

Collector.

Iesu Christe, Fili Dei viui, redemptor & mediator æterne, ad te suspiro creatura tua: Creator es, recrea me: vita es, viuifica me: plasmator es, reforma me. Ægrotus sum, ad medicum clamo: cæcus sum, ad lucē propero: mortuus sum, ad vitam aspiro. Tu es medicus, tu lux, tu vita; Iesu Nazarene miserere mei, fili Dauid miserere mei fons misericordiæ. Omnia interiora & exteriora mea deprauata sunt, non est bonum in me: intellectus est cæcus, voluntas infirma, sensus omnes ad peccatum proni, & cuncta cogitatio cordis intenta est ad malum omni tempore: iniquitatem sicut aquam bibo.

Genes. 3.

In hac farcina seculi veluti somno premor, cogitationes quibus meditor in te similes sunt conatibus expergisci volentium, qui tamen superati soporis altitudine remerguntur. Tu hætenus vocasti me, & non audiui: tu traxisti me, & ego non sequebar, nec adhuc sequor: semper obmurmurabam; Modò, & ecce modò; sine paululum. Sed, ô pie Iesu, quando modò & modò illud habebit modum? & istud sine paululum vltèrius non ibit? Quamdiu cras & cras? quare non modò? quare non hac hora finis turpitudinis meæ?

Sæpe dico, Hoc faciam, illud perficiam. Adest voluntas, non est facultas: adest facultas, non est voluntas. multa propono, nihil perficio. quod vna hora pla-

cet,

cet, altera displicet: quod nunc probo, paulò pòst improbo. & sic semper vacillo, nec vnquam in eodem proposito permaneo; quia de viribus meis confido. Nunc autem cōfiteor tibi Domine, quia non in fortitudine sua roborabitur vir, vt gloriectur ante te: stulta omnis præsumptio carnis. Non enim est hominis velle quòd possit, aut posse quòd velit, sed potius à te gress⁹ hominis diriguntur.

Obsecro igitur benignissime Iesu, per viscera misericordiæ tuæ, da mihi simplex & rectum propositum, vt nec committam nec omittā aliquid tuę voluntati contrarium: nihil in tota vita mea quæram, aut concupiscam aliud, quàm quod animæ meæ sit vtile, ac salutare: quodque diuinæ Maiestatì tuæ in primis placeat. Da propositi huius immobilem constantiam, vt neque propter diuitias, neque propter honores, neq; propter voluptates, aut pro alia quacunque re mundi te in posterum offendere præsument: da vt omnia potius mundi tormenta ferre, imò vitam hanc potius velim amittere, quàm vnum lethale peccatum committere. Scio enim te nulla re magis offendi, nihil magis odisse, nihil in oculis tuis abominabilius esse peccato: vt quod solum tuos humeros flagellis lacerauit, caput tuum spinis pupugit, corpus tuum cruci affixit, & diuinam animam amarissima morte à suo corpore separauit.

Heb. 12.

Hæc quotiescunque Diabolus impugnat, mens cogitet; hæc quoties mūdus tentat, animus meditetur: hæc quoties caro ad peccandum sollicitat, cor sentiat. Ad hoc certamen alacri spiritu curram, aspiciens in te auctorem fidei, & cōsummatorem Iesum; qui proposito tibi gaudio, sustinuisti crucem; recogitansque te qui talem sustinuisti à peccatoribus contradictionem, ne fatigetur animus meus: sed ad sanguinem vsque resistat aduersus peccatum repugnans, vt post legitimum certamen à te coronetur in cælis. Amen.

*Pro humilitate, & sue vilitatis
cognitione.*

Granatēs.
in Appen.
Memori-
alis pri-
ma.

Domine mi, quis es tu, & quis sum ego? tu es Deus magnus, Deus cæli & terræ, Deus Deorum, Rex Regum, & Dominus Dominantium: ego sum vermis & non homo, fæx hominum, & opprobrium mundi. Tu es summa bonitas, summa dulcedo, summa pulchritudo; tu es gloria sanctorum, thesaurus opulentissimus, vera lux, splendor clarissimus, fons vitæ, vita animarum nostrarum, lumen cæli, & claritas mundi. Ego sum abyssus tenebrosa, terra miserabilis, filius iræ, vas ignominie, conceptus in peccatis, natus in miserijs. Ego sum sterquilinum immundum, plenum fœtore & corruptione: infirmus, cæcus, claudus, surdus, & mutus: omnium re-
rum

rum bonarum vacuus, miseriarum verò plenus. Principium meū fuit peccatum, finis meus erit mors: quæ mihi stipendium peccati est.

O Domine mi, quid sum ego, nisi vmbra mortis, & vniuersa vanitas? puteus sordidus, terra sterilis, & maledicta, cuius fructus sunt spinæ, tribuli & confusio? Igitur, ô Domine, & Deus misericordiarum, propitius esto huic pauperri-
mæ animæ, quæ ex se nihil est, & ratione peccati plus quàm nihil: pelagus vanarum cupiditatum, fons peccatorum; pro quibus, si pro tua iustitia debite punirer, tot vtique supplicia, & tanta tormenta sustinere deberem, quanta est tuæ Maiestatis magnitudo. siquidem tanta est culpa, quanta est Maiestas offensa.

O Domine, quis ego sum, vt loqui tecum audeam, cum tu sis Deus ille magnus, verus, omnipotens, immensus, æternus, incomprehensibilis, & Angelicis etiam spiritibus admirabilis? Audi, ô Deus, clamores meos, vide lachrymas meas, intellige mea suspiria, & succurre. Illa quæ te mouit pietas vt me redimeres, etiam te moueat, vt me exaudias. Ne perdat mea malitia, quod in me creauit tua potentia. Quando non eram, tu me fecisti: cum erraui, tu me in viā rectam reduxisti: cum rudis eram & ignarus, tu me docuisti: quando cecidi, tu me subleuasti: quando stabam, tu me tenuisti: quando affligebar, tu me consolatus es:

quando

quando desperabam, tu mihi animum addidisti: quādo dormiebam, tu me custodijsti: quando eram infirmus, tu me sanasti: quando veniebam ad te, tu me recepisti. Omnia hæc tua sunt Domine, omnia hæc mihi fecisti gratis, nullo meo præcedente merito.

Quid igitur est quod à me habeo? quid habeo, quod non à te accepi? si autem acceperim, cur gloriabor? Qui enim de bono tuo gloriam sibi quærit, & non tibi, hic fur est & latro: similis Diabolo, qui tuam gloriam furari voluit. Quid superbiam ego cinis & pulvis? quid me extollam putredo & esca vermium? Sed & si quando mens inani gloria sollicitetur, oro te, ô æterne Deus, & pater humilium, largire mihi virtutum omnium parentem humilitatem: qua in conspectu Maiestatis tuæ vilis terræ vermiculus & cinis erubescam, & meiipsum vera cognitione vilescam, omnia tibi soli accepta feram; omnibus me facile lubensque subijciam, neque altè de meipso sentiam: sed vilis sim, abiectusque semper in oculis meis, & talis ab omnibus haberi cupiam.

O melliflue Domine mi, cognoscam me, cognoscam & te. Qui enim te bene cognoscit, etiam amat te: & qui amat te, contemnit se, & plus amat te, quàm se. Veni igitur ad me, ô fons dulcedinis, cibus animæ, & lumen intellectus mei. illumina cæcum hunc; sana ægrotum

hunc.

hunc, ciba famelicum hunc, visita capti-
uum hunc, tege nudum hunc; & seruum
hunc tot tyrannorum, quot passionibus
exagitatur, & quot peccata commisit,
tui sanguinis lytro redime: vt ab omni-
bus animi perturbationibus, & peccatis,
maximè autem à superbiæ atque inanis
gloriæ malo liberatus, tibi in omni hu-
militate, animique demissione famule-
tur hîc, & in perpetuum. Amen.

Pro timore Dei.

Svmme, inæstimabilis, metuende, &
terribilis Deus, remunerator omni-
um bonorum & malorum operum ius-
tissime, qui per vnigenitum filium tu-
um, Verbum verum & æternum admo-
nuisti nos, ne timeamus eos qui corpus
occidunt, animam autem non possunt
occidere: sed vt potius timeamus te, qui
potes & animā & corpus perdere in ge-
hennam. Fac Domine, vt anima mea te
timeat: non enim minùs dignus es ti-
more, quàm amore, cùm sis vti infinitè
misericors, ita etiam infinitè iustus: &
quemadmodum opera tuæ misericordiæ
sunt infinita, sic & opera iustitiæ tuæ
nec numerum habent, nec mensuram:
& quòd magis metuendū est, plura sunt
vasa iræ, quàm misericordiæ: cùm da-
mnandorum numerus sit infinitus, sal-
uandorum verò perexiguus.

Operare igitur in me Domine, vt ti-
meam te, propter magnitudinem tuæ

iusti-

Granatēf.
lib. 5 Me-
morialis.

Matth. 10.

iustitiæ, & propter iudiciorum tuorum profunditatem : propter celsitudinē tuæ Maieſtatis, & propter immenſitatem tuę magnitudinis : propter multitudinem meorum peccatorū, & ſuper omnia propter rebellionem, qua tuis ſanctiſſimis præceptis & inſpirationibus hætenus reluctatus ſum. Æquum enim omnino eſt, vt timeam in conſpectu illius, ante quem columnæ cæli, & vniuerſæ terræ ambitus contremiſcit.

Si igitur omnes creaturæ tam in cælo, quàm in terra te ſic metuant, & reuerſantur, tibi quæ obediunt; quid faciā ego miſerrimus peccator? quid faciam ego cinis & pulvis? Si Angeli tremant, cū te adorant, tibi quæ laudes canūt; cur non tremet cor meum, cū eidem vacat officio? Ah miſerum me, quomodo ſic induit cor meum, vt non infinitas profundat lachrymas, quoties ſeruus loquitur cum Domino, creatura cum Creatore, homo cum Deo? ille qui de terra formatus eſt, cū eo, qui omnia fecit de nihilo?

Pſal. 118.

Da Domine, vt inſcrutabilia iudicia tua in corde meo fixa ſint, propter hæc conſige timore carnes meas, vt ab ijs timeam ſemper. Iudicium tuū magnum fuit caſus totius generis humani, propter peccatum vnius. Iudicium tuum fuit magnum, cū vniuerſum terrarum orbem diluuiο extinxiſti. Magnum fuit iudicium tuum electio Iacob, & Eſau re-

pro-

probatio; Iudæ desperatio, & Pauli vocatio; Iudæorum reiectio, & Gentium assumptio. Super omnia verò metendum iudicium tuum est, tot nationes in superficie terræ habitare, quæ sedent in regione & vmbra mortis, atque in tenebris infidelitatis; de tenebris interioribus ad exteriores properantes, & de tribulationibus tēporalibus ad æterna tormenta progredientes. Propter hanc iudiciorum tuorum abyssum timebo te Domine, quia incertus sum an ne & ego de numero eorum sum, qui à te reprobati, & ab æterna salute exclusi sunt. Si enim iustus vix saluabitur, impius & peccator vbi parebunt? 1 Pet. 4.

Infinittæ sunt iniquitates meæ, peccata mea non habent numerum, & scio quòd hæc omnia mecum procedent in iudicium, & corā tribunali tuo mecum stabunt. Cùm enim in conspectu tuo ignis exardescet, & in circuitu tuo tempestas valida ingruet; cùm aduocabis cælum desuper, & terram discernere populum tuum, coram vniuersi mundi nationibus nudabuntur omnes iniquitates meæ; omnibus agminibus Angelorum patebunt scelera mea, non solum actum, sed etiam cogitationum, simulque locutionum. Tot iudicibus astabo, quot me præcesserunt in opere bono; tot arguentibus confundar, quot mihi præbuerunt bene viuendi exempla; tot cōincar testibus, quot me monuerūt pijs ser-

moni-

monibus, seque imitandos iustis dederunt actionibus. Domine mi, non suppetit quid dicam, non occurrit quid respondeam, nisi hoc solum : Non intres, Domine, in iudicium cum seruo tuo: quia non iustificabitur in conspectu tuo omnis uiuens : quem enim inuenies iustum, si remota pietate iudicaueris? Igitur prostratus ante pedes pietatis tuæ corde humili & contrito dicam cum Propheta; Domine ne in furore tuo arguas me, neque in ira tua corripias me &c. Sana me Domine, & sanabor : saluum me fac, & saluus ero : quia spes mea tu es, qui uiuis & regnas Deus per omnia secula seculorum. Amen.

Pro vera obedientia.

Petrus Michael in
Sertis suis.

Psal. 118.

Domine Deus, deprecatus sum faciem tuam in toto corde meo : misere mei secundum eloquium tuum. Cogitavi vias meas : & conuerti pedes meos in testimonia tua. Paratus sum, & non sum turbatus: ut custodiam mandata tua. In æternum non obliuiscar iustificationes tuas : quia in ipsis uiuificasti me. Tuus sum ego, saluum me fac, quoniam iustificationes tuas exquisiui.

Tibi enim meipsum, & omnia mea tempora, sensus, cogitationes dedico, meque totum tanquam holocaustum tibi offero. Non mea vnquam, sed tua in me & de me voluntas fiat. Certè si tu voles, facile mihi erit, non solum me præceptis

tuis

tuis subdere, verum etiam sacris inspira-
tionibus nihil penitus obluſtari; Neque
tantum Superioribus meis cæca, veloci,
humili voluntatis & iudicij obedientia,
verum etiam ad imitationem tui, qui te
obſequentē præbuiſti in grauiffimis tor-
mentis, dum ab impuriſſimis miniſtris
iſſus purpurā induere vel exuere, ſede-
re vel ſtare, caput, corpusq; ad colaphos,
alapas & flagella, vel clauos extendere,
crucem portare, mortis ſententiam ſuſ-
cipere, omne improprii genus morien-
do tolerare, libenter paruiſti: te inquam
in tantæ obedientiæ tuæ exemplo intu-
ens, in tolerandis aduerſis, vtpote mor-
bis, damnis, confuſione & contumelia, à
quocunque, ſiue meritò, ſiue immeritò
illatis; quin imò morte etiam, ſi ita vo-
les, ignominioſa ſubeūda tibi obediam,
nihil aliorum iudicia verbaque reueri-
tus à cœpto deſiſtam, aut contra te quic-
quam agam, dicens cum Propheta: Ego
tanquam iumentum factus ſum ante te,
ego autem ſemper tecum.

Pſal. 72.

Hæc mea eſt voluntas, hoc deſideri-
um, quod te dignum eſt, quodque tuæ in
me obedientiæ viſ & meditatio excitat.
Conſerua Deus meus, quod operatus es
in me. Orabo te Domine Ieſu cum Da-
uide, quem ob hanc virtutem virum ſe-
cundum cor tuum appellaviſti, orabo te,
inquam, & dicam: Vtinam dirigantur
viæ meæ ad cuſtodiendas iuſtificationes
tuas. Tunc non confundar, cum perſpe-

Pſal. 118.

xero

xero in omnibus mādatīs tuis. Confitebor tibi in directione cordis, in eo quòd didici iudicia iustitiæ tuæ. Iustificatio-
nes tuas custodiam, non me derelinquas
vsquequaque. Amen.

Pro mentis & corporis castitate,

Collector.

Domine Iesu Christe, fons puritatis,
& amator castitatis, qui pasceris in-
ter lilia: qui candidus es & rubicundus,
sponsus omnium castarum animarum,
scio quòd thesaurum incomparabilem,
quem in hoc fictili corporis mei vase
mihi concreditum circumfero, absque
singulari tua gratia illesum seruare non
possum: scio corpus meū esse templum
Spiritus sancti, quod contaminare sacri-
legium est. sed & scio quòd non possum
esse continens, nisi tu Deus dederis: cum
caro semper concupiscat aduersus spiri-
tum, & brutis suis voluptatibus egrè vult
defraudari.

Sap. 8.

Cum itaque, o purissime amator ho-
minum, castitas donum tuū sit, supplex
ad te venio, obsecrans te, vt extinguas in
me omnem flammam libidinis: cingas
lumbos meos zona castitatis, & vras
igni Spiritus sancti cor meum Domine,
vt tibi mundo corde placeam, & casto
corpore seruiam.

Tibi hodie & omni tempore purita-
tem corporis mei commendo, vt sub rua
custodia secura sit ab omni actu illicito,
siue is violentus sit, siue voluntarius:

neque

neque vlla vel locutione obscœna, vel cogitatione immunda polluat. Extol-
lentiam oculorum ne dederis mihi, ne
fortè mors per fenestras istas ad me in-
grediatur, & impudicus oculus impudi-
ci præcursor sit animi. Ne derelinquas
me in cogitatu immundo, & omne desi-
derium malum auerte à me. Aufer à me
ventris concupiscentias, & concubitus
concupiscentiæ ne apprehendant me, &
animæ infrunitæ atque irreuerenti ne
tradas me: sed desponde me tibi in iu-
stitia & iudicio, in pietate & miserationi-
bus: desponde me tibi in fide, vt verè
te cognoscam & diligam: coniunge me
corpori tuo insertum, vt tibi adglutina-
tus hauriam ex te succum vitæ, & sapi-
entiæ cælestis, quæ non habitat in cor-
pore peccatis subdito.

Nihil est carne nostra magis lubricū,
ô Domine; ad cogitationem vnā im-
puram, ad vnum verbum obscœnum, &
aspectum vnum impudicum concupi-
scentiæ stimulis exagitur, inardescit,
reluctatur spiritui, & illicita concupi-
scit: tolle quæso omnes huiusmodi oc-
casionēs, & præserua me, ne pudicitia
mea vnquam vel periclitetur, vel carnis
desiderijs succumbat. Amen.

Pro salutari morte.

O Domine Iesu Christe, fili Dei vi-
ui, per amarissimam illam angustia-
ni, quæ animā tuam inuasit, dum ora-

Granatēs.
in Appē-
dice 2 Me-
morialis.

bas in monte Oliueti ; perque tremorem
& pauorem illum, qui concusserunt sanctissimam carnem tuam, quando pre dolore dicebas ; Tristis est anima mea usque ad mortem : te oro, animo & spiritu humillimo, corpore quoque in terram prostrato, ut in vltima hora transitus mei, quando in extrema angustia timor & tremor occupabunt cor & intellectum meum, succurras mihi, & des in tristi illa agonia, viteque & mortis duello robur & fiduciam tue misericordie.

O suauissime Domine, & Magister mi, noli me illa hora, & in summo illo periculo derelinquere: sed sicut Pater tuus misit tibi Angelum de celo, qui te consolabatur ; ita tu Domine mitte mihi Angelum sanctum tuum, qui mihi assistat in illa hora : qui me confirmet, ac robur mihi subministret, contra omnes impugnationes inimici : qui que in omnibus mihi auxilietur. Ne patiaris Domine, ut consilium & tentationes maligni praeualeant contra nos, aut eius tentationes nos superent ; aut ut ille falsis suis persuasionibus nos seducat, & decipiat.

Arma & corrobora cor nostrum virtute tue patientie, ut nec aduersitas, nec dolor quantumuis magnus nos ad impatientiam impellat : sed in omnibus & per omnia sit anima nostra subiecta & conformis tue diuine voluntati, tam in infirmitate, quam in sanitate ; tam in ad-

uer-

uerſitate; quàm in proſperitate, tam in morte, quàm in vita: quemadmodum & tu Domine volūtatem tuam naturalem poſtpoſuiſti voluntati Patris tui, dicens; Non mea, ſed tua voluntas fiat. Non flagito Domine, vt mortem mihi tribuas dulcem, non vt dolores exiguos, non morbum oro facilem. Omnia hæc tuæ committo pietati, vt diſponas hæc non ſecundum deſiderium meum, ſed ſecundum vtilitatem & neceſſitatem ſalutis meæ. Gratia quam à te petimus, hæceſt, vt in omni afflictione nobis detur robur & fortitudo talis, quæ nulla in re ſuccumbat; ſed inuiſta maneat, & inexpugnabilis, vſque ad vitæ terminum: vt ex ſocietate, quam in hac vita tecum habemus per gratiã, mereamur hinc tranſmigrando venire ad illam, quam tecum habent Sancti in gloria. Amen.

CAPVT XV,
EAS CONTINENS ORATIONES,
QVIBVS BONA
temporalia à Deo ex-
petimus.

Pro pace impetranda.



Onipotens ſempiternæ Deus, Pater miſericors, largitor pacis, & amator charitatis, qui in tantum pacem nobis commendaviſti per filium tu-

Ioannes
Ferus.

Matth. 5.

um Dominum nostrum Iesum Christum, vti solos pacificos filios tuos vocare dignareris: da omnibus quibuscunque causis discordantibus, nobisque tuis filiis veram cum tua voluntate concordiam, quam mundus dare nequit: tu enim solus, qui pugnas pro nobis; vt seposita hostium formidine, tibi in tua protectione hinc seruiamus, & in futuro seculo tecum in sempiterna pace viuamus.

Additio.

Psal. 141.

Benefac Domine terris, vrbibus & cunctis oppidis, atque locis, in quibus verbum tuum habitat, & sincerè docetur: cōforta seras portarum nostrarum, & benedic filiis tuis in eis: pone fines & terminos nostros pacem, & adipe frumenti satia nos. Æterne Deus, qui nos vocasti in pace, da vt cum omnibus hominibus pacem habeamus, quantum in nobis est: Mitiga corda nostra, vt omnes obliuiscamur iniurias, atque alij alijs in multis rebus mutuam demus veniam, ne vlciscentes nos, & offensas nostras, tollamus vitæ tranquillitatem.

Reprime Domine Satanam turbatorem piæ concordie, & Christianæ pacis, qui circumeundo per omnes regiones in terris diffeminat litium & bellorum occasiones. Custodi nos à bello & cæde, dissipa gentes quæ bella volunt. Infringe atque impedi omne malum consilium, & volūtatē eorum, qui nihil meditantur, nec fitiunt aliud, quàm vt sanguinem profundant. Exaudi nos Deus

pacis,

pacis, & largire, vt pax tua exuperans omnem intellectum humanū custodiat corda nostra, & sensus nostros in Christo Iesu, Dño nostro, qui tecum viuit & regnat per omnia secula seculorū. Amē.

Vt vitæ nobis det Deus necessaria.

VTique Domine Deus meus, Pater meus, tu corpus meum, animā meam, facultates meas mihi contulisti, ego de manibus tuis quicquid illud est, quod esse & possidere videor, suscepi. Tu Ecclesiæ tuæ etiam promissiones de rebus corporalibus tradidisti; ideo ad te clamamus filij tui, vt des nobis panem quotidianum, & quidquid pertinet ad corporālē sustentationem. Mendicitatem prohibe à me, ne egestate compulsus fuer, & periurem nomen Dei mei: neve murmurando contra tuam volūtatē, & meam sortem, aut inuidendo ditioribus fortunam eorum meliorem, offendam te, & mandata tua transgrediar. Diuitias quoque ne dederis mihi, ne captus & immersus terrenarum opum desiderio insatiabili, neve inhians turpi lucro, obliuiscar regni tui, & excusē me non posse venire ad cœnā magnā & cælestē, ad quam omnes vocati sumus per Euangelium; ne denique satiatu illicitar ad negandū, & dicam; Quis est Deus meus?

Tribue tantū victui meo necessaria: da victum & amictum, da animum

Collector.

Prou. 30.

Luc. 14.

Deut. 28.

Luc. 9.

his contentum. In te enim fiducia mea, in te spes mea: conquiesco planè in te: scio quòd non derelinques me. Tibi omnia mea, vxorem, liberos, domesticos commendo, ad tua præsidia confugio. Benedic Domine operibus manuum nostrarum, benedic agris & ædibus nostris: emitte benedictionem tuam super horrea & cellas nostras. Manda virtuti tuæ, & benedic promptuarijs & omnibus reliquijs nostris. Da alme Deus, vt in nomine tuo laxemus rete nostrum, operaque vocationis nostrę sedulò & diligenter faciamus, cum inuocatione auxilij tui, & fauore tuo prosperos habeamus successus in hoc seculo, & in futuro vitam æternam. Amen.

Pro sanitate corporis.

Lodouic.
Viues.

VEra atque vnica est salus, id valere in nobis, quod nostri est pars potissima, tuiq; Domine simillima. Hoc est, fieri eam, quoad eius perfici queat, cultu atque amore vicinam coniunctamque tibi, qui solus es salus nostra. Sed ea ipsa mens, quatenus corpori est annexa, sentit illius affectiones, & in eis commouetur. Pharmaca & medicinæ omnes ex iussu tuo ac nutu prosunt, superflua atque inania futura, nisi tu annueris, & illorum, & naturæ vniuersæ opifex.

Voluntas tua vnica autor est vitæ ac mortis, valetudinis prosperę & aduersæ, quam tu sæpe immittis nobis, propter

casti-

castigandum & cohibendum corpus hoc, effundens se in libidinem omnium proiectissimam, veluti belluam immanem & effrenem, quod viribus & felici habitudine obliuione nos obruit veræ salutis. Da Pater vt rectè valeamus corpore, quo integra & sana sit mens in corpore sano. Aut si bene esse corpori non est è re nostra, tribue saltem fortem animum; præbe vires ac robur, vt morbum possimus tolerare; ne corporis dolor atque infirmitas in ipsam mentem redundet. Amen.

Pro bona fama.

Collector.

HÆ sunt artes Satanæ accusatoris fratrum nostrorum, ô iustissime iudex, & innocentium patrone, Domine Deus, vt cum nos palam ad malitiam inducere non potest, ad insidias antiquas se conuertat: famam scilicet nostram denigrare, & bonum nomen nostrum traducere quouis modo studeat; vt talibus iniurijs, & pessimarum linguarum petulantia ad iram commoueamur, & indignas calumnias impatienter feramus. Ne in hanc igitur tentationem incidamus te oro, piissime Domine Iesu; vt qui calumnias & blasphemias Iudæorū perferendo didicisti compati infirmitatibus nostris, etiam tentatus in hoc; nomen meum & integram famam meam custodire digneris, cum nihil pretiosius possideam nomine bono, quod melius est di-

Eccles 7.

uitijs multis, & vnguenta pretiosissima quæque superat.

Hoc autem insigne decus boni nominis habere non possum, sine tuo auxilio: cum nomen bonum oriatur ex vita bona & inculcata. Te igitur inuoco, miissime Domine, vitæ integritatem & sanctimoniam mihi concede, ad tuum honorem, & proximi correctionem. Verum quia etiam innocentia & probitas à venenatis & falsis linguis non semper est tuta, sed interdum vulneratur ab ijs, qui dicunt; Linguam nostram magnificabimus, labia nostra à nobis sunt, quis noster Deus est? fit sæpe vt dum inter amicos versari nos arbitramur, cum Propheeta tuo in medio scorpionum habitemus. Ideo supplico tibi, pie defensor innocentium, disperde vniuersa labia dolosa, & linguam magniloquam. Sepulchrum enim patens est guttur eorum, nil nisi foetidos odores exhalans, & linguis suis agunt dolosè: iudica illos Deus, quoniam venenum aspidum sub labijs eorum est, Dentes eorum arma & sagittæ, & lingua eorum gladius acutus. Eripe me de inimicis meis, & à calumniantibus me libera me: libera me de laqueo venantium, & à verbo aspero. Libera, inquam, Domine, animam meam à labijs dolosis, & peruersis, à lingua fallaci defende me.

Si verò sic tibi placeat, ô benignissime Iesu, vt per tales linguas ad pietatem

exer

Ezech. 2.

Psal. 17.

Psal. 5.

Psal. 13.

Psal. 56.

Psal. 90.

Psal. 119.

exercear, da mihi, vt cum S. Paulo in bonitate perseuerare possim, quicquid tandem de me sentiant & loquantur inuidi: siue honore me afficiant, siue ignominia, siue malos, siue bonos rumores de me spargant. Amen.

In sumptione antidoti.

Deus infirmitatis humanæ singulare præsidium, qui benedictionis tuæ gratiam ægris infundendo corporibus, facturam tuam multiplici pietate custodis: ad inuocationem nominis tui benignus assiste, vt per hoc medicamētum omnis de meo corpore pellatur humor pestifer; quatenus clarescentibus meis sensibus in tuo seruitio valeam mundus persistere: Per Christum Dominum nostrum. Amen.

Ex libello cui titulus Hymni & Collectæ.

In diminutione sanguinis.

Mediator Dei & hominū Deus homo. Iesu Christe, qui ne æternæ mortis deputaremur supplicio, tui sacri sanguinis nos redemisti precio: præsta, vt per hanc diminutionē sanguinis proveniat mihi salus corporis; omnes mei clarescant sensus, totiusque in me frigeat prauæ voluptatis luxus; per te Saluator mundi, qui venturus es iudicare viuos & mortuos, & seculum per ignem. Amen.

Ibidem.

Tempore diuturnæ siccitatis.

Collector.
Deut. 11.

Misericors & pie Deus, qui in præc-
tis tuis ambulatibus promissisti da-
turum te pluuiam temporaneam & se-
rotinam, vt colligant frumentum, & vi-
num, & oleum, fœnumque in agris ad
pascenda iumenta, vt comedant ipsi, &
saturentur. Vides sitiētes agros nostros,
vides arentes herbas & segetes ardore so-
lis amburi. In hortis, & agris, & pascuis
languent omnia, & quasi intermoriun-
tur: quia cælum desuper nobis factum
est quasi æneum, nec ros, nec pluuiæ de-
scendit in terram nostram. Non quia tu
vanus es in promissionibus tuis, sed quia
istæ non pertinent ad nos, qui peccau-
mus, iniquitatem fecimus, & declinaui-
mus à mandatis tuis. Ideo stillauit super
nos maledictio & detestatio, quæ scripta
est in libro Moysei serui tui.

Deut. 12.

Pius tamen es, & misericors Domine,
nec repellis orationes eorum, qui ex to-
to corde clamant ad te. Procidentes igitur
ad genua diuinę Maiestatis tuę, obse-
cramus te, auertatur ira tua, & furor tuus
à nobis, & à loco isto: ne secundum pec-
cata nostra multa & magna facias no-
bis, sed secundum misericordiam tuam,
quæ superat omnia opera tua. Aperi cæ-
los tuos, & terram nostram, quam vide-
mus tabescentem, cælestibus aquis per-
funde, & irriga eam beneficijs gratiæ
sempiternæ. Aërem redde temperatum,
pluuias lenes, rores benignos, fructuum
magnam vim: vt annus plenam nobis
omni-

omnium rerum copiam suppeditet, ac totius anni curriculo fructus nobis abundant: quò præsentibus subsidijs sufficienter adiuti, sempiterna expeditiùs & alacriùs appetamus, & consequamur, per misericordiã vnigeniti filij tui, cum quo benedictus es nunc, & semper, & in secula seculorum. Amen.

Pro frugibus terra.

OMnipotens, benignissimeque Domine Deus, aperi obsecro tuam infinitæ misericordiæ manum; eleua oculos tuæ munificæ prouidentia, & reple orbem terræ benedictione, quò creaturarum tuarum necessitati prospectum sit. Corona annum benignitatis tue, vt terra optatos populo tuo proferat fructus.

Petrus Michaelis in
Sertis suis.

Conserua & custodi, quod iam natum est, à grandine, & quauis alia tempestate, aërisque omni nociua intemperie. Ante omnia verò te oro, vti nobis eam des mentem, vt timeamus, & recte colamus te: ne indigni simus, in quos beneficia tua conferantur: sed nos in conspectu tuo filios obsequentes præbeamus, quibus panis mensæ tuæ debetur, qui que tibi ob beneficia accepta honorem & debitum obsequium impartiri semper sollicitè curent, atque omnibus, quæ largitus fueris, ad tuam gloriam & salutem suam vtantur. Amen.

CAPVT XVI.
 PRECATIONES PIAE
 QVIBVS FRATRIBVS NOSTRIS
 & proximis fausta omnia,
 feliciâque prece-
 mur.

Pro Ecclesia Catholica.

Collector.



Matth. 28.

Celectis, omnipotens & mi-
 sericors Deus, qui Ecclesiam
 sanctam, quæ est congrega-
 tio hominû per vniuersum
 terrarum orbem dispersa, &
 in vnitæte veræ fidei collecta, Vnigeni-
 to filio tuo desponsasti tunc, cùm illam
 amarissima sua morte in Cruce redime-
 ret, ita vt ille nunc Ecclesiæ non tantùm
 sponsus sit, sed & caput : qui antequam
 ad cælos reuerteretur, promisit se cum ea
 futurum vsque ad consummationem se-
 culi. Nos illius membra rogamus te sup-
 plices, vt digneris clementissimos ocu-
 los tuos in nos conuertere, & omnes in-
 firmitates nostras à nobis auferre; quæ
 sanè quàm plurimæ sunt; vt per fidem
 in nobis operantem liquidò constare
 queat, cuius patris filij, & cuius præce-
 ptoris discipuli sumus.

Ante omnia verò deprecamur te, vt
 protegas & conserues nauiculam Petri
 in medio maris impetuosæ, inter omni-
 um turbinum procellas, & terribiles in-
 undati-

undationes fluctuantem, ne demersa intereat. Ouile tuum defende ab impetu luporum, ne maceriam perfodiant, & ingressi oues tuas, quæ numero paucae sunt, prosternant, iugulent, ac deuorent. Expectamus quotidie, & sperauimus hactenus, quod vnum facies ouile, sicut vnus est pastor. sed ô Domine, videmus quotidie numerum tuarum ouium minui, multas perire, & ouile magis magisque coarctari. Multiplicati sunt lupi, & nusquam non ferox aper inuenitur, qui execrabili sua & maledicta hæresi, doctrinaque tot seculis aut non audita, aut penitus damnata vineam tuam, quam maximis laboribus ex Ægypto transfulisti, exterminare atque depascere gestiunt. sed tu Domine excita potentiam tuam, & ostende te nostrum esse Deum: custodi eos, super quos nomen tuum inuocatum est, & qui in nomine filij tui congregati sunt.

Psal. 79.

Memento cælestis Pater, tibi post Christi filij tui humanitatem nihil charius esse Ecclesia; ne finas igitur, vt propter nostras transgressiones hæc tua in nos charitas extinguatur, aut nos secundum merita nostra in corruptam fidem incidamus. Oro te Domine, pro me, & pro omnibus qui sub alis Ecclesiæ matris nostræ adhuc latitant; ne nos vnquam patiaris ab eius vnitatem deuiare; custodi nos ab illis, qui Petri, ceterorumque Apostolorum ac Patrum Ecclesiæ

doctrinam euertere, & in eius locum Calvinum, Lutherum, Mennonem, aliosque eius farinae pseudoprophetas suos substituere conantur.

Pfal. 73.

Exurge Domine, & vide, quàm multæ innocentes animæ pereunt, nescientes quid faciunt : quæ in nomine tuo baptizatae sunt, & tamen ad hanc cæcitatem peruenerunt. Quousque, benignissime Pater, videbis templum tuum demoliri? sanctuarium tuum igni accendi? pollui tabernaculum nominis tui? portionem tuam desiderabilem dari in desertum solitudinis; & tacebis? Quamdiu cernes sanctissima tua Sacramenta, ad nostram sanctificationem instituta, conculcari? iuge illud sacrificium Misse contemni, & impugnari? corpus & sanguinem dilectissimi filij tui, verum animarum nostrarum alimentum, prophanis manibus attrectari, ne dicam pedibus proteri? Hæccine videbis adhuc diutius & filebis? Cur, Domine, pateris hæc, ut fiant? An peccata mea hæc meruerunt? Meruere sanè hæc, & mea, & totius populi peccata : ideoque non immerito horrore concutimur : nam si ea in hoc seculo tanta cæcitate plectantur, quid fiet in futuro, si in hac ingratitude, cordisque duritia perseueremus?

Tolle igitur à nobis Domine, tolle causas ad hanc iracundiam te prouocantes : ostende nobis faciem tuam; oria-
tur nobis sol gratiæ & misericordiæ

tua;

tuæ; crescat fides nostra sanctissima; extende regni tui pomœria, dilatetur Ecclesia, exerat palmites suos ad mare, & vsque ad flumē propagines suas. Infringe potentiam hostium tuorum, qui immani odio cum suis satellitibus grassantur, & conspiratione facta debacchantur aduersus Ecclesiam tuam, vt ea faciant stabula luporum, & latronum antra perniciosissima.

Conserua nos, vt maneamus in sancta, Catholica & Apostolica Ecclesia, collecta ex membris multarum gentium; sed coniunctis tibi in eadem confessione. Sanctifica nos spiritu tuo, vt peccatis nostris remissis deinceps in nouitate vitæ ambulemus; vt tandem ex hac Ecclesia militante, ad illam triumphantem sine vilo offendiculo transmigremus. Amen.

Alia pro Ecclesia breuior.

O Amicissime nostri Christe, ô sponse, cui est vnicè chara tua Ecclesia, quiq̃ue pollicitus es, te illi nunquam defuturum; auge eam, & fac lætissimam bona sobole, patris simillima, nēpe tui: fac nos omnes idē & de te sentire, & in te, vt simus verè vnum corpus illud, cui tu es caput, conglutinati & compacti charitate mutua de tuo illo perpetuo igne accensa. qui ita nos amasti, vt sanguinem & vitam tuam pro nobis impenderes.

Lodouic.
Viues.

O Chri-

O Christe, auctor & suator charitatis, pacis, beneuolentiæ, emolli durissima nostra pectora, & planè ferrea: calefac corda nostra glacie cōcreta, & durata, vt mutuò bene cupiamus, quo agnoscant omnes discipulos tuos esse nos, & iam nunc incipiamus vitam illam cælestē exprimere, in qua nulla est dissensio, nullum odium; sed pax & amor omnium inter nos. Amen.

PRO ECCLESIA,

Cum ab hæreticis bello & falsis doctrinis exagitur.

Clerus
Coloni-
ensis, quo
tempore
Truchse-
sius Eccle-
siam per-
sequeba-
tur.

OMnipotens & misericors Deus, creator & moderator cæli & terræ, quem nihil latet eorum, quæ nobis miseris Christianis in hac lachrymarum valle eueniūt: qui etsi iustè propter peccata & iniquitates populi tui irasceris, & permissione horrendi furoris, & persecutionis impiorum grauitè tentari, contristari, & ad tempus lædi pateris: Nihilominus tamen pro paterna tua pietate, & prouidentia, in æquissima ira multoties promissæ misericordiæ citò soles recordari, simulac populus & filij tui, ô benignissime Pater, cordibus confritis ante thronum gratiæ tuæ se humiliant, & spiritu tribulato, firmaque fiducia, per Iesum Christum dilectissimum filium tuum, suum verò fidelem seruatorem & redemptorem, tanquam propitiationem pro peccatis suis, & per quem

solum

solum tibi placuit reconciliare, & restituere, quod perditum, atque dirutū fuerat, pro gratia & remissione grauissimi debiti, miserè gemunt & obtestantur, seque auxilio gratiæ tuæ ad omnē emendationem ac obedientiam promptos offerunt; firmiter confidentes, te esse Patrem misericordiarum & Deum totius consolationis, qui non vis mortem peccatorum, sed magis vt conuertantur & viuant, clamasque per filium tuum dilectissimum; Venite ad me, qui laboratis & onerati estis, & ego reficiam vos.

Matth. II.

Respice propterea, ô clementissime Deus Pater, Deus Filius, & Deus Spiritus sanctus, vnus verus Deus, & æternum bonum; O vnicum Christianismi tui afflictissimi perfugiū, respice te obtestamur oculis tuæ infinitæ misericordiæ hunc pusillum Catholicum gregē, quem multis hætenus in periculis conseruasti. Illumina tenebras cordium nostrorum, in omnium hominum ordinibus, vt vnanimis, communiq̃ doloris sensu peccata & iniquitates nostras, tanquā causam omnis miseriæ & calamitatis, humiliter agnoscamus, vera cordis contritione confiteamur, & dignis pœnitentiæ fructibus castigantes, per sacramēta, gratiæ tuæ instrumenta, in sanguine Iesu agni innocentissimi, pro nobis cæleluamus, & expiemus; nosque tibi, ô fidelissime & fortissime liberator, oblationem sanctam, viuam, beneplacentem &

per-

perfectam offeramus ac consecremus :
 quæ tibi in conspectu & æstimatione
 pretiosissimi sanguinis, passionis &
 mortis filij tui sic accepta sit, vt coram
 te in gratiam accepti, & forti brachio
 tuo, quo sæpius populum tuum è mani-
 bus inimicorum tuorum fortiter erui-
 sti, contra inimicorum nostrorum iram
 & rabidum furorem defensi atque pro-
 tecti maneamus.

Respice de summo Maieſtatis tuæ
 throno, ô Domine Exercituum, in iram
 & insolentiam Aduersariorum nostro-
 rum, & vide, quàm temerè veritatem &
 illustrationem tuam in impuris & abo-
 minanda hypocrisi contaminatis cordi-
 bus, studijs, machinationibus suis iacti-
 tent. Sacramenta profanent, verbum tu-
 um adulterent, thesaurum sanctissimæ
 carnis & sanguinis tui, quem fidelibus
 tuis singulare præsidium & solatium te-
 ſtamento legasti, negent & propulſent.
 Catholicam & Apostolicam Ecclesiam,
 sponsam tuam & saluificā religionem
 conuicijs proſcindant, calumniētur, &
 mendacibus criminationibus insecten-
 tur. Nobisquē ideo, quòd ab accepta fide-
 liter à patribus religione, quam tot ſan-
 ctorum Martyrum corporibus fundasti
 & conſtitutus es, recedere, & nos in ſo-
 cietatem impij & iniqui studij & cona-
 tus illorum adiungere nolimus, omnis
 generis clades, per ſeditiones, rapinas,
 cædes, & incendia minentur & inferre

conentur. O Domine & fortis saluator, qui odisti & citò præcipitas turgidos & inflatos spiritus, & nequaquam aspernaris humiles pauperum tuorum preces & obsecrationes, conuerte ad te corda eorum, vt agnoscant impios suos conatus & deserant. Imple facies eorum ignominia, vt nomen tuū, quod per excæcationem & subuersionem cordium suorum in nobis Catholicis persequuntur, quærant & inueniant. Infatua & in nihilum cōuerte eorum consilia, confunde eorum studia, vt in veritate experiantur te populi tui qui se ad te conuertit, iuxta promissiones tuas obliuisci, & hostibus eorum parcere nequaquam velle. Largire quæsumus Ecclesiastico Magistratui, Pontifici Romano, Archiepiscopis & Episcopis omnibus veram doctrinam & pietatem. Da Regibus & Principibus ad communem pacem Ecclesiæ, & sacri Romani Imperij conciliandam, felicem successum & victoriam, contra inimicos tuos & suos. Da illi & alijs magistratibus & huius ciuitatis Moderatoribus & Senatui lætitiā salutaris tui, & confirma eos spiritu principali veræ sapientiæ & fortitudinis, per quem in omnibus constituent & promoucant, quod ad tuum beneplacitum & communem pacem & vtilitatem profuerit. Da etiam Ciuibus nostris & Inquilinis, ad conseruationem & defensionem peruectæ & venerandæ fidei, in te cor im-

per-

perterritum & inuictum, Magistratibus suis obedientissimū, inter se mutuò pacis & concordiae studiosissimum, miseris & afflictis foris consolationem & patientiam, nobis & singulis nouum spiritum cum firmo proposito & bona voluntate in omnem obedientiam & pietatem paratissima, quo in presentis belli periculis fidelissimum auxilium ad gloriam nominis tui reipsa experientes, & à timore inimicorum nostrorum liberati, in sanctitate & iustitia te laudemus, tibi gratias agamus, atque debitum obsequium præstemus.

Exaudi ergo, ô spes & consolatio afflictorum, hos gemitus & preces nostras, per Iesum Christum Dominum & Redemptorem, perque intercessionem gloriosissimæ matris illius, atque omnium Sanctorum, eorum præcipuè, quorū preciosa morte & fortitudine hanc Prouinciam & Ciuitatem bene hactenus ornatam & communitam esse voluisti, qui tecum in perpetua pace, ad quam omnes post huius vitæ ærumnas aspiramus, uiuunt & regnant. Amen.

Pro omni Ecclesie statu.

Ioannes
Ferus.

O Domine Deus, cuius misericordia magna est, cuius gratia superabundans est, cuius dilectio immensa est, humiliter te obsecramus, misericordiam, gratiam & charitatem tuam omnibus Ecclesiæ tuæ Præsulibus ostende propitius,

tius, vt officio, quod te tradente veluti per manus acceperunt, dignè incūbant, in seipfos & gregem attendant, pascere Ecclesiam tuam, quam filius tuus proprio sibi vindicauit sanguine. Sint inculpatæ vitæ in sancta conuersatione, propter sempiternum illum animarum nostrarum Episcopum.

Sed & pro omnibus Pastoribus, & Christianæ Ecclesiæ presbyteris interpellamus, vt gregi Christi spontaneè, non coactè præsent, pro quo cum apparuerit pastorum princeps immarcescibilem accipient gloriæ coronam. In Apostolicis statutis veluti claro speculo se contemplantur, agnoscant & emendent.

Pro Romano Imperatore etiam, ô Pater clementissime, precamur te, pro Regibus & omnibus Magistratibus, vt ad senectam vsque perueniant curuam: perfunde in illos gratiæ tuæ benedictionem, Sapientiam illis largire & scientiam, vt per te regnent, populumque tuum paterna gubernent sollicitudine. Admone illos tu, vt erudiri & doceri patiantur se, vtque diuinæ legis volumen ipsi in manibus habeant, legantque semper, & ex eo tibi deuoti seruiant. Ne timorem tuum illis subtrahas, quo pacem inter se mutuam conseruent, & foueant, populumque tuum iuste iudicent, & omnibus ex æquo sine personarum respectu iustitiam administrent, scientes & se

Do-

Dominum in cælis habere.

Conserua populum tuum in obedientia fidei, vt omnem potestatem reuerantur, & venerentur, ipsique quod suum est tribuant in humilitate: quoniam ministra illa tua est. Sed & pro omnibus in genere tuam precamur misericordiam. Confirma debiles, sana ægrotos, cura infirmos, adiuua derelictos, honorifica contemptos, miserere pertinacium, illumina inimicos nostros, dimitte persequentibus nos, benefac mala facientibus nobis, vt te donante errata sua tandem agnoscant.

Pauperibus necessaria administra, peregrinos recrea, captiuos visita, pupillos & viduas vindica, lætifica mœstos, conuerte delinquentes, confirma iustos, custodi progredientes, pascere fideles operarios, succurre in partu laborantibus, adsis morientibus, consilia pia approba, benedic terram, bella compesce, diaboli pessunda malitiam. Angelos tuos de cælo mitte sanctos, qui nos in aduersis tueantur, ab omni malo custodiant, infernalis illius draconis assiduò oppugnent tyrannidem, vt securi persistamus ab illius potentia: præcedant nos semper, vt in tua protectione, quæ bona sunt perficiamus, quæ mala omittamus, per Iesum Christum Dominum & redemptorem nostrum. Amen.

Pro summo Pontifice Romano.

Domi-

Domine Iesu Christe, Pontifex eterne, qui per proprium sanguinē introijsti semel in sancta, æterna redemptione inuenta, quique in cælum vnde descenderas ascensurus Apostolo Petro, eiusque successoribus Romanis Pontificibus, Agnos tuos pascere præcepisti, regni cælestis claues tradidisti, eosque Vicarios tuos in terris constituisti, ne visibilis Ecclesiæ corpus, visibili capite in rebus dubijs & aduersis carere videretur. Quæsumus clementiam tuam, vt hunc famulum tuum N. Pontificem Maximum, pastorem & Rectorem nostrum, ab omni aduersitate & periculo tam animæ, quàm corporis, quàm diutissimè serues incolumem: vt Ecclesiam tuam in hac regnorum omniū ruina, & postremæ ætatis calamitatibus grauissimis, atque in tot peruersorum dogmatum atque hæresium confusionibus piè ac sapienter regat, & tueatur.

Collector.
Heb. 9.

Ioan. 20.
Matth. 16.

Illumina mentem eius vera verbi tui agnitione, vt salutaria nos doceat, & oues suas pascat sanæ atque incorruptæ doctrinæ pabulo. Suggere illi consilia optima, sapientiam, industriam, fortitudinem animi: vt hæreses omnes, & peruersa dogmata tollat è medio, ne posteritati vlla errandi relinquatur occasio: quò sic ab omnibus Regibus & Principibus Christianis, veris Ecclesiæ tuæ nutritijs, suspiciatur, diligatur, & à virulentis hostium blasphemijs, violentisque

impu-

impugnationibus in sua functione defendatur: vt in animorum concordia, & vnitate fidei tibi **Christe** seruiamus; **Qui** viuus & regnas Deus, per omnia secula seculorum. Amen.

Pro Episcopo & Pastore.

Collector.

Deus fidelium omnium pastor & rector, qui hunc famulum tuum N. ad functionem muneris Apostolici, vt regeret Ecclesiam hanc, quam acquisisti sanguine tuo, vocare dignatus es; te supplicibus ac deuotis suspirijs oramus; da illi spiritum tuum rectorem linguæ illius, vt potens sit exhortari in doctrina sana, & eos qui contradicunt arguere.

1 Cor. 9.

Da vt verbo tuo dignè ambulet; sit exemplum populo suo, ne dum alios docet, ipse reprobis inueniatur. Attendat sibi & gregi vniuerso; ambulet in conspectu tuo in veritate, & iustitia, & recto corde. sit sine crimine, sit hospitalis, benignus, sobrius, iustus, sanctus & continens: fac eum vigilantem & solertem, vt audacter ab ouili suo depellat lupos rapaces, qui dilacerant & dispergunt gregem tuum, vt possit conuincere pseudo-prophetas redarguendo, & confutando hæreses eorum.

Tit. 1.

Luc. 12.

Tribue illi os & prudentiam, cui nemo potest resistere, & contradicere. Eos qui manifestè peccant coram omnibus arguat, sine respectu personarum; vt & ceteri timorem habeant, & auertantur

à vijs pessimis: si quis autem præoccupatus fuerit aliquo delicto, huiusmodi spiritu mansuetudinis obiarget, ne qua anima ex ouibus suis pereat: sed ad vitam vnà cum vniuerso grege sibi concredito perueniat sempiternam. Amen.

Pro Cesare Romano.

Memento Domine pijsissimi & fidelissimi Imperatoris, quem decreuisti regnare super terram. Da ei arma veritatis, arma bonæ voluntatis: corona eum, obumbra caput eius in die belli, confirma brachium eius. Exalta dexteram eius, corrobora imperium eius, subditas illi fac omnes Barbaras nationes, quæ bella volunt: Tribue illi profundam & inablatam pacem; loquere in cor eius bona pro Ecclesia tua, & omni populo tuo, vt in tranquillitate eius tranquillam, pacificamque vitam peragamus, in omni pietate & venerabilitate. Amen.

Ex Missa
Basilij
Magni.

Pro Rege Catholico.

Dominator Domine, Rex cæli & terræ, cuius est magnificentia, & potentia, & gloria atque victoria, & tibi laus: cuncta enim quæ in cælo sunt, & in terra, tua sunt; tuū Domine regnum, & tu es super omnes principes. Cor Regis in manu tua est, & tu quocunque volueris inclinabis illud. Cum itaq; multum intersit qualem habeamus princi-

Collector.

1 Par. 29.

Prou. 21.

Eecli 10.

Psal. 17.

2 Reg. 7.

pem, (Rex enim insipiens perdit populum, & ciuitates inhabitantur per sensum prudentium) te supplices rogamus Domine, rege mentem & voluntatem Principis nostri, vt seruiat tibi Deo omnipotenti in timore, & exultet in tremore: apprehendat disciplinam veram; & religionem catholicā aduersus omnes nostri temporis hæreticos tueatur: sit verus Ecclesiæ tuæ nutricius, Persequatur inimicos & tuos & suos: comprehendat illos, & non conuertatur donec deficient. Stabiliatur Domine regnum eius, & thronus eius sit firmus iugiter. Largire illi sapientiam & intellectum agendi, quæ tibi grata sunt, quæque ad incrementum Reipub. faciunt, & omitendi his contraria. Defende eum contra omnes ocores & æmulos, qui clām aut palām vitæ & dignitati eius insidiantur, vt afferat eius imperium pacem populo, & in omni loco vigeat iustitia: iudicet afflictos populi, & saluos faciat filios pauperum, ne quādo irascaris Domine, & transferas regnum hoc in gentem alteram.

Similiter tibi supplico, ô Rex Regum & Domine Dominantium, pro inclyta coniuge Regis nostri, proque prole regia & omnibus hæredibus eius, vt eos diutissimè superstites & incolumes conserues, illisque benefacias, & fortunes eos in successione dominij, & regiminis, vt felices sint, & beati: fruantur bona vale-

leta-

letudine, & pace; floreat vera Religione, opibus, auctoritate, omniumque rerum prosperitate, & post hanc vitam miseram & caducā ad te in illud æternum regnum tuum perueniant, vbi tu viuis & regnas Deus, per omnia secula seculorum. Amen.

*Pro omni Magistratu tam Ecclesiastico
quàm civili.*

Misericors Deus, cælestis Pater, in cuius manu est omnis terrena potestas & magistratus, per te constitutus, ad suppliciū malorum, & defensionem bonorum: in cuius potenti dextera sita sunt omnia iura & leges imperiorum; Te supplices corde deuoto oramus, pro Magistratu nostro Ecclesiastico, & seculari, vnā cum ijs, qui sunt vtrique dignitati à consilijs, & qui Rempub. administrant; vt gladium tam spiritualē, quàm secularem, ipsis per te commissum, in sincera & vera fide & timore Dei recte gerant, eoque pro tua voluntate & iussu vtantur. Obumbret ipsos virtus & sapientia altissimi. Illuminet & conseruet eos in amore Dei ipsa diuina gratia.

Da illis, ô Domine, sapientiam & intellectum, concede pacatam gubernationem, vt omnes subditos in veritate fidei, dilectione, & iustitia, quæ tibi cordi est, regant, & dicto audientes cōseruent. Proroga ipsis dies vitæ suæ, & annos multos largire, vt prospera & laudata ipso-

Ioannes
Fabri.

rum functione nomen tuū sanctificetur,
& laudetur in omne æuū. Amen.

Pro subditis omnibus Christianis.

Petrus Mi-
chael in
Sertis su-
is.

Miseri cordissime Redēptor, & Deus
pacis, exaudi preces meas, & per in-
finitā misericordiam tuā largire omni-
bus Christianis subditis, vt spontē & li-
benter in omnibus ijs, quæ tibi non ad-
uersantur, Magistratibus suis morem ge-
rant; eos syncerē ament, & honore pro-
sequantur; de illis vt par est sentiant, ac
loquantur, & tribuant, quæ illis debent:
vt in bona pace & tranquillitate ab om-
nibus tibi seruiatur, per quem reges re-
gnant, & legillatores iusta decernunt:
Rom. 13. quiq; per Apostolum tuū dixisti; Qui
potestati resistit, Dei ordinationi resistit:
qui autem Dei ordinationi resistunt, ipsi
sibi damnationem acquirunt.

Tuere, ô Deus pacis & dilectiōis, sub-
ditos omnes ab impœnitentiæ & obdu-
rationis grauiſſimo peccato, ab Hæresi-
bus & perditionis Sectis, quibus trāsuer-
sum actis sub falso Euangelij & verbi tui
prætextu, inobedientia & manifesta re-
bellio ad cōmunem perniciem inducun-
tur. Exaudi etiam, ô Pater misericordia-
rum, & Deus totius consolationis, exau-
di, inquam, oppressorum & protritōrum
gemitus: adauge illis patientiam, & tan-
dem aliquando de manibus inimico-
rum & oppressorum suorum eos erue,
ad laudem magni nominis tui, quod sit
benedictum in æternum. Amen.

Pro

Pro parentibus & consanguineis.

Domine Deus, qui secundum te patrem & matrem honorare, pro eorum incolumi vita & fortunis, ut equum est, orare strictè præcepisti: da parentibus nostris, omnibusque domesticis & consanguineis nostris salutem & pacem. Conserua eos in fidei tue pietate; custodi eos ab omni corporis, animæque incommodo: largire gratiam, ne vnquam in vlllo te offendant: sed propitium te semper patrem & Deum experiantur. Amen.

Ioannes
Ferus.

Pro fidelibus coniugibus.

Benignissime Deus meus, cuius dulcedinis & misericordiæ non est numerus, concede quæso omnibus Christianis coniugibus, quos coniungere, & gratia tua sacramentali benedicere ad populi tui propagationem dignatus es, uti vocationem suam tanquam tuam ordinationem agnoscant, ornent, & exequantur: vero amore, fideque se diligant, sicut Christus dilexit Ecclesiam, & ab ea merito impensius diligetur. Da, ut tanquam sanctorum filij, quos in sanctificationem vocasti, in omni modestia & vitæ sanctimonia vnanimes cohabitent, & cum liberis suis, quos donasti, vel donaturus es, temporali & æterna benedictione tua cumulentur. Amen.

Petrus Mi-
chaelis in
Sertis.

Pro muliere pregnante.

Iuste Domine Deus, qui propter primæ mulieris piaculum communem omnibus fœminis seueram & inuita-

Ioannes
Ferus.

bilem maledictionem denūciasti, & im-
posuisti: nēpe in peccato originali con-
ciperent, grauidæ multis & magnis cru-
ciatibus subiacerent, & tandem cum vi-
tæ periculo parerent: mitiga quæso pro
tua immensa bonitate, proque inexhau-
sta misericordia tua huius legis edictū:
quiescat paululum ira tua, & foeminam
hanc N. partum enitentē tuæ gratiæ sinu
foue; adiuua eam, vt sine periculo vitæ
dolorem superare, prolē corpore elegan-
tem, anima nobilem iusto tempore va-
leat parere; quo post oblita angustię gau-
dio miserationis tuæ gratiā celebret, te-
que benedicat in secula seculorū. Amen.

*Pro Christiana inuentute, vt rectē
instituitur.*

Ex libello
cui titulus
Hymni &
Collectę

DEus, cuius Vnigenitus post assum-
ptam carnem à matre triduo perdi-
tus, in templo inter Iudæorum Scribas
inuentus est, suæque absentię rationem
prudenti responso cum obedientia red-
didit: da, vt non solum ipsi tuo verbo,
tuęque doctrinę adhareamus, verum etiā
liberos nostros, quos de tua munificētiā
habemus, ad nominis tui gloriam, ad ti-
morem, ad disciplinam, ad virtutem, ad
obedientiam educemus, vt probitate vi-
tæ, & pietate fidei crescant: tu benepla-
citur, nos gaudium sine incommodo
habeamus, teque per omnem vitam no-
stram celebrare valeamus.

Additio
generalis

Non pro nostris tantū liberis te, Do-
mine, deprecor, sed & pro vniuersa Chri-
stiana

stiana iuuentute. Custodi eam, ne corrupta doctrina & falsis inficiatur opinio-
nibus: da vt in tui & veræ Religionis,
qua colendus es, cognitione bene forme-
tur, & proficiat; iugumque tuū ab ado-
lescentia libenter portare addiscat. Præ-
serua piam & simplicem iuuentutem a
cōmercio malo, & sodalitia turpi, quod
instar contagij & fermenti subigit ac pe-
netrat totam massam. A crapula & ebbri-
etate, à vagis libidinibus, ab otio inerti
omnium vitiorū materia, & nutrimen-
to iuueniles animos auerte.

Dona omnibus pueris & scholasticis
bonitatem ingēnij, capacitatem mentis,
firmitatem memoriæ, vt admittant, re-
tineantq; vtilia, & quæ animabus suis &
Rebus pub. quibus nati sunt, conducunt:
vt exculi necessaria scientia & industria
omnes in vtilēs Ecclesiæ tuæ ciues eua-
dant, ad gloriam nominis sancti tui, &
salutem animarum suarum. Amen.

Pro amico.

Cælestis Pater, æterne Deus, cū ipsa
me dudum experientia docuerit, in
quantis angustijs, & in quot periculis
hanc vitam trahimus, ex humana & fra-
terna sympathia tibi, ô Deus, pro charis-
simo amico meo N. supplico, cuius salu-
tem anxie desidero; vt eum posthac in
tuam suscipias tutelam, eum custodias,
& diuinę prouidentię oculos in eū con-
ijcias, haud aliter, quàm pia mater in fi-
lium, quem tenerrimè diligit.

ter pro
omni iu-
uentute.

Ex manu
scripto
Belgico
versa.

Ne patiare, Domine, vt secundū carnem ambulet, sed secundum spiritum : nec ab huius mundi contagio inficiatur, sed dulcedinē spiritus tui gustet, omniaque secundum hunc iudicet : nullū maius existimans detrimētum, quā à tua charitate diuelli : nec aliquod lucrū optimius, quā adhærere tibi, etiam si ob id ipsum tribulatio, angustia, iniuria, infirmitas ; imò mors ipsa esset perferenda. Confirma illum, Domine, in sanctis cogitationibus ; largire illi fidē ardentem, cumque ad opera bona facienda compelle. Perfice dona quę in eo cœpisti ; delicta verò & crimina, in quæ prolapsus est, aufer ab eo : vt cor eius acceptum tibi fiat habitaculum.

Tribue illi victui necessaria, ne aliena rapiat, aut concupiscat : ne imposturis quæstum faciat ; sed sua potius non habenti largiatur. Adesto illi in omni periculo, & esto turris fortitudinis, aduersus inimicos eius, vt in uocatione sua tibi pacificè & tranquillè seruiat. Vbi verò appropinquauerit dies, in qua cum ex hac misera vita euocare decreueris, ne recedas ab eo : sed ex angustijs huius ergastuli educ animam eius in celestem illam beatitudinem, vbi tu, mi Pater, viuis & regnas in secula seculorum. Amen.

Pro benefactoribus.

Collector

ALtissime Deus, retributor omnium bonorum, cui potestas & misericordia, cui omnis displicet ingratitude ; te

oro,

oro, da mihi animum gratum, & beneficiorum acceptorum memorem, ne oblitus meritorum mihi, vel à te, vel ab hominibus exhibitorum, in turpe & abominandum crimen ingratitudinis incurram. Concede, Domine, vt pro facultatum mearum modulo accepta beneficia recompensem, & non verbis tantum, sed & re ipsa gratus sim.

Quòd si qui sint, quorum in me beneficia maiora sunt, quàm vt quæ rependere, pro his oro te, Domine: benefac illis hîc, & in resurrectione iustorû. Redde retributionem his, qui me genuerunt, educarunt, instituerunt, & promouerunt: omnibusque alijs, qui bene de me meriti sunt: qui in me contulerunt opera misericordiæ, & officia humanitatis. Hos omnes tibi precibus meis commendo, oro & obtestor te, vt ipsi, & eorum familiæ benedicantur: omnia quæcunque faciunt prosperentur, ab omnibus aduersis, cum animæ, tum corporis præseruentur. Si de hoc mundo transierint, non præualeat illis Aduersarius, sed recipi ad te in vitam æternam mereantur: sin adhuc superstites sint, tuæ misericordiæ fauore, tuæque protectione sic vitam instituant, vt post mortem misericorditer à te bona recipiant æterna. Per Christum Dominum nostrum. Amen..

Pro fratribus in calamitate positis.

Vitam hanc singulis penè momētis experimur calamitatibus refertam,

Ludouic.
Viues.

quæ vnicuique vel ex carne peccati pul-
lulant, vel ex malitia sua, aut aliena. In
hoc quoque indulge nobis Pater indul-
gentissime, ne ad res nostras tristes ex a-
micorum aduersis accedat tristitia. Exi-
me illos è calamitate, vt & ipsis quietio-
ribus cogitare de te vacet, & nos munere
tuo non parua sollicitudinis leuemur
parte.

Quòd si hoc vel illis non expedit, vel
nobis, (nam quid cuique expediat tu no-
sti solus) at certè da illis vires in animo,
firmitatem in corpore, quo res duras &
graues facilius valeant perferre: ne cor-
pore sint impares, dolori, neu animus
succumbat egritudini: vnde vel per im-
patientiam, vel per desperationē aliquid
faciant, dicant, cogitent parum tibi gra-
tum, ipsisque pestiferum. Amen.

Pro Captiuis.

Petrus Mi-
chael in
Sertis fu-
is.

Clemētissime Deus, qui audis gemi-
tus compeditorū, & soluis filios in-
teremptorum, miserere obsecro per ca-
ptiuitatem amantissimi filij tui omni-
um Christianorū, qui apud Turcas aut
Gentiles, Hereticos vel Schismaticos ca-
ptiui tenentur. Refoue eos in vinculis,
& acerba afflictione, cælesti tuo solatio,
ne aliquando pusillanimes reddantur,
& in infidelitatem, impietatemque acer-
bitate tribulationum deiecti, tempora-
libus calamitatibus & ternam damnatio-
nem adijciant. Adiuua illos Domine co-
modo, quo nosti ad eorū conferre salutē.

Miseri

Misericordissime Saluator mūdi, qui captiuis prædicari facis redemptionem, vinctis libertatem, & præcepisti prædicari & annunciari populo tuo annū placabilem, & diem salutis; largire nobis, vt de perpetuis carceribus & infernalibus vinculis liberati, ea deinceps libertate fruamur, qua liberaſti nos; neque patiaris, vt ad ſeruile peccati & diaboli iugum reuertamur, & tandem æternæ damnationi obnoxij reddamur. Amen.

Pro Viduis & Orphanis.

Domine Deus, Pater viduarum & orphanorum, auxiliator in tempore opportuno omnium afflictorum & conſolationis egentium; Concede omnibus Chriſtianis viduis, vt ſperent in te Deum viuum, atque ad te tanquam ad fidelem patrem in aduerſis rebus confugiāt, mandata tua obſeruent, vacent bonis operibus, à voluptatibus & ſcādalis abſtineant, quò aſſiduè paternā tuam erga ſe prouidentiam largiūſ experiantur.

Idem ibidem.

Largire etiam, vt Orphani fideiū in tuo timore & omni modestia educantur, debitaque cum obedientia educatoribus ſuis obſecundent; in omni temperantia & pietate creſcant, fidei admonitioni, conſilio bono, & diſciplinæ paternæ obtemperent, quò à vitijs & criminibus, opprobrio & exitio immunes exiſtant, & tandem ad vitam æternam perueniant. Amen.

Pro inimicis & ijs qui nobis mala volunt.

Ludouic.
Viues.

MAnsuetissime & clemētissime Pater, qui nihil odisti corū quæ creasti, qui sustines & suffers hominum delicta, dissimulans ea propter pœnitentiam, etiam atque etiam te precamur supplices, vt inimicis nostris ea largiaris plena manu, quæ scis illis profutura. In primis verò sanam atque integrā mentem, qua noscant te, & quærant vera charitate, ac toto pectore: nos autem filios tuos diligant tua causa, ne illos odium nostri lædat, neque nos quodammodo nocumento illis simus, qui nequam & imbecilles adiumento esse non possumus. Ne perdas illos Pater propter odiū nostri, sed serua propter preces nostras.

Emendationem illorū cupimus, Domine, non vltionem: ne separet illos à nobis supplicio, sed coniunge & coaduna clementia. Et quandoquidem nos omnes vni ciuitati æternæ destinamur ciues, iam hīc per amorem mutuū incipiamus eam ingredi viam, quæ rectā nos illuc, sine vllis ambagibus, adducit. Per Christum Dominum nostrum. Amen.

Pro iter agentibus.

Ex libello
cui titulus
Hymni &
Collectę.

DEus, qui ad vitam ducis, & cōfidentes in te paterna protectione custodis, quæsumus Domine, vt præsētibz famulis tuis à nobis egredientibus Angelicum tribuas comitatum, vt tuo auxilio protecti, nulla mala concutiantur formidine, nullo comprimantur aduersitatis rigore, nullis irruentis inimici

mole-

molestentur insidijs: sed spatio necessa-
rij itineris prospero gressu peracto, pro-
prijs locis feliciter restituti, vniuersos re-
periant sospites, ac debitas exoluant tuo
nomini grates; Per Dominum nostrum
Iesum Christum filium tuū, qui tecum
viuit & regnat in secula seculorū. Amē.

Pro peccatoribus.

Clementissime Domine, qui Vnige-
nitum filium tuum in hunc mun-
dum misisti, vt peccatores saluos face-
ret, errātem ouem quæreretur, atque mun-
daret sibi populum acceptabilem, secta-
torem bonorum operum. Ecce refrixit
charitas, & abundauit iniquitas. Populus
tuus sicut aquam bibit iniquitatem, o-
mnes declinauerūt, & inutiles facti sunt,
non est qui faciat bonum, non est vsque
ad vnum. Hinc ira tua exardescit, hinc
fames & pestis, hinc gladius deuorat ple-
bem tuam, & calamitates instar diluuij
obruunt nos.

At tu Domine, qui non vis mortem
peccatoris, sed vt conuertatur & viuat,
miserere, miserere: parce populo tuo, quē
pretioso sanguine tuo redemisti. Da que-
so illis gratiam tuā, vt illuminata men-
te tandem perueniant ad agnitionem
peccatorum suorum, & conterriti for-
mident iram tuam, & æternas pœnas, vt
resipiscant à Diaboli laqueo, capti ab eo
ad ipsius voluntatem. Aufer contuma-
ciam & duritiem cordis eorum: da eis
cor nouum, & spiritum nouum: aufer

Collector.
Ioan. 3.

Matt. 24.
Iob 15.
Psal. 13.

Ezech. 18.

Ezech. 11.

Tit. 2.

cor lapideum, & da carneum, spiritum-
que tuum pone in visceribus eorum : vt
abnegantes omnem impietatem, & secu-
laria desideria, sobrie, pie, & iuste viuant
in hoc seculo; expectantes beatam spem,
& aduentum gloriæ magni Dei, & Sal-
uatoris nostri Iesu Christi, qui tecum
viuit & regnat in secula seculorū. Amen.

*Pro Infidelibus, Schismaticis, &
Hereticis.*

Petrus Mi-
chael in
Sextis.

Domine Iesu Christe, vera mundi
lux, illumina quæsumus omnium
hominum mentes, qui tenebris obscu-
raturum intellectum habentes, procū ab-
errant à via veritatis; vtpote Iudeorum,
& prophanarum gentium, quæ neque
Patrem, neque te, quem misit, filiū agnō-
scunt, sed in cæcitate mentium suarum
quotidie blasphemant; tum etiā eorum,
qui licet tibi nomen dederint, in omnis
generis nihilominus Sectas & errores
tanquam dispersæ oues aberrant, & in
prædam lupo palam rapaci cedunt, vel
saltem occultè in vno aut altero sacræ
Religionis tuæ articulo superbum intel-
lectum suum captiuare nolunt in obse-
quium sanctissimæ fidei tuæ, & obedi-
entiæ Sponsæ tuæ, quæ est Ecclesia Ca-
tholica, colūna & firmamentū veritatis.

Benignissime Pastor, amator & quæ-
sitor omnium errantium ouium, quære
obsecro largitione tuæ gratiæ, & per se-
dulam Ministrorū Ecclesiæ curam, quod

perijt,

perijt, reduc quod aberrauit, sana quod infirmum est, alliga quod cōtritum est; aperi cæcorum oculos, & surdorum aures, vt videant & audiant tam ea, ad quæ tendunt exitia, quàm ad quæ eos vocas salutis compendia; solue linguam mutorum, quò te nobiscum vno ore rectè profitentes atque colentes, communem nobiscum, & omnibus Sanctis tuis, salutem consequantur. Amen.

Pro Ethnico ad fidem veniente, vel Hæretico ad Ecclesiam reuertente.

Deus magne, magnique nominis, qui Doris tui verbo priores tenebras illuminasti, qui vnigenitum filium tuum in mundum misisti, vt esset propitiatio pro peccatis nostris: qui sedes super Cherubin, quem glorificant Seraphin, cui omne genu flectitur cælestium, terrestrium & inferorum, quem omnis terra Regem seculorum confitetur, qui ouem errantem in Seruatoris nostri Iesu Christi ouile reduxisti, qui conuertis peccatores à via ipsorum: ipsum hunc quoque seruum tuum à tenebris aduersarijs ad lumen æternum conuerte. Reuoca ipsum ab errore Diaboli, ad diuinitatis vnigeniti filij tui Iesu Christi cognitionem. Confirma cor eius in fide & dilectione Christi tui: Partem & hæreditatem ei largire in Ecclesia tua. Aufer ab illo veterem illum errorem, eumque imple ea fide & charitate, quæ est in te. Da ei, vt

Nicetas
in thesau-
ro ortho-
doxiæ.

in

in cunctis præceptis tuis ambulet, & quæ tibi complacita sunt obseruet. Scribito eum in libro vitæ tuæ, & vnito eū cum ouili hæreditatis tuæ. Tu enim es Deus noster, & vnigenitus filius tuus, & Spiritus sanctissimus nunc & semper in secula. Amen.

Pro vno & pluribus infirmis.

Ioannes
Ferus.

Esa. 38.

OMnipotens & misericors Deus, in cuius manu mors & vita sunt; qui mortificas & viuificas, qui quondā Ezechix petenti rer quinos vitæ annos donasti, tuā de morte eius reuocans sententiam; per vnigenitū filium tuum te oro, atque obtestor, famulo tuo N. grauitè in infirmitate decumbenti, pristinx sanitati propitiatus restitue, vt deinceps in emendata vita tibi per omnia placeat.

Additio
generalis.

Sed & memor charitatis Domine, nō pro hoc tantū infirmo te deprecor, sed & pro omnibus ægrotantibus, vbicunque terrarum decumbentibus: succurre illis, & præsertim his, qui in agone mortis suæ cum multis & varijs luctantur tentationibus. Da illis gratiam, vt agnoscant ægritudines non esse fortuitas, sed à te Deo nostro illis paternè immitti, vt reuoces eos ad pœnitentiam, aut in officio contineas. Consolare, consolare illos, Domine, in lucta conscientix, affulgeat eis spes viua de tua misericordia: tolle ab illis languores, aut saltem mitiga dolores eorum. Restitue eos in pristinam sanitatem, & medere languoribus

eorum,

corum, pro tua diuina voluntate, ad salutem ipsorum.

Quibus autem pro tuo beneplacito expedit, vt moriantur, hos tuo Spiritu sancto confirma, ne vacillet in ijs fides, ne titubet spes, ne refrigescat charitas, ne terrore mortis deiiciatur humana infirmitas. Abbreuiata tormenta eorum, & posteaquam mors occupauerit oculos corporis, mentis tamen à te non deflestantur: cumque linguæ vsum ademerit, cor tamen instanter ad te clamet; In manus tuas Domine commendo spiritum meum: & sic placide in te obdormiscant, tristitiaque eorum vertatur in gaudium nunquam auferendū. Amen.

CAPVT XVII,
CONTINENS ORATIONES
PARTICVLARIVM
Personarum.

Oratio Pastoris.



Lementissime Domine Iesu
Christe, Pontifex æterne, qui
me indignum famulum tuum,
ignorantem egressum &
introitum meum, ad functionem
muneris Apostolici vocare dignatus es,
vt oues huius ouilis salutaripabulo
doctrinæ pascere, & Ecclesiæ huic,
quam pretioso tuo sanguine redemisti,
in his quæ ad te sunt præessem,

Collector.

horreo.

horreo, & toto corpore contremisco, quoties considero, quis ego sim, & quid requirat onus, quod infirmis humeris meis incumbit. Qui enim pro vna & sola mea animula rationem reddere non possum, pro toto hoc grege quomodo reddam? Quid ego infelix, quomodo me vertam, si tantum thesaurum, si pretiosum depositum illud, quod tibi sanguine proprio pretiosius iudicasti, contingat me negligentius custodire? Si stillantem in Cruce sanguinem tuum collegissem, essetque repositus penes me in vase vitreo, quod portare sæpius oporteret, quid animi habiturus essem in tanto discrimine? at certè seruandum accepi à te Domine, pro quo tu mercator non insipiens, imò ipsa Patris sapientia sanguinem illum dedisti, idque in vasis fictilibus, & quouis vitro fragilioribus. Impares sunt sanè humeri mei tanto ponderi, si meas vires respiciam: impeditioris & tardioris linguæ sum, nescio loqui, puer sum, & regi, quàm regere, magis idoneus.

Obsecro igitur te Principē Pastorum, & Archiepiscopum nostrū, qui nullum vocare soles ad aliquod munus obeundum, cui non etiam largiri consueuisti dotes eas, quibus ornatus & instructus dignè perficere potest, ad quod vocatus est: me etiam inutile instrumentum tuum reforma, & vocatione mea me dignum præpara. Da seruo tuo cor docile, vt voluntatem tuam annunciet populo

tuo:

tuo: Da illi amplecti eum, qui secundum doctrinam est sermonem fidelem, ut potens sit exhortari in doctrina sana, & eos qui contradicunt arguere. Verbum veritatis ne auferas ab ore meo, & da mihi gratiam, ut feruēti spiritu eloquar illud, ne aures tantum feriat, sed cor penetret, & fructum optatissimum adferat. Renoua vitam meam, & mores meos in melius commuta: ne dum alijs prædicom, ipse reprobis inueniar.

Tit. 2.

1 Cor. 9.

☞ Tolle à me superbiam, iracundiam, vinolentiam, & turpis lucri cupiditatem. Largire hospitalitatem, benignitatem, sobrietatem, iustitiam, sanctitatem & continentiam; ne ulli hominum impura vita mea scandalum præbeam, aut blasphemandi verbum tuum occasionem offeram. Concede mihi spiritum, quo subditos meos in visceribus meis diligam, nec aliter tractem, quam mater vnicum, quem habet, filium tractare solet: nemo infirmetur, cum quo ego non infirmus: nemo scandalizetur, & ego non yrar. Iuua me Domine, ut quod infirmum est consolidem, quod ægrotum sanem, quod confractum alligem, quod abiectum reducā, quod perierat queram. Quos concredidisti mihi custodiam, & unus ex eis non pereat. Sanctifica eos in veritate, o sanctificator hominum benignissime, atque illos ab omnibus inimicis & aduersitatibus corporis & animæ custodi. Sic mihi obtemperent, sic me

Ezech. 34.

dili-

diligant, vt sit rationabile obsequiū eorum, & vias Christiano dignas ambulet: vt ego & verbo & exemplis eos precedendo, & illi me sequendo pariter curamus ad te verum animarū nostrarum pastorem, qui nos in loco pascuæ pinguiſſimæ collocabis, vbi viuis & regnas Deus per omnia ſecula ſeculorū. Amen.

Oratio Confessarij.

Nicolaus
Gallerius
in Euang.
explican-
dorū ra-
tione.

Domine Deus omnipotens propitius esto mihi peccatori, vt dignè possim tibi gratias agere, qui me indignū, propter magnam tuam misericordiam, ministrum fecisti officij sacerdotalis, & me exiguum, humilemque constituisti ad orandum, & intercedendū ad Dominum nostrum Iesum Christum filium tuum, pro peccatoribus, & ad pœnitentiam reuertentibus.

Ideoque Dominator Deus, qui omnes homines vis saluos fieri, & ad agnitionem veritatis venire: qui non vis mortem peccatorum, sed vt conuertantur & viuant, suscipe orationem meam, quam fundo pro famulis & famulabus tuis, qui ad pœnitentiam veniunt, vt des illis spiritum cōpunctionis, resipiscant à Diaboli laqueis, quibus astricti tenentur, vt ad te per dignā satisfactionē reuertantur.

Additio.

Sed & mihi Domine indigno famulo tuo adesto, fidelium tuorum confessiones audituro, vt potestate ligandi & soluendi, mihi à te in consolationem & instructionem Ecclesiæ tuæ tradita, ritè

& sine

& sine animæ meæ detrimento fungi possim. da mihi spiritum consilij & intellectûs, spiritum scientiæ & discretionis, vt populum tuû iudicare, inter bonum & malum, inter lepram & non lepram, inter peccatum & non peccatum, rectè queam discernere, & tanquam expertus medicus singulis infirmitatibus conuenientia adhibere pharmaca. Qui viuus & regnas Deus per omnia secula seculorum. Amen.

*Oratio in Magistratu constitui &
Iudicis.*

OMnipotens æterne Deus, qui omnia verbo tuo fecisti, tua sapientia constituisi hominem, vt dominaretur creaturæ à te factæ, & disponat orbem terrarum in æquitate & iustitia, & in directione cordis iudicium iudicet: quique ad terrorem malis, & ad pacem bonis instituisi potestatem, ordinasti gladium: Tu fidis ministris tuis bene Rempub. administrantibus ingentes retributiones promissisti; pauperum contra oppressoribus, suauæ auxilium pro officij ratione denegantibus, iram tuam, seueritatem, iudiciumque denunciaisti.

Agnosce, ô mi Domine, agnosce & vide quàm timendis periculis pro officij mei cōditione vndique implicitus sim. Scio enim, Domine, non esse mihi dominium, sed seruitutē & officium. Scio non bruta mihi, meæque commissa fi-

Ioannes
Ferus.

dei,

Zach. 2.

dei, sed filios selectissimos, illosque tibi charitatis vinculo iunctos, vt pro ipsis temet mortis tradere supplicio non dubitares. Scio Domine, quòd quicumque pueros tuos iniuria affecerit, oculi tui pupillam tangit. Exaudis illos scio in quacunque tribulatione clamantes ad te. Concede mihi, ô Domine, ita præsum officio meo, vt omnis accusandi me apud tuum tribunal illis auferatur occasio. Quis enim ego sum mi Deus, qui tanto satisfaciam officio? Homo cum sim imperfectus & æger, falli & errare mihi facile, in nullam declinare partiũ propè impossibile mihi est: adhæc populus tuus plurimus est, semper & in omni loco præstò esse quĩ possum? Ea propter te, ô Domine Deus, supplex precor, da mihi sedium tuarum assuetudinem sapientiam, & noli me reprobare à pueris tuis, quoniam homo infirmus exigui temporis ego, & minor ad intellectum iudicij & legum. Sit licet consummatus quis inter filios hominum, si tamen illi sapientia tua abfuerit, nihili æstimabitur.

Sap. 9.

Tu ergo, ô Domine, mitte sapiẽtiam illam tuam de cœlis sanctis tuis, & à sede magnitudinis tuæ, vt mecum sit, & mecum laboret: vt intelligam & sciã quid acceptum sit apud te. sic tibi accepta erũt opera mea, sic disponam populum tuum iustè, sic tandem dignus meo habebor officio. Infunde cordi meo timorem tuum, ô Domine, ne quid in gratiam, vel

ali-

alicuius faciam odium : sed vt secundum veritatem & iustitiam feram sententiam. Illumina cor meum & intellectum meum tuo verbo, ô Domine, vt placeat mihi quidquid coram te iustum, displiceat quicquid iniquum. Mentem largire Deus amantem eorum, quæ tibi placent ; aspernantē quæ tu minus probaueris. Spiritum tuum infunde mihi, ô Domine Deus meus, qui in omni verbo regat me, in omni opere ducat me : vt iustē administrans pueris tuis tibi placeam, & tandem coram tuo tribunali lætus, gaudensque compaream. Amen.

Oratio cuiuscunque Subditi.

Orationes subditi pro Cæsare, Rege, Principe, & Magistratu, inuenies Lector capite decimo sexto. Quibus subiiciatur subsequens additio.

Domine Deus, supplex etiam te oro, vt omnibus Subditis des spiritū obsequentē, & cor in omnibus, quæ tibi nō aduersantur, promptē & alacriter obediendi, Magistratū honorandi, iuuandi atque amādi : dandi quod illis competit, seque ab omni seditione & conspiratione nefaria separādi. Diligant commune bonum magis quā in propriū, teque tanquam auctorem & consummatorem salutis nostræ in omnibus inuocēt, vt sub bono Magistratuum regimine in omni pace & tranquillitate, ad gloriam tui sancti nominis, vitam agamus, & in o-

Petrus Michaelis in Sertis suis.

mini pietate & modestia tibi laudes & gratiarum actiones referamus. Amen.

Oratio Consiliarij vel Senatoris.

Idem ibi-
dem.

Prou. 4.

Eccles 2.

L Argire mihi, Domine Iesu Christe, Spiritū consilij & fortitudinis, quē super te requieturū Propheta vaticinatus est, cuius etiā inter alia nomina, quę tibi tributa sunt, illud commemoratur, quōd sis Cōsiliarius. Et quis melior te, qui ipsa Dei Patris es increata Sapiētia, quā nihil latere, quæq; nec fallere, nec falli potest? Da mihi, vt, quod Salomō docet, dum ad consultationē vocor, oculi mei recta videāt, & palpebræ meæ præcedant gressus meos: quando tantum differt sapiens à stulto, quantū distat lux à tenebris; & sapiētes oculi in capite ipsius, dum ratione & consilio velut oculis quibuscūq; vtitur, qui facienda omnia prius prouideant, quàm in opus prodeant: dum stultus in tenebris ambulat, & ratione sopita velut oculis captus, non iudicio & ratione, sed turbulentis affectibus more pecudum ducitur. At tu Deus meus, illuminatio mea, illumina tenebras meas, vt clarē videam, quid ad tuam gloriam, & Reipublicæ salutem consulam Amen.

Oratio Coniugis.

Collector

O Mnipotens & misericors Pater, author & institutor Matrimonij, quō status hic carni est propinquior, eò plura in illo se offerunt pericula, & occurrunt offendicula. Ideo te supplex oro, per dilectum

ctum filium tuum Iesum Christum, Dominum nostrum, ita vt nos in timore & amore tui contineas, ne aut te offendamus, aut tui planè obliuiscamur. Circuncide, ô Domine, cor & carnem nostram, ne velut impuri & impij, in desiderijs & voluptatibus carnis demersî, quæ spiritûs sunt negligamus : sed vt, iuxta Apostoli tui consilium, ex consensu ad tēpus abstineamus, vt vacemus orationi, & iterū cum timore tui, in idipsum reuertentes, prolem sanctam & tibi placitam generemus. Si quid hactenus à nobis peccatum sit, ignosce precor, ô clementissime Pater, & conserua nos, ne te post hac in aliqua re iterum offendamus.

I Cor. 7.

Spiritus sancte Deus, qui amorē conjugalem plantas & conseruas in pectoribus nostris, te rogo, vt suffles & exuscites fomité castæ dilectionis inter nos cōiuges, vt qui sic copulati sumus, sola quòd mors potest nos separare, diligamus inuicem amore forti & inextinguibili, discreto tamen, & qui limites pietatis non excedat : ne amor tui in nobis aut minuat, aut extinguatur : sed vt diligentes nos mutuò in te, & per te similitudinem Christi & sponsæ illius Ecclesiæ sanctæ referamus.

Da mihi Domine Deus prudentiā, vt cum ratione cōhabitē vxori meæ, sciens illi imbecillitatē animi quasi congenitā esse, quam ob rē multę mihi ineptię sunt

ferendæ, multa mihi tædia deuoranda, si in ea affectuum imbecillitatem videro. Sit vxor mihi adiutorium vtile & iucundum, sine perfidia & dolo, vt in ea confidere possit cor meum, illaque tribuat mihi bonum & non malum: sit solatium animi mei, operetur manibus suis fufum, & paret cibaria familiæ meæ.

Profliga Satanā, huius ordinis tui infensissimum hostē, ne serat inter nos discordias & contentiones. Amputa omnium dissidiorū & suspicionū occasiones, vt in vera coniunctione animorū viuamus: & tu, qui Deus pacis es, in medio nostrū habites. Da vt alacri animo inter nos feramus abundantiam & penuriam, diuitias & paupertatem, dolorem & voluptatem, aduersitatem & prosperitatem, morbum & sanitatem, idque sine murmure. Da vt cuius est præesse, alterā non contemnat; & cuius est subesse, alteri non dominetur.

Largire Domine, vt coniugium nostrū non sit sterile, sed fœcundū: & liberos nostros educemus in agnitione & timore nominis tui, ne vel molliori educatione & conuiuētia, vel illiberali asperitate, aut malo parentum exemplo deteriores reddantur: sed vt moderata tractatione, & bona nostra conuersatione contineātur in timore ingenuo, augeaturque in eis obsequendi studium & alacritas. Concede nobis, vt simul laboran-

tes,

tes, quæ ad vitam sustentandam necessaria sunt, honestè quæramus, quæ sita non dilapidemus: sed inde piè, & cum honestate viuamus, vt moderatam, laudabilemque vitam coram te & vniuerso mundo ducamus. Amen.

Oratio Patrisfamilias.

Ioannes
Ferus.

QUum omnibus ex quo proximi fui ratione habere, res & fortunas prouehere, incommoda verò omnia propellere mandas, quid velis, Pater, intelligo: nempe id magis decere patremfamilias in domesticos suos, tum è diuerso domesticos in patremfamilias doces. Agnosco officium, sed ad regendos, quos meæ tutelæ commisisti, vxorem, liberos, seruos, ancillas, ceterosque domesticos, in me facultatem non inuenio, nec iudicium.

Ad te ergo summum Patremfamilias confugio, ad te inquam cæli terræque Rectorem supplex gratiam petitem venio. Da pater & rector, vt mihi commissos domesticos in tuo timore, in tua disciplina conseruem: tum quæ corporibus, animabusque ipsorum comoditati, quæ honori sunt & emolumento ipsis tuear: sine iracundia & amarulentia vindicem. Illi porrò è contrario officia sua cum timore & obedientia, non ad oculum seruientes, beneuolè in cordis simplicitate, tanquam coram te Deo, nō homine præstent; quo tādē vtrique laboris merces

reddatur in cælis. Amen.

Oratio Pueri seu Filij.

Collector.

Exod. 10.

Leuit. 20.

OMnipotens æterne Deus, cui omnis obedientia liberorum in parentes placet, omnisque rebellio displicet: qui in lege tua nos parentes honorare præcepisti, mandatum hoc quasi duplici muro muniens, præmio scilicet atque pœna, dum morigero atque obedienti filio vitæ diuturnitatem promittis; immorigero verò atque rebelli maledictionem & mortem denuncias. Nec præceptum hoc tuum supra me est, neque procùl positum, vt possim dicere; Quis opere compleat illud? sed iuxta me est, imò in me, cum ipsa naturæ lex animæ meæ insculpta, ad hoc ipsum me incitet, atque inuitet.

Te igitur, ô benignissime Pater, ex quo omnis paternitas in cælo & in terra est, oro, aufer à me omnem rebellionem & contentionem: ne cuncta hæc diuini & humani iuris vincula perrumpere, & infringere audeam: sed parentes meos omni officiorum genere persequar, honore atque reuerētia debita illos colam, humili & prompta obedientia illorum præceptis obtemperem, subuentioneque, obsequio, & ministerio meo illis succurram: eorū obiurgationes, austeritatem, inconditos clamores, vel errata æquo animo feram: nec mœrore aut sollicitudine illos per totum vitæ meæ curriculum

lum

lum afficiam. Si quando per ætatem defecerint sensu & vigore iudicij rationalis, ne eos ludibrio habeam: senectutem & imbecillitatem eorum debita modestia tolerem. eos denique si egeant aut ægrotent ope & opibus meis aliam ac sustineam, ne culpa & avaritia mea his pereat vita, à quibus, & per quos ego vitæ exordium accepi: sed tanquam Dominis in omnibus seruiam his, qui me genuerunt. Domine remitte mihi peccata mea, quibus parentes meos charissimos vnquam offendi. Auge multitudinem dierum, & conserua illos in omni mentis & corporis sanitate, videant filios suos tanquam nouellas oliuarum, in circuitu mensæ suæ: educant illos in omni pietate: præsent familiæ suæ sermonibus & exemplis sanctis, vt tandem immaculati ad te perueniant, vbi viuiscum Filio & Spiritu sancto Deus, per omnia secula seculorum. Amen.

Oratio Præceptoris.

OMnipotens æterne Deus, in cuius ordinatione cuncta sunt posita, largire mihi Spiritum tuum sanctum, sine quo nihil discere aut docere possum; vt Inuentutem mihi commissam sedulò institutam, & ad bonos mores, pietatemque colendam, non minùs quàm ad literas impigrè, & ad tui nominis gloriam formem, vt in ciues bonos, & Ecclesiæ tuæ vtilis aliquando euadant. Da illis cor

Eccli 3.

Psal. 127.

Petrus Michaelis in Sertis suis.

docile & intelligens, vt quæ docturus sum faciliè percipiant, & retineant, mihiq̃ue in omnibus, quæ officium meum postulat, morem gerant: seque duci & formari humili & sequenti animo patientur: vt eorum senectus qui adolescentiam suam honestis artibus instruxerūt, ætate euadat doctior, & veterum studiorum iucundissimos fructus metat, alijsq̃ue communicet.

Oratio Professoris alicuius Facultatis.

D. Thomas Aquinas.

Creator ineffabilis Deus, qui de thesauris sapientiæ tuæ nouem ordines Angelorum informasti, & eos miro ordine super cælum Empyreum collocasti, elegatissimè partes vniuersi disposuisti, tu, inquam, qui verus fons luminis & sapientiæ diceris, atque supereminens principium, infundere digneris super intellectus mei tenebras tuæ radii claritatis, duplicem, in qua natus sum, remoueas priuationem, peccatum & ignorantiam. Qui linguas infantium facis disertas, linguam meam erudias, atque in labijs meis gratiam tuæ benedictionis infundas. Da mihi intelligendi acumen, retinendi capacitatem, interpretandi subtilitatem, addiscendi facultatem, loquendi gratiam copiosam: gressus instruas, processum dirigas, & egressum compleas. Qui cum Patre & Spiritu sancto viuis & regnas Deus per omnia secula seculorum. Amen.

Oratio

Oratio litteris operam danti.

Sapientissime Pater, & omnipotentissime Deus, fons & dator omnium sapientiae & intelligentiae, sine quo omnia nostra studia successu carent, qui per Spiritum sanctum tuum ex pastorebus ouium Prophetas populi, & ex piscatoribus Apostolos mundi totius Doctores effecisti, infunde mihi per meritum Christi filij tui eiusdem Spiritus sancti gratiam, qua intellectus meus liberalibus disciplinis melius illustretur, quas in diuinum honorem tuum aliquando, & spiritalem Ecclesiae tuae utilitatem possim conuertere. Da ut bonas litteras & linguas necessarias fideliter addiscam, & tenaci memoria retineam, & in usum vitae melioris conferam: ut ad tuae sanctissimae pueritiae exemplum indies proficiam aetate, sapientia, & gratia apud Deum & homines. Largire docilitatem, & ingenij subtilitatem, ut discenda facilius comprehendam, & ex ijs sublimiora eliciam: alacritatem quoque in studijs, ne mens assiduo labore fatigetur, & quodam fastidio capta, à litteris abhorreat. Tempus inutiliter ne perdam, nec iuueniles annos studijs aptissimos in otio transigam, ne parentum sumptus in me male collocati, eorum in me odium pariant, & ego amicorum meorum spem & expectationem turpiter eludam.

*Collector.**Amos 1.*

Tribue denique mihi Domine cor obediendi præceptoribus meis, vt in ijs colendis nullum pietatis, studij, officij & obseruantix genus prætermittam : sed præcepta eorum suscipiam, & admonitionibus locum relinquam, vt pietate, doctrina & obedientia ornatus, ad clariorem tui agnitionem, perfectumque tuæ bonitatis amorem, & gloriæ tuæ meritum tandem perueniam. Amen.

Oratio Adolescentis seu Iuuenis.

Ex ma-
nuscripto
Belgico.

CVM nunc in feruore carnis, periculofissimoque ætatis meæ cursu viuam, ô Pater cælestis, oro te, misericordia & paterna tua prouidentia non recedant à me, sed maiori me sollicitudine conseruent: ne fortè præda fiam inimicis meis, qui vt lupi famelici in hoc toti sunt, vt me in hac iuuenili ætate sic peccatis onerent, ne vnquam ex ijs postea emergam.

Psal. 24.

Sed, ô pie Pater, diffidens de viribus meis, totum me in tuam protectionem confero, vt me nunc & semper custodias, ne in eam peccandi consuetudinem incidam, vt necesse sit in senectute mea (nisi prius in peccatis præfocatus fuero) iuuentutis meæ crimina defflere, & cum Propheta dicere, Delicta iuuentutis meæ ne memineris Domine: sed potius, vt ab hac hora sic virtutibus assuescam, vt quotidie magis magisque in ijs proficiam, trāquilla & pura tibi con-

scien-

scientia deferuiens: vt in senio cum humili gratiarum actione dicam illud Regis Ezechiae; Obsecro Domine, memento quaeso quomodo ambulauerim coram te in veritate & in corde perfecto, & quod bonum est in oculis tuis fecerim.

Esa. 38.

Dilectissime Pater, tu verè omnium hominum pater es, tibi cura est de omnibus, tibi commendo animam meam instar pueri, qui ex se nihil potest: defende me ab omnibus inimicis meis, qui mihi malè volunt, & mala machinantur, in his, quæ ad corpus vel animam meam pertinent: quique me seducere student, & quæ impia sunt, docere. Ante omnia commendo tibi hodie castitatem corporis mei, vt ea non tantum immunis sit ab omni violentia, vel illicito consensu, sed vt & ego eam nec per impuram cogitationem, nec per obscœnam locutionem pollutam. Thesaurus pretiosior est, quàm vt ego eum custodire valeam: obsecro igitur, vt qui amator puritatis es, etiam & meæ sis conseruator. Ne iuuenile corpus hoc in omni concupiscentia, infrenique desiderio excrescat, aut sensus mei illicito capiatur amore, vt te negligam: sed liberi maneant ab omni amore externo, donec me ad castum matrimonium, aut alium statum vocaueris.

Tribue Domine, vt parentibus, & ijs quorum tutelæ traditus sum, nunc in

omni obedientia & humilitate seruiam, & da mihi gratiam, vt si me ad coniugij vinculum voceris, talis mihi persona cedat, qua cum tibi in pace & sanctitate deferuire, & statum istum in honestate & fœcunditate queam possidere. si inquam me huc vocaueris, & hæc voluntas tua sit, cui me, omniaque mea commendo, vt de me, & in me disponas, quod tibi beneplacitum, & mihi salutare sit. Amen.

Oratio Militis in bello iusto.

Collector.

Iustissime Deus, qui propter peccata hominum excitas bella, & inducis super populum tuum gladium, ultorem fœderis tui: ecce hostes & tui & Principis nostri irruunt super nos, terram nostram crudeliter vastant, populantur agros, incendunt pagos, euertunt oppida, parentes, coniuges, liberosque nostros dulcissimos occidunt, vel in contumeliosam seruitutem abstrahunt; profanant & diripiunt templa, monasteriaque tua: ab ipsis aris & adytis sacras virgines ad incesta stupra abripiunt, & respersa sunt sanguine innocentium hominum & sacerdotum tuorum diuina Christi tui mysteria. Nec cupiditati & crudelitati suæ modum ponent, priusquam nos sedibus nostris omnino propulerint, aut sanguinem nostrum prorsus exorbuerint, nomenque nostrum deleuerint.

Non

Non illi à nobis, sed nos ab illis primum laceffiti, atque ad bellum sumus prouocati. Et nunc Domine armis accincti, & ad iustissimum hoc bellum à famulo tuo, Principe nostro euocati, en adsumus. Tu scis Domine, quòd nec amore prædæ, nec dominandi cupiditate, nec propriam iniuriam vindicandi libidine, nec denique alia re quapiam iniusta prouocatus in hanc militiam veni : sed ab ordinaria potestate mea vocatus, vt pro lege, pro rege, pro aris & pro focus dimicem, violatores mandatorum tuorum, perturbatoresque nostræ Reipub. in ordinem redigam, atque ad pacem & tranquillitatem adigam.

Respice igitur, ô fortitudo mea, de excelso sanctuario tuo, & qui olim pro Israelitis, etiam tacentibus, contra Ægyptios pugnasti, adesto mihi famulo tuo, brachium meum corrobora ; vt viriliter agam, & victoriam de hoste hoc immanissimo referam. Confundatur ille, & non confundar ego : cadat ille, & non cadam ego, à subitanea & improuisa morte me defende : conserva me in die belli, ne quando præualeat inimicus meus aduersus me. Centurionem ad te venientem non repulisti, fidem eius laudasti, militiam vt desereret non imperasti ; & me precantem te exaudi Domine, dignum me fac vocatione mea, ne gladio iustitiæ abutar, &

potestas à te ordinata ad defensionem bonorum, & vindictam malorum, per me malè audiat, & blasphemetur. Neminem concutiam, nemini calumniam faciam : prædas & spolia ab innocentibus non auferam ; nullius, qui in partem belli non venit, aut propter quem arma hæc sumpta non sunt, ager à me demetatur, vinea destruat, pecus abigatur : sed stipendio meo, mihi publicè decreto, contentus sim, & du-cibus meis in omnibus, quæ contra præceptum tuum non sunt, obtemperem, & morem geram.

Indue me præter externam hanc panopliam etiam lorica m iustitiæ : da scutum fidei in dextera mea ; accinge me gladio spiritûs, & galeam salutis impone capiti meo, vt possim resistere inuisibilibus hostibus meis in die malo, & in omnibus perfectus stare. Prudenter agam in omnibus vijs meis ; & tu mecum esto. Cùm pugnandum est, infere pectori meo fortitudinem, aufer timorem, adauge vires, vt sim vir fortis, & præliet bella Domini. Extra pugnam tempera ardorem animi mei, ne sanguinem innoxium profundam. Conserua me ab omni raptu, incestu, aut illicito violentoq; concubitu. Viduas aut orphanos non opprimam, pauperibus iniuriam non inferam, ne quando vociferentur ad te, & furor tuus accendatur in me. Sed & hoc supplex oro,

ô man-

ô mansuetissime Domine, aufer à me omnem iurandi, peierandi & blasphemandi te consuetudinem: sanguis tuus, vulnera tua, nomen & Sacramenta tua apud me summa in veneratione sint: vt mundo corde, labijs circumcisis, & manibus ab omni iniustitia & innocenti sanguine liberis, sic in vocatione mea ambulem, vt post hanc militarem vitam, ad illam tandem triumphalem perueniam. Amen.

Oratio Famuli.

Benignissime Domine Saluator Iesu Christe, qui formam serui accepisti, cum filius Dei & Dominus esses vniuersorum, vt per obedientiam nostrorum omnium, sine personarum acceptione, salutem operareris in terra, ita vt neque apud te sit distinctio inter omnes tibi famulantes, siue liberi sint, siue serui: Obtestor, vt cum ad seruiendum alijs vocaueris, largiaris mihi cor humile & obsequens, quo de manu tuæ prouidentiae hanc conditionem accipiam, facile illis, quibus seruiendum mihi est, me submittam, meque, vt alijs seruiendo tibi non displiceam, in omnibus comparem: Nunquam contra te aut Superiores meos murmurem, aut conditioni aliorum meliori inuideam: In omnibus quæ obedientiæ, quam tibi debeo, non obstant, morem geram in omni timore & simplicitate cordis, non ad

Petrus Michaelis in Sertis.

Colos. 3.

oculum seruiendo, vt hominibus placeam, sed ex toto corde meo, idque propter mandatum tuum, quo obstrictus tibi tencor.

Colos. 3.

Da ergo, vt diligenter, fideliter, intelligenterque Superioribus meis seruiens, illorum iram declinem, atque nullum in sancto tuo obsequio detrimentum capiam: tum eam, quam mihi per passionem & mortem tuam comparasti, libertatem spiritualem, contra seruitutem Peccati, Dæmonis, Mortis, & Inferni, sedulo conseruem; vt tandem aliquando ad cælestem hæreditatem mihi in cælis promissam perueniam. Amen.

Oratio Ægroti.

Collector.

Benedictus sis Deus Pater Domini mei, quòd me (qui ob fiduciam, quam in sanitate mea habebam, ad omne malum præceps ruebam, haud aliter, quam si vires meæ in eodem semper vigore permansissent, nec vllis morbis debilitari potuissent) nunc tam paternè visitas, per corporalem hanc ægritudinem me meæ admonens mortalitatis, & ad pœnitentiam reuocans. Fateor Domine, perire potuissem, imò periissem, nisi per morbum hunc oculos meos aperuisses, meque præsentis periculi admonuisses.

Cur igitur impatiens ero, licet dolores magni sint, & caro infirma releuari cupiat; cum certò sciam, hanc virgam

mihi

mihi esse perquam necessariam, quæ etsi ego iustissimus essem omnium mortalium, nunquam tamen mihi esse potest inutilis? Concede mihi Domine fortitudinem & patientiam, ne magnitudine dolorum victus, vnquam aliter credam aut sentiam. Si ægritudo hæc non sit ad mortem, fer mihi opem super lecto doloris mei, vniuersum stratum infirmitatis meæ verte mihi in lætitiā, & pro bona voluntate tua fac mecum vt membris meis sanitas restituatur, vt commodius tibi seruiam, & secundum vocationem meam sine querela viuam, ita tamen, ne in posterum mea fretus incolumitate & robore liberius te iterum offendam. Nihilominus ô cælestis Pater, tua voluntas in me fiat: tu enim solus nosti, quid mihi expediat: tantum da gratiam, vt tuæ me voluntati totum submittam.

Quod si autem animulam hanc ex huius corpusculi domicilio, adeoque ex hoc seculo demigrare placeat, ô cælestis Pater, nolo esse obstreperus. Cur enim in profundo procellosi huius maris, in mille naufragij periculis constitutus, metuum prosperum ventum, qui me in optatissimum portum potest adducere, vbi nullus dolor est amplius? Saltem, ô Pater, opus manuum tuarum ne despicias: sed animam meam aduersus omnes tentationes tua gratia corrobora, contraque omnes assultus Satanæ cinge

me

me scuto tuæ misericordiæ, qua olim martyres tuos aduersus horrendos cruciatus & mortes crudelissimas inuictos reddidisti.

Nihil habeo meritorum aut bonorum operum, quod allegem apud te: malorum heu nimis multum video; sed per tuam iustitiam confido me in numero iustorum censendum, quia vni-
geniti tui filij morte me redemisti, & sanguine illius lauisti.

Propter peccata quidem mea inducias & prorogationem peterem, si fortè post hac (vt spero) meliorem vitam ducerem: sed quis huius rei me certum & securum faciet, cùm infirmitas & vanitas mea tam magna sit, nisi tu Deus adiuues me? Sine tuo auxilio nec viuere possum, nec mori. Quicquid igitur de me statuas, ne me ope saltem tua destituas, oro Domine Deus veritatis, qui viuus & regnas cum Filio & Spiritu sancto, vnus Deus in omni æternitate. Amen.

Oratio Morituri.

August. ex
libro 1 de
Visitat. in-
firmorū.

DEus meus, Deus meus, misericordia mea, refugium meum desidero te, & ad te confugio, ad te venire festino, ne despicias me in tremendo discrimine positum. Adesto mihi propitius in his magnis meis necessitatibus. Non possum me redimere meis operationibus, sed tu redime me, & miserere mei.

Diffi-

Diffido de meis meritis, sed confido de tuis miserationibus, & plus confido de tuis miserationibus, quàm diffido de malis meis actibus. Tu es spes mea, Deus meus, tibi soli peccaui, mea culpa. Qui fui tibi tam charus ad redimendum, non sim vilis ad perdendum; & nunc ad te venio, qui nulli dees, cupio dissolui, & tecum esse. In manus tuas commendo spiritum meum, Domine; Respice in me Deus veritatis, & præsta mihi Deus meus, vt in pace dormiam & requiescam. Qui in Trinitate perfecta viuus & regnas Deus, per omnia secula seculorum. Amen.

CAPVT XVIII.

ORATIONES ET INTERCESSIONES PRO Defunctis.

ADMONITIO.

GRAVE & laboriosum est disferri spem, & quod valde cupias, non assequi. Proinde Christianorum animis eorum, qui cum fide obdormierunt, adhuc in Purgatorio detentis asperissimum est, spem suam prolatari, & arceri ab eo bono, quod ipsi supra quàm credi possit desiderant. Ideoq; cupiunt & implorant opem omnium, quotquot possunt. Aduuemus

Ex Ludouico Viue.

itaque

itaque nos eos, quando alia re nequimus, certè votis, faustis ominationibus, & p̃ys orationibus nostris.

ORATIONES ALIQVOT

generales pro omnibus de
functis. 1.

S. Iacobus
frater Dñi
in sua Li-
turgia.

MEmento, Domine Deus noster, spirituum & vniuersæ carnis Orthodoxorum, & rectè de fide sentientium, ab Abel iusto, vsque in hodiernū diem: fac eos requiescere in regione viuentium, in regno tuo, & delicijs Paradisi, in sinu Abrahamæ, Isaac & Iacob sanctorum patrum nostrorum, vnde exulat dolor, tristitia, & gemitus, vbi præsidet lumen vultus tui, & perpetuò refulget, per benignitatem vnigeniti filij tui, cum quo benedictus es cum sancto, bono, & viuificatore Spiritu tuo, nunc & semper. Amen.

II.

Ex Liturgia B. Basilij.

MEmento Domine Patrū, fratrumque nostrorum, qui obierunt in vera fide; Presbyterorum, Diaconorum, Hypodiaconorum, Lectorum, Cœnobarum, in cœlibatu perpetuò viuētium; laicorum & omnium qui decesserunt de hoc ærumnoso mundo: recrea eos in tabernaculo tuo omnis decoris pleno. Traice eos trans mansiones cruciatu horrendas, atque in tabernaculis luculentissimis ipsos colloca. Erue eos ex tenebris

nebris & caligine, atque ex tribulatione, doloreque eripe : appareatque ipsis vultus tuus pacificus, neque intres cum ipsis in iudicium, aut acrem questionem habeas de acta vita : sed siue verbo, siue opere peccauerunt, utpote homines carne induti, remitte, & abole errores eorum. Quia benignus & summè misericors es, tibi que congruit laus, & honor, & potestas: simulque vnigenito filio tuo, & sanctissimo tuo Spiritui bono, adorando, vitam largienti, ac tibi in substantia æquali, nunc, & semper, & in secula seculorum. Amen.

III *Alia.*

Memento, Domine, dormientium Principum, Pontificum, Regum, Patriarcharum, Archiepiscoporum, Episcoporum, Sacerdotum, Diaconorum, & Ministrorum tuorum, & omnium in recta fide quiescentium. Miserere animarum seruorum & ancillarum tuarum, qui manducauerunt carnem tuam, & biberunt sanguinem tuum : colloca animas eorum in sinu Abrahæ, Isaac & Iacob.

*Ex Missa
Æthiopu.*

Et si enim animæ quorundam illorum in tenebris sedeant, & in loco tormentorum ; incredibili tamen tui flagrant desiderio, & multis suspirijs tuam gratiam præstolantur. Memento quam abundè filius tuus Iesus Christus pro illis satisfecit. noli, Domine, noli

*Generalis
additio.*

ampli-

ampliùs vllum exposcere debitum, vbi tam copiosa reperitur satisfactio. An paternum illud pectus tuum adhuc de inobedientia, luxuria, gula, superbia, ira, & similibus poterit cum illis exposulare, vbi frater noster Christus, vnigenitus tuus tantam obedientiam, castitatem, abstinentiam, humilitatem, charitatem, & similia exhibuit: non pro semetipso, sed pro nobis, & pro ijs, qui adhuc in pœnis Purgatorij detinentur? qui etsi dum viuerent ingrati fuerint, per eum tamen omnia à te expectant?

Libera eos, Domine, quorum nunc ora clausa sunt, & qui te tam auidè laudare & glorificare desiderarent; nec diutius in perditione mancant, quos filius tuus triginta tribus annis in deserto huius mundi, tantis tormentis & cruciatibus quæsiuit, & inuenit. Meretur, ô pie Pater, meretur optimus Pastor, vt ouibus suis bene sit propter illum, & vt perducas eò, vbi ille tecum viuit & regnat Deus, in secula seculorum. Amen.

IIII *Alia.*

Ludouic.
Viues.

A Micissime ac benignissime Christe, qui ades tibi fidentibus, & illos ab omni eximis periculo, cuius miserationes & infinita bonitas vniuersa hominum scelera exuperat, quæ omnia, si quis in clementiam tuam conijciat, velut igne validissimo consumentur: Animos

mos

mos fratrum nostrorum corpore solutos maculis deterge, quæ illis ex vitæ huius actionibus adhæserunt : Frigus eorum quod illos à te arcet, ac separat, sanctissimo charitatis tuæ igne dispelle : vre, atque incende illos flammis tuis, vt emundati ac perpurgati celerimè ad te reuolent, tecumque ad sempiternam beatitudinem vniantur. Amen.

V *Alia.*

OMnipotens sempiterne Deus, Deus vitæ & mortis, Iudexque viuorum & mortuorum, qui pro tua bonitate & sapientia constituisti inter fideles tuos omnes communionem, non gratiæ à te duntaxat comparatæ, & vbertim communicatæ, verum etiam mutux intercessionis, auxilij & solatij : Oro te per amarissimam passionem & mortem, descensionem quoque ad inferos, & resurrectionem à mortuis, vt nostras, qui adhuc vitam mortalem ducimus, preces & supplicationes apud thronum gratiæ tuæ admittere digneris, pro animabus parentum, consanguineorum, & amicorum nostrorum, atque omnium Christi fidelium tuorum, vt qui ex illis adhuc carcere Purgatorij, & supplicij non sempiternis detinentur, consolationem & remissionem peccatorum à tua clementia consequantur, à grauissimis tormentis ere-

Petrus Michael in Seris suis.

pti, ad cælestis regni requiem & gaudium citius deducantur. Amen.

Pro vno defuncto.

Ex Belgico manu-
scripto.

EX mera fraterna, Christianaque charitate, ô æterne Deus, commendo tibi animam N. quam tu ex hoc ærumnoso euocasti seculo : te suppliciter orans, vt eam non secus suscipias, quàm olim suscepisti animam mendici tui Lazari. Ne memineris, Domine, quòd dum viueret te offendit : nam præterquam quòd istius eum pœnituit, etiam in infinita misericordia tua semper sperauit ; & in nunquam exhauriendo meritorem Filij tui thesauro semper eius fiducia fuit collocata, qui sufficiens est non tantum pro huius miseri, sed pro totius mundi peccatis satisfacere.

Domine, opus manuum tuarum non sit in derisum, & in similitudinem improperij hostibus tuis, qui inuident ipsi gloriam, antequam crearetur à te illi præparatam ; quam vt consequeretur, & locum vnde maligni illi eiectioni sunt possideret, toties eum à periculis & animæ & corporis liberaisti. Tu scis, Domine, quòd antiqui serpentes illi auctores & impulsores fuere, qui fragilem eius carnem peccare fecerunt : ne igitur, Domine, ab impostoribus illis hæreditas tua tibi subtrahatur, cum vno verbo destruere poteris, quod illi tanto tempore, & tam varijs consilijs construxerunt ; &

hanc

hanc animam tam puram, sanctam & nobilem vel vno momento efficere, vt digna sit vocari & esse hæreditas Altissimi.

Ostende illi, ô æterne Deus, extremam pietatem tuam, intima tuæ misericordiæ viscera, pectusque paternum tuum, quod toties dum vixit in hoc seculo illi exhibuisti, in conferendis plurimis gratijs, quibus illam exornaues. Non tam ingrata fuit, quin te omnis virtutis fontem & largitorem agnouerit: non tam cæca, quin à te petierit illuminari: non ita in peccatis sepulta, quin semper voluerit se emendare: nō vsque eò potestati Dæmonis permissa, quin semper de paterna tua charitate spe plena expectauerit, fore, vt in extrema necessitate illi opitulareris, & in gratiam tuam reciperes.

Omnipotentissime Deus, id omnino credimus, quòd nullo nomine aut gratiori tibi, aut iucundiori nobis te indigitare possumus, quàm si te misericordem Patrem appellemus: ostende igitur, ô misericordissime Pater, gratiam & misericordiam tuam, erga hunc puerum tuum, quem creasti, quem redemisti, quem tot seculis ante orbem conditum in corde tuo gestasti: qui tibi tantæ curæ fuit, vt volens redimere, laueris cum in lauacro pretiosissimi filij tui sanguinis, eiusque carne & sanguine nutriueris: pro quo nihil facere

inter-

intermisisti aliud, quàm quod aut tibi impossibile erat, aut illi non necessarium. Quare, ô Domine, te iterum atque iterum obtestor & oro, tribue nobis, vt cùm & ego aliquando viam vniuersæ carnis ingressus fuero, hunc, pro quo deprecor, inueniam inter Sanctos tuos, vt vnanimiter te laudemus & glorificemus, quia tibi debetur laus & gloria in secula seculorum. Amen.

Pro recens defuncto, vel inter sepeliendum corpus dicenda.

Felician?
Ningnard
da in Ma
nuali Pa
rochorū.

Adesto Domine supplicationibus nostris, & pias aures tuas ad preces nostras inclinare digneris, vt nos de throno Maieſtatis tuæ clementer exaudias, & orationes famulatûs nostri dignanter admittas. Te igitur inuocamus Domine sancte, Pater omnipotens, eterne Deus, pro anima famuli tui, quam hodierna die de hac luce vocare dignatus es, vt iubeas, Domine, ei præparari Paradisi tui loca virentia, vt non eam exurat flamma ignis crudelis gehennæ. Quia propterea Dominus noster Iesus Christus filius tuus in ligno crucis sub Pontio Pilato pati dignatus est, vt animas quæ per Adæ transgressionem perierant, sua sancta resurrectione ab inferni claustris liberaret. Confundantur gehennæ ianitores, & ministri nequitiae erubescant. Deducant eam Angelicæ potestates in sinus Patriarcharum Abraham,

ham, Isaac & Iacob patrum nostrorum. Consequatur à tua potentia paratam electis iucunditatem, & à dextris hæreditatem adepta lætetur: vt cum dies illa tremendæ agnitionis aduenerit, vnà cum Sanctis & Electis tuis, qui tibi placuerunt, in gloria Maiestatis tuæ resurgere mereatur ad indulgentiam, non ad pœnam. Et animam illam quam fontis vnda perfudit, & chrisma salutis inunxit, non finas Domine flammæ ardoribus cruciari, nec peccatorum vinculis alligari: sed liberam redde Paradiso tuo per indulgentiam pietatis tuæ: quia tuam clementiam dum in hoc seculo constitit non negauit. Per eundem Christum Dominum nostrum. Amen.

Pro parentibus nostris defunctis.

DEus qui nos patrem & matrem honorare præcepisti, miserere clementer animabus patris ac matris meæ, eorumque peccata dimitte, meque eos in æternæ claritatis gaudijs fac videre. Per Dominum nostrum &c.

Ecclesia
Romana.

*Pro ijs qui dum viuerent in nostra
re congregatione vel fraternitate.*

DEus veniæ largitor & humanæ salutis amator, quæsumus immensam clementiam tuam, vt nostræ congregationis fratres & sorores, qui ex hoc seculo transierunt; beata Maria

Ex Missa-
li Colo-
nienſiũ.

semper Virgine cum omnibus Sanctis intercedente; ad perpetuæ beatitudinis consortium peruenire concedas. Per Christum Dominum nostrum. Amen.

Pro animabus ijs que singulares non habent intercessores.

ibidem.

Miserere misericors Deus animabus illis, quæ singulares non habent apud te intercessores, quibus nulla est consolatio in tormentis, neque spes ulla, nisi quòd factæ sunt ad imaginem & similitudinem tuam. Parce & defende plasmata tuum nobile, gloriam nominis tui ne des alteri, opus manuum tuarum respice in eis, & libera eas ab omnibus intolerabilibus pœnis & cruciatibus, & perduceas ad societatem ciuium superiorum. Per Dominum nostrum Iesum Christum filium tuum, Qui tecum

viuit & regnat Deus per omnia
secula seculorum.

Amen.

F I N I S.

INDEX TOTIVS LIBELLI.

Prefatio in Orationem Dominicam. pag. 1.
Expositio Orationis Dominicæ in septem Meditationes distributa. pag. 3.

Meditatio prima. ibidem.

Meditatio secunda. 18.

Meditatio tertia. 22.

Meditatio quarta. 26.

Meditatio quinta. 30.

Meditatio sexta. 34.

Meditatio septima. 39.

CAP VT 1, *contimens Orationes quotidianas certis horis diei & noctis ferè adaptatas.* 47.

Admonitio matutina. ibidem.

Cùm expergiscimur. 49.

Cùm surgimus & induimur. 50.

Meditatio. 52.

Gratiarum actio, seu oratio matutina. 53.

Oratio deuotissima manè dicenda, in qua commemorat homo præcipua Dei beneficia, vt cognoscat ex ijs, quid Deo debeat: deinde gratias Deo pro illis agit, illi se offert, nouaque beneficia petit. 56.

Oratio qua præsidium Angelorum à Deo petimus. 63.

Ad Angelum custodem. 65.

Commendatio matutina, qua nos omnes Christi fideles Deo commendamus. 66.

Ad omnes Sanctos. 67.

Antequam domo egrediaris admonitio. 68.

Oratio domo exeuntis. 69. Alia. 70.

Ingredientis aliquod iter. 71.

Admonitio. 72.

Oratio ante concionem. 73.

Oratio post concionem. 76.

Cùm aliquod opus aggredimur. 77.

Regulæ quædam prudentiæ in rerum agendarum de-

- liberationibus obseruanda. 79.
 Gratiarum actio opere iam perfecto. 80.
 Cum opus aliquod nostrum bonum Deo volumus offerre. 82.
 Cum nos ad studium paramus. 83.
 Cum horæ signum auditur. 85.
 Oratio antequam cibum sumamus. 85.
 Præcepta inter edendum seruanda. 87.
 Oratio post sumptum cibum. 88.
 Aliæ orationes ante & post cibum. 89. 90.
 Eleuatio mentis post Solis occasum. 90.
 Ad preces vespertinas admonitio. 92.
 Confessio vespertina. 94.
 Admonitio vespertina. 95.
 Gratiarum actio vespertina. 96.
 Oratio nocturna, qua Deo nos commendamus. 98.
 Alia oratio ante somnum. 100.
 Admonitio nocturna. 101.
 Orationes iaculatoriæ semper in pröptu habenda. 102.

CAPVT II, *continens orationes Liturgicas, quæ sub sacrificio Missæ legendæ sunt.* 108.

- Q**uanta cum reuerentia in templo versari debeamus. 108.
 Meditatio qua mentem ad deuotionem & reuerentiam erga tremendū Missæ sacrificiū præparamus. 100.
 Generalis ante Missam confessio. 114.
 Ad Introitum. 115. Ad Kyrieleyson, & Hymnum Angelicum. 116. Et sic deinceps ad singulas Missæ partes, vsque ad folium 146.

CAPVT III, *continens orationes pœnitentium, pro impetranda remissione peccatorum.* 146.

- P**ræfatio. ibidem.
 Pro Contritione. Orationes tres ad excitandam in anima contritionem, & dolorem peccatorum. Oratio I. 149. Oratio II. 152. Oratio III. 155.

Post contritionem oratio, qua mens ad spem diuinam erigitur. 167.

Pro Confessione. Oratio ad Iesum ante Confessionem sacramentalem. 169.

Consilium tempore Confessionis. 173.

Gratiarum actio post Confessionem. 174.

Oratio præcedenti gratiarum actioni subiicienda. 176.

Pro Satisfactione. Doctrina catholica de Satisfactione. 178.

Orationes satisfactoriæ, quibus remissionem peccatorum à Deo petimus. 181.

Oblatio omnium laborum atque pœnarum Christi pro peccatis nostris. ibidem.

Oratio qua peccatoris anima, Deo reconciliata, ei se commendat. 185.

Alia, qua petitur remissio peccatorum. 186.

Alia deuotissima pro peccatorum remissione. 190.

CAPVT IIII, continens orationes resipiscentium, quibus Deo pro nouitate vitæ supplicamus. 193.

P Ræfatio. ibidem.

Oratio, seu oblatio pia, qua se homo offert Deo, petens vt expulsis vitiorum tyrannis, Deus posthac in anima sua regnet, ibique agat, quæ ad nouitatem vitæ pertinent. 195.

Oratio secunda, qua petit anima omnia ad vitæ nouitatem necessaria. 199.

Tertia resipiscentis oratio. 203.

Quarta resipiscentis oratio, qua petitur sensuum & potentiarum animi reformatio. 209.

Quinta oratio resipiscentis, pro emendatione vitæ. 211.

Sexta oratio resipiscentis ad vitæ nouitatem impetrandam. 212.

Septima oratio resipiscentis, ex Psalmis cõpilata. 215.

CAPVT V, continens orationes ante & post Communionem vsurpandas. 218.

Prefatio, docens quomodo quis dignè communi-
cabit. 218.

Meditatio deuotissima, & ante communionem utilis-
sima, qua anima ad timorem & amorē excitatur. 223.

Oratio ante Communionem. 235.

Alia ante Communionem. 239.

Oratio ante Communionem tertia. 240. quarta. 243.
quinta. 245.

Admonitio sub Communionem. 247.

Excitatio mentis ad deuotionem tempore Communi-
onis. 249.

Oratio sub ipsam Communionem. 250.

Cum salutare hostiam vides in manu Sacerdotis. 251.

Eucharistiam ore excipientis oratio. ibid.

Admonitio post Communionem. 252.

Meditatio insignis post Communionem. 253.

Alia meditatio. 247.

Tertia meditatio post Communionem. 267.

Orationes post Communionem quatuor. Prima. 274.

Secunda. ibidem. Tertia. 275. Quarta. 277.

**CAPVT VI, continens orationes quibus Sacerdotes
ante & post Missarum solennia vti possunt. 280.**

Prefatio, seu admonitio ad Sacerdotes. ibidem.

Oratio ante sacrificiū Missæ, qua Sacerdos suam in-
dignitatem confitetur. 282.

Oratio Sacerdotis pro suis peccatis, qua B. Basili-
us vti solet. 283.

Oratio ante Missam, in qua Sacerdos intentionem su-
am Deo explicat, peccata confitetur, veniamque si-
bi, & gratiam proximis petit. 284.

Alia oratio ante Missam. 289. Alia. 290.

Orationes cum Sacerdos induitur, & se præparat. 290.

Cum lauat manus. 291. Ad amictum. ibid. Ad albam.
ibidem. Ad cingulum. ibid. Ad manipulum. Ad
stolam. ibidem.

Præparans calicem. 292. Infundens vinum. ibidem.

Ad

Ad Casulam. ibidem.

Orationes Sacerdotis post Missā quatuor. Prima. 293.
Secunda. 294. Tertia. 295. Quarta. ibidem.

CAPVT VII, *quo continentur orationes pro impetrando amore Dei.* 297.

PRologus. ibidem.

Oratio pro amore Dei impetrando Prima. 300.
Secunda 302. Tertia. 305. Quarta. 310. Quinta. 315. Sexta. 321. Septima. 325.

CAPVT VIII, *varias ad sanctissimam Trinitatem orationes continens.* 332.

DE S. Triade fidei confessio. ibidem.

Prima oratio ad sanctiss. Trinitatem, de magnitudine Maiestatis eius. 334.

Secunda oratio ad S. Trinitatem, de eadem magnitudine diuinæ Maiestatis. 339.

Oratio ad sanctissimam Trinitatem tertia. 344.

Orationes ad Patrem. Prima, qua iustificationem petimus. 347. Secunda ad Patrem oratio. 349. Tertia, vt propter filium nostri misereatur. 351.

Orationes ad Filium. Prima. 352. Secunda. 355. Tertia. 356.

Orationes ad Spiritum sanctum. Prima. 359. Secunda. 361. Tertia. 362.

CAPVT IX, *continens septem orationes, quibus vniversa vita, mors & resurrectio Saluatoris comprehenditur.* 364.

PRologus. ibidem.

Oratio de vita Iesu Prima. 366. Secunda. 370. Tertia. 374. Quarta. 377. Quinta. 382. Sexta. 386. Septima. 390.

Oratio de nomine Iesu. 392.

CAPVT X, *diuersas continens gratiarum actiones.* 394.

Prologus. 394.

Gratiarū actio p beneficio

Creationis. 396.

Conseruationis corporalis. 401.

Redemptionis. 406.

Vocationis & Iustificationis. 414.

Sacramentorum. 420.

Conseruationis spiritualis in gratia. 425.

Generalis gratiarum actio, ad Iesum filiū Mariæ. 429.

CAPVT XI, continens preces Catholicas & Christianas, ad sanctissimam Deiparam & Virginem Mariā, aliosq; celestis patriæ ciues. 434.

Rosarium B. Mariæ Virginis. 434.

Oratio ad Deiparam Virginem. 457.

Oratio ad quemuis Apostolum. 462.

Oratio ad quemuis Martyrem. 464.

Oratio ad quemuis Confessorem. 466.

Oratio ad quamuis Virginem Martyrem. 468.

Oratio ad quamuis Virginem non Martyrem. 471.

Oratio ad quamuis S. Viduam aut Coniugatam. 473.

CAPVT XII. Preces deprecatorie, quibus pro evitandis malis spiritualibus & internis diuinam opem imploramus. 475.

Quot tentationibus exposita sit vita nostra, & quam necessarium nobis sit diuinum auxilium. 475.

Contra quamlibet tentationem. 478.

Contra tentationes Diaboli. 480.

Contra tentationes mundi. 481.

Contra tentationes carnis. 483.

Deuicta tentatione. 484.

Contra conflictum vitiorum. 485.

Contra malas cogitationes. 486.

Contra varia peccatorum genera. 487.

Contra

- Contra avaritiam. 488.
 Contra superbiam. 488.
 Contra ebrietatem. 489.
 Contra iniuriarum recordationem. 489.
 Contra iram. 489.
 Contra inuidiam. 490.
 Contra mentis euagationem in precibus & deuotione. 491.
 Contra Sectas & schismata Religionis. 492.
 CAPVT XIII. *Precationes quibus Domino supplicamus, vt nos à diuersis malis corporalibus & externis liberet.* 493.
 I N quacunque tribulatione. 493.
 In angustijs & extremis periculis. 495.
 Tempore belli inter Christianos. 496.
 Tempore belli Turcici. 497.
 Tempore pestis. 500.
 Tempore famis & annonæ caritatis. 502.
 Contra tempestates aeris & tonitrua. 503.
 Tempore nimiae pluuiæ. 504.
 CAPVT XIII. *Precationes petitoria, quibus pro expetendis bonis spiritualibus Deum obsecramus.* 506.
 P R O diuina gratia impetranda. 506.
 Oratio pia qua à Deo iustificationē expetimus. 509.
 Pro fide firma & sincera. 511.
 Pro solida spe & fiducia. 512.
 Pro charitate erga Deum. 514.
 Pro charitate erga proximum. 514.
 Pro corde recto & pura intentione. 516.
 pro bono proposito. 517.
 Pro humilitate & suæ vilitatis cognitione. 520.
 Pro timore Dei. 523.
 Pro vera obedientia. 526.
 Pro mentis & corporis castitate. 528.

Pro salutari morte. 529.

CAPVT XV, continens orationes, quibus bona
temporalia à Deo expetimus. 531.

PRO pace impetranda. 531.

Vt vitæ nobis det Deus necessaria. 533.

Pro sanitate corporis. 534. Pro bona fama. 535.

In sumptione antidoti. 537.

In diminutione sanguinis. 537.

Tempore diuturnæ siccitatis. 538.

Pro frugibus terræ. 539.

CAPVT XVI. Precationes piæ quibus fratribus no-
stris & proximis fausta omnia, feliciaq;
precemur. 540.

PRO Ecclesia Catholica. 540.

Alia pro Ecclesia breuior. 543.

Pro Ecclesia, Cùm ab Hæreticis bello & falsis doctri-
nis exagitur. 544.

Pro omni Ecclesiæ statu. 548.

Pro summo Pontifice Romano. 550.

Pro Episcopo & Pastore. 552.

Pro Cæsare Romano. 553.

Pro Rege Catholico. 553.

Pro omni Magistraturâ Ecclesiastico quàm civili. 555.

Pro subditis omnibus Christianis. 556.

Pro parentibus & consanguineis. 557.

Pro fidelibus coniugibus. 557.

Pro muliere prægnante. 557.

Pro Christiana iuuentute, vt rectè instituatur. 558.

Pro amico. 559. Pro benefactoribus. 560.

Pro fratribus in calamitate positis. 561.

Pro Captiuis. 562. Pro Viduis & Orphanis. 563.

Pro inimicis & ijs qui nobis mala volunt. 563.

Pro iter agentibus. 564.

Pro peccatoribus. 565.

Pro Infidelibus, Schismaticis, & Hæreticis. 566.

Pro

Pro Ethnico ad fidem veniente, vel Hæretico ad Eccle-
siam reuertente. 567.
Pro vno & pluribus infirmis. 568.

CAPVT XVII, *continens orationes particu-
larium Personarum.* 569.

O Ratio Pastoris. 569.
Oratio Confessarij. 572.
Oratio in Magistratu constituti & Iudicis. 573.
Oratio cuiuscunque subditi. 575.
Oratio Consiliarij vel Senatoris. 576.
Oratio Coniugis. 576.
Oratio Patrisfamilias. 579.
Oratio Pueri seu Filij. 580.
Oratio Præceptoris. 581.
Oratio Professoris alicuius Facultatis. 582.
Oratio litteris operam dantis. 583.
Oratio Adolescentis seu Iuuenis. 584.
Oratio Militis in bello iusto. 586.
Oratio Famuli. 589.
Oratio Ægroti. 590. Oratio Morituri. 592.

CAPVT XVIII. *Orationes & intercessiones
pro Defunctis.* 593.

A Dmonitio. 593.
Orationes aliquot generales pro omnibus defun-
ctis. 594.
Pro vno defuncto. 598.
Pro recens defuncto, vel inter sepeliendum corpus di-
cenda. 600.
Pro parentibus defunctis. 601.
Pro ijs qui dum viuerent in nostra fuere congregatione
vel fraternitate. 601.
Pro animabus ijs quæ singulares non habent interces-
ses. 602.

Ex libro P. Hieronymi de
mensura et Anno ab
antiquitate Domini 1618

Adrianus Thengue

Salisgenst

XXIX. #6. 4

F

